

श्री

सागरासुधाचिन्तु



संपादक : संशोधकश्च

प्र. पन्त्यास श्री जिनेन्द्रविजयजी गणिवर

श्री हर्षपुष्पामृत जैन ग्रन्थमाला—ग्रन्थाङ्कः—५३

श्री महावीर जिनेन्द्राय नमः ।

तपोमूर्ति पूज्याचार्यदेवश्रीविजयकूर् रसूरिगुरुभ्योः नमः ।

हालारदेशोद्धारक—पूज्याचार्यदेवश्रीविजयामृतसूरिगुरुभ्यो नमः ।

पञ्चम-गणधर श्रीमत्सुधर्मस्वामि-निर्मितं

श्रीमदाचारंग-सूत्रम्

प्रथममङ्गलम् ।

(मूलम्)

ॐ

संपादकः संशोधकश्च

तपोमूर्ति—पूज्याचार्यदेवश्रीमद्विजयकूर् रसूरीश्वर-पट्टालङ्कार-हालारदेशोद्धारक-

कविरत्न-पूज्याचार्यदेवश्रीमद्विजयामृतसूरीश्वर—विनेयः

पण्यास--श्री-जिनेन्द्रविजय-गणी

ॐ

प्रकाशिका—

श्री हर्षपुष्पामृत जैन ग्रन्थमाला

लाखाबावल-शान्तिपुरी (सौराष्ट्र)

પ્રકાશિકા—શ્રી હર્ષપુષ્પામૃત જૈન ગ્રન્થમાલા
લાલાલાલ-શ્રાવણપુરી (સૌરાષ્ટ્ર) ગુજરાત

કોર નં. ૨૧૦૧]

વિકાસ સં. ૨૦૨૧

[સન્ ૧૯૭૪]

આ આગમના અધિકારી યોગવાહી ગુરુકુલવાસી
સુવિહિત સાધુ-સાધ્વી મહારાજો છે.

મૂલ્ય રૂ. ૧૦--૦૦



મુદ્રક:—

જ્ઞાનોદય પ્રિન્ટિંગ પ્રેસ
પિંજવાડા (રાજસ્થાન)
(વાવા-બિરોહી રોડ)

પ્રકાશકીય નિવેદન



અમારી ગ્રન્થમાલા તરફથી આ શ્રી આચારાંગ સૂત્ર મૂલ પ્રગટ કરતા આનંદ અનુભવી છીએ । વિ• સં ૨૦૨૨ માં ‘મણિસિદ્ધ મેઘ મનોહર સ્વાધ્યાય’ રૂપે ગુજરાતી ટાઇપમાં આ સૂત્ર અમે પ્રગટ કર્યું હતું । હાલમાં ૪૫ આગમ મૂલ અને કેટલાક આગમ ટીકા સહિત પ્રગટ કરવાનું કામ શરૂ કરતાં આ સૂત્ર નાગરી લિપિમાં મોટા ટાઇપમાં પ્રગટ કરેલ છે ।

આ ગ્રન્થનું સંશોધન સંપાદન હાલારદેશોદ્ધારક કવિરત્ન સ્વ. પૂ• આચાર્યદેવ શ્રીમદ્-વિજયઅમૃતસૂરીશ્વરજી મહારાજના શિષ્યરત્ન પૂ• પંન્યાસ શ્રી જિનેન્દ્રવિજયજી ગણિવરે ઘણી खंत થી કરેલ છે ।

કામઠ છપાઈ આદિના ભાવ વધવાને કારણે સર્ચ ધાર્યા કરતાં વધુ આવે છે । મોટા ટાઇપમાં મુદ્રિત કરતાં પેજ વધારે થાય છે । પરંતુ ટકવાની અને અભ્યાસની દૃષ્ટિએ અનુકૂળતા રહેશે ।

આગમ સૂત્રોના અધિકારી યોગવાહી ગુરુકુલવાસી સુવિહિત મુનિઓ છે । એ શાસ્ત્રવિષિ મુજબ પૂજ્ય શ્રમણસંઘમાં આગમ વાંચનાદિમાં અનુકૂળતા થાય તે રૂઢ આ શ્રુતભક્તિ કરતાં અમે આનંદ અનુભવી છીએ ।

શ્રી આચારાંગ સૂત્રાદિ મૂલ સૂત્રો પ્રગટ થઈ રહ્યાં છે । શ્રી સૂત્રકૃતાન્ગ સૂત્ર તૈયાર થઈ ગયું છે । શ્રીસ્થાનાન્ગસૂત્રનું મુદ્રણ કામ ચાલુ છે । એજ રીતે સટીક આગમોમાં શ્રીમદન્તકૃદશા, અને શ્રીમદન્તરોપપાતિકદશા તૈયાર થઈ ગયા છે અને શ્રીમદ્દુપાસકદશા સૂત્રનું મુદ્રણ કામ ચાલુ છે ।

બીર સંવત્ ૨૧૦૧
વિ• સં• ૨૦૩૧
માગશાર સુવ ૧૧



લિ:-

નેમચંદ બાગજી ગુદકા
નવીનચંદ્ર બાબુલાલ શાહ

* अनुक्रमः *

५

॥१॥ प्रथम ब्रह्मचर्यश्रुतस्कंधः

क्रम अध्ययन-	नाम	पृष्ठ	क्रम अध्ययन नाम	पृष्ठ
१	शस्त्रपरिज्ञा (उद्देशा-७)	१	६ घृत (उद्देशा-५)	२८
२	लोकविजय (उद्देशा-६)	६	७ महापरिज्ञा (व्युच्छिन्नम्)	
३	शीतोष्णीय (उद्देशा-४)	१६	८ विमोक्ष (उद्देशा-८)	३३
४	सम्यक्त्व (उद्देशा-४)	१९	९ उपधान श्रुत (उद्देशा-४)	४१
५	लोकसार (उद्देशा-६)	२३		

॥२॥ द्वितीयोऽग्र-श्रुतस्कंधः प्रथमाचूलिका-

१ (१०) पिण्डेक्षणा(उद्देशा-११)	४७	५ (१४) वस्त्रेक्षणा (उद्देशा-२)	९९
२ (११) शय्येक्षणा (उद्देशा-३)	७१	६ (१५) पात्रेक्षणा (उद्देशा-२)	१०५
३ (१२) ईर्या (उद्देशा-३)	८३	७ (१६) अवग्रह-प्रतिमा(उद्देशा-२)	१०८
४ (१३) भाषा जात(उद्देशा-२)	६३		

द्वितीया चूलिका

१ (१७) स्थान	११३	५ (२१) रूप	१२०
२ (१८) निषीचिका	११४	६ (२२) परक्रिया	१२१
३ (१९) उच्चार प्रश्रवणा	११४	७ (२३) अन्योन्यक्रिया	१२४
४ (२०) शब्द	११८		

तृतीया चूलिका

१ (२४) भावना	१२४
--------------	-----

चतुर्थी चूलिका

१ (२५) विमुक्ति	१३९
-----------------	-----

॥ शुद्धिपत्रकम् ॥

पृष्ठं	पंक्तिः	अशुद्धं	शुद्धं
३	११	समारंभंतो	समारंभंते
५	१३	कट्टनिस्सिया	कट्टनिस्सिया
१२	८	दढे	दढे
१६	१४	करुसयं	फरुसयं
२०	१	शुद्धे	सुद्धे
२४	१०	वेयं	एयं
३०	१५	आयणं	आयाणं
३४	१८	सवस्सिणोमि	समुस्सिणोमि
३५	२४	विणवन्ने	विणयन्ने
४०	१७	जिवीए	जीविए
४३	५	अप्पि	अप्पं
४६	९	पुण्णकम्मासं	पुराणकुम्मासं
५६	२	पयलमाले	पयलमाणे
६३	२४	पुक्खलं	पुक्खलं वा
६८	१७	अजाण्या	अजाणया
७५	१०	निरुवरूवे	विरुवरूवे
७५	१२	वियट्ठित्तए	वियट्ठित्तए
७९	२	निक्खत्तपुच्चा	निक्खित्तपुच्चा
७९	१३	अलिहणेज्ज	अभिहणेज्ज
८४	१०	वणिमागा	वणिमगा
८६	५	विक्खूवा	भिक्खू वा
८९	२	अणालाइए	अणासादए
१०२	१४	बहुदेसएण	बहुदेसिएण
१२७	१४	एवमाहिज्जंति	एवमाहिज्जंति
१३७	३	पणीयरसभोयणभाइ	पणीयरसभोयणभोई
१३७	३	अइमत्तपाणभोयण-	अइमत्तपाणभोयणभोई
		भोयणभाइ	
१३८	५	मंखिज्जा	मंसिज्जा
१३६	१८	मेहुणो	मेहुणे

卐 श्री वीरपाटपरंपरा-स्तवना 卐

महावीरं जिनं नत्वा स्मृत्वा च गौतमं गुरुम् ।
 पवित्रां हि स्मरिष्यामि सुधर्मादि परंपराम् ॥ १ ॥
 श्री सुधर्मा गुरुर्जम्बूजयतात् प्रभवप्रभुः ।
 शय्यंभवो यशोभद्रः संभूतिर्भद्रबाहुपः ॥ २ ॥
 स्थूलभद्रः सदा भद्रो महागिरिसुहस्तिनौ ।
 सुस्थितो मुनिनाथो हि सुप्रतिबद्धकौटिकः ॥ ३ ॥
 सरीन्द्रदिग्गदिभौ हि श्री सिंहगिरिवज्रपौ ।
 वज्रसेनश्च चन्द्रस्सामंतभद्रो हि पातु नः ॥ ४ ॥
 बुद्धदेवो गुरुः प्रद्योतनो वै मानदेवकः ।
 श्री मानतुङ्गवीरौ हि जयदेवश्च रक्षतात् ॥ ५ ॥
 देवानन्दो गुरुर्जीयात् विक्रमो नरसिंहज्ञः ।
 ससुद्रो मानदेवश्च विबुधप्रभसूरिपः ॥ ६ ॥
 जयानन्दो रविप्रभो यशोदेवो दयानिधिः ।
 प्रद्युम्नमानदेवौ हि सूरिर्विमलचन्द्रकः ॥ ७ ॥
 उद्योतनः सर्वदेवो देवश्च सर्वदेवकः ।
 यशोभद्रश्च श्रीनेमिचन्द्रश्च मुनिचन्द्रकः ॥ ८ ॥
 अजितदेवसिंहौ सोमप्रभो मणिस्तनकः ।
 जगच्चन्द्रस्तथा जीयात् तपोधर्मप्रभावकः ॥ ९ ॥
 देवेन्द्रो धर्मधोषस्सोमप्रभः सोमतिलकः ।
 श्रीदेवसुन्दरः सोमसुन्दरो मुनिसुन्दरः ॥ १० ॥
 श्रीरत्नशेखरः लक्ष्मीसागरः सुमनिस्तथा ।
 श्रीहेमविमलाणंदविमलौ दानहीरकौ ॥ ११ ॥
 श्रीसेनदेवसिंहाश्च सूरयः सत्यपण्डितः ।
 श्रीकपूर-क्षमाविज्ञौ जिनोत्तमौ च पद्मकः ॥ १२ ॥
 रूपः कीर्तिश्च कस्तूरः गणीन्द्रो मणिपण्डितः ।
 बुद्धिगणीन्द्रपन्न्यासो द्विसप्ततितमोऽवतात् ॥ १३ ॥
 आणंदविजयो हर्षकपूरामृतसूरयः ।
 स्तुताः पद्मधराः प्रेम्णा जिनेन्द्रेण सिवाय ते ॥ १४ ॥

॥ श्री महावीरजिनेन्द्राय नमः ॥

छन्दोऽमृतरसः

शिवशर्मप्रदातारं चरमतीर्थनायकम् ।
भक्तिभावेन वन्देऽहं गणेशगौतमन्तथा ॥ १ ॥
स्मृत्वा कर्पूरसूरीशं तपोधर्मप्रभावकम् ।
छन्दोऽमृतरसं वक्ष्ये नत्वाऽमृतगुरुं स्वकम् ॥ २ ॥
ग्रन्थोऽयं सुखबोधाय, संक्षेपेण विरच्यते ।
लक्षणं छन्दसां यत्र, श्रुतमात्रेण ज्ञायते ॥ ३ ॥
सानुस्वारविसर्गं हि, संयुक्ताद्यं तथा गुरु ।
बिज्ञेयमक्षरं दीर्घं पादान्तस्थं विकल्पतः ॥ ४ ॥
आदिमध्यावसानेषु, यरता यान्ति लाघवम् ।
भजसा गौरवं यान्ति, मनौ तु गुरुलाघवम् ॥ ५ ॥
यस्याः पादे प्रथमे, द्वादश मात्रास्तथा तृतीयेऽपि ।
अष्टादश द्वितीये, चतुर्थके पञ्चदश साऽऽर्या ॥ ६ ॥
आर्यापूर्वार्धसमं, परार्धमपि यच्छन्दसि मुने ! भवति ।
छन्दोविदस्तदानी-माय्यागीतिं तां मुदा कथयन्ति ॥ ७ ॥
आर्योत्तरार्धतुल्यं, पूर्वार्धं यच्छन्दसि स्यात् ।
तच्छन्दो भाषन्ते, ह्यार्यामुपगीतिं सुकवयः ॥ ८ ॥
आद्यचतुर्थे, पञ्चमकं चेत् ।
यत्र गुरु स्याद् भौगिति पङ्क्तिः ॥ ९ ॥
अगुरुचतुष्कं, भवति गुरु द्वौ ।
विनतमुनेऽसौ, शशिवदना न्यौ ॥ १० ॥
तुर्यं पञ्चमकं चेद्यत्र स्याल्लघु साधो ! ।
त्रिद्विः कथिता सा मसौ गः स्यान्मदलेखा ॥ ११ ॥
ज्ञेयं षष्ठं गुरु श्लोके, लघु सर्वत्र पञ्चमम् ।
द्विचतुष्पादयोर्ह्रस्वं, दीर्घं सप्तममन्ययोः ॥ १२ ॥
ज्ञेयं षष्ठं गुरु श्लोके, लघु सर्वत्र पञ्चमम् ।
द्विचतुष्पादयोः सप्तमं ह्रस्वं पद्य-लक्षणम् ॥ १३ ॥

आदिगतं तुर्यगतं, पञ्चमकं चान्त्यगतम् ।
 स्याद्गुरु चेत्तत्कथितं, माणवकं भातलगाः ॥ १४ ॥
 द्वितुर्यषष्ठमष्टमं, यदा गुरु प्रयोजितम् ।
 बुधाः प्रकाशयन्ति तां, प्रमाणिकां जगौ लगौ ॥ १५ ॥
 वर्णाः सर्वे द्वीर्षा यस्यां, विश्रामः स्याद्वेदैर्वेदैः ।
 व्याख्याता सा विद्वद्भन्दैर्मोमो गो गो विद्युन्माला ॥ १६ ॥
 यत्र गुरु स्यादाद्यचतुर्थं, पञ्चमषष्ठं चान्त्यमुपान्त्यम् ।
 चम्पकमाला चेद्भ्रमसागाश्चेन्द्रियबाणैर्यत्र विरामः ॥ १७ ॥
 चम्पकमाला यत्र भवेदन्त्यविहीना काव्यमते ! ।
 स्यान्मणिबन्धो भ्रमसगणैरिन्द्रियवेदैर्यद्विरतिः ॥ १८ ॥
 मन्दाक्रान्ताऽन्त्ययतिरहिता, चत्वारः प्राग्दशमगुरुकाः ।
 विश्रामः स्याद्युगरसमितैर्हंसी मत्ता मभनागयुता ॥ १९ ॥

इस्वो वर्णो जायते शैक्ष ! षष्ठ-

च्छन्दोबुद्धे तद्वदेवाष्टमान्त्यः ।

विश्रामः स्याद्यत्र वेदैस्तुरङ्गैः

शालिन्युक्ता स्तौ तगौ गो सुसाधो ॥ २० ॥

आद्यचतुर्थमखण्डतपस्विन्सप्तमकं दशमं गुरु चान्त्यम् ।

दोषकवृत्तमिदं भभभाद्गौ यत्कथितं कविमण्डलमुख्यैः ॥ २१ ॥

यस्यां त्रिषट्सप्तममक्षरं स्याद्-

ध्रस्वं तथा चेन्नवमं च तद्वत् ।

स्यादिन्द्रवज्रा यदि तौ जगौ गो

यस्यां क्रियाषट्प्रमितैर्विरामः ॥ २२ ॥

यदीन्द्रवज्राचरणेषु पूर्वे,

भवन्ति वर्णा लघवः सुकर्मन् ।

उपेन्द्रवज्रा जतजास्ततो गौ,

भवेत्क्रियाषट्प्रमितैर्विरामः ॥ २३ ॥

अनन्तरोदीरितलक्ष्मभाजौ,

पादौ यदीयावुपजातयस्ताः ।

यासां क्रियापट्टमितैर्विरामो,
भवन्ति सुज्ञैः परिकीर्त्तिता याः ॥२४॥
आख्यानकी स्याद्विपरीतपूर्वा,
यदीन्द्रवज्राचरणः पुरस्तात् ।
उपेन्द्रवज्राचरणास्त्रयोऽन्ये,

मनीषिणोक्ता शुभकार्यकारिन् ॥२५॥
प्रथमलघुकषट्कवर्णकं नवमचरमपूर्वकं तथा ।
भवति सुजन ! यत्र भाषिता, ननरलगयुतैव भद्रिका ॥२६॥
आद्यमक्षरमतस्तृतीयकं सप्तमं च नवमं तथान्तिमम् ।
दीर्घमन्धिगतिभिर्विरामका रात्रराविह रथोद्धता लग्नौ ॥२७॥
अक्षरं तु नवमं दशमं चेद्व्यत्ययाद्भवति पूर्वत आर्य !
स्वागतेति रनभाद्गुरुयुग्मं चान्धिवेदसुमितैर्हि विरामः ॥२८॥
प्रथमाक्षरमाद्यतृतीययोर्द्वुतविलम्बितकस्य न पादयोः ।
लग्नपारसकारगणैस्त्रिभिर्नभमरैस्तु गणैर्हरणीप्लुता ॥२९॥
इस्रो वर्णः स्यात्सप्तमो यत्र योगिन् !

तद्वद्विन्यस्तो वर्ण एकादशाद्यः ।

बाणैर्विश्रामस्तत्र चेत्स्यात् तुरङ्गै-

मौ यौ नाम्ना सा भाषिता वैश्वदेवी ॥३०॥

उपेन्द्रवज्राचरणेषु सन्ति चे-

दुपान्त्यवर्णा लघवः कृता यदि ।

जतौ तु वंशस्थमुदीरितं जरौ

सनाथ ! निदोषमिदं बुधैस्तदा ॥३१॥

वंशस्थपादा गुरुपूर्ववर्णका यस्यां भवेयुः क्षतिभिर्विवर्जिताः ।

स्यादिन्द्रवंशा खलु तौ जरौ मुने !

विश्रामभाग्या शरवाहसंख्यकैः ॥३२॥

सतृतीयकषष्ठमखण्डमते ! नवमं विरतिप्रभवं गुरु चेत् ।

इह तोटवृत्तमिदं गतिसैः निपुणैः कविभिः कमनीयमते ॥३३॥

यदि तोटकस्य गुरु पञ्चमकं, रससंख्यकं गुरु न चेद्विहितम् ।

प्रमिताक्षरा सजससैरुदिता, शुभकर्मवीर ! निपुणैः कविभिः ॥३४॥

यदाद्यं चतुर्थं तथा सप्तमं चेत् ,
 तथैवाक्षरं ह्रस्वमेकादशाद्यम् ।
 भुजङ्गप्रयातं भवेद्यैश्चतुर्भिः—
 र्यदुक्तं कवीन्द्रैर्जिनेन्द्रादिभक्तैः ॥३५॥

अपि मुनिप्रिय ! यत्र चतुर्थकं
 गुरु च सप्तमकं दशमं तथा
 विरतिगं च तथैव विशेषविद्
 द्रुतविलम्बितमाह नभौ भरो ॥३६॥

द्वितीयकपञ्चमकाष्टमकञ्च
 तथा दशमान्त्यगतं गुरु यत्र ।
 चतुर्जगणं यदि भौक्तिकदाम
 वदन्ति बुधा विगतेन्द्रियदोष ॥३७॥

आद्यतुर्यान्त्यकं द्वाष्टमेकादशं
 ह्रस्वमेवं नियुक्तं भवेच्छन्दसि ।
 विश्ववात्सल्यदेवाधिदेवार्चक !
 रैश्चतुर्भिर्मता कोविदैः स्रग्विणी ॥३८॥

आद्यं द्वितीयमथ तुर्यमष्टमं,
 चैकादशाद्यपरके तथैव चेद् ।
 दीर्घे सुकाव्यकुशलैर्मनोहरा
 धीरैरभाणि ललिता तभौ जरी ॥३९॥

करतलगतधर्मरत्नसाधो !
 विगलितमोहगजेन्द्रमोक्षयात्रिन् ! ।
 भवति जगति नौ ततः परौ यौ
 नजसहितैर्जरगैश्च पुष्पिताग्रा ॥४०॥

सत्तृतीयपञ्चमसुवर्णकं तथा
 नवमं यथा दशमकान्त्यकान्त्यकम् ।
 गुरुकं सुभाषितमभूद्धि नन्दिनी
 सजसा जगौ भवति मञ्जुभाषिणी ॥४१॥

द्वितीयतुर्यनवममक्षरं गुरु,

भवेत्तथैव च दशमान्त्यमन्तिमम् ।

सुभाषिता विबुधगणैः प्रभावती

जभौ सजौ गिति रुचिरा चतुर्ग्रहैः ॥४२॥

तुर्यं पञ्चममपि षष्ठसप्तमं वै

स्याद्भ्रस्वं खलु नवमं च रुद्रसंख्यम् ।

अन्यत्स्याद् गुरु यदि गीयते तदा सा

म्नौ जौगस्त्रिदशयतिः प्रहर्षिणीयम् ॥४३॥

तुर्याद्यतुर्यपरषष्ठकसप्तमं वै

स्याद् ह्रस्वकश्च नवमं दशमं तथैव ।

चेद् द्वादशं भवति यत्र सुकाव्यविज्ञै-

रुक्ता वसन्ततिलका तभजा जगौ गः ॥४४॥

प्रथममगुरुषट्कं यत्र चैकादशाद्यं

भवति लघु तथा चेदक्षरं द्वादशान्त्यम् ।

सुकविजनमनोज्ञा सा सुचारु प्रसिद्धा

ननमयययुतेयं मालिनी भौगिलोकैः ॥४५॥

चत्वारो यत्र वर्णा आद्यास्तथा पञ्चमान्त्या-

श्चत्वारो यत्र वर्णा दीर्घास्तथा चेद्दिशोन्त्यौ ।

द्वावेवं यत्र वर्णावन्त्यौ तथा स्यात्सुवर्णा

त्रौ म्यौ यान्तौ भवेतां सप्ताष्टकैश्चन्द्रलेखा ॥४६॥

चत्वारः प्राग्विहितगुरवो ये दिगेकादशौ चे-

द्वर्णौ दीर्घौ तदनु भवतः शोभनौ द्वादशान्त्यौ ।

तद्वच्चान्त्यौ सुगुरुतनुकौ वर्णिता सुप्रसिद्धा

मन्दाक्रान्ता मभनततगा गः समुद्रतु लोकैः ॥४७॥

यदा पूर्वो ह्रस्वः प्रभवति ततः षष्ठकपरा-

स्ततो वर्णाः पञ्च प्रकुशल ! तथैवात्र लघवः ।

त्रयोऽन्ये चोपान्त्याः प्रवरकविभिर्वै सुभणिता

रसै रुद्रैच्छिन्ना यमनसभला गः शिखरिणी ॥४८॥

द्वितीयमथ यत्र चेद्गुरु षडष्टमं द्वादशं
चतुर्दशमपीह पञ्चदशमान्तिमं स्यात्तथा ।

ततः प्रकथिता क्षमामतिमुने ! सुबोधान्वितै-

र्जसो जसयला वसुग्रहयतिश्च पृथ्वी गुरुः ॥४६॥

विबुध ! लघवः पञ्च प्राच्यास्ततो दशमान्तिक-

स्तदनुविहितौ ह्रस्वौ चेद्यत्र वै त्रिचतुर्दशौ ।

प्रभवति पुनर्यत्रोपान्त्यस्तथैव सुभाषिता

रसयुगहयैन्सौं औ स्लौ गो यदा हरिणी तदा ॥५०॥

आद्याश्चेद्गुरवस्त्रयस्तदनु चेत्षष्ठस्तथा चाष्टमः

स्यादेकादशतस्त्रयः खलु तथैवाष्टादशाद्यौ ततः ।

स्यादेवं ननु चान्तिमो भवति तच्छन्दोऽमृते चेन्मुने !

सूर्याश्वैर्मसजाः स्तताः सगुरवः शार्दूलविक्रीडितम् ॥५१॥

चत्वारो यत्र वर्णाः प्रथममलघवः पञ्चमान्त्यौ तथैव

द्वौ तद्वत्षोडशाद्यौ यदि गुरुतनुकौ षोडशान्त्यौ तथान्त्यौ ।

विद्वद्बृन्दैः सदा साऽन्वयगगनमणे ! सेविता सुप्रसिद्धा

औ भ्नौ यानां त्रयेण त्रिमुनियतिपुता स्रग्धरा कीर्तितेयम् ॥५२॥

पूर्वग्रन्थानुसारेण, छन्दोऽमृतरसो मुदा ।

छन्दोगणसुबोधाय संक्षेपतः प्रकीर्तितः ॥५३॥

अमृतसूरिशिष्येण जिनेन्द्रविजयेन यः ।

रसभूखदिके वर्षे गुम्फितो जामपट्टने ॥५४॥

वेदान्ताचार्यवर्येण ब्रजलालेन शोधितः ।

जीयात्काव्यमतीनेष प्रददानो मुदं सदा ॥५५॥

- शिवमस्तु सर्वजगतः -

॥ अर्हम् ॥

॥ श्री आचाराङ्ग-सूत्रम् ॥

॥१॥ अथ प्रथमः श्रुतस्कंधः ॥

॥३ः शस्त्रपरिज्ञा-अध्ययनं प्रथमोद्देशकः ॥

सुयं मे आउसं ! तेरां (आमुसंतेरां, आवसंतेरां) भगवया एवम-
स्वायं-इहमेगेसिं णो सगणा भवइ ॥सू० १॥ तं जहा-पुरत्थिमाओ वा
दिसाओ आगओ अहमंसि, दाहिणाओ वा दिसाओ आगओ अहमंसि,
पच्चत्थिमाओ वा दिसाओ आगओ अहमंसि, उत्तराओ वा दिसाओ
आगओ अहमंसि, उट्ठाओ वा दिसाओ आगओ अहमंसि, अहोदिसाए
वा आगओ अहमंसि, अराण्यरीओ वा दिसाओ अणुदिसाओ वा आगओ
अहमंसि, एवमेगेसिं णो णायं भवति ॥सू० २॥ अत्थि मे आया उववाइए,
नत्थि मे आया उववाइए, के अहं आसी ? के वा इओ चुए इह पेच्चा
भविस्सामि ? ॥सू० ३॥ से जं पुण जाणेज्जा सह संमइयाए परवागरणेणं
अराणेसिं अंतिए वा सोच्चा तं जहा-पुरत्थिमाओ वा दिसाओ आगओ
अहमंसि जाव अराण्यरीओ दिसाओ अणुदिसाओ वा आगओ अहमंसि
एवमेगेसिं जं णायं भवति-अत्थि मे आया उववाइए, जो इमाओ
दिसाओ अणुदिसाओ वा अणुसंचरइ (अणुसंसरइ), सव्वाओ दिसाओ
अणुदिसाओ, सोऽहं ॥सू० ४॥ से आयावादी लोयावादी कम्मावादी किरिया-
वादी ॥सू० ५॥ अकरिस्सं चऽहं कारवेसुं चऽहं, करओ आवि समणुन्ने
भविस्सामि ॥सू० ६॥ एयावंति सव्वावंति लोगंसि कम्मसमारंभा परिजाणि-
यव्वा भवंति ॥सू० ७॥ अपरिगणायकम्मा(म्मे) खलु अयं पुरिसे जो इमाओ
दिसाओ अणुदिसाओ अणुसंचरइ, सव्वाओ दिसाओ सव्वाओ

अणुदिसाओ साहेति ॥सू० ८॥ अणोगरूवाओ जोणीओ संघेइ (संघावइ),
 विरूवरूवे फासे पडिसंवेदेइ ॥सू० ९॥ तत्थ खलु भगवता परिगणा पवेइया
 ॥सू० १०॥ इमस्स चेव जीवियस्स परिवंदणमाणणपूयणाए जाइमरणमोय-
 णाए दुक्खपडिघायहेउं ॥सू० ११॥ एयावंति सव्वावंति लोगंसि कम्मसमा-
 रंभा परिजाणियव्वा भवंति ॥सू० १२॥ जस्सेते लोगंसि कम्मसमारंभा
 परिगणाया भवंति, से हु मुणी परिगणायकम्मे त्ति वेमि ॥सू० १३॥

॥ इति प्रथमोद्देशकः ॥ १-१ ॥

॥ अध्ययनं-१ उद्देशकः २ ॥

अट्टे लोए परिजुराणे दुस्संबोहे अविजाणए, अस्सि लोए पव्वहिए
 तत्थ तत्थ पुढो पास आलुरा परितावेति ॥सू० १४॥ संति पाणा पुढो
 सिया लज्जमाणा पुढो पास; अणगारा मोत्ति एगे पवयमाणा, जमिणां
 विरूवरूवेहिं सत्थेहिं पुढवीकम्मसमारंभेणं पुढवीसत्थं समारंभेमाणा
 अणोगरूवे पाणे विहिंसइ । तत्थ खलु भगवया परिगणा पवेइया, इमस्स चेव
 जीवियस्स परिवंदणमाणणपूयणाए जाइमरणमोयणाए दुक्खपडिघायहेउं स
 सयमेव पुढोसत्थं समारंभइ, अणोहिं वा पुढविसत्थं समारंभावेइ, अणो
 वा पुढविसत्थं समारंभंते समणुजाणइ ॥सू० १५॥ तं से अहियाए तं से
 अबोहीए से तं संबुज्झमाणे आयाणीय समुट्ठाय सोचा खलु भगवओ अण-
 गाराणं वा अंतिए इहमेगेसिं णातं भवति-एस खलु गंथे, एस खलु मोहे,
 एस खलु मारे, एस खलु णारए, इच्चत्थं गड्डिए ल ए जमिणां विरूवरूवेहिं
 सत्थेहिं पुढविकम्मसमारंभेण पुढविसत्थं समारंभमाणे अणो अणोगरूवे पाणे
 विहिंसइ, से वेमि, अप्पेगे अंधमब्भे अप्पेगे अंधमच्छे अप्पेगे पायमब्भे अप्पेगे
 पायमच्छे अप्पेगे गुप्फमब्भे अप्पेगे गुप्फमच्छे अप्पेगे जंघमब्भे (२) अप्पेगे
 जाणुमब्भे (२) अप्पेगे ऊरुमब्भे (२) अप्पेगे कडिमब्भे (२) अप्पेगे णाभिमब्भे
 (२) अप्पेगे उदरमब्भे (२) अप्पेगे पासमब्भे (२) अप्पेगे पिट्ठिमब्भे (२) अप्पेगे

उरमब्धे (२) अण्पेगे हिययमब्धे (२) अण्पेगे थण्णमब्धे (२) अण्पेगे खंधमब्धे (२) अण्पेगे बाहुमब्धे (२) अण्पेगे हत्थमब्धे (२) अण्पेगे अंगुलिमब्धे (२) अण्पेगे ग्राहमब्धे (२) अण्पेगे गीवमब्धे (२) अण्पेगे हाणुमब्धे (२) अण्पेगे होट्टमब्धे (२) अण्पेगे दंतमब्धे (२) अण्पेगे जीवमब्धे (२) अण्पेगे तालुमब्धे (२) अण्पेगे गलमब्धे (२) अण्पेगे गंडमब्धे (२) अण्पेगे कण्णमब्धे (२) अण्पेगे णासमब्धे (२) अण्पेगे अञ्जिमब्धे (२) अण्पेगे भमुहमब्धे (२) अण्पेगे णिडालमब्धे (२) अण्पेगे सीसमब्धे (२) अण्पेगे सयमारए अण्पेगे उद्वए, इत्थं सत्थं समारंभमाणस्स इच्चेते आरंभा अपरिणणाता भवन्ति ॥सू० १६॥ एत्थं सत्थं असमारंभमाणस्स इच्चेते आरंभा परिणणाता भवन्ति, तं परिणणाय मेहावी नेव सयं पुढवीसत्थं समारंभेज्जा, गोवराणोहिं पुढविसत्थं समारंभावेज्जा, गोवराणो पुढविसत्थं समारंभतो समणुजाणेज्जा, जस्सेते पुढविकम्मसमारंभा परिणणाता भवन्ति, से हु मुणी परिणणातकम्मे त्ति वेमि ॥सू० १७॥

॥ इति द्वितीय उद्देशकः ॥१-२॥

अध्ययनं-१ उद्देशकः ३

से वेमि जहा अण्णगारे उज्जुकडे नियायपडिवराणो (निकायपडिवन्ने) अमायं कुब्बमाणो वियाहिए ॥सू० १८॥ जाए सद्धाए निक्खंतो तमेव अणुपालिज्जा, वियहिता विसोत्तियं (विजहिता पुब्बसंजोयं) ॥सू० १९॥ पण्णा वीरा महावीहिं ॥सू० २०॥ लोगं च आणाए अभिसमेच्चा अकुत्रोभयं ॥सू० २१॥ से वेमि, गोव सयं लोगं अब्भाइक्खिज्जा, गोव अत्ताणं अब्भाइक्खिज्जा, जे लोयं अब्भाइक्खइ, से अत्ताणं अब्भाइक्खइ, जे अत्ताणं अब्भाइक्खइसे लोयं अब्भाइक्खइ ॥सू० २२॥ लज्जमाणा पुढो पास; अण्णगारा मो त्ति एगे पवयमाणा जमिणं विरुवरूवेहिं सत्थेहिं उदयकम्मसमारंभेणं उदयसत्थं समारंभमाणो अराणो अणोगरूवे पाणो विहिसइ । तत्थं खलु भगवता परिणणा पवेदिता । इमस्स चैव जीवियस्स परिवंदणमाणा-

पूयणाए जाइमरणमोयणाए दुक्खपडिघायहेउं से सयमेव उदयसत्थं समारंभति,
 अराणोहिं वा उदयसत्थं समारंभावेति, अराणो उदयसत्थं समारंभते समणुजा-
 णाति । तं से अहियाए, तं से अबोहीए, से तं संबुज्झमाणो आयाणीयं
 समुट्ठाय सोच्चा भगवच्चो अणगाराणं अंतिए इहमेगेसिं णायं भवति—एस खलु
 गंथे, एस खलु मोहे, एस खलु मारे, एस खलु णारए, इच्चत्थं गट्ठिए लोए
 जमिणं विरूवरूवेहिं सत्थेहिं उदयकम्मसमारंभेणं उदयसत्थं समारंभमाणो
 अराणो अणोगरूवे पाणो विहिंसइ । से बेमि संति पाणा उदयनिस्सया जीवा
 अणोगे ॥सू० २३॥ इहं च खलु भो ! अणगाराणं उदयजीवा वियाहिया
 ॥सू० २४॥ सत्थं चेत्थ अणवीइ पासा, पुढो सत्थं (पासं) पवेइयं
 ॥सू० २५॥ अदुवा अदिन्नादाणं ॥सू० २६॥ कप्पइ णो कप्पइ णो पाउं,
 अदुवा विभूसाए ॥सू० २७॥ पुढो सत्थेहिं विउट्टन्ति ॥सू० २८॥ एत्थऽवि
 तेसिं नो निकरणाए ॥सू० २९॥ एत्थ सत्थं समारंभमाणस्स इच्चेए आरंभा
 अपरिगणाया भवंति, एत्थ सत्थं असमारंभमाणस्स इच्चेते आरंभा परिगणाया
 भवंति, तं परिगणाय मेहावी णोव सयं उदयसत्थं समारंभेज्जा, नेवराणोहिं
 उदयसत्थं समारंभावेज्जा, उदयसत्थं समारंभंतेऽवि अराणो ण समणुजाणोज्जा,
 जस्सेते उदयसत्थसमारंभा परिगणाया भवंति से हु मुणी परिगणातकम्मे त्ति
 बेमि ॥सू० ३०॥

॥ इति तृतीयोद्देशकः ॥ १-३॥

॥ अध्ययनं-१ उद्देशकः ४ ॥

से बेमि णोव सयं लोगं अब्भाइक्खेज्जा णोव अत्ताणं अब्भाइक्खेज्जा, जे
 लोयं अब्भाइक्खइ से अत्ताणं अब्भाइक्खइ जे अत्ताणं अब्भाइक्खइ से लोयं
 अब्भाइक्खइ ॥सू० ३१॥ जे दीहलोगसत्थस्स खेयराणो से असत्थस्स खेयराणो,
 जे असत्थस्स खेयराणो से दीहलोगसत्थस्स खेयराणो ॥सू० ३२॥ वीरेहिं एयं
 अभिभूय दिट्ठं, संजएहिं सया जत्तेहिं सया अप्पमत्तेहिं ॥सू० ३३॥ जे पमत्ते

गुणद्वीए से हु दंडेत्ति पवुच्चइ ॥सू० ३४॥ तं परिगणाय मेहावी इयाणि
 णो जमहं पुव्वमकासी पमाएणां ॥सू० ३५॥ लज्जमाणा पुढो पास, अणगारा
 मोत्ति एगे पवदमाणा जमिणां विरूवरूवेहिं सत्थेहिं अगणिकम्मसमारम्भेणां
 अगणिसत्थं समारंभमाणो अरणो अणोगरूवे पाणे विहिंसंति । तत्थ खलु
 भगवता परिगणा पवेदिता, इमस्स चेव जीवियस्स परिवंदणमाणापूयणाए
 जाइमरणभोयणाए दुक्खपडिघायहेउं से सयमेव अगणिसत्थं समारम्भइ,
 अरणोहिं वा अगणिसत्थं समारंभावेइ अरणो वा अगणिसत्थं समारंभमाणो
 समणुजाणइ, तं से अहियाए, तं से अबोहियाए, से तं संबुज्जमाणो, आया-
 णीयं समुट्ठाय सोच्चा भगवओ अणगाराणां इहमेगेसि णायं भवति-एस
 खलु गंथे, एस खलु मोहे, एस खलु मारे, एस खलु णारए, इच्चत्थं गट्ठिए
 लोए जमिणां विरूवरूवेहिं सत्थेहिं अगणिकम्मसमारंभमाणो अरणो अणोगरूवे
 पाणे विहिंसइ ॥सू० ३६॥ से बेमि-संति पाणा पुढवीनिस्सिया, तणाणि-
 स्सिया, पत्तणिस्सिया, कट्टनिस्सिया, गोमयणिस्सिया, कयवरणिस्सिया, संति
 संपातिमा पाणा, आहच्च संपयंति, अगणिं च खलु पुट्ठा एगे संघायमावज्जंति,
 जे तत्थ संघायमावज्जंति ते तत्थ परियावज्जंति जे तत्थ परियावज्जंति ते
 तत्थ उद्दायंति ॥सू० ३७॥ एत्थ सत्थं समारंभमाणस्स इच्चेते आरंभा
 अपरिगणाया भवंति, एत्थ सत्थं असमारंभमाणस्स इच्चेते आरंभा
 परिगणाया भवंति, तं परिगणाय मेहावी णोव सयं अगणिसत्थं समारंभे,
 नेवअरणोहिं अगणिसत्थं समारंभावेजा, अगणिसत्थं समारंभमाणो अरणो
 न समणुजाणोजा, जस्सेते अगणिकम्मसमारंभा परिगणाया भवंति, से हु
 मुणी परिगणायकम्मे त्ति बेमि ॥सू० ३८॥

॥ इति चतुर्थ उद्देशकः ॥ १-४॥

॥ अध्ययन-१ उद्देशकः ५ ॥

तं णो करिस्सामि समुद्गाए, मत्ता मइमं अभयं विदिता, तं जे णो करए एसोवरए, एत्थोवरए, एस अणगारेत्ति पवुच्चइ ॥सू० ३६॥ जे गुणे से आवट्टे जे आवट्टे से गुणे ॥सू० ४०॥ उट्ठं अहं तिरियं पाइणं पासमाणो रूवाइं पासति, सुणमाणो सदाइं सुणोति, उट्ठं अहं पाइणं मुच्छमाणो रूवेसु मुच्छति, सेसेसु आवि ॥सू० ४१॥ एस लोए वियाहिए एत्थ अगुत्ते अणगणाए ॥सू० ४२॥ पुणो पुणो गुणामाए, वंसमायारे ॥सू० ४३॥ पमत्तज्जारमावसे ॥सू० ४४॥ लज्जमाणा पुटो पास, अणगारा मोत्ति एगे पवदमाणा जमिणं विरुवरूवेहिं सत्येहिं वणस्सइकम्मसमारंभेणं वणस्सइसत्थं समारंभमाणा अणो अणोगरूवे पाणे विहिंसंति, तत्थ खलु भगवया परिणणा पवेदिता, इमस्स चैव जीवियस्स परिवंदणमाणाणूपयणाए जाती(जरा)-मरणमोयणाए दुक्खपडिघायहेउं से सयमेव वणस्सइसत्थं समारंभइ, अणोहिं वा वणस्सइसत्थं समारंभवेइ, अणो वा वणस्सइसत्थं समारंभमाणो समणु-जाणइ, तं से अहियाए, तं से अबोहीए, से तं संबुज्झमाणो, आयाणीयं समुद्गाए सोच्चा भगवयो अणगाराणं वा अंतिए इहमेगेसि णायं भवति-एस खलु गंथे, एस खलु मोहे, एस खलु मारे, एस खलु णारये, इत्थं गट्ठिए लोए, जमिणं विरुवरूवेहिं सत्येहिं वणस्सइकम्मसमारंभेणं वणस्सइसत्थं समारंभमाणो अणो अणोगरूवे पाणे विहिंसंति ॥सू० ४५॥ से वेमि, इमं पि जाइधम्मयं, एयं पि जाइधम्मयं, इमं पि बुद्धिधम्मयं, एयं पि बुद्धिधम्मयं, इमं पि चित्तमंतयं, एयं पि चित्तमतयं, इमं पि छिराणं मिलाइ, एयं पि छिराणं मिलाइ, इमं पि आहारगं, एयं पि आहारगं, इमं पि अणिच्चयं, एयं पि अणिच्चयं, इमं पि असासयं, एयं पि असासयं (इमं पि अधुवं एयं पि अधुवं) इमं पि चओवचइयं, एयं पि चओवचइयं इमं पि विपरिणामधम्मयं (नामियं) एयं पि विपरिणामधम्मयं ॥सू० ४६॥ एत्थ सत्थं समारंभमाणास्स इच्चेते आरंभा अपरिणणाता भवति,

एतथ सत्थं असमारंभमाणस्स इच्चवेते आरंभा परिगणाया भवन्ति, तं परिगणाय मेहावी नेव सां वणस्ससइत्थं समारंभेज्जा, गोवराणोहिं वणस्सइसत्थं समारंभवेज्जा, गोवराणो वणस्सइसत्थं समारंभन्ते समणुजाणोज्जा, जस्सेते वणस्सइसत्थसमारंभा परिगणाया भवन्ति, से हु मुणी परिगणायकम्मे त्ति वेमि ॥सू० ४७॥

॥ इति पंचम उद्देशकः ॥ १-५ ॥

॥ अध्ययनं-१ : उद्देशकः ६ ॥

से वेमि संतिमे तसा पाणा, तं जहा-अंडया पोयया जराउया रसया संसेयया संमुच्छिमा उब्भियया उववाइया, एस संसारेत्ति पवुच्चइ ॥सू० ४८॥ मंदस्सादियाणओ ॥सू० ४९॥ निज्झाइत्ता पडिलेहिता पत्तेयं परिनिव्वाणं सव्वेसि पाणाणं सव्वेसि भूयाणं, सव्वेसि जीवाणं, सव्वेसि सत्ताणं अस्सायं अपरिनिव्वाणं महब्भयं दुक्खं त्ति वेमि, तसंति पाणा पदिसो दिसासु य ॥सू० ५०॥ तत्थ तत्थ पुटो पास, आतुरा परितवेत्ति, संति पुटो सिया ॥सू० ५१॥ लज्जमाणा पुटो पास, अणगारा मोत्ति एगे पवयमाणा जमिणं विरुवरूवेहिं सत्थेहिं तसकायसमारंभेण तसकायसत्थं समारंभमाणो अराणो अराणेरूवे पाणो विहिंसति, तत्थ खलु भगवया परिगणा पवेइया, इमस्स चैव जीवियस्स परिवंदणमाणपूयणाए जाइमरणमोयणाए दुक्खपडिवायहेउं से सयमेव तसकायसत्थं समारंभन्ति, अराणोहिं वा तसकायसत्थं समारंभवेइ, अराणो वा तसकायसत्थं समारंभमाणो समणुजाणइ तं से अहियाए, तं से अबोहीए से तं संबुज्जमाणो आयाणीयं समुट्ठाय सोच्चा खलु भगवओ अणगाराणं अंतिए इहमेगेसिं णायं भवति-एस खलु गंथे, एस खलु मोहे, एस खलु मारे, एस खलु गारए, इच्चत्थं गड्डिए लोए जमिणं विरुवरूवेहिं सत्थेहिं तसकायसमारंभेण तसकायसत्थं समारंभमाणो अराणो अराणेरूवे पाणो विहिंसति ॥सू० ५२॥ से वेमि अप्पेगे अच्चाए हणांति, अप्पेगे अजिणाए वहन्ति, अप्पेगे मंसाए वहन्ति, अप्पेगे सोणियाए वहन्ति, एवं हिययाए पित्ताए वसाए

पिच्छाए पुच्छाए वालाए सिंगाए विसाणाए दंताए दाढाए गहाए गहास्णीए
 अट्टीए अट्टिमिंजाए अट्टाए अणट्टाए, अप्पेगे हिंसिसु मेत्ति वा वहंति,
 अप्पेगे हिंसंति मेत्ति वा वहति, अप्पेगे हिंसिस्संति मेत्ति वा वहंति ॥सू० ५३॥
 एत्थं सत्थं समारभमाणस्स इच्चेते आरंभा अपरिगणाया भवंति, एत्थ सत्थं
 असमारभमाणस्स इच्चेते आरंभा परिगणाया भवति, तं परिगणाय मेहावी
 गोव सयं तसकायसत्थं समारंभेज्जा, गोवज्जगोहिं तसकायसत्थं समारंभावेज्जा,
 गोवज्जगो तसकायसत्थं समारंभे ते समणुजाणोज्जा, जस्सेते तसकायसत्थसमारंभा
 परिगणाया भवंति, से हु मुणी परिगणायकम्मे त्ति बेमि ॥सू० ५४॥

॥ इति षष्ठ उद्देशकः ॥ १-६ ॥

॥ अध्ययन-१ : उद्देशकः ७ ॥

पहू एजस्स (एगस्स) दुगुंछणाए ॥सू० ५५॥ आयंकदंसी अहियंति
 णाच्चा, जे अज्झत्थं जाणइ से बहिया जाणइ, जे बहिया जाणइ से अज्झ-
 त्थं जाणइ, एयं तुलमन्नेसिं ॥सू० ५६॥ इह संतिगया दविया णावकंखंति
 जीविउं ॥सू० ५७॥ लज्जमाणो पुटो पास, अणगारा मोत्ति एगे पवयमाणा
 जमिणां विरुवरूवेहिं सत्थेहिं वाउकम्मसमारंभेणं वाउसत्थं समारंभमाणो अरणो
 अणोगरूवे पाणो विहिंसति । तत्थ खलु भगवया परिगणा पवेइया । इमस्स
 चेव जीवियस्स परिवंदणमाणपूयणाए जाइमरणमोयणाए दुवखपडिघायहेउं
 से सयमेव वाउसत्थं समारंभति, अरणोहिं वा वाउसत्थं समारंभावेइ, अरणो
 वाउसत्थं समारंभते समणुजाणति, तं से अहियाए, तं से अबोहिए, से तं
 संबुज्जमाणो आयाणीए समुट्टाए सोच्चा भगवओ अणगाराणं अंतिए इहमेगेसिं
 णायं भवति—एस खलु गंथे, एस खलु मोहे, एस खलु मारे, एस खलु णिरए,
 इच्चत्थं गड्डिए लोए जमिणां विरुवरूवेहिं सत्थेहिं वाउकम्मसमारंभेणं वाउसत्थं
 समारंभमाणो अरणो अणोगरूवे पाणो विहिंसति ॥सू० ५८॥ से बेमि संति
 संपाइमा पाणा आहच्च संपयंति य फरिसं च खलु पुट्टा एगे संघायमावज्जंति,

जे तत्थ संघायमावज्जंति ते तत्थ परियावज्जंति, जे तत्थ परियावज्जंति ते तत्थ उद्दायंति, एत्थ सत्थं समारभमाणस्स इच्चेते आरंभा अपरिगणया भवन्ति, एत्थ सत्थं असमारभमाणस्स इच्चेते आरंभा परिगणया भवन्ति, तं परिगणाय मेहावी गोव सयं वाउसत्थं समारंभेज्जा, गोवराणेहिं वाउसत्थं समारंभवेज्जा, गोवराणे वाउसत्थं समारंभंते समणुजाणेज्जा, जस्सेते वाउसत्थसमारंभ परिगणया भवन्ति, से हु मुणी परिगणायकम्मेत्ति बेमि ॥सू० ५६॥ एत्थपि जाणे उवादीयमाणा, जे आयारे ण रमन्ति, आरंभमाणा विण्णं वयंति, छंदोवणीया अज्झोववराणा, आरंभसत्ता पकरन्ति संगं ॥सू० ६०॥ से वसुमं समराणागयपरगणारोणं अप्पाणोणं अकरणिज्जं पावं कम्मं णो अरणोसिं तं परिगणाय मेहावी गोव सयं छज्जीवनिकायसत्थं समारंभेज्जा, गोवराणेहिं छज्जीवनिकायसत्थं समारंभवेज्जा, गोवराणे छज्जीवनिकायसत्थं समारंभंते समणुजाणेज्जा, जस्सेते छज्जीवनिकायसत्थसमारंभा परिगणया भवन्ति से हु मुणी परिगणायकम्मेत्ति बेमि ॥सू० ६१॥

॥ इति सप्तमोद्देशकः ॥ १-७ ॥ इति प्रथममध्ययनम् ॥१॥

॥ २ : लोकविजय-अध्ययनं : उद्देशकः-१ ॥

जे गुणे से मुलट्ठाणे, जे मूलट्ठाणे से गुणे । इति से गुणट्ठी महया परियावेणं पुणो पुणो रसे पमत्ते-माया मे, पिया मे, भाया मे, भगिणी मे, भज्जा मे, पुत्ता मे, धूया मे, राहुसा मे, सहिसयणसंगंथसंथुआ मे, विवित्तुवगरणपरिवट्ठाणभोयणच्छायणं मे । इच्चत्थं गड्डिए लोए अहो य रात्रो य परितप्पमाणो कालाकालसमुट्ठाई संजोगट्ठी अट्ठालोभी आलुपे सहसाकारे विणिविट्ठचित्ते, एत्थ सत्थे पुणो पुणो, अप्पं च खलु आउयं इहमेगेसिं माणवाणं तं जहा-॥सू० ६२॥ सोयपरिगणारोहिं परिहायमारोहिं, चम्बुपरिगणारोहिं परिहायमारोहिं, घाणपरिगणारोहिं परिहायमारोहिं रस-

णापरिगणाणोहिं परिहायमाणोहिं फासपरिगणाणोहिं परिहायमाणोहिं अभिक्तं
 च खलु वयं संपेहाए तत्रो से एगदा मूढभावं जणयंति ॥सू० ६३॥ जेहिं
 वा सद्धि संवसति ते वि णं एगदा णियगा पुब्बि परिवयंति सोऽवि ते
 णियए पच्छा परिवएज्जा, णालं ते तव ताणाए वा सरणाए वा, तुमंपि तेसिं
 णालं ताणाए वा सरणाए वा, से ण हासाय ण किड्ढाए ण रतीए ण
 विभूसाए ॥सू० ६४॥ इच्चेवं समुट्ठिए अहोविहाराए अंतरं च खलु इमं
 संपेहाए धीरे मुहुत्तमवि णो पमायए वत्रो अच्चेति जोध्वणं व ॥सू० ६५॥
 जीविए इह जे पमत्ता से हंता छेत्ता भेत्ता लुंपित्ता विलुंपित्ता उद्वित्ता
 उत्तासइत्ता, अकडं करिस्सामित्ति मरणमाणे, जेहिं वा सद्धि संवसइ ते वा णं
 एगया नियगा तं पुब्बि पोसेंति, सो वा ते नियगे पच्छा पोसिज्जा,
 नालं ते तव ताणाए वा सरणाए वा, तुमंपि तेसिं नालं ताणाए वा सरणाए
 वा ॥सू० ६६॥ उवाइयसेसेण या संनिहिसंनिचत्रो किज्जइ, इहमेगेसिं
 असंजयाण भोयणाए, तत्रो से एयगा रोगसमुप्पाया समुप्पज्जंति, जेहिं वा
 सद्धि संवसइ ते वा णं एयगा नियगा तं पुब्बि परिहरति, सो वा ते
 नियगे पच्छा परिहरिज्जा, नालं ते तव ताणाए वा सरणाए वा, तुमंपि तेसिं
 नालं ताणाए वा सरणाए वा ॥सू० ६७॥ जाणित्तु दुक्खं पत्तेयं सायं
 ॥सू० ६८॥ अणभिक्कंतं च खलु वयं संपेहाए ॥सू० ६९॥ खणं
 जाणाहि पंडिए ॥सू० ७०॥ जाव सोयपरिगणाणा अपरिहीणा, नेत्तपरि-
 गणाणा अपरिहीणा, घाणपरिगणाणा अपरिहीणा, जीहपरिगणाणा अप-
 रिहीणा, फरिसपरिगणाणा अपरिहीणा इच्चेएहिं विरूवरूवेहिं पराणाणोहिं
 अपरिहीणोहिं, आयट्ठं संमं समणुवासिज्जासि त्ति वेमि ॥सू० ७१॥

॥ अध्ययनं-२ : उद्देशकः-२ ॥

अरइं अउट्टे स मेहावी, खणंसि मुक्के ॥सू० ७२॥ अणायणाय
पुट्टावि एगे नियट्टेति, मंदा मोहेण पाउडा, अपरिग्गहा भविस्सामो समुट्टाय
लद्धे कामे अभिगाहइ, अणायणाय मुणिल्लो पडिलेहंति, इत्थ मोहे पुणो पुणो
सन्ना नो हव्वाए नो पाराए ॥सू० ७३॥ विमुत्ता हु ते जणा जे जणा
पारगामिणो लोभमलोभेण दुगुंछमाणे लद्धे कामे नाभिगाहइ ॥सू० ७४॥
विणायवि लोभं निक्खम्म एस अकम्मे जाणइ पासइ पडिलेहाए नावकंखइ,
एस अणगारित्ति पवुच्चइ, अहो य रात्रो परितप्पमाणे कालाकालसमुट्टाई
संजोगट्ठी अट्टालोभी आलु पे सहकारे विणिविट्ठचित्ते, इत्थ सत्थे पुणो पुणो
से आयबले, से नाइबले, से सयणबले, से मित्तबले, से पिच्चबले, से देवबले, से
रायबले, से चोरबले, से अतिहिबले, से किविणबले, से समणबले इच्चेएहिं
विख्वरूवेहिं कज्जेहिं दंडसमायाणं संपेहाए भया कज्जइ, पावमुक्खुत्ति मन्नमाणे
अदुवा आसंसाए ॥सू० ७५॥ तं परिणाय मेहावी नेव सयं एएहिं कज्जेहिं
दंडं समारंभिज्जा, गोव अन्नं एएहिं कज्जेहिं दंडं समारंभाविज्जा, एएहिं
कज्जेहिं दंडं समारंभंतंपि अन्नं न समणुजाणिज्जा, एस मग्गे आरिएहिं
पवेइए, जहेत्थ कुसले नोवलिंपिज्जासि त्ति वेमि ॥सू० ७६॥

॥ इति द्वितीय उद्देशकः ॥ २-२ ॥

॥ अध्ययनं-२ उद्देशकः-३ ॥

से असइं उच्चागोए असइं नीआगोए, नो हीणे नो अइरित्ते (एग-
मेगे खलु जीवे अईअद्धाए असइ उच्चागोए असइ नीआगोए, कंडगट्टयाए
नो हीणे नो अइरित्ते) नोऽपीहए, इय संखाय को गोयावाइ को माणावाइ ?
कंसि वा एगे गिज्झा, तम्हा नो हरिसे नो कुप्पे, भूएहिं जाण पडिलेह
सायं ॥सू० ७७॥ समिए एयाणुपस्सी (पुरिसे णं खलु दुक्खुव्वेअसुहेसए)

तं जहा, अन्धत्तं बहिरत्तं मूयत्तं काणत्तं कुंटत्तं खुज्जत्तं वडभत्तं सामत्तं सबलत्तं सह पमाणं अणोगरूवाओ जोगीओ संधायइ विरूवरूवे फासे परिसंवेयइ ॥सू० ७८॥ से अबुज्झमाणे हओवहए जाइमरणं अणुपरियट्टमाणे, जीवियं पुढे पियं इहमेगेसिं माणवाणं खित्तवत्थुममायमाणं, आरत्तं विरत्तं मणिकुंडलं सह हिरण्येण इत्थियाओ परिगिज्झति तत्थेव रत्ता, न इत्थ तवो वा दमो वा नियमो वा दिस्सइ, संपुराणं बाले जीविउकामे लालप्पमाणे मूढे विप्परियासमुवेइ ॥सू० ७९॥ इणमेव नावकंखंति, जे जणा धुवचारिणो । जाइमरणं परिन्नाय, चरे संकमणे दूढे, नत्थि कालस्स णागमो, सव्वे पाणा पियाउया (पियायया) सुहसाया दुक्खपडिकूला अप्पियवहा पियजीविणो जीविउकामा, सव्वेसिं जीवियं पियं, तं परिगिज्झ दुपयं चउप्पयं अभिजुंजिया णं संसिचिया णं तिविहेण जाऽवि से तत्थ मत्ता भवइ अप्पा वा बहुया वा, से तत्थ गड्डिए चिट्ठइ, भोअणाए, तओ से एगया विविहं परिसिट्ठं संभूयं महोवगराणं भवइ, तंपि से एगया दायाया वा विभयन्ति, अदत्तहारो वा से अवहरति, रायाणो वा से विलुपंति, नस्सइ वा से, विणस्सइ वा से, अगारदाहेण वा से डज्झइ इय, से परस्सट्ठाए कूराइं कम्माइं बाले पकुज्जमाणे तेण दुक्खेण संमूढे विप्परियासमुवेइ, मुणिणा हु एयं पवेइयं, अणोहंतरा एए नो य ओहं तरित्तए, अतीरंगमा एए नो य तीरं गमित्तए, अपारंगमा एए नो य पारं गमित्तए, आयाणिज्जं च आयाय तंमि ठाणे न चिट्ठइ, वितहं पप्पज्जेयन्ने तंमि ठाणंमि चिट्ठइ ॥सू० ८०॥ उइसो पासगस्स नत्थि, बाले पुण निहे कामसमणुन्ने असमियदुक्खे दुक्खी दुक्खाणमेव आवट्ठं अणुपरियट्ठइ ति वेमि ॥सू० ८१॥

॥ अध्ययनं-२ उद्देशकः-४ ॥

तत्रो से एगया रोगसमुप्पाया समुप्पज्जंति, जेहिं वा सद्धिं संवसइ ते व
 णं एगया नियया पुब्बि परिवयंति, सो वा ते नियणे पच्छा परिवइज्जा,
 नालं ते तव ताणाए वा, सरणाए वा, तुमं पि तेसिं नालं ताणाए वा, सरणाए
 वा, जाणित्तु दुक्खं पत्तेयं सायं, भोगा मे व अणुसोयन्ति इहमेगेसिं माणावाणं
 ॥सू० ८२॥ तिविहेण जावि से तत्थ मत्ता भवइ अप्पा वा बहुगा वा, से
 तत्थ गड्डिए चिट्ठइ, भोयणाए, तत्रो से एगया विपरिसिट्ठं संभूयं महाव-
 गरणं भवइ, तं पि से एगया दायाया विभयंति, अदत्तहारो वा से हरति,
 रायाणो वा से विलुं पंति नस्सइ वा से, विणस्सइ वा से, अगारदाहेण वा
 से डज्झइ इय, से परस्स अट्ठाए कूराणि कम्माणि बाले पकुव्वमाणे तेण
 दुक्खेण मूढे विप्परियासमुवेइ ॥सू० ८३॥ आसं च छन्दं च विगिं च धीरे !,
 तुमं चेव तं सल्लमाहट्ठ जेण सिया तेण नो सिया, इणमेव नावबुज्झंति
 जे जणा मोहपाउडा, थीभि लोए पव्वहिए, ते भो ! वयंति एयाइं आयय-
 णाइं से दुक्खाए मोहाए माराए नरगाए नरगतिरिक्खाए, सययं मूढे धम्मं
 नाभिजाणइ, उच्चाहु वीरे, अप्पमात्रो महामोहे, अलं कुसलस्स पमाणां,
 संतिमराणं संपेहाए भेउरधम्मं संपेहाए नालं पास अलं ते एएहिं ॥सू० ८४॥
 एयं पस्स मुणी ! महब्भयं, नाइवाइज्ज कंचणं एस वीरे पसंसिए जे न निव्वि-
 ज्जइ आयाणाए, न मे देइ न कुप्पिज्जा थोवं लद्धुं न खिसए, पडिसेहित्रो
 (पडिलाभित्रो) परिणमिज्जा, एयं मोणं समणुवासिज्जासि त्ति बेमि ॥सू० ८५॥

॥ इति चतुर्थोद्देशकः ॥ २-४ ॥

॥ अध्ययनं-२ उद्देशकः-५ ॥

जमिणं विरूवरूवेहिं सत्थेहिं लोगस्स कम्मसमारंभा कज्जंति, तं जहा
 अप्पणो से पुत्ताणं, धूयाणं, सुगहाणं, नाइणं, धाइणं, राइणं, दासाणं,

दासीणां, कम्मकराणां, कम्मकरीणां आएसाए पुढोपहेणाए, सामासाए, पायरा-
 साए, संनिहिसंनिचओ कज्जइ, इहमेगेसिं माणावाणां भोयणाए ॥सू० ८६॥
 समुट्ठिए अणगारे आरिए आरियपन्ने आरियदंसी अयंसंधित्ति अदक्खु, से
 नाइए नाइयावए न समणुजाणइ, सव्वामगंधं परिन्नाय निरामगंधो परिव्वए
 ॥सू० ८७॥ अदिस्समाणो कयविक्रयेसु, से ण किणो, न किणावए, किणांतं न
 समणुजाणइ, से भिक्खू कालन्ने, बालन्ने, मायन्ने, खेयन्ने, खणायन्ने, विणायन्ने
 स-समय-पर-समयन्ने, भावन्ने, परिग्गहं अममायमाणो कालाणुट्ठाइ अपडिग्गो
 ॥सू० ८८॥ दुहओ छेत्ता नियाइ, वत्थं, पडिग्गहं, कंबलं, पायपुंछणां,
 उग्गहणां च कडासणां एएसु चेव जाणिज्जा ॥सू० ८९॥ लद्धे आहारो
 अणगारो मायं जाणि(ए)ज्जा, से जहेयं भगवया पवेइयं, लाभुत्ति न
 मज्जिज्जा, अलाभुत्ति न सोइज्जा, बहुं पि लद्धुं न निहे, परिग्गहाओ
 अण्णाणं अवसकिज्जा ॥सू० ९०॥ अन्नहा णं पासए परिहरिज्जा, एस
 मग्गे आयरिएहिं पवेइए, जहित्थ कुसले नोवल्लिपिज्जासि त्ति बेमि
 ॥सू० ९१॥ कामा दुरतिक्रमा, जीवियं दुप्पडिवूहगं, कामकामी खलु अयं
 पुरिसे, से सोयइ जूरइ तिप्पइ परित्त्पइ ॥सू० ९२॥ आययचवस्सु लोगवि-
 पस्सी लोगस्स अहो भागं जाणइ, उट्ठं भागं जाणइ, तिरियं भागं जाणइ,
 गट्ठिए लोए अणुपरियट्ठमाणो, संधिं विइत्ता इह मच्चिएहिं, एस दीरे
 पसंसिए जे बद्धे पडिमोयए, जहा अंतो तहा बाहिं, जहा बाहिं तहा अंतो,
 अंतो अंतो पुइदेहंतराणि पासइ, पुढोवि सव्वंताइं पंडिए पडिलेहाए
 ॥सू० ९३॥ से मइमं परिन्नाय मा य हु लालं पच्चासी, मा तेसु तिरिच्छम-
 ण्णाण—मावायए, कामंवासे खलु अयं पुरिसे, बहुमाई कडेण मूढे, पुणो तं
 करेइ लोहं, वेरं वड्ढेइ अण्णाणो, जमिणां परिकहिज्जइ इमस्स चेव पडिवूह-
 णायाए, अमरा य महासट्ठी अट्टमेयं तु पेहाए अपरिगणाए कंदइ ॥सू० ९४॥
 से तं जाणह जमहं बेमि, तेइच्छं पंडिए पवयमाणो से इंता छित्ता भित्ता

लुं पइत्ता विलुं पइत्ता उद्वइत्ता, अकडं करिस्सामित्ति मन्नमाणो, जस्सवि य
गां करेइ, अलं बालस्स संगेगां, जे वा से कारइ बाले, न एवं अणागारस्स
जायइ त्ति बेमि ॥सू० १५॥

॥ इति पंचमोद्देशकः ॥ २-५ ॥

॥ अध्ययनं-२ उद्देशकः-६ ॥

से तं संबुज्झमाणो आयाणीयं समुट्ठाय तम्हा पावकम्मं नेव कुज्जा,
न कारवेज्जा ॥सू० १६॥ सियो तत्थ एगयरं विप्परामुसइ छसु अन्नयरंमि,
कप्पइ सुहट्ठी लालप्पमाणो, सएणा दुवखेण मुढे विप्परियासमुवेइ, सएणा
विप्पमाणेण पुढो वयं पकुब्बइ, जंसिमे पाणा पव्वहिया, पडिलेहाए नो
निकरणायाए, एस परिन्ना पवुच्चइ, कम्मोवसंती ॥सू० १७॥ जे ममाइयमइं
जहाइ स चयइ माइयं, से हु दिट्ठपहे मुणी जस्स नत्थि ममाइयं, तं
परिन्नाय मेहावी विइत्ता लोगं वंता लोगसन्नं से मइमं परिकमिज्जासि त्ति
बेमि ॥ नारइं सहइ वीरे वीरे न सहइ रतिं ॥ जम्हा अविमणो वीरे, तम्हा
वीरे न रज्जइ ॥१॥ सू० १८॥ सहो फासे अहियासमाणो, निर्विद
नंदिं इह जीवियस्स । मुणी मोणां समायाय, धुणो कम्मसरीरगं ॥२॥ पंतं
लुहं सेवंति, वीरा संमत्तदंसिणो । एस ओहंतरे मुणी, तिन्ने मुत्ते विरए
वियाहिए ॥३॥ त्ति बेमि ॥सू० १९॥ दुव्वसुमुणी अणाणाए, तुच्छए
गिलाइ वत्तए, एस वीरे पसंसिए, अच्चेइ लोयसंजोगं, एस नाए पवुच्चइ
॥सू० १००॥ जं दुक्खं पवेइयं इह माणावाणं तस्स दुक्खस्स कुसला परिन्न-
मुदाहरंति, इह कम्मं परिन्नाय सब्बसो जे अणान्नदंसी से अणान्नारामे, जे
अणाराणारामे से अणान्नदंसी, जहा पुराणस्स कथइ तहा तुच्छस्स कथइ,
जहा तुच्छस्स कथइ तहा पुराणस्स कथइ ॥सू० १०१॥ अ वि य हणो,
अणाइयमाणो, इत्थंपि जाण सेयंति नत्थि केयं पुरिसे कं च नए ! एस
वीरे पसंसिए, जे बद्धे पडिमोयए, उड्डं अहं तिरियं दिसासु, से सब्बओ

सञ्चपरिन्नाचारी, न लिप्पइ छणपण्ण, वीरे, से मेहावि अणुग्घायणस्वेयन्ने
जे य बन्धपमुक्खमन्नेसी कुसले पुण नो बद्धे नो मुक्के ॥सू० १०२॥ से
जं च आरंभे जं च नारभे, अणारद्धं च न आरभे, छणं छणं परिणाय
लोगसन्नं च न सञ्चसो ॥सू० १०३॥ उइसो पासगस्स नत्थि, बाले पुणे
निहे कामसमण्णने, असमिथदुक्खे दुक्खी दुक्खाणमेव आवट्ठं अणुपरियट्ठइ
त्ति बेमि ॥सू० १०४॥

॥ इति षष्ठोद्देशकः ॥ २-६ ॥ इति द्वितीयमध्ययनम् ॥२॥

॥ ३ : शीतोष्णीयाध्ययनं-३ उद्देशकः-१ ॥

सुत्ता अमुणी सया मुणिणो जागरंति ॥सू० १०५॥ लोयंसि जाण
अहियाय दुक्खं, समयं लोगस्स जाणित्ता, इत्थ सत्थोवरण, जस्सिमे
सदा य रूवा य रसा य गंधा य फासा य अभिसमन्नागया भवंति
॥सू० १०६॥ से आयवं नाणवं वेयवं धम्मवं बंभवं पन्नाणेहिं परियाणइ
लोयं, मुणीति वुच्चे, धम्मविऊ उज्जू, आवट्ठसोए संगमभिजाणइ
॥सू० १०७॥ सीउसिणच्चाई से निग्गंथे अरइरइसंहे, करुसयं नो वेणइ,
जागरे वेरोवरण वीरे एवं दुक्खा पमुक्खसि, जरामच्चुवसोवणिण नरे सययं मूढे
धम्मं नाभिजाणइ ॥सू० १०८॥ पासिय आउरपाणे अप्पमत्तो, परिव्वए मंता य
मइमं, पास आरंभजं दुक्खमिणां ति गाच्चा, माइ पमाइ पुण एइ गब्भं, उवेह-
माणो सदरूवेसु उज्जू माराभिसंकी मरणा पमुच्चइ, अप्पमत्तो कामेहिं, उवरओ
पावकम्मेहिं, वीरे आयगुत्ते खेयन्ने, जे पज्जवजायसत्थस्स खेयणो, से
असत्थस्स खेयणो जे असत्थस्स खेयणो से पज्जवजायसत्थस्स खेयणो,
अकम्मस्स ववहारो न विज्जइ, कम्मुणा उवाही जायइ; कम्मं च पडिलेहाए
॥सू० १०९॥ कम्ममूलं च जं छणं, पडिलेहिय सव्वं सामायाय दोहिं
अतेहिं अदिस्समाणे तं परिन्नाय मेहावी विइत्ता लोगं वंता लोगसन्नं से
मेहावी परिकमिज्जासि त्ति बेमि ॥सू० ११०॥

॥ इति प्रथमोद्देशकः ॥ ३-१ ॥

॥ अध्ययनं-३ :: उद्देशकः-२ ॥

जाइं च बुद्धिं च इहऽज्ज ! पासे, भूएहिं जाणे पडिलेहसायं ॥ तम्हाऽति-
विज्जे परमंति णच्चा, संमत्तदंसी न करेइ पावं ॥१॥ उम्मुंच पासं इह
मच्चिएहिं, आरंभजीवी उभयाणुपस्सी ॥ कामेसु गिद्धा निचयं करंति, संसि-
च्चमाणा पुणरिति गब्भं ॥२॥ अवि से हासमासज्ज, हंता नंदीति मन्नइ ॥
अलं बालस्स संगेण, वेरं वड्ढेइ अप्पणो ॥३॥ तम्हातिविज्जो परमंति णच्चा,
आयंकदंसी न करेइ पावं ॥ अग्गं च मूलं च विगिंच धीरे, पलिच्छिदिया णं
निक्कमदंसी ॥४॥ एस मरणा पमुच्चइ, से हु दिट्ठमए मुणी, लोगंसि परमदंसी
विवित्तजीवी उवसंते समिए सहिए सयाजए कालकंखी परिवए, बहुं च खलु
पावं कम्मं पगडं ॥सू० १११॥ सिच्चंमि धिइं कुब्बहा, एत्थोवरए मेहावी
सव्वं पावं कम्मं जोसइ ॥सू० ११२॥ अणोगचित्ते खलु अयं पुरिसे, से
केयणं अरिहए पूरिणए, से अणवहाए अणपरियावाए अणपरिग्ग-
हाए, जणवयवहाए जणवयपरियावाए जणवयपरिग्गहाए ॥सू० ११३॥
आसेवित्ता एतं(वं) अट्ठं इच्चेवेगे समुट्ठिया, तम्हा तं विइयं नो सेवे,
निस्सारं पासिय नाणी, उववायं चवणं णच्चा अणणं चर माहणे से न
छणे न छणावए छणांतं नाणुजाणइ, निब्बिंद नंदिं, अरए पयासु, अणोम-
दंसी निसराणे पावेहिं कम्मेहिं ॥सू० ११४॥ कोहाइमाणं हणिया य वीरे,
लोभस्स पासे निरयं महंतं ॥ तम्हा य(हि) वीरे विरए वहाओ, छिंदिज्ज
सोयं लहुभूयगामी ॥१॥ गंथं परिणाय इहऽज्ज ! धीरे, सोयं परिणाय
चरिज्ज दंतं ॥ उम्मज्ज लद्धुं इह माणवेहिं, नो पाणिणं पाणे समारभिज्जा
सि ॥२॥ ति वेमि ॥

॥ इति द्वितीय उद्देशकः ॥ ३-२ ॥

॥ अध्ययन-३ :: उद्देशकः-३ ॥

संधिं लोयस्स जाणित्ता, आयओ बहिया पास, तम्हा न हंता, न वि धायए, जमिणं अन्नमन्नवित्तिगिच्छाए पडिलेहाए न करेइ पावं कम्मं, किं तत्थ मुणी कारणां सिया ? ॥सू० ११५॥ समयं तत्थुवेहाए अप्पाणां विप्पसायए— अणन्नपरमं नाणी, नोपमाए क्याइ वि । आयगुत्ते सया वीरे, जायामायाइ जावए ॥१॥ विरागं रूवेहिं गच्छिज्जा महया खुडुएहि य, आगइं गइं परिगणाय दोहिवि अतेहिं अदिस्समाणेहिं से न छिज्जइ, न भिज्जइ, न डज्जइ, न हंमइ कंचणां सब्वलोए ॥सू० ११६॥ अवरेण पुब्बि न सरंति एगे, किमस्स तीयं किं वाऽऽगमिस्सं । भासंति एगे इह माणवाओ, जमस्स तीयं तमागमिस्सं ॥१॥ (अवरेणपुब्बि किह से अतीतं, किह आगमिस्सं न सरंति एगे । आसंति एगे इह माणवाओ, नह से अईयं तह आगमिस्सं ॥१॥) नाईयमट्ठं न य आगमिस्सं, अट्ठं नियच्छन्ति तहागयाउ । विहुयकप्पे एयाणुपस्सी, निज्झोसइत्ता खवगे महेसी ॥२॥ का अरइ के आणांदे ?, इत्थंपि अग्गहे चरे, सब्वं हासं परिच्चज्ज आलीणगुत्तो परिव्वए, पुरिसा ! तुममेव तुमं मित्तं, किं बहिया मित्तमिच्छसि ? ॥सू० ११७॥ जं जाणिज्जा उच्चालइयं तं जाणिज्जा दूरालइयं, जं जाणिज्जा दूरालइयं तं जाणिज्जा उच्चालइयं, पुरिसा ! अत्ताणमेवं अभिणिगिज्झ एवं दुक्खा पमुच्चसि, पुरिसा ! सच्चमेव समभिजाणाहि, सच्चस्स आणाए से उवट्ठिए मेहावी मारं तरइ, सहिओ धम्ममायाय सेयं समणुपस्सइ ॥सू० ११८॥ दुहओ जीविअस्स परिवंदणाभाणापूयणाए जंसि एगे पमायंति ॥सू० ११९॥ सहिओ दुक्खमत्ताए पुट्ठो नो भंभाए, पासिमं दविए लोकालोकपवंचाओ मुच्चइ त्ति बेमि ॥सू० १२०॥

॥ इति तृतीयोद्देशकः ॥ ३-३ ॥

॥ अध्ययनं-३ :: उद्देशकः-४ ॥

से वंता कोहं च माणां च मायं च लोभं च, एयं पासगस्स दंसणां, उवरयसत्थस्स पलियंतकरस्स, आयाणां सगडब्भि ॥सू० १२१॥ जे एगं जाणाइ से सव्वं जाणाइ, जे सव्वं जाणाइ से एगं जाणाइ ॥सू० १२२॥ सव्वओ पमत्तस्स भयं, सव्वओ अपमत्तस्स नत्थि भयं, जे एगं नामे से बहुं नामे, जे बहुं नामे से एगं नामे, दुक्खं लोगस्स जाणित्ता वंता लोगस्स संजोगं जंति धीरा महाजाणां, परेण परं जंति, नावकंखंति जीवियं ॥सू० १२३॥ एगं विगिंचमाणे पुढो विगिंचइ, पुढोवि, सद्धी आणाए मेहावी लोगं च आणाए अभिसमिच्चा अकुओभयं, अत्थि सत्थं परेण परं, नत्थि च सत्थं परेण परं ॥सू० १२४॥ जे कोहदंसी से माणदंसी, जे माणदंसी से मायादंसी, जे मायादंसी से लोभदंसी, जे लोभदंसी से पिज्जदंसी, जे पिज्जदंसी से दोसदंसी, जे दोसदंसी से मोहदंसी, जे मोहदंसी से गव्वदंसी, जे गव्वदंसी से जम्मदंसी, जे जम्मदंसी से मारदंसी, जे मारदंसी से नरयदंसी, जे नरयदंसी से तिरियदंसी, जे तिरियदंसी से दुक्खदंसी । से मेहावी अभिणिवट्टिज्जा, कोहं च माणां च मायं च लोभं च पिज्जं च दोसं च मोहं च गव्वं च जम्मं च मारं च नरयं च तिरियं च दुक्खं च, एयं पासगस्स दंसणां उवरयसत्थस्स पलियंतकरस्स, आयाणां निसिद्धा सगडब्भि, किमत्थि ओवाही पासगस्स ? न विज्झइ ? नत्थि त्ति वेमि ॥सू० १२५॥

॥ इति चतुर्थ उद्देशकः ॥ ३--४ ॥ इति तृतीयमध्ययनम् ॥ ३ ॥

॥ ४ : सम्यक्त्वाध्ययनं-४ :: उद्देशकः-१ ॥

से वेमि जे अईया, जे य पडुपन्ना, आगमिस्सा अरहंता भगवंतो, ते सव्वे एवमाइक्खन्ति, एवं भासंति, एवं पणावित्ति, एवं परूवित्ति—सव्वे पाणा सव्वे भूया सव्वे जीवा सव्वे सत्ता न हंतवा, न अज्जावेयवा, न परिधि-

तत्त्वा, न परियावेयत्वा, न उद्देवेयत्वा, एस धम्मे शुद्धे निइए समिच्च लोयं
 खेयरगोहिं पवेइए, तं जहा-उट्टिएसु वा, अणुट्टिएसु वा, उवट्टिएसु वा,
 अणुवट्टिएसु वा, उवरयदंडेसु वा, अणुवरयदंडेसु वा, सोवहिएसु वा,
 अणोवहिएसु वा, संजोगरएसु वा, असंजोगरएसु वा, तच्चं चेयं तहा चेयं
 अस्सिं चेयं पवुच्चइ ॥सू० १२६॥ तं आइत्तु न निहे न निक्खिखवे जाणित्तु
 धम्मं जहा तहा दिट्ठेहिं निव्वेयं गच्छिज्जा, नो लोगस्सेसणं चरे ॥सू० १२७॥
 जस्स नत्थि इमा जाइ अरणा तस्स कत्थो सिया ?, दिट्ठं सुयं मयं विरणायं
 जं एयं परिकहिज्जइ, समेमाणा पलेमाणा पुणो पुणो जाइं पकप्पति
 ॥सू० १२८॥ अहो अ रात्थो य जयमाणो धीरे सया आगयपराणाणे पमत्ते
 बहिया पास, अप्पमत्ते सया परिकमिज्जासि त्ति बेमि ॥सू० १२९॥

॥ इति प्रथमोद्देशकः ॥ ४-१ ॥

॥ अध्ययनं-४ :: उद्देशकः-२ ॥

जे आसवा ते परिस्सवा, जे परिस्सवा ते आसवा, जे अणासवा ते
 अपरिस्सवा, जे अपरिस्सवा ते अणासवा, एए पए संबुज्झमाणो लोयं च
 आणाए अभिसमिच्चा पुढो पवेइयं ॥सू० १३०॥ आघाइ नाणी इह माणावाणं
 संसारपडिविणाणां संबुज्झमाणाणां (आघाइ धम्मं खलु से जीवाणां, तं जहा
 संसारपडिविन्नाणां माणासभवत्थाणां आरंभविणईणां दुक्खुव्वेअसुहेसगाणां
 धम्मसवणागवेसयाणां सुस्सुसमाणाणां पडिपुच्छमाणाणां) विन्नाणापत्ताणां,
 अट्ठावि संता अदुवा पमत्ता अहा सच्चमिणां तिवेमि, नाणागमो मच्चुमुहस्स
 अत्थि, इच्छा पणीया वंका निकेया कालगहिया निचयनिविट्ठा पुढो पुढो
 जाइं पकप्पयंति (एत्थ मोहे पुणो पुणो) ॥सू० १३१॥ इहमेगेसिं तत्थ तत्थ
 संथवो भवइ अहोववाइए फासे पडिसेवेयंति, चिट्ठं कम्मेहिं कूरेहिं चिट्ठं
 परिचिट्ठइ, अचिट्ठं कूरेहिं कम्मेहिं नो चिट्ठं परिचिट्ठइ, एगे वयंति
 अदुवावि नाणी, नाणी वयंति अदुवावि एगे ॥सू० १३२॥ आवंती

केयावन्ती लोयंसि समणा य माहणा य पुढो विवायं वयंति, से दिट्ठं च गो, सुयं च गो, मयं च गो, विराणायं च गो, उट्ठं अहं तिरियं दिसासु सव्वओ सुपडिलेहियं च गो-सव्वे पाणा, सव्वे जीवा, सव्वे भूया, सव्वे सत्ता, हन्तव्वा अज्जावेयव्वा, परियावेयव्वा, परिघेत्तव्वा, उद्देवेयव्वा, इत्थं वि जाणाह नत्थित्थ दोसो अणारिय वयणमेयं; तत्थ जे आरिया ते एवं वयासी-से दुट्ठिड्ठं च भे, दुस्सुयं च भे, दुम्मयं च भे, दुविराणायं च भे, उट्ठं अहं तिरियं दिसासु सव्वओ दुप्पडिलेहियं च भे, जं गां तुब्भे एवं आइक्खह, एवं भासह, एवं परूवेह, एवं पराणावेह-सव्वे पाणा (४) हंतव्वा (५), इत्थं वि जाणाह नत्थित्थ दोसो, अणारिय-वयणमेयं, वयं पुण एवमाइक्खामो, एवं भासामो, एवं परूवेमो, एवं पराणावेमो-सव्वे पाणा (४) न हंतव्वा १ न अज्जावेयव्वा २ न परिघि-त्तव्वा ३ न परियावेयव्वा ४ न उद्देवेयव्वा ५, इत्थं वि जाणाह नत्थित्थ दोसो आयरियवयणमेयं पुवं निकाय समयं पत्तेयं पत्तेयं पुच्छिस्सामि, हं भो पावाइया (पावाउया) ? किं भे सायं दुक्खं उयाहु असायं ? समिया पडिवराणो यावि एवं बूया-सव्वेसि पाणाणां, सव्वेसि भूयाणां, सव्वेसि जीवाणां, सव्वेसि सत्ताणां असायं अपरिनिव्वाणां महम्मयं दुक्खं त्ति बेमि ॥सू० १३३॥

॥ इति द्वितीय उद्देशकः ॥४-२॥

॥ अध्ययनं-४ :: उद्देशकः-३ ॥

उवेहि गां बहिया य लोगं, से सव्वलोगंमि जे केइ विराणा, अणुवीइ पास निक्खित्तदंडा, जे केइ सत्ता पलियं वयंति, नरा मुयच्चा धम्मविउत्ति अंजू, आरंभजं दुक्खमिणां ति गाच्चा, एवमाहु संमत्तदंसिणो, ते सव्वे पावाइया दुक्खरस कुसला परिणामुदाहरंति इय कम्मं परिणाय सव्वसो ॥सू० १३४॥ इह आणाकंखी पंडिए अणिहे, एगमप्पाणां सपेहाए धुरो सरीरं, कसेहि अप्पाणां जरेहि अप्पाणां-जहा जुनाइं कट्ठाइं हव्ववाहो पमत्थइ । एवं अत्तसमाहिए अणिहे, विगिंच कोहं अविकंपमाणो

॥सू० १३५॥ इमं निरुद्धाउयं संपेहाए, दुक्खं च जाण अदु आगमेस्सं, पुढो फासाइं च फासे, लोयं च पास विपदमाणां, जे निव्वुडा पावेहिं कम्मेहिं अणियाणा ते वियाहिया, तम्हा अतिविजो नो पडिसंजलिज्जासि त्ति बेमि ॥सू० १३६॥

॥ इति तृतीय उद्देशकः ॥ ४-३ ॥

॥ अध्ययन-४ :: उद्देशकः-४ ॥

आवीलए पवीलए निप्पीलए जहिता पुव्वसंजोगं हिच्चा उवसमं, तम्हा अविमणो वीरे, सारए समिए सहिए सया जए, दुरणुचरो मग्गो वीराणां अनियट्टगामीणां, विगिच मंससोणियं, एस पुरिसेदविए वीरे, आयाणिज्जे वियाहिए, जे धुणाइ समुस्सयं वसित्ता बंभचेरंसि ॥सू० १३७॥ नित्तेहिं पलिच्छिन्नेहिं आयाणसोयगड्डिए बाले, अव्वोच्छिन्नबंधणो अण-भिक्कंतसंजोए तमंसि अविआणओ आणए लंभो नत्थि त्ति बेमि ॥सू० १३८॥ जस्स नत्थि पुरा पच्छा मज्जे तस्स कुओ सिया ?, से हु पन्नाणमंते बुद्धे आरंभोवरए संममेयंति पासह, जेण बंधं वहं घोरं परियावं च दारुणं पलिच्छिंदिय बाहिरगं च सोयं, निवकंमदंसी इह मच्चिएहिं, कम्माणं सफलं दट्टुण तओ निज्जाइ वेयवी ॥सू० १३९॥ जे खलु भो ! वीरा ते समिया सहिया सया जया संघदंसिणो आओवरया अहातहं लोयं उवेह-माणा पाइणं पडिणं दाहिणं उड्ढं इय सच्चंसि परि(चिए)चिट्ठिसु, साहिस्सामो नाणं वीराणां समियाणां सहियाणां सयाजयाणां संघदंसीणां आओवरयाणां अहातहं लोयं समुवेहमाणाणां किमत्थि उवाही ?, पासगस्स न विज्जइ नत्थि त्ति बेमि ॥सू० १४०॥

॥ इति चतुर्थ उद्देशकः ॥ ४-४ ॥ इति चतुर्थमध्ययनम् ॥ ४ ॥

॥५॥ लोकसाराध्ययनं-५ :: उद्देशकः-१ ॥

आवंती केयावंती लोयंसि विपरामुसंति अट्टाए अणट्टाए, एएसु चेव विपरामुसंति, (जावंति केइ लोए छकायवहं समारभंति अट्टाए अणट्टाए) गुरु से कामा, तत्रो से मारंते, जत्रो से मारंते तत्रो से दूरे, नेव से अंतो नेव दूरे ॥सू० १४१॥ से पासइ कुसियमिव कुसग्गे पणुन्नं निवइयं वाएरियं एवं बालस्स जीवियं मंदस्स अविआणत्रो, कुरां कम्माइं बाले पकुच्चमाणो, तेण दुक्खेण मूढे विपरिआसमुवेइ, मोहेण गब्भं मरणाइ एइ, एत्थ मोहे पुणो पुणो ॥सू० १४२॥ संसयं परिआणत्रो संसारे परिआण भवइ, संसयं अपरिआणत्रो संसारे अपरिआण भवइ ॥सू० १४३॥ जे छेए से सागारियं न सेवइ, कट्ठं एवमविआणत्रो बिइआ मंदस्स बालया, (जे खलु विसए सेवइ, सेवित्ता वा णालोएइ, परेण वा पुट्ठो निगहवइ अहवा तं परं सएण वा दोसेण पाविट्ठयरेण वा दोसेण उवल्लिपिज्जति) लद्धा दुरत्था पडिलेहाए आगमिता आणविज्जा अणासेवणय त्ति बेमि ॥सू० १४४॥ पासह एगे ख्वेसु गिद्धे परिणिज्जमाणो, इत्थ फासे पुणो पुणो, (एत्थ मोहे पुणो पुणो) आवंती केयावंती लोयंसि आरंभजीवी, एएसु चेव आरंभजीवी, इत्थवि बाले परिपच्चमाणो रमइ पावेहिं कम्मेहिं असरणे सरणांति मन्नमाणो, इहमेगेसिं एगन्नरिया भवइ, से बहुकोहे बहुमाणो बहुमाए बहुलोभे बहुरए बहुनडे बहुसदे बहुसंकप्पे आसवसत्ती पलिउच्छन्ने उट्ठियवायं पवयमाणो, मा मे केइ अदक्खु अन्नायपमादोसेणं, सययं मूढे धम्मं नाभिजाणइ, अट्टा पया माणव ! कंमकोविया जे अणुवरया अविज्जाए पलिमुक्खमाहु आवट्टमेव अणुपरियट्ठंति त्ति बेमि ॥सू० १४५॥

॥ इति प्रथमोद्देशकः ॥ ५-१ ॥

॥ अध्ययनं-५ :: उद्देशकः-२ ॥

आवन्ती केयावन्ती लोए अणारंभजीविणो तेसु, एत्थोवरए तं भोसमाणो, अयं संधीति अदवखु, जे इमस्स विग्गहस्स अयं खणो त्ति अन्नेसी एस मग्गे आरिएहिं पवेइए, उट्टिए नो पमायए, जाणित्तुं दुक्खं पत्तेयं सायं, पुटोछंदा इह माणवा पुटो दुक्खं पवेइयं, से अविहिंसमाणो अणवयमाणो, पुटो फासे विपणुन्नए ॥सू० १४६॥ एस समिधा परियाए वियाहिए, जे असत्ता पावेहिं कम्मेहिं उदाहु ते आयंका फुसंति, इति उदाहु धीरे ते फासे पुटो अहियासइ, से पुब्बिपेयं पच्छापेयं भेउरधम्मं, विद्धंसणधम्ममधुवं, अणिइयं, असासयं चयावचइयं, विप्परिणामधम्मं, पासह चेयं रूवसंधिं ॥सू० १४७॥ समुप्पेहमाणस्स इकाययणारयस्स इह विप्पमुक्कस्स नत्थि मग्गे विरयस्स त्ति बेमि ॥सू० १४८॥ आवन्ती केयावन्ती लोगंसि परिग्गहावन्ती, से अप्पं वा बहुं वा अणुं वा थूलं वा चित्तमंतं वा अचित्तमंतं वा एएसु चेव परिग्गहावन्ती, एतदेव एगेसिं महब्भयं भवइ, लोगवित्तं च णं उवेहाए, एए संगे अवियाणओ ॥सू० १४९॥ से सुपडिबद्धं सूवणीयंति नच्चा पुरिसा परमचक्खु विपरिक्कमा, एएसु चेव बंभचेरं त्ति बेमि, से सुयं च मे, अज्झत्थयं च मे, बंधपमुक्खो अज्झत्थेव, इत्थ विरए अणुगारे दीहरायं तित्तिक्खए, पमत्ते बहिया पास, अप्पमत्तो परिव्वए, एयं मोणां सम्मं अणुवासिज्जासि त्ति बेमि ॥सू० १५०॥

॥ इति द्वितीय उद्देशकः ॥ ५-२ ॥

॥ अध्ययनं-५ :: उद्देशकः-३ ॥

आवन्ती केयावन्ती लोयंसि अपरिग्गहावन्ती, एएसु चेव अपरिग्गहावन्ती, सुच्चा वइ मेहावी पंडियाण निसामिधा समियाए धम्मे आरिएहिं पवेइए जहित्थ मए संधी भोसिए, एवमन्नत्थ संधी दुज्जोसए भवइ, तम्हा बेमि नो निहणिज्ज वीरियं ॥सू० १५१॥ जे पुब्बुट्ठाइ नो पच्छान्निवाइ,

जे पुब्बुट्ठाइ पच्छानिवाइ जे नो पुब्बुट्ठायी नो पच्छानिवाइ, सेऽवि
तारिसिए सिया, जे परिन्नाय लोगमन्नेसयंति ॥सू० १५२॥ एयं नियाय
मुणिया पवेइयं, इह आणाकंखी पंडिए अणिए, पुब्बावररायं जयमाणो,
सया सीलं सुपेहाए सुणिया भवे अकामे अभंभे, इमेण चैव जुज्झाहि
किं ते जुज्जेण वज्जभूयो ? ॥सू० १५३॥ जुद्धारिहं खलु दुल्लहं, जहित्थ
कुसलेहिं परिन्नाविवेगे भासिए, चुए हु बाले गव्भाइसु रजइ (रिज्जइ) अस्सि
चेयं पवुच्चइ, रुवंसि वा, छणांसि वा से हु एगे संविद्धपहे (संवद्धिभये-
संचिदुपहे) मुणी, अन्नहा लोगमुवेहमाणो, इय कम्म परिणाय सव्वसो से न
हिसइ, संजमइ नो पगव्भइ, उवेहमाणो पत्तेय सायं, वराणाएसी नारंभे
कंचां सव्वलोए एगप्पमुहे विदिसप्पइन्ने निव्विराणाचारी अरए पयासु
॥सू० १५४॥ से वसुमं सव्वसमन्नागयपन्नाणेणं अप्पाणेणं अकरणिज्जं
पावकम्मं तं नो अन्नेसी, जं संमंति पासहा तं मोणांति पासहा, जं मो-
णांति पासहा तं संमंति पासहा, न इमं सक्कं सिद्धिलेहिं अदिज्जमाणेहिं
गुणासाएहिं वंकसमायारेहिं पमत्तेहिं गारमावसंतेहिं, मुणी मेणां समायाए
धुणे सरीरगं पंतं लुहं सेवंति वीरा सम्मत्तदंसिणो, एस ओहन्तरे मुणी,
तिगणे मुत्ते विरए वियाहिए त्ति वेमि ॥सू० १५५॥

॥ इति तृतीयोद्देशकः ॥ ५-३ ॥

॥ अध्ययनं-५ :: उद्देशकः-४ ॥

गामाणुगामं दूइज्जमाणस्स दुज्जायं दुप्परक्कंतं भवइ अवियत्तस्स
भिक्षुणो ॥सू० १५६॥ वयसावि एगे बुइया कुप्पंति माणवा, उन्नयमाणो
य नरे महया, मोहेण मुज्झइ, संवाहा बहवे भुज्जो (२) दुरइक्कम्मा अन्नाणयो
अपासयो, एयं ते मा होउ, एयं कुसलस्स दंसणां, तदिट्ठिए तम्मत्तिए तप्पुर-
कारे तस्सन्नी तन्निवेसणो, जयं विहारी चित्तनिवाइ पंथभिज्झाइ पलिवाहिरे,
पासिय पाणो गच्छिज्जा ॥सू० १५७॥ से अभिक्कममाणो, पडिक्कममाणो

संकुचमाणौ पसारमाणौ विणिवट्टमाणौ संपलिज्जमाणौ, एगया गुणसमियस्स
रीयओ कायसंकासं समणुचिन्ना एगतिया पाणा उदायंति, इहलोग वेयणा-
विज्जावडियं, जं आउट्टिकयं कम्मं तं परिन्नाय विवेगमेइ, एवं से अप्पमाण
विवेगं किट्टइ वेयवी ॥सू० १५८॥ से पभूयदंसी पभूयपरिन्नाणो उवसंते
समिए सहिए सयाजए, दट्टुं विप्पडिवेणइ अप्पाणं किमेस जणो करिस्सइ ?
एस से परमारामो जाओ लोगंमि इत्थीओ, मुणीणा हु एयं पवेइयं,
उव्वाहिज्जमाणो, गामधम्मेहिं अबि निव्वलासए अवि ओमोयरियं कुज्जा,
अवि उट्टं ठणं अइज्जा, अवि गामाणुगाम दूइज्जिज्जा, अवि आहारं
वुच्छिदिज्जा, अवि चए इत्थीसु मणां, पुव्वं दडा पच्छा फासा, पुव्वं फासा
पच्छा दंडा, इच्चेए कज्जहासंगकरा भवंति, पडिलेहाए आगमिन्ता आणा-
विज्जा अणासेवणाए त्तिबेमि, से नो काहिए नो पासणिए नो संपसारणिए
नो मामए णो कयकिरिए वइगुत्ते अज्झमसंबुडे परिवज्जइ सया पावं एयं मोणं
समणुवासिज्जासि त्तिबेमि ॥सू० १५९॥

॥ इति चतुर्थे उद्देशकः ॥ ५-४ ॥

॥ अध्ययनं-५ :: उद्देशकः-५ ॥

से बेमि तं जहा-अवि हरए पडिपुणो समंसि भोमे चिट्ठइ उवसं-
तरए सारक्खमाणो, से चिट्ठइ सोयमज्जमए से पास सव्वओ गुत्ते, पास लोए
महेसिणो जे य पन्नाणमंता पबुद्धा आरम्भोवरया सम्ममेयंति पासह, कालस्स
कंखाए परिव्वयंति त्ति बेमि ॥सू० १६०॥ वितिगिच्छसमावन्नेणं अप्पाणोणं
नो लहइ समाहिं, सिया वेगे अणुगच्छंति असिता वेगे अनुगच्छंति
अणुगच्छमाणोहिं अणुगच्छमाणो कहां न निव्विज्जे ? ॥सू० १६१॥
त्तमेव सच्चं नीसंकं जं जिणोहिं पवेइयं ॥सू० १६२॥ सडिस्स णं समणु-
नस्स संपव्वयमाणस्स समियंति मन्नमाणस्स एगया समिया होइ १, समियंति
अन्नमाणस्स एगया असमिया होइ २, असमियंति मन्नमाणस्स एगया समिया

होइ ३, असमियंति मन्नमाणस्स एगया असमिया होइ ४, समिर्यति मन्नमा-
णास्स समिया वा असमिया वा समिया होइ उवेहाए ५, असमिर्यति
मन्नमाणस्स समिया वा असमिया वा असमिया होइ उवेहाए ६, उवेहमाणो
अणुवेहमाणं ब्रूया-उवेहाहि समियाए, इच्चैर्वं तत्थ संधी भोसियो भवइ,
से उट्टियस्स ठि-स्स गइं समणुपासह, इत्थवि बालभावे अप्पाणं नो उव्वं-
मिज्जा ॥सू० १६३॥ तुमंसि नाम सच्चैव जं हंतव्वंति मन्नसि, तुमंसि
नाम सच्चैव जं अज्जवेयव्वंति मन्नसि, तुमंसि नाम सच्चैव जं परियावेय-
व्वंति मन्नसि, एवं जं परिघित्तव्वंति मन्नसि, जं उदवेयव्वंति मन्नसि, अज्ज
चेयपडिबुद्धजीवी, तम्हान हंता नवि घायए, अणुसंवेयणमप्पाणोणं जं हंतव्वं
नामिपत्थए ॥सू० १६४॥ जे आया से विन्नाया, जे विन्नाया से आया,
जेण वियाणइ से आया, तं पडुच्च पडिसंखाए, एस आयावाइ समियाए
परियाए वियाहिए चिबेसि ॥सू० १६५॥

॥ इति अचमोर्देशकः ॥ ५-५ ॥

॥ अध्ययनं-५ :: उद्देशकः-६ ॥

अणाणए एगे सोवट्ठाणा आणाए एगे निरुवट्ठाणा, एयं ते म्हा
होउ, एयं कुसलस्स दंसणं, तदिट्ठीए तम्मुत्तीए तप्पुरकारे तस्सन्नी तन्निक्खेणो
॥सू० १६६॥ अभिभूय अट्ठस्सु अणभिभूए पभू निरालंबणयाए जे महं
अबहिमणो, पवाएण प्रवायं जाणिज्जा, सहसंमइयाए परवागरणोणं अन्नेसि
वा अंतिए सुच्चा ॥सू० १६७॥ निहंसं नाइवट्टेज्जा मेहावी सुपडिलेहिया
सव्वथो सव्वधणा सम्मं समभिणाय, इह आरामं परिणाय अल्लीणागुत्ते
आरामो परिज्जए निट्टियट्ठी वीरे आगमेण सथा परकमे ॥सू० १६८॥
उद्धं सोया अहे सोया, तिरियं सोया वियाहिया । एए सोया विअक्खाया,
जेहि संगंति पासह ॥१॥ आवट्ठं तु पेहाए इत्थ विरमिज्ज वेयवी, विणइत्तु
सोयं निक्खम्म एसमहं अकम्मा जाणइ पासइ पडिलेहाए नावकंखइ इह

आगइं गइं परिन्नाय ॥सू० १६१॥ अच्चेइ जाइमरणस्स वट्टमगं विक्खा-
यरए, सव्वे सरा नियट्ठंति, तक्का जत्थ न विज्जइ, मइ तत्थ न गाहिया,
ओए, अप्पइट्ठाणस्स खेयन्ने, से न दीहे न हस्से न वट्ठे न तंसे न चउरंसे न
परिमंडले न किणहे न नीले न लोहिए न हालिहे ने सुक्खिल्ले न सुरभि-
गंधे न दुरभिगंधे न तित्ते न कडुए न कसाए न अंबिले न महुरे न कक्खडे
न मउए न गरुए न लहुए न उराहे न निद्धे न लुवखे न काऊ न रूहे न
संगे न इत्थी न पुरिसे न अन्नहा, परिन्ने सन्ने उवमा न विज्जए, अरूवी
सत्ता अपयस्स पयं नत्थि ॥सू १७०॥ से न सद्दे न रूवे न गंधे न रसे न
फासे इच्चेव त्तिबेमि ॥सू० १७१॥

॥ इति षष्ठ उद्देशकः ॥ ५-६ ॥ इति पंचममध्ययनम् ॥ ५ ॥

॥ ६ ॥ धूताध्ययनं-६ :: उद्देशकः-१ ॥

ओबुज्झमाणो इह माणवेसु आघाइ से नरे, जस्स इमाओ जाइओ
सव्वओ सुपडिलेहियाओ भवंति, आघाइ से नाणमणोलिसं, से किट्ठइ तेसिं
समुट्ठियाणं निक्खित्तंराडाणं समाहियाणं पन्नाणमंताणं इह मुत्तिमगं, एवं
(अवि) एगे महावीरा विपरिकमंति पासह एगे अवसीयमाणो अणत्तपन्ने से
बेमि, से जहावि (सेवि) कुंमे हरए विणिविट्ठचित्ते पच्छन्नपलासे उम्मगं से
नो लहइ भंजगा इव संनिवेसं नो चयंति, एवं (अवि) एगे अणोगरूवेहिं
कुलेहिं जाया रूवेहिं सत्ता कलुणं थणंति, नियाणओ ते न लभंति
मुक्खं, अह पास तेहिं कुलेहिं आयत्ताए जाया ॥१७२॥ गंडी अहवा
कोढी, रायंसी अवमारियं । काणियं भिमियं चेव, कुणियं खुज्जियं
तहा ॥१॥ उदरिं च पास मूयं च, सूणीयं च गिलासणिं । वेवइं
पीढसप्पिं च, सिलिवयं महुमंहाणि ॥२॥ सोलस एए रोगा, अक्खाया
अणुपुव्वसो । अह गां फुसंति आयंका, फासा य असमंजसा ॥३॥ मरणं
तेसिं संपेहाए उववायं चवणां च नच्चा, परियागं च संपेहाए ॥सू० १७३-७६॥

तं सुणोह जहा तहा संति पाणा अंधा तमसि वियाहिया, तामेव सइं
असइं अइअव उच्चावयफामे पडिसंवेइ, बुद्धेहिं एयं पवेइयं—संति पाणा
वासगा रसगा उदए उदए चरा आगासगामिणो पाणा पाणे किलेसंति, पास
लोए महब्भयं ॥सू० १७७॥ बहुदुक्खा हु जन्तवो, सत्ता कामेसु
माणवा, अबलेण वहं गच्छन्ति सरीरेणं पभंगुरेण अट्टे से बहुदुक्खे इइ
बाले पकुब्बइ एए रोगा बहू नच्चा आउरा परियावए नालं पास, अलं
तवेएहिं, एयं पास मुणी ! महब्भयं नाइवाइज्ज कंचणं ॥सू० १७८॥
आयाण भो सुस्सुस ! भो धूयवायं पवेयइस्सामि, (धुतोवायं पवेयंति)
इह खलु अत्तत्ताए तेहिं तेहिं कुलेहिं अभिसेएण अभिसंभूया अभिसंजाया
अभिनिव्वुडा अभिसंबुद्धा अभिसंबुद्धा अभिनिक्कंता अणुपुव्वेण महामुणी
॥सू० १७९॥

तं परिक्रमंतं परिदेवमाणा मा चयाहि इय ते वयंति—छंदोवणीया
अज्झोववन्ना अक्कंदकारी जणगा रुयंति अतारिसे मुणी (ण य) ओहं
तरए जणगा जेण विप्पजढा, सरणं तत्थनो समेइ, कहं नु नाम से तत्थ
रमइ ?, एयं नाणं सया समणुवासिज्जासि त्ति वेमि ॥सू० १८०॥

॥ इति प्रथमोद्देशकः ॥६-१॥

॥ अध्ययनं-६ :: उद्देशकः-२ ॥

आउरं लोगमायाए चइत्ता पुव्वसंजोगं हिच्चा उवसमं वसित्ता बंभचे-
रंसि वसु वा अणुवसु वा जाणित्तु धम्मं अहा तहा अहेगे तमचाइ कुसीला
॥सू० १८१॥ वत्थं पडिग्गहं कंबलं पायपुच्छणं विउसिज्जा, अणुपुव्वेण
अणहियासेमाणा परीसहे दुरहियासए, कामे ममायमाणस्स इयाणि वा
मुहुत्तेण वा अपरिमाणाए भेए, एवं से अंतराएहिं कामेहिं आकेवल्लिएहिं
अवइन्ना चेए ॥सू० १८२॥ अहेगे धम्ममायाय आयाणप्पभिइसु पण्हिए
चरे अप्पलीयमाणो दढे सव्वं गिद्धि परिन्नाय, एस पणए महामुणी,

अइअच्च सव्वओ संगं न महं अत्थित्ति इय एगो अहं, अस्सि जयमाणो इत्थ विरए अणगारे सव्वओ मुंडे रीयंते, जे अचेले परिवुसिए संचिवखइ ओमोयरियाए, से आकुट्ठे वा हए वा लुंचिए (लूसिए) वा पलियं पकत्थ अदुवा पकत्थ अतहेहिं सदफासेहिं इय संखाए एगयरे अन्नयरे अभिन्नाय तित्तिवखमाणो परिव्वए जे य हिरी जे य अहिरीमाणा (मणा)।।सू० १८३।। चिच्चा सव्वे विसुत्तियं फासे समियदंसणे, एए भो एगिणा वुत्ता जे लोगंसि अणागमणा-धम्मिणो अणाए मामगं धम्मं एस उत्तरवाए इह माणावाणं वियाहिए, इत्थेवरए तं भोसमाणो आयाणिज्जं परिन्नाय परिव्वएणा, विगिंचइ, इह एगोसि एगवरिया होइ तत्थियरा इयरेहिं कुलेहिं सुद्धेसणाए सव्वेसणाए से मेहावी परिव्वए सुब्बिं अदुवा दुब्बिं अदुवा तत्थ भेरवा पाणापाणो किलेसेति, ते फासे पुट्ठो धीरे अहियासिज्जासि त्ति वेमि ।।सू० १८४।।

॥ इति द्वितीयोद्देशकः ॥ ११ ६-२ ॥

॥ अध्ययनं--६ :: उद्देशकः--३ ॥

एयं खु मुणी आयाणं सदा सुयवखा-धम्मं विद्वयकण्णे निज्भोसइत्ता, जे अचेले परिवुसिए तस्स णं भिक्खुस्स नो एवं भवइ-परिजुराणो मे वत्थं वत्थं जाइस्सामि, सुत्तं जाइस्सामि, सूदं जाइस्सामि संधिसामि सीविस्सामि उक्कसिस्सामि वुक्कसिस्सामि परिहिसामि पाउणिसिस्सामि, अदुवा तत्थ परिकमंतं भुज्जो अचेले तणाफासा फुसेति, सीयफासा फुसेति, तेउफासा फुसेति, दंसमसगफासा फुसेति, एयगरे अन्नयरे विरूवरूवे फासे अहियासेइ अचेले लाघवे आगममाणो, (एवं खलु से उवगरणालाघवियं तवे कम्मवखय-कारणं करेइ) तवे से अभिसमन्नागए भवइ, जहेयं भगवदा पवेइयं तमेव अभिसमिच्चा सव्वओ सव्वत्ताए सेमत्तमेव समभिजाणिज्जा, एवं तेसिं महा-वीराणं चिररायं पुव्वाडं वासाणि रीयमाणानां दवियाणं प्रास अहियासियं

॥सू० १८५॥ आगयपन्नाणाणं किंसा बाहवो भवंति पाणुर य मंससोणिण
विस्सेणि कट्ठु परिन्नाय, एस तिगणे मुते विरए दियाहिण त्ति वेमि
॥सू० १८६॥ विरयं भिक्खुं रीयंतं चिररात्रो मियं अरइ तत्थ किं
विधारण ? , संघेमाणे समुट्टिए, जहा से दीवे असंदीणे, एवं से धम्मे आरिय-
पदेसिए, ते अणुवकंखमाणा पाणे अणुइवाएमाणा जइया मेहाविणो पंडिया,
एवं तेसि भगवत्थो अणुट्ठाणे जहा से दियापोए एवं ते सिस्सा दिया य
रात्थो य अणुपुब्बेण वाइय त्ति वेमि ॥सू० १८७॥

॥ इति तृतीयोद्देशकः ॥ ६-३ ॥

॥ अध्ययनं--६ :: उद्देशकः--४ ॥

एवं ते सिस्सा दिया य रात्थो य अणुपुब्बेण वाइया तेहिं महावीरेहिं
पन्नाणमन्तेहिं तेसिमंतिण पन्नाणमुवलब्भ हिच्चा उवसमं फारुसियं समाइयंति,
वसित्ता वंभचेरंसि आणं तं नोत्ति मन्नमाणा आवायं तु सुच्चा निसम्म,
समणुन्ना जीविस्सामो एगे निक्खमंते असंभवता विडज्जमाणा कामेहिं
गिद्धा अज्झोववन्ना समाहिमाघायमजोसयंता सत्थारमेव फरुसं वयंति
॥सू० १८८॥ सीलमता उवसंता संखाए रीयमाणा असीला अणुवयमा-
णास्स विइया मंदस्स बाला ॥सू० १८९॥ नियट्टमाणा वेगे आयरगोयर-
माइक्खंति, नाणब्भट्ठा दंसणलूसिणो ॥सू० १९०॥ नममाणा वेगे जीवियं
विप्परिणामंति पुट्ठा वेगे नियट्टंति जीवियस्सेव कारणा, निक्खंतंति तेसिं
दुन्निक्खंतं भवइ, बालवयणिज्जा हु ते नरा, पुणो पुणो जाइं पकप्पंति अहे
संभवता विद्वायमाणा अहमंसीति विउक्कसे उदासीणे फरुसं वयंति, पलियं
पकथे अदुवा पकथे अतहेहिं तं वा मेहावी जाणिज्जा धम्मं ॥सू० १९१॥
अहम्मट्ठी तुमंसि नाम बाले आरंभट्ठी अणुवयमाणे हण पाणे घायमाणे हणत्थो
यावि समणुजाणमाणे घोरे धम्मे, उदीरिए उवेहइ णं अणाणाए एस विसन्ने
विद्दे दियाहिण त्ति वेमि ॥सू० १९२॥ किमणेण भो ! जणेण करिस्सामित्ति

मन्नमाणो एवं एगे वडत्ता मायरं पियरं हिच्चा नायत्रो यपरिग्गहं वीरायमाणा
समुट्ठाए अविहिंसया सुव्वया दंता (समणा भविस्सामो अणगारा अकिंचणा अपुत्ता
अपसुया अविहिंसया सुव्वया दंता परदत्तभोइणो पावं कम्मं न करेस्सामो
समुट्ठाए) पस्स दीणो उप्पइए पडिवयमाणो वसट्ठा कायरा जणा लूसगा
भवंति, अहमेगेसिं सिलोए पावए भवइ, से समणो भवित्ता विव्वंते २
पासहेगे समन्नागएहिं सइ असमन्नागए नममाणोहिं अनममाणो विरएहिं
अविरए दविएहिं अदविए अभिसमिच्चा पंडिए मेहावी निट्ठियट्ठे वीरे
आगमेणं सया परक्कमिज्जासिं ति वेमि ॥सू० १६३॥

॥ इति चतुर्थ उद्देशकः ॥ ६-४ ॥

॥ अध्ययनं-६ :: उद्देशकः-५ ॥

से गिहेसु वा गिहंतरेसु वा गामेसु वा गामंतरेसु वा नगरेसु वा नगरं-
तरेसु वा जणवयेसु वा जणवयंतरेसु वा गामनगरंतरे वा गामजणवयंतरे वा नगर-
जणवयंतरे वा संतेगइया जणा लूसगा भवंति अदुवा फासा कुसंति ते फासे
पुट्ठे वीरो अहियासए, ओए समियदंसणो, दयं लोगस्स जाणित्ता पाइणं
पडोणं दाहिणं उदीणं आइक्खे, विभए किट्ठे वेयवि, से उट्ठिएसु वा अणट्ठिएसु
वा सुस्सूसमाणेसु पवेयए संतिं विरइं उवसमं निव्वाणं सोयं अज्जवियं
मइवियं लाववियं अणइवत्तियं सव्वेसिं पाणाणं सव्वेसिं भूयाणं सव्वेसिं
सत्ताणं सव्वेसिं जीवाणं अणुवीइ भिक्खू धम्ममाइक्खिज्जा ॥सू० १६४॥
अणुवीइ भिक्खू धम्ममाइक्खमाणो नो अत्ताणं आसाइज्जा नो परं आसा-
इज्जा नो अन्नाइं पाणाइं भूयाइं जीवाइं सत्ताइं आसाइज्जा से अणासायए
अणासायमाणो वज्जमाणाणं पाणाणं भूयाणं जीवाणं सत्ताणं जहा से दीवे
असंदीणो एवं से भवइ सराणं महामुणी, एवं से उट्ठिए ठिय्पा अणिहे
अचले चले अवहिल्लेसे परिव्वए संक्खाय पेसत्तं धम्मं दिट्ठिं परिनिव्वुडे,
तम्हा संगंति पासह गंथेहिं गदिया नरा विसन्ना कामक्कंता तम्हा लूहात्रो

नो परिवित्तसिज्जा, जस्सिमे आरंभा सव्वओ सव्वण्णयाए सुपरिन्नाया भवंति जेसिमे लूसिणो नो परिवित्तसंति, से वंता कोहं चमाणं य मायं च लोभं च एस तुट्ठे वियाहिए त्ति बेमि ॥सू० ११५॥ कायस्स वियायाए एस संगामसीसे वियाहिए से हु पारंगमे मुणी, अविहम्ममाणे फलगावयट्ठी कालोवणिए कंखिज्ज कालं जाव सरीरभेउ त्ति बेमि ॥सू० ११६॥

॥ इति पंचमोद्देशकः ॥ ६-५ ॥ इति षष्ठमध्ययनम् ॥ ६ ॥

(सप्तममध्ययनं व्युच्छिन्नम्)

॥ ८ ॥ विमोक्षाध्ययनं—८ :: उद्देशकः—१ ॥

से बेमि समणुन्नस्स वा असमणुन्नस्स वा असणं वा पाणं वा खाइमं वा साइमं वा वत्थं वा पडिग्गहं वा कंबलं वा पायपुच्छणं वा नो पादेज्जा नो निमंतिज्जा नो कुज्जा वेयावडियं परं आदायमाणे त्ति बेमि ॥सू० ११७॥ धुवं चेयं जाणिज्जा असणं वा जाव पायपुच्छणं वा लभिया नो लभिया भुंजिया नो भुंजिया पंथं विउत्ता विउक्कम्म विभत्तं धम्मं जोसेमाणे समेमाणे चलेमाणे (पले-माणे) पाइज्जा वा निमंतिज्जा वा कुज्जा वेयावडियं परं अणादायमाणे त्ति बेमि ॥सू० ११८॥ इहमेगेसिं आचारगोयरे नो सुनिसंते भवति ते इह आरंभट्ठी अणुवयमाणा हण पाणे वायमाणा हणओ यावि समणुजाणमाणा अदुवा अदिन्नमाययंति अदुवा वायाउ विउज्जंति, तं जहा—अत्थि लोए नत्थि लोए, धुवे लोए, अधुवे लोए, साइए लोए अणाइए लोए, सपज्जवसिए लोए अपज्जवसिए लोए, सुकडेत्ति वा दुक्कडेत्ति वा, कल्लाणेत्ति वा पावेत्ति वा, साहुत्ति वा असाहुत्ति वा, सिद्धित्ति वा असिद्धित्ति वा निरएत्ति वा अनिरएत्ति वा, जमिणं विप्पडिवन्ना मामगं धम्मं पन्नवेमाणा इत्थवि जाणह अकस्मात् एवं तेसिं नो सुयक्खाए धम्मे नो सुपन्नत्ते धम्मे भवइ ॥सू० ११९॥ से जेहेयं भगवया पवेइयं आसुपन्नेण जाणया पासया अदुवा गुत्ती वओगोयरस्स त्तिबेमि सव्वत्थ संमयं पावं, तमेव उवाइक्कम्म एस महं विवेगे

वियाहिए, गामे वा अदुवा रराणे नेव गामे नेव रराणे धम्ममायाणह पवेइयं
 माहणेण मइमया, जामा तिन्नि उदाहिया जेसु इमे आयरिया संबुज्झमाणा
 समुट्ठिया, जे णिवुया पावेहिं कम्मेहिं अणियाणा ते वियाहिया ॥सू०
 २००॥ उट्ठं अहं तिरियं दिसासु सज्जथो सव्वावन्ति च णं पाडियक्कं
 जीवेहिं कम्मसम्मारम्भे णं तं परिन्नाय मेहावी नेव सयं एएहिं काएहिं दंडं
 समारंभिज्जा, नेवन्ने एएहिं काएहिं दंडं समारंभाविज्जा, नेवन्ने एएहिं
 कायेहिं दंडं समारंभंतेज्जि समणुजाणेज्जा नेवन्ने एएहिं काएहिं दंडं
 समारंभंति तेसिं पि वयं लज्जामो तं परिन्नाय मेहावी तं वा दंडं अन्नं
 वा नो दंडभी दंडं समारंभिज्जासि त्ति वेमि ॥सू० २०१॥

॥ इति प्रथमोद्देशकः ॥८-१॥

॥ अध्ययनं-८ :: उद्देशकः-२ ॥

से भिक्खु परिकमिज्ज वा चिट्ठिज्ज वा निसीइज्ज वा तुयट्ठिज्ज वा
 सुसाणांसि वा सुन्नागारंसि वा गिरिगुहंसि वा रुक्खमूलंसि वा कुंभाराययणां-
 सि वा हुरत्था वा कहिंचि विहरमाणां तं भिक्खुं उवसंकमित्तु गाहावइ बूया-
 आउसंतो समणा ! अहं खलु तव अट्ठाए असणां वा पाणां वा खाइमं वा
 साइमं वा वत्थं वा पडिग्गहं वा कंबलं वां पायपुच्छणां वा पाणाइं भूयाइं
 जीवाइं सत्ताइं समारब्भ समुद्दिस्स कीयं पामिच्चं अच्चिज्जं अणिसट्ठं
 अभिहडं आहट्ठु चेएमि आवसहं वा सवस्सिणोमि से भुंजह वसह, आउ-
 संतो समणा ! भिक्खु तं गाहावइं समणासं सवयसं पडियाइवखे-आउसंतो !
 गाहावई नो खलु ते वयणां आढामि नो खलु ते वयणां परिजाणामि, जो
 तुमं मम अट्ठाए असणां वा (४) वत्थं वा (४) पाणाइं वा (४) समारब्भ समुद्दिस्स
 कीयं पामिच्चं अच्चिज्जं अणिसट्ठं अभिहडं आहट्ठु चेएसि आवसहं वा समु-
 स्सि णासि, से विरथो आउसो गाहावई ! एयरस अकरणायाए ॥सू० २०२॥
 से भिक्खु परिकमिज्ज वा जाव हुरत्था वा कहिंचि विहरमाणां तं भिक्खुं उव-

संकमित्तु गाहावई आयगयाए पेहाए असणां वा (४) वत्थं वा (४) जाव
आहट्टु चेएइ आवसहं वा समुस्सिणाइ भिक्खू परिघासेउं, तं च भिक्खू जाणिज्जा
सहसम्मइयाए परवागरणेणं अन्नेसिं वा सुच्चा अयं खलु गाहावई मम अट्टाए
असणां वा (४) वत्थं वा (४) जाव आवसहं वा समुस्सिणाइ, तं च भिक्खू
पडिलेहाए आगमिन्ता आणाविज्जा अणासेवणाए त्ति बेमि ॥सू० २०३॥
भिक्खुं च खलु पुट्टा वा अउट्टा वा जे इमे आहच्च गंधा वा कुसंति,
से हंता हणाह खणाह छिंदह दहह पयह आलुं पह विलुं पह सहसाकारेह
विष्परायुसह, ते फासे धीरो पुट्टो अहियासए अदुवा आयारगोयरमाइक्खे,
तक्किया णमणेत्तिसं अदुवा वइगुत्तीए गोयरस्स अणुपुवेण संमं पडिलेहाए
आयतगुत्ते बुद्धेहिं एयं पवेइयं ॥सू० २०४॥ से समणुन्ने असमणुन्नस्स
असणां वा जाव नो पाइज्जा नो निमंतिज्जा नो कुज्जा वेयावडियं परं
आदायमाणो त्ति बेमि ॥सू० २०५॥ धम्ममायाणाह पवेइयं माहणेण मइमया
समणुन्ने समणुन्नस्स असणां वा जाव कुज्जा वेयावडियं परं आदायमाणो त्ति
बेमि ॥सू० २०६॥

॥ इति द्वितीय उद्देशकः ॥ ८-२ ॥

॥ अध्ययनं-८ :: उद्देशकः-३ ॥

मज्झिमेणं वयसावि एगे संबुज्झमाणा समुट्ठिया, सुच्चा मेहावी वयणां
पंडियाणां निसामिया समियाए धम्मे आरिएहिं पवेइए ते अणवकंखमाणा
अणइवाएमाणा अपरिग्गहेमाणा नो परिग्गहावंती सव्वावंती च णां लोगांसि
निहाय दंडं पाणेहिं पावं कम्मं अकुञ्चमाणो एस महं अग्रंथे वियाहिए ओए
जुइमस्स खेयन्ने उववायं चवणां च नच्चा ॥सू० २०७॥ आहारोवचया देहा
परीसहपभंगुरा पासह एगे सव्विदिएहिं परिगिलायमाणेहिं ॥सू० २०८॥
ओए दयं दयइ, जे संनिहाणासत्थस्स खेयन्ने से भिक्खू कालन्ने बलन्ने
मायन्ने खणन्ने विणवन्ने समयन्ने परिग्गहं अममायमाणो कालेणुट्टाई

अपडिन्ने दुहयो छित्ता नियाइं ॥सू० २०१॥ तं भिक्खुं सीयफासपरिवेव-
माणगायं उवसंकमित्ता गाहावई ब्रूया-आउसंतो समणा ! नो खलु गाम-
धम्मा उवाहंति, आउसंतो गाहावई ! नो खलु मम गामधम्मा उवाहंति,
सीयफासं च नो खलु अहं संचाएमि अहियासित्तए, नो खलु मे कप्पइ
अगणिकायं उज्जालित्तए वा पज्जालित्तए वा कायं आयावित्तए वा पया-
वित्तए वा, अन्नेसिं वा वयणाओ, सिया स एवं वयंतस्स परो अगणिकायं
उज्जालित्ता पज्जालित्ता कायं आयाविज्ज वा, पयाविज्ज वा, तं च भिक्खु
पडिलेहाए आगमित्ता आणविज्जा अणासेवणाए त्ति वेमि ॥सू० २१०॥

॥ इति तृतीयोद्देशकः ॥ ८-३ ॥

॥ अध्ययनं-८ :: उद्देशकः-४ ॥

जे भिक्खु तिहिं वत्थेहिं परिवुसिए पायचउत्थेहिं तस्स णं नो
एवं भवइ चउत्थं वत्थं जाइस्सामि, से अहेसणिज्जाइं वत्थाइं जाइज्जा
अहापरिग्गहियाइं वत्थाइं धारिज्जा, नो धोइज्जा (नो रइज्जा) नो धोयरत्ताइं
वत्थाइं धारिज्जा, अपलिओवमाणे (अपलिउंचमाणे) गामंतरेसु ओम-
चेलिए, एयं खु वत्थधारिस्स सामग्गियं ॥सू० २११॥ अह पुण एवं
जाणिज्जा-उवाइक्कंते खलु हेमंते गिम्हे पडिवन्ने अहापरिजुन्नाइं वत्थाइं
परिट्ठविज्जा, अदुवा संतरुत्तरे अदुवा ओमचेले अदुवा एगसाडे अदुवा अचेले
॥सू० २१२॥ लाघवियं आगममाणे, तवे से अभिसमन्नागए भवइ ॥सू० २१३॥
जमेयं भगवया पवेइयं तमेव अभिसमिच्चा सव्वओ सव्वत्ताए सव्वत्तमेव समभि-
ज्जाणिज्जा ॥सू० २१४॥ जस्स णं भिक्खुस्स एवं भवइ पुट्ठो खलु अहमंसि
नालमहमंसि सीयफासं अहियासित्तए, से वसुमं सव्वसमन्नागयपन्नाणेणं अण्णा-
णेणं केइ अकरणायाए आउट्ठे तवरिस्सणो हु तं सेयं जमेगे विहमाइए तत्थावि
तस्स कालपरियाए, सेऽवि तत्थे विअंतिकारए इच्चेयं विमोहायतणं हियं सुहं
खमं निस्सेसं आणुगामिअं त्ति वेमि ॥सू० २१५॥

॥ इति चतुर्थ उद्देशकः ॥ ८-४ ॥

॥ अध्ययनं-८ :: उद्देशकः-५ ॥

जे भिक्खु दोहिं वत्थेहिं परिवुसिए पायतईएहिं तस्स गां नो एवं भवइ तइयं वत्थं जाइस्सामि, से अणोसणिज्जाइं वत्थाइं जाइज्जा जाव एवं खु तस्स भिक्खुस्स सामग्गियं, अह पुण्ण एवं जाणिज्जा-उवाइक्कंते खलु हेमन्ते गिन्हे पडिवरणो, अहापरिजुन्नाइं वत्थाइं परिट्ठविज्जा, अहापरिजुन्नाइं परिट्ठवत्ता अदुवा संतरुत्तरे अदुवा ओमचेले अदुवा एगसाडे अदुवा अचेले लाघवियं आगममाणो तवे से अभिसमन्नागए भवइ जमेयं भगवया पवेइयं तमेव अभिसमिच्चा सव्वओ सव्वत्ताए सम्मत्तमेव समभिजाणिया, जस्स गां भिक्खुस्स एयं भवइ-पुट्ठो अबलो अहमंसि नालमहमंसि गिहंतरसंकमणां भिक्खायरियं गमणाए, से एवं वयंतस्स परो अभिहडं असणां वा (४) आहट्ठु दलइज्जा, से पुव्वामेव आलोइज्जा-आउसंतो ! नो खलु मे कप्पइ अभिहडं असणां वा (४) भुत्तए वा पायए वा अन्ने वा एयप्पगारे ॥सू० २१६॥ जस्स गां भिक्खुस्स अयं पगप्पे-अहं च खलु पडिन्नत्तो अपडिन्नत्तेहिं गिलाणो अगिलाणेहिं अभिकंख साहम्मिएहिं कीरमाणं वेयावडियं साइज्जस्सामि, अहं वावि खलु अप्पडिन्नत्तो पडिन्नत्तस्स अगिलाणो गिलाणस्स अभिकंख साहम्मियस्स कुज्जा वेयावडियं करणाए आहट्ठु परिन्नं अणुक्खिस्सामि आहडं च साइज्जिस्सामि १, आहट्ठु परिन्नं अणुक्खिस्सामि आहडं च नो साइज्जिस्सामि २, आहट्ठु परिन्नं नो अणुक्खिस्सामि आहडं च साइज्जिस्सामि ३, आहट्ठु परिन्नं नो अणुक्खिस्सामि आहडं च नो साइज्जिस्सामि ४, एवं से अहाकिट्ठियमेव धम्मं समभिजाणमाणो संते विरए सुसमाहियलेसे तत्थवि तस्स कालपरियाए से तत्थ विअंतिकारए, इच्चेयं विमोहाययणां हियं सुहं खमं निस्सेसं आणुगामियं त्ति वेमि ॥सू० २१७॥

॥ इति पंचमोद्देशकः ॥८-५॥

॥ अध्ययनं-८ :: उद्देशकः-६ ॥

जे भिक्खू एगेण वत्थेण परिवुसिए पायविईएण, तस्स णं नो एवं भवइ-विईयं वत्थं जाइस्सामि, से अहेसणिज्जं वत्थं जाइज्जा अहापरिग्ग-हियं वत्थं धारिज्जा जाव गिम्हे पडिवन्ने अहापरिजुन्नं वत्थं परिट्ठविज्जा (२) अदुवा एगसाडे अदुवा अचेले लाघवियं आगममाणे जाव सम्मत्तमेव समभिजाणिया ॥सू० २१८॥ जस्स णं भिक्खुस्स एवं भवइ-एगे अहमंसि, न मे अत्थि कोइ, न याहमवि कस्सवि, एवं से एगोगिणमेव अप्पाणं समभिजाणिज्जा, लाघवियं आगममाणे तवे से अभिसमन्नागए भवइ जाव समभिजाणिया ॥सू० २१९॥ से भिक्खू वा भिक्खुणी वा असणं वा (४) आहारेमाणे नो वामाओ हणुयाओ दाहिणं हणुयं संचारिज्जा आसाए-माणे, दाहिणाओ वामं हणुयं नो संचारिज्जा आसाएमाणे (आढायमाणे) से अणासायमाणे लाघवियं आगममाणे तवे से अभिसमन्नागए भवइ, जमेयं भगवया पवेइयं तमेवं अभिसमिच्चा सव्वओ सव्वत्ताए सम्मत्तमेव अ(सम)भिजाणिया ॥सू० २२०॥ जस्स णं भिक्खुस्स एवं भवइ-से गिलामि च खलु अहं इमंमि समये इमं सरीरगं अणुपुब्बेण परिवहित्तए, से अणु-पुब्बेण आहारं संवट्ठिज्जा, अणुपुब्बेण आहारं संवट्ठित्ता कसाए पयणुए किञ्चा समाहियच्चे फलगावयट्ठी उट्ठाय भिक्खू अभिनिवुडच्चे ॥सू० २२१॥ अणुपविसित्ता गामं वा नगरं वा खेडं वा कब्बडं वा मडंबं वा पट्टणां वा दोणमुहं वा आगरं वा आसमं वा सन्निवेसं वा नेगमं वा रायहाणि वा तणाइं जाइज्जा तणाइं जाइत्ता से तमायाए एगंतमवक्कमिज्जा, एगंतमवक्कमित्ता अप्पंडे अप्पपाणे अप्पवीए अप्पहरिए अप्पोसे अप्पोदए अप्पुत्तिगपणगद-गमट्ठियमवक्कडासंताणए पडिलेहिय (२) पमडिजय (२) तणाइं संथरिज्जा, तणाइं संथरित्ता इत्थवि समए इत्तरियं कुज्जा, तं सच्चं सच्चवाई ओए तिन्ने त्तिन्नकहंकहे आईयट्ठे अणाईए चिच्चाण भेउरं कायं संविहूय विरू-

वरूवे परीसहोवसग्गे अस्सि विसंभणयाए भेरवमणुचिन्ने तत्थवि तस्स
कालपरियाए जाव आणुगामियं ति वेमि ॥सू० २२२॥

॥ इति षष्ठ उद्देशकः ॥८-६॥

॥ अध्ययनं-८ :: उद्देशकः-७ ॥

जे भिक्खु अचेले परिवुसिए तस्स गां भिक्खुस्स एवं भवइ-चाएमि
अहं तणफासं अहियासित्तए सीयफासं अहियासित्तए तेउफासं अहि-
यासित्तए दंसमसगफासं अहियासित्तए एगयरे अन्नतरे विरूवरूवे फासे
अहियासित्तए हिरिपडिच्छायणां चइहं नो संचाएमि अहियासित्तए, एवं से
कप्पेइ कडिबंधणं धारित्तए ॥सू० २२३॥ अदुवा तत्थ परक्कमंतं भुज्जो
अचेलं तणफासा फुसन्ति सीयफासा फुसन्ति तेउफासा फुसन्ति दंसम-
सगफासा फुसन्ति एगयरे अन्नयरे विरूवरूवे फासे अहियासेइ, अचेले
लाघवियं आगममाणे जाव समभिजाणिया ॥सू० २२४॥ जस्स गां भिक्खु-
स्स एवं भवइ-अहं च खलु अन्नेसिं भिक्खूणां असणां वा (४) आहट्ठु
दलइस्सामि आहडं च साइज्जिस्सामि १, जस्स गां भिक्खुस्स एवं भवइ-अहं
च खलु अन्नेसिं भिक्खूणां असणां वा (४) आहट्ठु दलइस्सामि आहडं च
नो साइस्सामि २, जस्स गां भिक्खुस्स एवं भवइ-अहं च खलु असणां वा (४)
आहट्ठु नो दलइस्सामि आहडं च साइज्जिस्सामि ३, जस्स गां भिक्खुस्स
एवं भवइ-अहं च खलु अन्नेसिं भिक्खूणां असणां वा (४) आहट्ठु
नो दलइस्सामि आहडं च नो साइज्जिस्सामि ४, अहं च खलु तेणा
अहाइरित्तेणा अहेसणिज्जेणा अहापरिग्गहिणां असणेणा वा (४) अभि-
कंख साहम्मियस्स कुज्जा वेयावडियं करणाए, अहं वावि तेणा अहा-
इरित्तेणा अहेसणिज्जेणा अहापरिग्गहिणां असणेणा वा (४) अभिकंख
साहम्मिएहिं कीरमाणं वेयावडियं साइज्जिस्सामि लाघवियं आगममाणे जाव
सम्मत्तमेव समभिजाणिया ॥सू० २२५॥ जस्स गां भिक्खुस्स एवं भवइ-से

गिलामि खलु अहं इमम्मि समए इमं सरीरगं अणुपुब्बेणं परिवहित्तए, से
अणुपुब्बेणं आहारं संवट्टिज्जा (२) कसाए पयणुए किच्चा समाहियच्चे फल-
गावयट्ठी उट्ठाए भिक्खू अभिनिव्वुडच्चे अणुपविसित्ता गामं वा नगरं वा
जाव रायहाणिं वा तणाइं जाइज्जा जाव सन्थरिज्जा, इत्थवि समए कायं च
जोगं च ईरियं च पच्चक्खाइज्जा, तं सच्चं सच्चावाई ओएत्तिन्ने छिन्नकहंकहे
आईयट्ठे अणाईए चिच्चाणं भेउरं कायं संविट्ठणिय विरूवरूवे परीसहोवसग्गे
अस्सि विस्समण्णाए भेरवमणुचिन्ने तत्थवि तस्स कालपरियाए, सेवि तत्थ
विअन्तिकारए, इच्चेयं विमोहाययणां हियं सुहं खमं निस्सेसं आणुगामियं
तिवेमि ॥सू० २२६॥

॥ इति सप्तमोद्देशकः ॥ ८-७ ॥

॥ अध्ययनं-८ :: उद्देशकः-८ ॥

अणुपुब्बेण विमोहाइं, जाइं धीरा समासज्ज वसुमन्तो मइमन्तो, सच्चं
नच्चा अणोलिसं ॥१॥ दुविहंपि विइत्ता गां, बुद्धा धम्मस पारगा । अणु-
पुब्बीइ संखाए, आरंभाओ (य) (कम्मणा उ) तिउट्टइ ॥२॥ कसाए पयणु
किच्चा, अण्णाहारे तितिक्खए । अह भिक्खू गिलाइज्जा, आहारस्सेव
अन्तियं ॥३॥ जीवियं नाभिकंखिज्जा, मरणां नोवि पत्थए; दुहओऽवि न
सज्जिज्जा, जिवीए मरणे तहा ॥४॥ मज्झत्थो निज्जरापेही, समाहिमणुपालए
अन्तो बहिं विऊस्सिज्ज, अज्झत्थं सुद्धमेसए ॥५॥ जं किंचुवक्कमं जाणे,
आउखेमस्समण्णो । तस्सेव अन्तरद्धाए, खिप्पं सिविखज्ज पंडिए ॥६॥
गामे वा अदुवा रगणे, थंडिलं पडिलेहिया । अण्णपाणां तु विन्नाय, तणाइं
संथरे मुणी ॥७॥ अण्णाहारो तुयट्टिज्जा, पुट्ठो तत्थऽहियासए । नाइवेलं
उवचरे, माणुस्सेहि विपुट्ठवं ॥८॥ संसण्णगा य जे पाणा, जे य उट्ठमहाचरा ।
भुंजन्ति मंससोणियं, न छणे न पमज्जए ॥९॥ पाणा देहं विहिसन्ति,
अण्णाओ नवि उब्भमे आसवेहिं विवित्तेहिं, तिप्पमाणोऽहियासए ॥१०॥

गन्थेहि विवित्तेहि, आउकालस्स पारए पग्गहियतरणं चेयं, दवियस्स वियाणओ ॥११॥ अयं से अवरं धम्मे, नायपुत्तेण साहिए । आयवज्जं पडोयारं, विजहिज्जा तिहा तिहा ॥१२॥ हरिएसु न निवज्जिज्जा, थंडिलं मुणिया सए । विओसिज्ज अणाहारो, पुट्ठो तत्थइहियासए ॥१३॥ इन्दि-
एहिं गिलायन्तो, समियं आहरे मुणी । तहावि से अगरिहे, अचले जे समाहिए ॥१४॥ अभिकमे पडिकमे, संकुचए पसारए । कायसाहाराणाट्ठाए, इत्थं वावि अचेयणो ॥१५॥ परिकमे परिकिलन्ते, अदुवा चिट्ठे अहायए । ठाणो ण परिकिलन्ते, निसीइज्जा य अंतसो ॥१६॥ आसीणोओलेसं मरणं, इन्दियाणि समीरए । कोलावासं समासज्ज वितहं अउरे सए ॥१७॥ जअं वज्जं समुप्पजे, न तत्थ अवलम्बए; तउ उक्खसे अण्णाणं, फासे तत्थइहिया-
सए ॥१८॥ अयं चाययतरे सिया, जो एवमणुपालए सव्वगायनिरोहेऽवि, ठाणाओ नवि उब्भमे ॥१९॥ अयं से उत्तमे धम्मे, पुव्वट्ठाणस्स पग्गहे । अचिरं पडिलेहिता, विहरे चिट्ठ माहणो ॥२०॥ अचित्तं तु समासज्ज, ठावए तत्थ अण्णं । वोसिरे सव्वसो कायं, न मे देहे परीसहा, ॥२१॥ जावज्जीवं परीसहा, उवसग्गा इति संख्या संवुडे देह भेयाए, इय पन्नेइहियासए ॥२२॥ भेउरेसु न रज्जिज्जा, कामेसु बहुतरेसुवि (बहुलेसुवि) इच्छा लोभं न सेविज्जा, धुववन्नं सपेहिया ॥२३॥ सासएहिं निमन्तिज्जा, दिव्वमायं न सहहे । तं पडिबुज्फ माहणो, सव्वं नूढं विट्ठणिया ॥२४॥ सव्वट्ठेहिं अमुच्छिए, आउकालस्स पारए । तितिक्खं परमं नच्चा, विमोहन्नयरं हियं ॥२५॥ त्तिवेमि ॥

॥ इति अष्टमोद्देशकः ८-८ ॥ इति अष्टममध्ययनम् ॥८॥

॥ उपधानश्रुताख्यमध्ययनं ६ :: उद्देशकः १ ॥

अहासुयं वइस्सामि जहा से समणो भगवं उट्ठाए । संखाए तंसि हेमंते अट्ठणो पव्वइए रीइत्था ॥१॥ णो चेविमेण वत्थेण पिहिस्सामि तंसि हेमं-

ते । से पारए आवकहाए, एयं खु अणुधम्मियं तस्स ॥२॥ चत्तारि साहिए
 मासे, बहवे पाणजाइया आगम्म । अभिरुज्झ कायं विहरिंसु, आरुसिया
 णां तत्थ हिंसिंसु ॥३॥ संवच्छरं साहियं मासं जं न रिक्कासि वत्थगं भगवं ।
 अचेलए तथो चाइ तं वोसिज्ज वत्थमणगारे ॥४॥ अदु पोरिसिं तिरियं
 भित्तिं, चक्खुमासज्ज अन्तसो भायइ । अह चक्खुभीया संहिया ते, हन्ता
 हन्ता बहवे कंदिंसु ॥५॥ सयणोहिं वित्तिमिस्सेहिं इत्थिओ तत्थ से परिन्नाय
 सागारियं न सेवेइ य, से सयं पवेसिया भाइ ॥६॥ जे के इमे अगारत्था
 मीसीभावं पहाय से भाइ । पुट्ठोवि नाभिभासिंसु गच्छइ नाइवत्तइ अंजू
 (पुट्ठो व सो अपुट्ठो व नो अणुन्नाइ पावगं भगवं) ॥७॥ णो सुकरमेयमेगेसिं
 नाभिभासे य अभिन्नायमाणे । हयपुव्वे तत्थ दंडेहिं लूसियपुव्वे अप्पुणोहिं
 ॥८॥ फरुसाइं दुत्तितिक्खाइ अइअच्च मुणी परवकममाणे । आघाय नट्ट-
 गीयाइं दगडजुद्धाइं मुट्ठिजुद्धाइं ॥९॥ गढिए मिट्ठुकहासु समयंमि नायसुए
 विसोगे अदक्खु । एयाइ से उरालाइं गच्छइ नायपुते असरणायाए ॥१०॥
 अवि साहिए दुवे वासे सीओदं अभुच्चा निक्खन्ते । एगत्तगए पिहियच्चे से
 अहिन्नायदंसणे सन्ते ॥११॥ पुढविं च आउकायं च तेउकायं च वाउकायं
 च । पणगाइं बीयहरियाइं तसकायं च सव्वसो नच्चा ॥१२॥ एयाइं सन्ति
 पडिलेहे, चित्तमन्ताइ से अभिन्नाय । परिवज्जिय विहरित्था इयं संखाय से
 महावीरे ॥१३॥ अदु थावरा य तसत्ताए, तसा य थावरत्ताए । अदुवा
 सव्वजोणिया सत्ता कम्मुणा कप्पिया पुढो बाला ॥१४॥ भगवं च एवम-
 न्नेसिं सोवहिए हु लुप्पइ बाले । कम्मं च सव्वसो नच्चा तं पडियाइक्खे
 पावगं भगवं ॥१५॥ दुविहं समिच्च मेहावी किरीयमक्खायओलिसं नाणी ।
 आयाण सोयमइवायसोयं जोगं च सव्वसो णच्चा ॥१६॥ अइवत्तियं
 अणाउट्ठिं सयमन्नेसिं अकरणायाए । जस्सिस्त्थिओ परिन्नाया सव्वकम्मावहा
 उ से अदक्खु ॥१७॥ अहाकडं न से सेवे सव्वसो कम्म (कम्मुणा) अद-

क्खू । जं किंचि पावगं भगवं तं अकुच्चं वियडं भुंजित्था ॥१८॥ णो सेवइ
य परवत्थं परपाएवि से न भुंजित्था । परिवज्जित्थाण उमाणां गच्छइ संखडिं
असरणाए ॥१९॥ मायराणे असणाणास्स नाणुगिद्वे रसेसु अपडिन्ने ।
अच्छिं अपि नो पमज्जिज्जा नोवि य कंइयए मुणी गायं ॥२०॥ अप्पं
तिरियं पेहाए अप्पि पिट्ठयो पेहाए । अप्पं बुइए अपडिभाणी पंथपेही चरे
जयमाणे ॥२१॥ सिसिरंसि अद्धपडिवन्ने तं वोसिज्ज वत्थमणागारे ।
पसारित्तु बाहुं परक्कमे नो अवलम्बियाणा कंधंमि ॥२२॥ एस विही
अणुक्कन्तो माहणेण मइमया । बहुसो अपडिन्नेण भगवया एव रियंति
॥२३॥ त्तिवेमि ॥

॥ इति प्रथमोद्देशकः ॥६-१॥

॥ अध्ययनं ६ :: उद्देशकः २ ॥

चरियासणाइं सिज्जाओ एगइयाओ जाओ बुइयाओ । आइक्ख ताइं
सयणासणाइं जाइं सेवित्था से महावीरे ॥१॥ आवेसणासभापवासु पणियसा-
लासु एगया वासो । अदुवा पलियठाणेसु पलालपुंजेसु एगया वासो ॥२॥
आगन्तारे आरामागारे तह य नगरे व एगया वासो । सुसाणे सुराणागारे
वा रुक्खमूले व एगया वासो ॥३॥ एएहिं मुणी सयणेहिं समणे आसि पते-
रसवासे । राइं दिवंपि जयमाणे अपमत्ते समाहिए भाइ ॥४॥ णिइं पि नो
पगामाए, सेवइ भगवं उट्ठाए । जग्गावइ य अप्पाणां इसिं साइ य अपडिन्ने
॥५॥ संबुज्जमाणे पुणारवि आसिंसु भगवं उट्ठाए । निवस्सम्म एगया राओ
बहि चंकमिया मुहुत्तागं ॥६॥ सयणेहिं तत्थुवसग्गा भीमा आसी अरोगरूवा
य । संसप्पगा य जे पाणा अदुवा जे पक्खिणो उवचरन्ति । ७॥ अदु कुचरा
उवचरन्ति गामरक्खा य सत्ति-हत्था य । अदु गामिया उवसग्गा इत्थी
एगइया पुरिसा य ॥८॥ इहलोइयाइं परलोइयाइं मीमाइं अरोगरूवाइं । अवि
सुब्धि दुब्धिभगन्धाइं सद्दाइं अरोगरूवाइं ॥९॥ अहियासए सया समिए

फासाईं विरुवरूवाईं । अरइं रइं अभिभूय रीयइ माहरो अबहुवाई ॥१०॥
 स जरोहिं तत्थ पुच्छिंसु एगचरावि एगया राओ । अवाहिए कसाइत्था
 पेहमारो समाहिं अपडिन्ने ॥११॥ अयमंतरसि को इत्थ ? अहमंसित्ति
 भिक्खु आहइइ । अयमुत्तमे से धम्मे तुसिसीए कसाइए भाइ ॥१२॥ जंसि-
 प्पेगे पवेयन्ति सिसिरे मारुए पवायन्ते । तंसिप्पेगे अणगारा हिमवाए
 निवायमेसन्ति ॥१३॥ संघाडीओ पवेसिस्सामो एहा य समादहमाणा ।
 पिहिया च सक्खामो अइदुक्खे हिमगसंफासा ॥१४॥ तंसि भगवं अपडिन्ने
 अहे विगडे अहियासए । दविए निक्खम्म एगया राओ ठाइए भगवं
 समियाए ॥१५॥ एस विही अणुक्कन्तो माहरोरा मइमया । बहुसो अप-
 डिगरोरा भगवया एवं रीयन्ति ॥१६॥ तिवेमि ।

॥ इति द्वितीयोद्देशकः ६-२ ॥

॥ अध्ययनं ९ :: उद्देशकः ३ ॥

तण्णफासे सीयफासे य तेउफासे य दंसमसगे य । अहियासए सया
 समिए फासाईं विरुवरूवाईं ॥१॥ अह दुच्चरलाढमचारी वज्जभूमिं च सुब्भ-
 भूमिं च । पंतं सिज्जं सेविंसु आसरागाणि चेव पंताणि ॥२॥ लाढेहिं
 तस्सुवसग्गा बहवे जारावया लूसिंसु । अहलूहदेसिए भत्ते कुक्कुरा तत्थ
 हिंसिंसु निवइंसु ॥३॥ अप्पे जरो निवारेइ लूसणए सुणए दसमारो
 बुच्चुकारिंति आहंसु समरां कुक्कुरा दसंतुत्ति ॥४॥ एलिक्खए जणा (जणो)
 भुज्जो बहवे वज्जभूमिं फरुसासी । लट्ठिं गहाय नालियं समणा तत्थ
 य विहरिंसु ॥५॥ एवंपि तत्थ विहरन्ता पुट्टपुव्वा अहेसि सुणिएहिं ।
 संलुं चमाणा सुणएहिं दुच्चराणि तत्थ लाढेहिं ॥६॥ निहाय दण्डं पाणेहिं
 तं कायं वोसज्जमणगारे । अह गामकराटए भगवन्ते अहिआसए अभिस्स-
 मिच्चा ॥७॥

नागो संगामसीसे वा पारए तत्थ से महावीरे । एवंपि तत्थ लाढेहि
अलद्धपुब्बोवि एगया गामो ॥८॥ उवसंकमन्तमपडिन्नं गामं तियम्मि अप्पत्तं ।
पडिनिक्खमित्तु लूसिंसु एयाओ परं पलेहिति ॥९॥ हयपुब्बो तत्थ
दगडेण अदुवा मुट्ठिणा अदु कुन्तफलेण । अदु लेलुणा कवालेण
हन्ता हन्ता बहवे कन्दिंसु ॥१०॥ मंसाणि (मंसूणि) छिन्नपुञ्जाणि
उट्ठंभिंता एगया कायं । परीसहाइं लुं चिंसु अदुवा पंसुणा उवकरिंसु ॥११॥
उच्चालइय निहणिंसु अदुवा आसणाउ खलइंसु । वोसट्ठकायपणायाऽऽसी
दुवस्वसहे भगं अपडिन्ने ॥१२॥ सूरु संगामसीसे वा संबुडे तत्थ से
महावीरे । पडिसेवमाणे फरुसाइं अचले भगवं रीयित्था ॥१३॥ एस विही
अणुक्कन्तो माहणेण मइमया । बहुसो अपडिणणेण भगवया एवं रीयंति
॥१४॥ त्ति वेमि ॥

॥ इति तृतीयोद्देशकः ॥ ९-३ ॥

॥ अध्ययनं ९ :: उद्देशकः ४ ॥

ओमोयरियं चाणइ अपुट्ठेवि भगवं रोगेहि । पुट्ठे वा अपुट्ठे वा
नो से साइज्जइ तेइच्छं ॥१॥ संसोहणं च वमणं च गायब्भंणं च सिणाणं
च । संबाहणं च न से कप्पे दन्तपक्खालणं च परिन्नाए(य) ॥२॥ विरए गाम-
धम्मेहिं रीयइ माहणे अदुवाइ । सिसिरंमि एगया भगवं छायाए भाइ
आसीय ॥३॥ आयावइ य गिम्हाणं अच्छइ उक्कुडुए अभित्तावे । अदु जाव
इत्थ लूहेणं ओयणमंथुकुम्मासेण ॥४॥ एयाणि तिन्नि पडिसेवे अट्ठमासे अ
जावयं भगवं । अपि इत्थ एगया भगवं अद्धमासं अदुवा मासंपि ॥५॥
अवि साहिए दुवे मासे छप्पि मासे अदुवा विहरित्था (अपिबित्ता) । राओ-
वरायं अपडिन्ने अन्नगिलाणमेगया भुंजे ॥६॥ छट्ठेण एगया भुंजे अदुवा
अट्ठमेण दसमेण । दुवालसमेण एगया भुंजे पेहमाणे समाहिं अपडिन्ने

॥७॥ गच्छा गां से महावीरे नोऽविय पावगं सयमकासी । अन्नेहिं वा ग
कारित्या कीरंतं पि नाणुजाणित्या ॥८॥

गामं पविसे नगरं वा घासमेसे कडं परट्टाए । सुविसुद्धमेसिया
भगवं आयतजोगयाए सेवित्या ॥९॥ अदु वायसा दिगिंछता जे अन्ने
रसेसिणो सत्ता । घासेसणाए चिट्ठंति सययं निवइए य पेहाए ॥१०॥ अदुवा
माहणां च समणां वा गामपिण्डोलगं च अतिहिं वा । सोवागमूसियारि वा
कुकुरं वावि विट्ठियं पुराओ ॥११॥ वित्तिच्छेयं वज्जन्तो तेसिमप्पत्तियं
परिहरन्तो । मन्दं परक्कमे भगवं अहिंसमाणो घासमेसित्या ॥१२॥ अवि
सूइयं वा सुक्कं वा सीयं पिंडं पुराणकुम्मासं । अदु बुक्कसं पुलागं वा
लद्धे पिंडे अलद्धे दविए ॥१३॥ अवि भाइ से महावीरे आसणात्थे अकु-
क्कुए भाणां । उट्ठं अहे तिरियं च पेहमाणे समाहिमपडिन्ने ॥१४॥ अक-
साइ विगयगेही य सदरूवेसु अमुच्छिए भाइ । छउमत्थोऽवि परक्कममाणो न
पमायं सइं पि कुव्वित्या ॥१५॥ सयमेव अभिसमागम्म आयतजोगमायसोहीए ।
अभिनिव्वुडे अमाइल्ले आवकहं भगवं समियासी ॥१६॥ एस विही अणु-
क्कंतो, माहणेण मइमया । बहुसो अपडिन्नेणा, भगवया एवं रीयन्ति ॥१७॥
त्तिवेमि

॥ इति चतुर्थ उद्देशकः ॥ ६-४ ॥ इति नवममध्ययनम् ॥ ६ ॥

॥ प्रथमो ब्रह्मचर्य-श्रुतस्कंधः समाप्तः ॥



॥ अथ द्वितीयोऽय-श्रुतस्कंधः ॥

॥ चूलिका १ ॥ पिण्डेसणाध्ययनं १ :: उद्देशकः १ ॥

से भिक्खु वा भिक्खुणी वा गाहावड्कुलं पिंडवायपडियाए अणुप-
विट्ठे समाणे से जं पुण जाणिज्जा-असणं वा पाणं वा खाइमं वा साइमं
वा पाणेहिं वा पाणेहिं वा बीएहिं वा हरिएहिं वा संसत्तं उम्मिस्सं सीओद-
एण वा ओसित्तं रयसा वा परिवासियं (परिवासियं) वा तहप्पगारं असणं
वा पाणं वा खाइमं वा साइमं वा परहत्थंसि वा परपायंसि वा अफासुयं अणे-
सणिज्जंति मन्नमाणे लाभेऽवि संते नो पडिग्गाहिजा ॥ से य आहच्च पडि-
ग्गहे सिया से तं आयाय एगंतमवक्कमिज्जा, एगंतमवक्कमित्ता अहे आरामंसि
वा अहे उवस्सयंसि वा अप्पंडे अप्पपाणे अप्पबीए अप्पहरिए अप्पोसे अप्पुदए
अप्पुत्तिग-पणगदग-मट्टिय-मक्कडासंताणए विगिंचिय (२) उम्मीसं विसो-
हिय (२) तओ संजयामेव भुंजिज्ज वा पीइज्ज वा, जं च नो संचाइज्जा
भुत्तए वा पायए वा से तमायाय एगंतमवक्कमिज्जा, अहे भामथंडिलंसि वा
अट्टिरासिसि वा किट्टिरासिसि वा तुसरासिसि वा गोमयरासिसि वा अन्न-
यरंसि वा तहप्पगारंसि थंडिलंसि पडिलेहिय पडिलेहिय पमज्जिय पमज्जिय
तओ संजयामेव परिट्ठविज्जा ॥सू० १॥

से भिक्खु वा भिक्खुणी वा गाहावड्कुलं जाव पविट्ठे समाणे से
जाओ पुण ओसहीओ जाणिज्जा-कसिणाओ सासियाओ अविदलकडाओ
अतिरिच्छच्छिन्नाओ अबुच्छिराणाओ तरुणियं वा छिवाडिं अणभिकंत-
भज्जियं पेहाए अफासुयं अणेसणिज्जंति मन्नमाणे लाभे संते नो पडिग्गा-
हिज्जा १॥ से भिक्खु वा (२) जाव पविट्ठे समाणे से जाओ पुण ओस-
हीओ जाणिज्जा-अकसिणाओ असासियाओ विदलकडाओ तिरिच्छच्छि-

न्नाथो बुच्छिन्नाथो तरुणियं वा त्रिवाडिं अभिस्कृतं भजियं पेहाए
 फासुयं एसणिज्जंति मन्नमाणो लाभे संते पडिग्गाहिज्जा २ ॥सू० २ ॥
 से भिक्खु वा (२) जाव समाणे से जं पुण जाणिज्जा पिहुयं वा
 बहुरयं वा भुंजियं वा मंथुं वा चाउलं वा चाउलपलंबं वा सइं संभज्जियं
 अफासुयं जाव नो पडिग्गाहिज्जा १ ॥ से भिक्खु वा (२) जाव समाणे से जं पुण
 जाणिज्जा-पिहुयं वा जाव चाउलपलंबं वा असइं भज्जियं दुक्खुत्तो वा
 तिक्खुत्तो वा भज्जियं फासुयं एसणिज्जं जाव पडिग्गाहिज्जा २ ॥सू० ३ ॥
 से भिक्खु वा भिक्खुणी वा गाहावइकुलं जाव पविसिउकामे नो
 अन्नउत्थिएण वा गारत्थिएण वा परिहारिओ वा अपपरिहारिएणं सद्धिं
 गाहावइकुलं पिंडवायपडियाए पविसिज्ज वा निक्खमिज्ज वा १ ॥ से
 भिक्खु वा (२) बहिया वियारभूमिं वा विहारभूमिं वा निक्खममाणो वा
 पविसमाणो वा नो अन्नउत्थिएण वा गारत्थिएण वा परिहारिओ वा
 अपपरिहारिएण सद्धिं बहिया वियारभूमिं वा विहारभूमिं वा निक्खमिज्ज
 वा पविसिज्ज वा २ ॥ से भिक्खु वा (२) गामाणुगामं दूइज्जमाणो नो अन्नउ-
 त्थिएण वा जाव गामाणुगामं दूइज्जिज्जा ३ ॥सू० ४ ॥ से भिक्खु वा
 भिक्खुणी वा जाव पविट्ठे समाणे नो अन्नउत्थियस्स वा गारत्थियस्स
 वा परिहारिओ वा अपपरिहारियस्स असणं वा पाणं वा खाइमं वा
 साइमं वा दिज्जा वा अणुपवइज्जा वा ॥ सू० ५ ॥ से भिक्खु वा
 (२) जाव समाणे जाव असणं वा (४) अस्सिंपडियाए एगं साहम्मियं समु-
 द्दिस्स पाणाइं भूयाइं जीवाइं सत्ताइं समारब्भ समुद्दिस्स कीयं पामिच्चं
 अच्छिज्जं अणिसट्ठं अभिहडं आहट्ठु चेएइ, तं तहप्पगारं असणं वा (४)
 पुरिसंतरकडं वा अपुरिसंतरकडं वा बहिया नीहडं वा अनीहडं वा अत्त-
 ट्ठियं वा अणत्तट्ठियं वा परिभुत्तं वा अपरिभुत्तं वा आसेवियं वा अणा-
 सेवियं वा अफासुयं जाव नो पडिग्गाहिज्जा, एवं बहवे साहम्मिया एगा

साहम्मिणी बहवे साहम्मिणीओ समुद्दिस्स चत्तारि आलावगा भाणियव्वा
॥सू० ६॥ से भिक्खू वा (२) जाव समाणे से जं पुण जाणिज्जा असणं
वा ४ बहवे समण-माहण-अतिहि-क्विणवणीमए पगणिय २ समुद्दिस्स
पाणाइं वा ४ समारब्भ जाव नो पडिग्गाहिज्जा ॥सू० ७॥ से भिक्खू वा
भिक्खुणी वा जाव पविट्ठे समाणे से जं पुण जाणिज्जा असणं वा ४
बहवे समण-माहण-अतिहि-क्विणवणीमए समुद्दिस्स जाव चेएइ तं तहप्पगारं
असणं वा (४) अपुरिसंतरकडं वा अबहियानीहडं अणत्तट्ठियं अपरिभुत्तं
अणसेवियं अफासुयं अणोसणिज्जं जाव नो पडिग्गाहिज्जा १ अह पुण
एवं जाणिज्जा पुरिसंतरकडं बहियानीहडं अत्तट्ठियं परिभुत्तं आसेवियं
फासुयं एमणिज्जं जाव पडिग्गाहिज्जा ॥सू० ८॥ से भिक्खू वा भिक्खुणी
वा गाहावइकुलं पिंडवाय-पडियाए पविसिउफामे से जाइं पुण कुलाइं
जाणिज्जा-इमेसु खलु कुलेसु निइए पिंडे दिज्जइ अग्गपिंडे दिज्जइ नियए
भाए दिज्जइ नियए अवड्ढभाए दिज्जइ, तहप्पगाराइं कुलाइं निइयाइं निइउ-
माणाइं नो भत्ताए वा पाणाए वा पविसिज्ज वा निवस्वमिज्जं वा १॥ एयं
खलु तस्स भिक्खुस्स भिक्खुणीए वा सामग्गियं जं सव्वट्ठेहिं समिए
सहिए सया जए त्ति वेमि २ ॥सू० ९॥

॥ इति प्रथमोद्देशकः ॥ श्रु० २-चू० १-अ० १ उ०-१ ॥

॥ अध्ययनं-१ :: उद्देशकः-२ ॥

से भिक्खू वा भिक्खुणी वा गाहावइकुलं पिंडवायपडियाए अणुप-
विट्ठे समाणे से जं पुण जाणिज्जा असणं वा (४) अट्ठमिपोसहिएसु वा
अद्धमासिएसु वा मासिएसु वा दोमासिएसु वा तेमासिएसु वा चाउम्मासिएसु
वा पंचमासिएसु वा छम्मासिएसु वा उऊसु वा उउसंधीसु वा उउपरियट्ठेसु
वा बहवे समणमाहणअतिहिक्विणवणीमगे एगाओ उक्खाओ परिएसिज्ज-
माणे पेहाए दोहिं उक्खाहिं परिएसिज्जमाणे पेहाए तिहिं उक्खाहिं परि-

સિજ્જમાણે પેહાણે કુંભીમુહાત્રો વા કલોવાઈત્રો વા સંનિહિસંનિચયાત્રો
 વા પરિણસિજ્જમાણે પેહાણે તહપ્પગારં અસણં વા (૪) અપુરિસંતરકઢં
 જાવ અણાસેવિયં અપાસુયં જાવ નો પઢિગ્ગાહિજ્જા ॥ સૂ. ૧૦ ॥
 જાણિજ્જા પુરિસંતરકઢં જાવ આસેવિયં પાસુયં પઢિગ્ગાહિજ્જા ૨ ॥ સૂ. ૧૦ ॥
 સે ભિક્ખુ વા (૨) જાવ સમાણે સે જાઈં પુણ કુલાઈં જાણિજ્જા, તંજહા-
 ઉગ્ગકુલાણિ વા ભોગકુલાણિ વા રાઙ્ગકુલાણિ વા સ્વત્તિયકુલાણિ વા
 ઇક્ષ્વાગકુલાણિ વા હરિવંસકુલાણિ વા એસિયકુલાણિ વા વેસિયકુલાણિ
 વા ગંઢાગકુલાણિ વા કોટ્ટાગકુલાણિ વા ગામરક્ષકુલાણિ વા બુક્કાસ-
 કુલાણિ વા પોક્કાસાઈયકુલાણિ અન્નયરેસુ વા તહપ્પગારેસુ કુલેસુ અદુગુ-
 ત્તિયેસુ અગરહિયેસુ અસણં વા (૪) પાસુયં જાવ પઢિગ્ગાહિજ્જા ॥ સૂ. ૧૧ ॥
 સે ભિક્ખુ વા (૨) જાવ સમાણે સે જં પુણ જાણિજ્જા અસણં વા (૪)
 સમવાણેસુ વા પિંડનિયરેસુ વા ઇંદમહેસુ વા સંદમહેસુ વા એવં રુદ્ધમહેસુ વા
 મુગુંદમહેસુ વા ભૂયમહેસુ વા જક્કમહેસુ વા નાગમહેસુ વા શૂભમહેસુ વા ચેદ્ધ-
 યમહેસુ વા રુક્કમહેસુ વા ગિરિમહેસુ વા દરિમહેસુ વા અગ્ગમહેસુ વા તલા-
 ગમહેસુ વા દહમહેસુ વા નદમહેસુ વા સરમહેસુ વા સાગરમહેસુ વા આગર-
 મહેસુ વા અન્નયરેસુ વા તહપ્પગારેસુ વિરુવરુવેસુ મહામહેસુ વટ્ટમાણેસુ બહવે
 મમણમાહણ—અતિહિકિવણવણીમણે એગાત્રો ઉક્ષાત્રો પરિણસિજ્જમાણે
 પેહાણે દોહિં જાવ સંનિહિસંનિચયાત્રો વા પરિણસિજ્જમાણે પેહાણે તહપ્પગારં
 અસણં વા (૪) અપુરિસંતરકઢં જાવ નો પઢિગ્ગાહિજ્જા ॥ સૂ. ૧૧ ॥
 જાણિજ્જા દિન્નં જં તેસિં દાયવ્વં, અહ તત્થ મુંજમાણે પેહાણે ગાહાવડ્ધમારિયં
 વા ગાહાવડ્ધમણિણિં વા ગાહાવડ્ધપુત્તં વા ધૂયં વા સુગહં વા ધાઈં વા દાસં વા
 દાસિં વા કમ્મકરં વા કમ્મકરિં વા સે પુલ્લામેવ આલોજ્જા આઝસિત્તિ વા
 મણિણિત્તિ વા દાહિસિ મે ઇત્તો અન્નયરં મોયણાજાયં, સે સેવં વયંતસ્સ પરો
 અસણં વા (૪) આહટ્ટુ દલ્લજ્જા તહપ્પગારં અસણં વા (૪) સયં વા પુણ

जाइज्जा परो वा से दिज्जा फासुयं जाव पडिगाहिज्जा २ ॥सू० १२॥ से भिक्खू वा (२) परं अद्धजोयणमेराए संखडिं नच्चा संखडिपडियाए नो अभिसंधारिज्जा गमणाए १॥ से भिक्खू वा (२) पाइणं संखडिं नच्चा पडीणं गच्छे अणादायमाणे, पडीणं संखडिं नच्चा पाइणं गच्छे अणा दायमाणे, दाहिणं संखडिं नच्चा उदीणं गच्छे अणादायमाणे उइणं संखडिं नच्चा दाहिणं गच्छे अणादायमाणे, जत्थेव सा संखडिं सिधा तंजहा—गामंसि वा नगरंसि वा खेडंसि वा कच्चडंसि वा मडंबंसि वा पट्टणंसि वा आगरंसि वा दोणमुहंसि वा नेगमंसि वा आसमंसि वा संनि- वेसंसि वा जाव रायहाणिसि वा संखडिं संखडिपडियाए नो अभिसंधा- रिज्जा गमणाए २ । केवली बूया—आयाणमेयं (आययणमेयं) संखडिं संखडिपडियाए अभिधारेमाणे आहाकम्मियं वा उहेसियं वा मीसजायं वा कीयगडं वा पामिच्चं वा अच्छिज्जं वा अणिसिट्ठं वा अभिहडं वा आहट्ठु दिज्जमाणं भुंजिज्जा ३॥ अस्संजए भिक्खुपडियाए खुड्डियदुवारियाओ मह- ल्लियदुवारियाओ कुज्जा, महल्लियदुवारियाओ खुड्डियदुवारियाओ कुज्जा, समओ सिज्जाओ विसमाओ कुज्जा, विसमाओ सिज्जाओ समाओ कुज्जा, पवायाओ सिज्जाओ निवायाओ कुज्जा, निवायाओ सिज्जाओ पवायाओ कुज्जा, अंतो वा बहिं वा उवस्सयस्स हरियाणि त्तिदिय त्तिदिय दालिय दालिय संथारंगं संथारिज्जा, एस विलुंगयामो सिज्जाए, तम्हा से संजए नियंठे तहप्पगारं पुरेसंखडिं वा पच्छासंखडिं वा संखडिं संखडिपडियाए नो अभि- संधारिज्जा गमणाए, ४ । एयं खलु तस्स भिक्खुस्स जाव सया जए त्ति वेमि ॥सू० १३॥

॥ अध्ययनं-१ :: उद्देशकः-३ ॥

से एगइओ अन्नयरं संखडिं आसित्ता पिबित्ता छड्डिज्ज वा वमिज्ज वा भुत्ते वा से नो सम्मं परिणमिज्जा अन्नयरे वा से दुक्खे रोगायंके समुप्पज्जिज्जा केवली बूया आयाणमेयं ॥सू० १४॥ इह खलु भिक्खु गाहावईहिं वा गाहावईणीहिं वा परिवाएहिं वा परिवाइयाहिं वा एगज्जं सद्धिं सुडं पाठं भो वइमिस्सं दुरत्था वा उवस्सयं पडिलेहेमाणो नो लमिज्जा तमेव उवस्सयं संमिस्सीभावमावज्जिज्जा, अन्नमणे वा से मत्ते विप्परियासियभूए इत्थिविग्गहे वा किलीबे वा तं भिक्खुं उवसंकमितु बूया—आउसंतो समणा अहे आरामंसि वा अहे उवस्सयंसि वा राओ वा वियाले वा गामधम्मनियंतियं कट्ठ रहस्सियं मेहुणधम्मपरियारणाए आउट्टामो, तं चेवेगइओ सातिज्जिज्जा—अकरणिज्जं चेयं संखाए एए आयाणा (आयतणाणि) संति संविज्जमाणा पचवाया भवंति, तम्हा से संजये नियंठे तहप्पगारं पुरेसंखडिं वा पच्छासंखडिं वा संखडिं संखडिपडियाए नो अभिसंधारिज्जा गमणाए ॥सू० १५॥ से भिक्खु वा (२) अन्नयरिं संखडिं सुच्चा निसम्म संपहावइ उस्सुयभूएणा, अप्पाणेणा, धुवा संखडी, नो संचाएइ तत्थ इयरेयरेहिं कुलेहिं समुदाणियं एसियं वेसियं पिंडवायं पडिग्गाहित्ता आहारं आहारित्ताए माइट्टाणं संफासे, नो एवं करिज्जा१॥ से तत्थ कलेणा अणुपविसित्ता तत्थियरेयरेहिं कुलेहिं समुदाणियं एसियं वेसियं पिंडवायं पडिग्गाहित्ता आहारं आहारिज्जा२॥ (सू० १६) से भिक्खु वा (२) से जं पुण जाणिज्जा गामं वा जाव रायहाणि वा इमंसि खलु गामंसि वा जाव रायहाणिसि वा संखडी सिथा तंपि य गामं वा जाव रायहाणि वा संखडिं संखडिपडियाए नो अभिसंधारिज्जा गमणाए १ ॥ केवली बूया—आयाणमेयं आइन्नाज्वमा णं संखडिं अणुपविस्समाणस्स पाएणा वा पाए अक्कंतपुव्वे भवइ, हत्थेणा वा हत्थे संचालियपुव्वे भवेइ, पाएणा वा पाए आवडियपुव्वे

भइ, सीसेण वा सीसे संवट्टियपुव्वे भवइ, काएण वा काए संखोभियपुव्वे भवइ, दंडेण वा अट्ठीण वा मुट्ठीण वा लेलुणा वा कवालेण वा अभिहय-
पुव्वेण वा भवइ, सोओदएण वा उस्सित्तपुव्वे भवइ, रयसा वा परिघासिय-
पुव्वे भवइ, अणोपणिज्जे वा परिभुत्तपुव्वे भवइ, अन्नेसि वा दिज्जमाणे
पडिग्गाहियपुव्वे भवइ, तम्हा से संजर नियंठे तहप्पगारं आइन्नावमा णं
मंखडिं संखडियडियाए नो अभिसंधारिज्जा गमणाए ॥सू० १७॥ से भिक्खु
व (२) जाव समाणे से जं पुण जाणिज्जा असणं वा (४) एसणिज्जे
सिया अणोसणिज्जे सिया वित्तिगिंत्तसमावन्नेण अण्णाणेण असमाहडाए
लेसाए तहप्पगारं असणं वा (४) लाभे संते नो पडिग्गाहिज्जा ॥सू० १८॥
से भिक्खु वा (२) गाहावइकुलं पविसिउकामे सव्वं भंडगमायाए गाहावइकुलं
पिंडवायपडियाए पविसिज्ज वा निक्खमिज्ज वा १ ॥ से भिक्खु वा (२)
बहिया विहारभूमिं वा वियारभूमिं वा निक्खममाणे वा पविसमाणे वा
सव्वं भंडगमायाए बहिया विहारभूमिं वा वियारभूमिं वा निक्खमिज्ज वा
पविसिज्ज वा २॥ से भिक्खु वा (२) गामाणुगामं दूइज्जमाणे सव्वं भंडगमा-
याए गामाणुगामं दूइज्जिज्जा ३॥ ॥सू० १९॥ से भिक्खु वा (२) अह पुण
एवं जाणिज्जा तिब्बदेसियं वासं वासेमाणं पेहाए तिब्बदेसियं महियं संनि-
चयमाणं पेहाए महवाएण वा रयं समुद्धुयं पेहाए तिरिच्छसंपाइमा वा तसा
पाणा संथडा संनिचयमाणा पेहाए से एवं नच्चा नो सव्वं भंडगमायाए
गाहावइकुलं पिंडवायपडियाए पविसिज्ज वा निक्खमिज्ज वा बहिया विहार-
भूमिं वा वियारभूमिं वा निक्खमिज्ज वा पविसिज्ज वा गामाणुगामं दूइ-
ज्जिज्जा ॥सू० २०॥ से भिक्खु वा (२) से जाइ पुण कुलाइं जाणिज्जा तं जहा
खत्तियाण वा राइण वा कुराइण वा रायपेसियाण वा रायवंसट्टियाण वा
अंतो वा बाहिं वा गच्छंताण वा संनिविट्ठाण वा निमंतेमाणाण वा अनिमंते-
माणाण वा असणं वा (४) लाभे संते नो पडिग्गाहिज्जा ॥सू० २१॥

॥ इति तृतीयोद्देशकः ॥ २-१-१-३ ॥

॥ अध्ययनं-१ :: उद्देशकः-४ ॥

से भिक्खु वा (२) जाव समाणे से जं पुण जाणिज्जा मंसाइयं वा मच्छाइयं वा मंसखलं वा मच्छखलं वा अहेणं वा पेहेणं वा हिंगोलं वा संमेलं वा हीरमाणं पेहाए अंतरा से मग्गा बहुपाणा बहुवीणा बहुहरिया बहुओसा बहुउदया बहुउत्तिग—पणागदगमट्टीय—मक्खंडासंताणया बहवे तत्थ समणमाहणअतिहिक्खिणवणीमगा उवागया उवागमिस्संति (उवागच्छंति) तत्थाइन्ना वित्ती नो पन्नस्स निक्खमणपवेसाए नो पन्नस्स वायण-पुच्छण-परियट्ठणानुपेहधम्माणुओगचिंताए, से एवं नच्चा तहप्पगारं पुरेसंखडिं वा पच्छासंखडिं वा संखडिं संखडिपडियाए नो अभिसंधारिज्जा गमणाए १॥

से भिक्खु वा (२) से जं पुण जाणिज्जा मंसाइयं वा मच्छाइयं वा जाव हीरमाणं वा पेहाए अंतरा से मग्गा अप्पा पाणा जाव संताणगा नो जत्थ बहवे समण० जाव उवागमिस्संति अप्पाइन्ना वित्ती पन्नस्स निक्खमणपवेसाए पन्नस्स वायणपुच्छणपरियट्ठणानुपेहधम्माणुओगचिंताए, सेवं नच्चा तहप्पगारं पुरेसंखडिं वा० अभिसंधारिज्जा गमणाए २ ॥ सू० २२॥

से भिक्खु वा (२) जाव पविसिउकामे से जं पुण जाणिज्जा खीरिणियाओ गावीओ खीरिज्जमाणीओ पेहाए असणं वा (४) उवसंखडिज्जमाणं पेहाए पुरा अप्पजूहिए सेवं नच्चा नो गाहावइकुलं पिंडवायपडियाए निक्खमिज्ज वा पविसिज्ज वा १॥ से तमादाय एगंतमवक्कमिज्जा अणावायमसंलोए चिट्ठिज्जा अह पुण एवं जाणिज्जा-खीरिणियाओ गावीओ खीरियाओ पेहाए असणं वा (४) उवक्खडियं पेहाए पुराए जूहिए सेवं नच्चा तओ संजयामेव गाहावइकुलं पिंडवायपडियाए निक्खमिज्ज वा २-२॥ सू० २३॥

भिक्खागा नामेगे एवमाहंसु—समाणा वा वसमाणा वा गामाणुगामं दूइज्जमाणे खुट्ठाए खलु अयं गामे संनिरुद्धाए नो महालए से इता भयंतारो बाहिरगाणि गामाणि भिक्खायरियाए

वयह, संति तत्थेगइयस्स भिक्खुस्स पुरेसंथुया वा पच्छासंथुया वा परिवसंति, तंजहा-गाहावइ वा गाहावइणीओ वा गाहावइपुत्ता वा गाहावइधूयाओ वा गाहावइसुराहाओ धाइओ वा दासा वा दासीओ वा कम्मकरा वा कम्मकरीओ वा तहप्पगराइं कुलाइं पुरेसंथुयाणि वा पच्छासंथुयाणि वा पुव्वामेव भिक्खारियाए अणुपविसिस्सामि १। अविय इत्थ लभिस्सामि पिंडं वा लोयं वा खीरं वा दहिं वा नवणीयं वा घयं वा गुल्लं वा तिल्लं वा महुं वा मज्जं वा मंसं वा सक्कुलिं वा फाणियं वा पूयं वा सिहिरिणिं वा, तं पुव्वामेव भुच्चा पिच्चा पडिग्गहं च संलिहिय संमज्जिय तत्रो पच्छा भिक्खूहिं सद्धिं गाहावइकुलं पिंडवायपडियाए पविस्सिस्सामि वा निक्खमिस्सामि वा, माइट्ठाणं संफासे, तं नो एवं करिज्जा २॥ से तत्थ भिक्खूहिं सद्धिं कालेण अणुपविसित्ता तत्थियरेयरेहिं कुलेहिं सामुदाणियं एसियं वेसियं पिंडवायं पडिगाहित्ता आहारं आहारिज्जा, ३। एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सया जए त्तिवेमि ४ ॥सू० २४॥

॥ इति चतुर्थ उद्देशकः २-१-१-४॥

॥ अध्ययनं-१ :: उद्देशकः-५ ॥

से भिक्खु वा (२) जाव पविट्ठे समाणे से जं पुण जाणिज्जा-अग्गपिंडं उक्खिप्पमाणां पेहाए अग्गपिंडं निक्खिप्पमाणां पेहाए अग्गपिंडं हीरमाणां पेहाए अग्गपिंडं परिभाइज्जमाणां पेहाए अग्गपिंडं परिभुंजमाणां पेहाए अग्गपिंडं परिद्वविज्जमाणां पेहाए पुरा असिणाइ वा अवहाराइ वा पुरा जत्थज्जणे समाणा-माहणा-अतिहिकिवणा-वणीमगा खद्धं (२) उवसंकमंति से हंता अहमवि खद्धं (२) उवसंकमामि, माइट्ठाणं संफासे, नो एवं करेज्जा ॥सू० २५॥ भिक्खु वा (२) जाव समाणे अंतरा से वप्पाणि वा फलिहाणि वा पागाराणि वा तोरणाणि वा अग्गलाणि वा अग्गलपासगाणि वा सति परक्कमे संजयामेव परिकमिज्जा

नो उज्जुयं गच्छिज्जा १। केवली बूया आयाणमेयं, से तत्थ परक्कममाणे पयलिज्ज वा पवखलेज्ज वा पवडिज्ज वा, से तत्थ पयलमाले वा पवखलेज्ज-माणे वा पवडमाणे वा, तत्थ से काए उच्चारण वा पासवणेण वा खेलेण वा सिंघाणेण वा वंतेण वा पित्तेण वा पूरणे वा सुक्केण वा सीणिण्ण वा उवलिते सिया, तहप्पगारं कायं नो अण्णंतरहियाए पुढवीए नो ससिणि-द्धाए पुढवीए नो ससरक्खाए पुढवीए नो चित्तमंताए सिलाए नो चित्तमंताए लेलुए कोलावासंसि वा दारुए जीवपइट्टिए सअंडे सपाणे जाव ससंताणए नो आमज्जिज्ज वा पमज्जिज्ज वा संहिलिज्ज वा निलिहिज्ज वा उव्वलेज्ज वा उव्वट्टिज्ज वा आयाविज्ज वा पयाविज्ज वा २। से पुव्वामेव अप्पससरक्खं तणं वा पत्तं वा कट्ठं वा सक्करं वा जाइज्जा, जाइत्ता से तमायय एगतमवक्क-मिज्जा २ अहे भामथंढिलंसि वा जाव अन्नयरंसि वा तहप्पगारंसि पडिले-हिय पडिलेहिय पमज्जिय पमज्जिय तत्रो संजयामेव आमज्जिज्ज वा जाव पयाविज्ज वा ३ ॥सू० २६॥ से भिक्खू वा (२) जाव से जं पुण जाणिज्जा गोणं वियालं पडिपहे पेहाए महिसं वियालं पडिपहे पेहाए एवं मणुस्सं आसं हत्थिं सीहं वग्घं विगं दीवियं अच्छं तरच्छं परिसरं सियालं विरालं सुणायं कोलसुणायं कोकंतियं चित्ताचिल्लडयं वियालं पडिपहे पेहाए सइ परक्कमे संजयामेव परक्कमेज्जा, नो उज्जुयं गच्छिज्जा १। से भिक्खू वा (२) जाव समाणे अंतरा से उवात्रो वा खाणुए वा कंटए वा घसी वा भिलुगा वा विममे वा विज्जले वा परियावज्जिज्जा, सइ परक्कमे संजयामेव, नो उज्जुयं गच्छिज्जा २। ॥सू० २७॥ से भिक्खू वा (२) गाहावइकुलस्स दुवा-रबाहं कंटगुब्बुदियाए परिपिहियं पेहाए तेसिं पुव्वामेव उग्गह अण्णान्नविय अपडिलेहिय अप्पमज्जिय नो अवंगुणिज्ज वा पविसिज्ज वा निवस्वमिज्ज वा तेसिं पुव्वामेव उग्गहं अण्णान्नविय पडिलेहिय पडिलेहिय पमज्जिय पमज्जिय तत्रो संजयामेव अवंगुणिज्ज वा पविसेज्ज वा निक्खमेज्ज वा ॥सू० २८॥

से भिक्खु वा (२) जाव से जं पुण जाणिज्जा समणं वा माहणं वा गामपिंडोलगं अतिहिं वा पुव्वपविट्ठं पेहाए नो तेसिं संलोए सपडिदुवारे चिट्ठिज्जा, (केवली बूया-आयाणमेयं पुरा पेहाए तस्सट्ठाए परो असणं वा ४ आहट्टु दलइज्जा, अह भिक्खुणं पुव्वोवइट्ठं एस पइन्ना एस उवएसो जं नो तेसिं संलोए सपडिदुवारे चिट्ठिज्जा) से तमायाय एगंतमवक्कमिज्जा (२) अणावायमसंलोए चिट्ठिज्जा १। से से परो अणावायमसंलोए चिट्ठिमाणास्स असणं वा (४) आहट्टु दलइज्जा, से य एवं वइज्जा आउसंतो समणा इमे भे असणे वा (४) सब्वजणाए निसिट्ठे तं भुंजह वा णं परिभाएह वा णं, तं चेगइओ पडिगाहिता तुसिणीओ उवेहिज्जा, अवियाइं एयं मममेव सिया, माइट्ठाणं संपासे नो एवं करिज्जा २। से तमायाए तत्थ गच्छिज्जा (२) से पुव्वामेव आलोइज्जा-आउसंतो समणा ! इमे भे असणे वा (४) सब्वजणाए निसिट्ठे तं भुंजह वा णं जाव परिभाएह वा णं, सेणमेवं वयंतं परो वइज्जा-आउसंतो समणा ! तुमं चेव रां परिभाएहि से तत्थ परिभाएमाणे नो अप्पणो खद्धं (२) डायं (२) ऊसटं (२) रसियं (२) मणुन्नं (२) निद्धं (२) लुक्खं (२) से तत्थ अमुच्छिए अगिद्धे अग(ना)टिए अणज्झोववन्ने बहुसममेव परिभाइज्जा ३। से रां परिभाएमाणां परो वइज्जा-आउसंतो समणा, मा रां तुमं परिभाएहिसव्वे वेगइआ ठिआ उ भुक्खामो वा ४ पाहामो वा । से तत्थ भुंजमाणे नो अप्पणा खद्धं खद्धं जाव लुक्खं, से तत्थ अमुच्छिए (४) बहुसममेव भुंजिज्जा वा पाइज्जा वा ५ ॥सू० २६॥ से भिक्खु वा (२) जाव से जं पुण जाणिज्जा समणं वा माहणं वा गामपिंडोलगं वा अतिहिं वा पुव्वपविट्ठं पेहाए नो ते उवाइक्कम्मं पविसिज्ज वा ओभासिज्ज वा, से तमायाय एगंतमवक्कमिज्जा (२) अणावायमसंलोए चिट्ठिज्जा, अह पुणेवं जाणिज्जा-पडिसेहिए वा दिन्ने वा तथो तंमि नियत्तिए संजयामेव पवि-

सिज्ज वा ओभासिज्ज वा एयं खलु तस्स भिक्खुस्स वा भिक्खुणीए वा
सामग्गियं जाव जएज्जासित्ति बेमि ॥सू० ३०॥

॥ इति पंचमोद्देशकः ॥२-१-१-५॥

॥ अध्ययनं-१ :: उद्देशकः ६॥

से भिक्खु वा (२) जाव से जं पुण जाणिज्जा—रसेसिणो बहवे
पाणा घासेसणाए संथडे संनिवइए पेहाए, तं जहा कुक्कुडजाइयं वा सूयर-
जाइयं अग्गपिंडंसि वा वायसा संथडा संनिवइया पेहाए सइ परक्कमे संजया
नो उज्जुयं गच्छिज्जा ॥सू० ३१॥ से भिक्खु वा (२) जाव नो गाहावइ-
कुलस्स वा दुवारसाहं अवलंबिय २ चिट्ठिज्जा, नो गाहावइकुलस्स वा दग-
च्छङ्गात्तए चिट्ठिज्जा नो गाहावइकुलस्स वा चंदणिउयए चिट्ठिज्जा, नो
गाहावइकुलस्स वा सिणाणास्स वा वच्चस्स वा संलोए सपडिदुवारे चिट्ठिज्जा,
नो अलोयं वा थिग्गलं वा संधिं वा दग्गभवणं वा बाहाओ पग्गिज्झिय
(२) अंगुलियाए वा उद्दिसिय (२) उराणमिय (२) अवनमिय (२)
निज्झाज्जा, नो गाहावइअंगुलियाए उद्दिसिय (२) जाइज्जा, नो गाहावइ-
अंगुलिए चालिय (२) जाइज्जा, नो गाहावइअंगुलिए तज्जिय (२)
जाइज्जा, नो गाहावइअंगुलिए उक्खुलंपिय (उक्खलुंदिय) (२) जाइज्जा,
गाहावइ वंदिय (२) जाइज्जा नो वयणां फरुसं वइज्जा ॥सू० ३२॥ अह
तत्थ कंचि भुंजमाणां पेहाए गाहावइं वा जाव कम्मकरिं वा से पुव्वामेव
आलोइज्जा—आउसोत्ति वा भइणित्ति वा दाहिसि मे इत्तो अन्नयरं भोयणा-
जायं ? १ । से सेवं वयंतस्स परो हत्थं वा मत्तं वा दब्बिं वा भायणं वा
सीओदगवियडेण वा उसिणोदगवियडेण वा उच्छोलिज्ज वा प्होइज्ज
वा २। से पुव्वामेव आलोइज्जा—आउसोत्ति वा भइणित्ति वा ! मा एयं तुमं
हत्थं वा (४) सीओदगवियडेण वा (२) उच्छोलेहि वा (२), अभिकंखसि
मे दाउं एवमेव दलयाहि ३। से सेवं वयंतस्स परो हत्थं वा (४) सीओदग

वियडेण वा उसिणोदगवियडेण वा उच्छोलित्ता पहोइत्ता आहट्ठु दलइज्जा,
तहप्पगारेणं पुरेकम्मकएणं हत्थेण वा (४) असणं वा (४) अफासुयं जाव
नो पडिगाहिज्जा ४। अह पुण एवं जाणिज्जा नो पुरेकम्मकएणं उदउल्लेणं
तहप्पगारेणं वा उदउल्लेणं वा हत्थेण वा (४) असणं वा (४) अफासुयं
जाव नो पडिगाहिज्जा ५॥ अहं पुणेवं जाणिज्जा-उदउल्लेणं ससिणिद्धेण
सेसं तं चेव ६। एवं-ससरक्खे उदउल्ले, ससिणिद्धे मट्ठिया use ॥ हरि-
याले हिंगुलुर, मणोसिला अंजणे लोणे ॥१॥ गेरुय वन्निय सेडिय सोर-
ट्टिय पिट्ठ कुकुस उक्कुट्टसंसट्ठेण ७। अह पुणेवं जाणिज्जा नो असंसट्ठे
संसट्ठे तहप्पगारेण संसट्ठेण हत्थेण वा (४) असणं वा (४) फासुयं जाव
पडिगाहिज्जा ८ ॥सू० ३३॥ से भिक्खु वा (२) जाव से जं पुण जाणिज्जा
पिड्डुयं वा बहुरयं वा जाव चाउलपलंबं वा अस्संजए भिक्खुपडियाए चित्तमं-
ताए सिलाए जाव संताणाए कुट्टिसु वा कुट्टिति वा कुट्टिस्संति वा उप्फ-
णिसु वा (३) तहप्पगारं पिड्डुयं वा बहुरयं वा जाव अफासुयं नो पडिगा-
हिज्जा ॥सू० ३४॥ से भिक्खु वा (२) जाव समाणे से जं पुण जाणिज्जा
बिलं वा लोणं उब्भियं वा लोणं अस्संजए जाव संताणाए भिदिसु (३)
रुचिसु (३) बिलं वा लोणं उब्भियं वा लोणं अफासुयं नो पडिगाहिज्जा
॥सू० ३५॥ से भिक्खु वा (२) जाव से जं पुण जाणिज्जा असणं वा
(४) अगणि निक्खित्तं तहप्पगारं असणं वा (४) अफासुयं नो पडिगाहिज्जा
केवली बूया आयाणमेयं, अस्संजए भिक्खुपडियाए उस्सिंचमाणे वा
निरिसंचमाणे वा आमज्जमाणे वा पमज्जमाणे वा ओयारेमाणे वा उव्वत्तमाणे
वा अगणिजीवे हिंसिज्जा १। अह भिक्खुणां पुव्वोवइट्ठा एस पइन्ना एस हेऊ
एस कारणे एसुवएसे जं तहप्पगारं असणं वा (४) अगणि निक्खित्तं अफा-
सुयं नो पडिगाहिज्जा २। एयं खलु तस्स भिक्खुस्स वा भिक्खुणाए वा
सामग्गियं जाव सया जणज्जासि ति वेमि ३। ॥सू० ३६॥

॥ इति षष्ठ उद्देशकः ॥२-१-१-६॥

॥ अध्ययनं १ :: उद्देशकः ७ ॥

से भिक्खु वा (२) जाव समाणे जं पुण जाणिज्जा असणां वा (४) खंधंसि वा थंभंसि वा मंचंसि वा मालंसि वा पासायंसि वा हम्मियतलंसि वा अन्नयरंसि वा तहप्पगारंसि अंतलिव्वजायंसि उवनिक्खित्त सिया तहप्पगारं मालोहडं असणां वा (४) अफासुयं नो पडिगाहिज्जा १ । केवली बूया आयाणमेयं, अस्संजए भिक्खुपडियाए पीढं वा फलगं वा निस्सेणि वा उदूहलं आहट्ट उस्सविय दुरूहिज्जा, से तत्थ दुरूहमाणे पयलिज्ज वा पवडिज्ज वा २। से तत्थ पयलमाणे वा (२) हत्थं वा पायं वा बाहुं वा ऊरुं वा उदरं वा सीसं वा अन्नयरं वा कायंसि इंदियजालं लूसिज्ज वा पाणाणि वा (४) अभिहणिज्ज वा वित्तासिज्ज वा लेसिज्ज वा संघसिज्ज वा संघट्टिज्ज वा परिथाविज्ज वा किलामिज्ज वा ठाणाओ ठाणं संकामिज्ज वा, तं तहप्पगारं मालोहडं असणां वा (४) लाभे संते नो पडिगाहिज्जा से भिक्खु वा २ जाव समाणे से जं पुण जाणिज्जा असणां वा (४) कुट्टियाओ वा कोलेज्जाउ वा अस्संजए भिक्खुपडियाए उक्कुज्जिय अवउज्जिय ओहरिय आहट्टु दलइज्जा, तहप्पगारं असणां वा (४) लाभे संते नो पडिगाहिज्जा ३ ॥सू० ३७॥ से भिक्खु वा (२) जाव से जं पुण जाणिज्जा असणां वा मट्ठियाउलित्तं तहप्पगारं असणां वा (४) लाभे संते नो पडिगाहिज्जा १ । केवली बूया आयाणमेयं अस्संजए भिक्खुपडियाए मट्ठियाउलित्तं असणां वा ४ उब्भिंदमाणं पुढ्वीकायं समारंभिज्जा तह तेउवाउवणस्सइ-तसकायं समारंभिज्जा पुणरवि उल्लिंपमाणे पच्छाकम्मं करिज्जा २। अह भिक्खूणां पुव्वोवइट्ठा एस पइन्ना एस हेउ एस कारणे एसुवएसे जं तहप्पगारं मट्ठियाउलित्तं असणां वा (४) लाभे संते नो पडिगाहिज्जा ३। से भिक्खु वा २ से जं पुण जाणिज्जा असणां वा (४) पुढ्वीकायपइट्ठियं तहप्पगारं असणां वा (४) अफासुयं वा नो पडिगाहिज्जा ४ ।

से भिक्खु वा (२) से जं पुण जाणिज्जा असणां वा (४) आउकायपइ-
ट्ठियं चेव, एवं अगणिकायपइट्ठियं लाभे संते नो पडिगाहिज्जा ५। केवली
बूया आयाणमेअं अस्संजए भिक्खुपडियाए अगणि उस्सकिय निस्सकिय
ओहरिय आहट्ठु दलइज्जा अह भिक्खूणां जाव नो पडिगाहिज्जा ॥सू० ३८॥
से भिक्खु वा (२) जाव से जं पुण जाणिज्जा असणां वा (४) अच्चुसिणां
अस्संजए भिक्खुपडियाए सुप्पेण वा विहुयणेणं वा तालियंटेण वा पत्तेण
वा साहाए वा साहाभंगेण वा पिहुणेण वा पिहुणाहत्थेण वा चेलेण वा
चेलकाणेण वा हत्थेण वा मुहेण वा फुमिज्ज वा वीइज्ज वा १ । से
पुव्वामेव आलोइज्जा-आउसोत्ति वा भइणित्ति वा मा एतं तुमं असणां वा (४)
अच्चुसिणां सुप्पेण वा जाव फुमाहि वा वीयाहि वा अभिकंखसि मे दाउं,
एमेव दलयाहि, से सेवं वयंतस्स परो सुप्पेण वा जाव वीइत्ता आहट्ठु
दलइज्जा तप्पगारं असणां वा ४ अफासुयं वा नो पडिगाहिज्जा २ ॥सू०
३९॥ से भिक्खु वा (२) जाव से जं पुण जाणिज्जा असणां वा (४) वणा-
स्सइकायपइट्ठियं तहप्पगारं असणां वा (४) वणास्सइकायपइट्ठियं लाभे संते
नो पडिगाहिज्जा एवं तसकाएवि ॥सू० ४०॥ से भिक्खु वा (२) जाव से जं
पुण पाणगजायं जाणिज्जा, तंजहा-उस्सेइमं वा १ संसेइमं वा २ चाउलोदगं
वा ३ अन्नयरं वा तहप्पगारं पाणगजायं अहुणाधोयं अणांबिलं अव्वुकंतं
अपरिणयं अविद्धत्थं अफासुयं जाव नो पडिगाहिज्जा १ । अह पुण एवं
जाणिज्जा चिराधोयं अंबिलं वुक्कंतं परिणयं विद्धत्थं फासुयं पडिगाहिज्जा
२ । से भिक्खु वा (२) से जं पुण पाणगजायं जाणिज्जा, तंजहा-तिलोदगं
वा ४ तुसोदगं वा ५ जवोदगं वा ६ आयामं वा ७ सोवीरं वा ८ सुद्ध-
वियडं वा ९ अन्नयरं वा तहप्पगारं वा पाणगजायं पुव्वामेव आलोइज्जा,
आउसोत्ति वा भइणित्ति वा ! दाहिसि मे इत्तो अन्नयरं पाणगजायं ! से
सेवं वयंतस्स परो वइज्जा-आउसंतो समणा ! तुमं चेवेयं पाणगजायं पडि-

ग्गहेण वा उस्सिचिया णं उयत्तिया णं गिराहाहि, तहप्पगारं पाणगजायं
 सयं वा गिरिहज्जा परो वा से दिज्जा, फासुयं लाभे संते पडिगाहिज्जा ३
 ॥सू० ४१॥ से भिक्खू वा (२) जाव से जं पुण पाणगं जाणिज्जा अणंतर-
 हियाए पुढवीए जाव संताणए उद्धट्ठ (२) निक्खित्ते सिया, असंजए भिक्खु-
 पडियाए उदउल्लेण वा ससिणिज्जेण वा सकसाएण वा मत्तेण वा सीओदगेण
 वा संभोइत्ता आहट्ठ दलइज्जा, तहप्पगारं पाणगजायं अफासुयं नो
 पडिगाहिज्जा, एयं खलु तस्स भिक्खुस्स वा भिक्खुणीए वा सामग्गियं जाव
 सया जएज्जासि त्ति वेमि ॥सू० ४२॥

॥ इति सप्तम उद्देशकः ॥२-१-१-७॥

॥ अध्ययनं-१ :: उद्देशकः ८ ॥

से भिक्खू वा (२) जाव पविट्ठे समाणे से जं पुण पाणगजायं
 जाणिज्जा, तंजहा-अंबपाणगं वा १० अंबाडगपाणगं वा ११ कविट्ठपाणगं
 वा १२ माउलिंगपाणगं वा १३ मुहियापाणगं वा १४ दालिमपाणगं
 वा १५ खज्जुरपाणगं वा १६ नालियेरपाणगं वा १७ करीरपाणगं वा १८
 कोलपाणगं वा १९ आमलपाणगं वा २० चिचापाणगं वा २१ अन्नयरं वा
 तहप्पगारं पाणगजातं सअट्ठियं सकण्णयं सबीयं असंजए भिक्खुपडियाए
 छब्बेण वा दूसेण वा वालगेण वा अविलियाण परिवीलियाण परिसावियाण
 आहट्ठ दलइज्जा तहप्पगारं पाणगजायं अफासुअं लाभे संते नो पडिगाहिज्जा
 ॥सू० ४३॥ से भिक्खू वा (२) जाव पविट्ठे समाणे आगंतारेसु वा आरामागा-
 रेसु वा गाहावइगिहेसु वा परियावसहेसु वा अन्नगंधाणि वा पाणगंधाणि वा
 सुरभिगंधाणि वा आघाय (२) से तथ आसायपडियाए मुच्छिण गिद्धे
 गट्ठिण अज्झोववन्ने अहो गंधो (२) नो गंधमाघाइज्जा ॥सू० ४४॥ से
 भिक्खू वा (२) जाव से जं पुण जाणिज्जा सालुयं वा विरालियं वा
 सासवनालियं वा अन्नयरं वा तहप्पगारं आमगं असत्थपरिणयं अफासुअं नो

पडिगाहिज्जा १ । से भिक्खु वा (२) जाव से जं पुण्ण जाणिज्जा पिप्पलिं वा पिप्पलचुराणं वा मिरियं वा मिरियचुराणं वा सिंगवेरं वा सिंगवेरचुराणं वा अन्नयरं वा तहप्पगारं वा आमगं वा असत्थपरिणयं अफासुयं नो पडिगाहिज्जा २, से भिक्खु वा (२) जाव से जं पुण्ण पलंबजायं जाणिज्जा, तंजहा—अंबपलंबं वा अंबाडगपलंबं वा तालपलंबं वा भिज्झिरिपलंबं वा सुरहिपलंबं वा सल्लरपलंबं वा अन्नयरं वा तहप्पगारं पलंबजायं आमगं असत्थपरिणयं अफासुयं नो पडिगाहिज्जा ३ । से भिक्खु वा २ जाव से जं पुण्ण पवालजायं जाणिज्जा, तं जहा—आसोट्टपवालं वा निग्गोहपवालं वा पिलुंखुपवालं वा निप्प(यू)रपवालं वा सल्लइपवालं वा अन्नयरं वा तहप्पगारं पवालजायं आमगं असत्थपरिणयं अफासुयं नो पडिगाहिज्जा ४ । से भिक्खु वा (२) जाव से जं पुण्ण सरडुयजायं जाणिज्जा, तंजहा—सरडुयं वा (अंबसरडुयं वा अंबाडसरडुयं वा) कविट्टसरडुयं दाडिमसरडुयं विलसरडुयं अन्नयरं वा तहप्पगारं सरडुयजायं आमं असत्थपरिणयं अफासुयं जाव नो पडिगाहिज्जा ५ । से भिक्खु वा (२) जाव से जं पुण्ण जाणिज्जा तंजहा—उंबरमंथुं वा नग्गोहमंथुं वा पिलुंखुमंथुं वा आसोत्थमंथुं वा अन्नयरं वा तहप्पगारं वा मंथुजायं आमयं दुरुक्कं साण्णवीयं अफासुयं नो पडिगाहिज्जा ६ ॥सू० ४५॥ से भिक्खु वा (२) जाव समाणे से जं पुण्ण जाणिज्जा आमडागं वा पूइपिन्नागं वा महुं वा मज्झं वा सप्पि वा खोलं वा पुराणगं वा इत्थ पाणा अणुप्पसूयाइं जायाइं संबुद्धाइं अन्वुक्कं ताइं अपरिणया इत्थ पाणा अविद्धत्था नो पडिगाहिज्जा ॥सू० ४६॥ से भिक्खु वा (२) जाव समाणे से जं पुण्ण जाणिज्जा उच्छुमेरगं वा अंकरेलुगं वा कसेरुगं वा सिंघाडगं वा पूइआलुगं वा अन्नयरं वा तहप्पगारं आमगं असत्थपरिणयं जाव नो पडिगाहिज्जा १ । से भिक्खु वा (२) से जं पुण्ण जाणिज्जा उप्पलं वा उप्पलनालं वा भिसं वा भिसमुणालं वा पुक्खलं पुक्खल-

विभंगं वा अन्नयरं वा तहप्पगारं जाव नो पडिगाहेज्जा २ ॥सू० ४७॥ से भिक्खु वा (२) जाव समाणे से जं पुण जाणिज्जा अग्गवीयाणि वा मूल-
वीयाणि वा खंधवीयाणि वा पोस्वीयाणि वा अग्गजायाणि वा मूलजा-
याणि वा खंधजायाणि वा पोस्जायाणि वा नन्नत्थ तक्कलिमत्थएण वा तक्क-
लिसीसेण वा नालियेरमत्थएण वा खज्जुरीमत्थएण वा तालमत्थएण वा
अन्नयरं वा तहप्पगारं आमं असत्थपरिणयं जाव नो पडिगाहिज्जा १ ।
से भिक्खु वा (२) जाव से जं पुण जाणिज्जा उच्छुं वा काणां वा अंगा-
रियं वा संमिस्सं विगद्धमियं वित्त(त्त)ग्गं वा कंदलीउसुगं अन्नयरं
वा तहप्पगारं आमं असत्थपरिणयं जाव नो पडिगाहिज्जा २ । से भिक्खु
वा (२) जाव से जं पुण जाणिज्जा लसुणं वा लसुणपत्तं वा लसुणनालं वा
लसुणकंदं वा लसुणचोयगं वा अन्नयरं वा तहप्पगारं आमं असत्थपरिणयं
जाव नो पडिगाहिज्जा ३ । से भिक्खु वा (२) जाव से जं पुण जाणिज्जा
अच्छियं वा कुंभिपक्कं तिदुगं वा वेलुगं वा कासवनालियं वा अन्नयरं
वा तहप्पगारं आमं असत्थपरिणयं जाव नो पडिगाहिज्जा ४ । से भिक्खु वा
(२) जाव से जं पुण जाणिज्जा कणां वा कणकुंडं वा कणपूयलियं वा
चाउलं वा चाउलपिट्ठं वा तिलं वा तिलपिट्ठं वा तिलपप्पडं वा अन्नयरं
वा तहप्पगारं आमं असत्थपरिणयं जाव लाभे संते नो पडिगाहिज्जा ५ ।
एवं खलु तस्स भिक्खुस्स भिक्खुणीए वा सामग्गियं जाव सदा जएज्जासि
त्ति वेमि० ६ ॥सू० ४८॥

॥ इति अष्टम उद्देशकः ॥२-१-१-८ ॥



॥ अध्ययनं १ :: उद्देशकः ९ ॥

इह खलु पाइणं वा (४) संतेगइया सट्ठा भवंति, गाहावई वा जाव कम्मकरी वा, तेसिं च णं एवं वुत्तपुब्बं भवइ-जे इमे भवंति समणा भगवंता सीलवंतो वयवंतो गुणवंतो संजया संवुडा बंभयारी उवरया मेहुणाओ धम्माओ, नो खलु एएसिं कप्पइ आहाकम्मिए असणो वा (४) भुत्तए वा पायए वा १। से जं पुण इमं अम्हं अप्पणो अट्ठाए निट्ठियं तं असणं सव्वमेयं समणाणं निसिरामो, अवियाइं वयं पच्छा अप्पणो अट्ठाए असणं वा (४) चेइस्सामो २ । एयप्पगारं निग्घोसं सुच्चा निसम्म तहप्पगारं असणं वा अफासुयं अणोसणिज्जं लाभे संते नो पडिगाहिज्जा ३ ॥सू० ४६॥ से भिक्खू वा (२) जाव समाणो वसमाणो वा गामाणुगामं वा दूइज्जमाणो से जं पुण जाणिज्जा गामं वा जाव रायहाणिं वा इमंसि खलु गामंसि वा रायहाणिंसि वा संतेगइयस्स भिक्खुस्स पुरेसंथुया वा पच्छासंथुया वा परिवसंति, तंजहा-गाहावई वा जाव कम्मकरी वा तहप्पगाराइं कुलाइं नो पुब्बामेव भत्ताए वा निक्खमिज्ज वा पविसेज्ज वा (२) १ । केवली ब्रूया-आयाणमेयं, पुरा पेहाए तस्स परो अट्ठाए असणं वा (४) उवकरिज्ज वा उवक्खडिज्ज वा, अह भिक्खूणं पुब्बोवइट्ठा (४) जं नो तहप्पगाराइं कुलाइं पुब्बामेव भत्ताए वा पाणाए वा पविसिज्ज वा निक्खमिज्ज वा (२) २ । से तमायाय एगंतम-वक्कमिज्जा (२,) अणावायमसंलोए चिट्ठिज्जा, से तत्थ कालेणं अणुपविसिज्जा (२) तत्थियरेयरेहिं कुलेहिं सामुदाणियं एसियं वेसियं पिंडवायं एसित्ता आहारं आहारिज्जा सिया से परो कालेण अणुपविट्ठस्स आहाकम्मियं असणं वा उवकरिज्ज वा उवक्खडिज्ज वा तं चेगइओ तुसिणीओ उवेहेज्जा, आहडमेव पच्चाइक्खिस्सामि, माइट्ठाणं संफासे, नो एवं करिज्जा ३ । से पुब्बामेव आलोइज्जा-आउसोत्ति वा भइणित्ति वा नो खलु मे कप्पइ आहाकम्मियं असणं वा (४) भुत्तए वा पायए वा, मा उवकरेहि मा उवक्खडेहि, से सेवं

वयंतस्स परो आहाकम्मियं असणां वा (४) उवक्खडावित्ता आहट्टु दलइज्जा तहप्पगारं असणां वा (४) अफासुयं जाव लाभे संते नो पडिगाहिज्जा ४ ॥सू० ५०॥ से भिक्खू वा (२) जाव से जं पुण जाणिज्जा मंसं वा मच्छं वा भज्जिज्जमाणां पेहाए तिलपूयं वा आएसाए उवक्खडिज्जमाणां पेहाए नो खद्धं (२) उवसंकमित्तु ओभासिज्जा, नन्नत्थ गिलाणाणीसाए ॥सू० ५१॥ से भिक्खू वा (२) जाव समाणे अन्नयरं भोयणाजायं पडिगाहिता सुब्भि सुब्भि भुच्चा दुब्भि २ परिट्टवेइ, माइट्ठाणं संफासे नो एवं करिज्जा । सुब्भि वा दुब्भि वा सव्वं भुंजिज्जा नो किंचिवि परिट्टविज्जा (सव्वं भुज्जे न छट्ठुए) ॥सू० ५२॥ से भिक्खू वा (२) जाव समाणे अन्नयरं पाणा-गजायं पडिगाहिता पुप्फं २, आविइत्ता कसायं २, परिट्टवेइ, माइट्ठाणं संफासे नो एवं करिज्जा, १ ॥ पुप्फं पुप्फेइ वा कसायं कसाइ वा सव्वमेयं भुंजिज्जा, नो किंचिवि परिट्टवेज्जा २ ॥सू० ५३॥ से भिक्खू वा (२) बहुपरियावन्नं भोयणाजायं पडिगाहिता बहवे साहम्मिया तत्थ वसंति संभोइया समणुन्ना अपरिहारिया अदूरगया तेसिं अणालोइया अणामंते परिट्टवेइ माइट्ठाणं संफासे, नो एवं करेज्जा १ । से तमायाए तत्थ गच्छिज्जा (२) से पुव्वामेव आलोइज्जा आउसंतो समणा ! इमे मे असणो वा पाणो वा (४) बहुपरियावन्ने तं भुंजह णं २ । से सेवं वयंतं परो वइज्जा-आउसंतो समणा ! आहारमेयं असणां वा (४) जावइयं (२) सरइ तावइयं (२) भुक्खामो वा पाहामो वा सव्वमेयं परिसडइ सव्वमेयं भुक्खामो वा पाहामो वा ३ ॥सू० ५४॥ से भिक्खू वा (२) से जं पुण जाणिज्जा असणां वा (४) परं समुहिस्स बहिया नीहडं जं परेहि असमणुन्नायं अणिसिट्ठं अफासुयं जाव नो पडिगाहिज्जा जं परेहिं समणुन्नायं सम्मं णिसिट्ठं फासुयं जाव पडिगा-हिज्जा, १ । एवं खलु तस्स भिक्खुस्स भिक्खुणीए वा सामग्गियं जाव सया जएज्जासि ति बेमि २ ॥सू० ५५॥

॥ इति नवम उद्देशकः ॥२-१-१-६॥

॥ अध्ययनं-१ :: उद्देशकः-१० ॥

से एगइयो साहाराणं वा पिंडवायं पडिगाहिता ते साहम्मिए अणा-
 पुच्छिता जस्स जस्स इच्छइ तस्स तस्स खद्धं खद्धं दलइ, माइट्ठाणं संफासे,
 नो एवं करिज्जा १। से तमायाय तत्थ गच्छिज्जा २, एवं वइज्जा—आउसं-
 तो समणा ! संति मम पुरेसंथुया वा पच्छासंथुया तंजहा—आयरिए वा १,
 उवज्झाए वा २, पविती वा ३, थेरे वा ४, गणी वा ५, गणहरे वा ६, गणा-
 वच्छेइए वा ७, अवियाइं एएसिं खद्धं खद्धं दाहामि, सेणेवं वयंतं परो वइज्जा—
 कामं खलु आउसो ! अहापज्जत्तं निसिराहि, जावइयं (२) परो वयइ
 तावइयं (२) निसिरिज्जा, सव्वमेवं परो वयइ सव्वमेयं निसिरिज्जा २ ।
 ॥सू० ५६॥ से एगइयो मणुन्नं भोयणाजायं पडिगाहिता पंतेण भोयणेण
 पलिच्छाएइ मा मेयं दाइयं संतं दट्ठण सयमाइए आयरिए वा जाव गणा-
 वच्छेए वा; १। नो खलु मे कस्सइ किंचि दायव्वं सिया, माइट्ठाणं संफासे,
 नो एवं करिज्जा २। से तमायाए तत्थ गच्छिज्जा, (२) पुव्वामेव उत्ताणए
 हत्थे पडिग्गहं कट्ठ इमं खलुत्ति आलोइज्जा, नो किंचि वि णिगूहिज्जा ३।
 से एगइयो अन्नयरं भोयणाजायं पडिगाहिता भइयं (२) भुच्चा विवन्नं विर-
 समाहरइ, माइट्ठाणं संफासे, नो एवं करेज्जा ४ ॥सू० ५७॥ से भिक्खु
 वा (२) से जं पुण जाणिज्जा अंतरुच्छियं वा उच्छुगंडियं वा उच्छुचोयगं वा
 उच्छुमेरगं वा उच्छुसालगं वा उच्छुडालगं वा सिबलिं वा सिबलथालगं वा
 अस्सि खलु पडिग्गहियंसि अप्पे भोयणाजाए बहुउज्झियधम्मिए तहप्पगारं
 अंतरुच्छुयं वा जाव सिबलवालगं वा अफासुअं जाव नो पडिगाहिज्जा १॥से
 भिक्खु वा २, से जं पुण जाणिज्जा बहुअट्ठियं वा मंसं वा मच्छं वा बहुकट्ठयं
 अस्सि खलु पडिगाहितंसि अप्पे सिया भोयणाजाए बहुउज्झियधम्मिए तहप्पगारं
 बहुअट्ठियं वा मंसं वा मच्छं वा बहुकट्ठयं वा लाभे संते जाव नो पडिगाहिज्जा २।
 से भिक्खु वा (२) जाव समाणे सिया णं परो बहुअट्ठिएणं मंसेण वा मच्छेण

वा उवनिमंतिज्जा—आउसंतो समणा ! अभिकंखसि बहुअट्ठियं मंसं पडि-
गाहित्तए ? एअप्पगारं निग्घोसं सुच्चा निसम्भ से पुव्वामेव आलोइज्जा—
आउसोत्ति वा (२) नो खलु मे कप्पइ बहुअट्ठियं मंसंपडिगाहिगत्तए अभिकं-
खसि मे दाउं जावइयं तावइयं पुग्गलं दलयाहि, मा य अट्ठियाइं ३। से सेवं वयं-
तस्स परो अभिहट्ठु अंतो पडिग्गहंगंसि बहुअट्ठियं मंसं परिभाइत्ता निहट्ठु
दलइज्जा ४। तहप्पगारं पडिग्गहं परहत्यंसि वा परपायंसि वा अफासुयं अणो-
सणिज्जं लाभे संते जाव नो पडिगाहिज्जा ५। से आहच्च पडिगाहिए सिया
तं नोहित्ति वइज्जा नो अण्हित्ति वइज्जा ६। से तमायाय एगंतमवक्कमिज्जा
(२) अहे आरामंसि वा अहे उवस्सयंसि वा अप्पंडे जाव संताणए मंसगं
मच्छगं भुच्चा अट्ठियाइं कंटे गहाय से तमायाय एगंतमवक्कमिज्जा (२) अहे
भामथंडिलंसि वा जाव पमज्जिय पमज्जिय परट्ठुविज्जा ७॥सू० ५८॥ से भिक्खू
वा (२) जाव समाणे सिया से परो अभिहट्ठु अंतो पडिग्गहे विलं वा लोणं
उब्भियं वा लोणं परिभाइत्ता नीहट्ठु दलइज्जा, तहप्पगारं पडिग्गहं परहत्यंसि
वा परपायंसि वा अफासुयं जाव नो पडिगाहिज्जा १। से आहच्च पडिगाहिए
सिया तं च नाइदूरगए जाणिज्जा, से तमायाए तत्थ गच्छिज्जा (२) पुव्वामेव
आलोइज्जा-आउसोत्ति वा (२) इमं किं ते जाणया दिन्नं उयाहु अजाणया २।
से य भणिज्जा—नो खलु मे जाणया दिन्नं, अजाणया दिन्नं, कामं खलु
आउसो ! इयाणिं निसिरामि, तं भुंजह वा णं परिभाएह वा णं तं परेहिं
समणुन्नायं समणुसट्ठं तत्रो संजयामेव भुंजिज्ज वा पीइज्ज वा ३। जं च
नो संचाएइ भोत्तए वा पायए वा साहम्मिया तत्थ वसंति संभोइया समणुन्ना
अपरिहारिया अदूरगया, तेसिं अणुप्पयायव्वं सिया, नो जत्थ साहम्मिया जहेव
बहुपरियावन्नं कीरइ तहेव कायव्वं सिया ४। एवं खलु तस्स भिक्खुस्स
भिक्खुणिए वा सामग्गियं जाव सया जएज्जासि त्ति वेमि ५ ॥सू० ५९॥

॥ अध्ययनं-१ :: उद्देशकः-११ ॥

भिक्षागा नामेगे एवमाहंसु समाणे वा वसमाणे वा गामाणुगामं वा
 दूइज्जमाणे मणुन्नं भोयणजायं लभित्ता से भिक्खू गिलाइ, से हंदह गां
 तस्साहरह से य भिक्खू नो भुंजिजा तुमं चेव गां भुंजिजासि, से एगइत्थो
 भोक्खामि त्ति कट्ठु पलिउंचिय (२) आलोइज्जा, तं जहा-इमे पिंडे इमे
 लोए इमे तित्ते इमे कडुयए इमे कसाये इमे अंबिले इमे महुरे, नो खलु इत्तो
 किंचि गिलाणस्स सयइत्ति माइट्ठाणं संफासे, नो एवं करिज्जा १ । तहाठियं
 आलोइज्जा जहाठियं गिलाणस्स सयइत्ति, तं तित्थं तित्थएत्ति वा कडुयं
 कडुयं कसायं कसायं अंबिलं अंबिलं महुरं महुरं त्ति वा २ ॥सू० ६०॥
 भिक्षागा नामेगे एवमाहंसु-समाणे वा वसमाणे वा गामाणुगामं दूइज्जमाणे
 वा मणुन्नं भोयणजायं लभित्ता से य भिक्खू गिलाइ से हंदह गां तस्स
 आहरह, से य भिक्खू नो भुंजिजा आहारिज्जा, से गां नो खलु मे अंतराए
 आहरिस्सामि, इच्चेयाइं आयतणाइं उवाइक्कम्म ॥सू० ६१॥ अह भिक्खू
 जाणिज्जा सत्तपिंडेसणाओ सत्त पाणेसणाओ-तत्थ खलु इमा पट्ठमा पिंडेसणा-
 असंसट्ठे हत्थे असंसट्ठे मत्ते, तहप्यगारेण असंसट्ठेण हत्थेण वा मत्तेण वा
 असणां वा (४) सयं वा गां जाइज्जा परो वा से दिज्जा फासुयं पडिगाहिज्जा,
 पट्ठमा पिंडेसणा १ ॥ अहावरा दुच्चा पिंडेसणा-संसट्ठे हत्थे संसट्ठे मत्ते, तहेव
 दुच्चा पिंडेसणा २ ॥ अहावरा तच्चा पिंडेसणा-इह खलु पाइणां वा (४) संते-
 गइया सट्ठा भवंति-गाहावई वा जाव कम्मकरी वा, तेसि च गां अन्नयरेसु
 विख्वरूवेसु भायणजाएसु उवनिविस्सत्तपुव्वे सिया, तं जहा-थालंसि वा
 पिढरंसि वा सरगंसि वा परगंसि वा वरगंसि वा, अह पुणेवं जाणिज्जा-
 असंसट्ठे हत्थे संसट्ठे मत्ते, संसट्ठे वा हत्थे असंसट्ठे मत्ते, से य पडिग्गह-
 धारी सिया पाणिपडिग्गहिण वा, से पुव्वामेव आलोएज्जा-आउसोत्ति वा
 भणिणि त्ति वा, एएण तुमं असंसट्ठेण हत्थेण संसट्ठेण मत्तेण संसट्ठेण

वा हत्थेण असंसट्ठेण मत्तेण अस्सि पडिग्गहगंसि वा पाणिंसि वा निहट्ठु उचित्तु दलयाहि तहप्पगारं भोयणजायं सयं वा गां जाइज्जा परो वा देज्जा, फासुयं जाव पडिगाहिज्जा, तइया पिंडेसणा ३ ॥ अहावरा चउत्था पिण्डेसणा—से भिक्खु वा (२) से जं पुण जाणिज्जा पिहुयं वा जाव चाउलपलंबं वा अस्सि खलु पडिग्गहियंसि अप्पे पच्छाकम्मे अप्पे पज्जवजाए, तहप्पगारं पिहुयं वा जाव चाउलपलंबं वा सयं वा गां जाइज्जा जाव पडिगाहिज्जा, चउत्था पिंडेसणा ४ ॥ अहावरा पंचमा पिंडेसणा—से भिक्खु वा (२) उग्गहियमेव भोयणजायं जाणिज्जा, तं जहा—सरावंसि वा डिंडिमंसि वा कोसगंसि वा, अह पुणेवं जाणिज्जा बहुपरियावन्ने पाणीसु दगलेवे, तहप्पगारं असणां वा (४) सयं वा गां जाएज्जा जाव पडिगाहिज्जा, पंचमा पिंडेसणा ५ ॥ अहावरा छट्ठा पिंडेसणा—से भिक्खु वा (२) पग्गहियमेव भोयणजायं जाणिज्जा, जं च सयट्ठाए पग्गहियं, जं च परट्ठाए पग्गहियं, तं पायपरियावन्नं तं पाणिपरियावन्नं फासुयं पडिगाहिज्जा, छट्ठा पिंडेसणा ६ ॥ अहावरा सत्तमा पिंडेसणा—से भिक्खु वा (२) जाव समाणे बहु उज्झियधम्मियं भोयणजायं जाणिज्जा, जं चऽन्ने बहवे दुपयचउप्पयसमाणामाहणाअतिहिकिविणावणीमगा नावकंखंति, तहप्पगारं उज्झियधम्मियं भोयणजायं सयं वा गां जाइज्जा परो वा से दिज्जा जावए फासुअं पडिगाहिज्जा, सत्तमा पिंडेसणा ७ ॥ इच्चेयाअो सत्त पिंडेसणाअो अहावराअो सत्त पाणेसणाअो ८ । तत्थ खलु इमा पढमा पाणेसणा—असंसट्ठे हत्थे असंसट्ठे मत्ते, तं चेवं भाणियव्वं, नवरं चउत्थाए नाणात्तं ९ । से भिक्खु वा (२) जाव समाणे से जं पुण पाणगजायं जाणिज्जा, तं जहा—तिलोदगं वा तुसोदगं वा जवोदगं वा आयामं वा सोवीरं वा सुद्धवियडं वा अस्सि खलु पडिग्गहियंसि अप्पे पच्छाकम्मे तहेव पडिगाहिज्जा १० ॥ सू० ६२॥ इच्चेयासिं सत्तरहं पिंडेसणाणां सत्तरहं पाणेसणाणां अन्नयरं पडिमं पडिवज्जमाणो नो एवं वइज्जा—मिच्छा-

पडिवन्ना खलु एए भयंतारो, अहमेगे सम्मं पडिवन्ने, जे एए भयंतारो एयाओ पडिमाओ पडिवज्जित्ता णां विहरंति जो य अहमंसि एयं पडिमं पडिवज्जित्ता णां विहरामि सध्वेऽवि ते उ जिणाणाए उवट्ठिया अन्नुन्नसमाहिए, एवं च णां विहरति, एयं खलु तस्स भिक्खुस्स भिक्खुणीए वा सामग्गियं जाव सया जएज्जामि त्ति वेमि ॥सू० ६३॥

॥ इति एकादशम उद्देशकः ॥ २-१-१-११ ॥

॥ इति प्रथममध्ययनम् ॥श्रु० २-चू० १-अ० १॥

२ः शय्यैषणा-अध्ययनं २ :: उद्देशकः-१

से भिक्खू वा भिक्खुणी वा अभिकंखिज्जा उवस्सयं एसित्तये अणु-पविसित्ता गामं वा जाव रायहाणि वा, से जं पुण उवस्सयं जाणिज्जा सअण्डं जाव ससंताणयं तहप्पगारे उवस्सए नो ठाणं वा सिज्जं वा निसीहियं वा चेइज्जा १ । से भिक्खू वा (२) से जं पुण उवस्सयं जाणिज्जा अप्पण्डं जाव अप्पसंताणयं तहप्पगारे उवस्सए पडिलेहित्ता पमज्जित्ता तथो संजयामेव ठाणं वा (३) चेइज्जा २ । से जं पुण उवस्सयं जाणिज्जा अस्सि पडियाए एगं साहम्मियं समुद्दिस्स पाणाइं (४) समारब्भ समुद्दिरस कीयं पामिच्चं अच्छिज्जं अणिसट्ठं अभिहणं आहट्ठु चेएइ, तहप्पगारे उवस्सए पुरिसंतर-कडे वा जाव अणासेविए वा नो ठाणं वा (३) चेइज्जा ३ ॥ एवं बहवे साहम्मिया एगं साहम्मिणिं बहवे साहम्मिणीओ ४ । से भिक्खू वा (२) से जं पुण उवस्सयं जाणिज्जा अस्संजए भिक्खुपडियाए बहवे समणमाहणाअति-हिक्किवणवणीमए पगणिय (२) समुद्दिस्स तं चेव भाणियत्वं ५ ॥ से भिक्खू वा (२) से जं पुण उवस्सयं जाणिज्जा, बहवे समणमाहणाअतिहिक्किवणवणी-मए पगणिय (२) समुद्दिस्स पाणाइं (४) जाव चेएत्ति, तहप्पगारे उवस्सए अपुरिसंतरकडे जाव अणासेविए नो ठाणं वा (३) चेइज्जा (३) ६ । अह पुणेवं

जाणिज्जा पुरिसंतरकडे जाव सेविए पडिलेहिता पमजित्ता तथो संजयामेव चेइज्जा ७ ॥ से भिक्खु वा (२) से जं पुण उवस्सयं जाणिज्जा अस्संजए भिक्खुपडियाए कडिए वा उक्कंबिए वा छन्ने वा लित्ते वा घट्ठे वा मट्ठे वा संमट्ठे वा संयमूमिए वा तहप्पगारे उवस्सए अपुरिसंतरकडे जाव अणा-सेविए नो ठाणं वा सेज्जं वा निसीहिं वा चेइज्जा, अह पुण एवं जाणिज्जा पुरिसंतरकडे जाव आसेविए पडिलेहिता २, तथो चेइज्जा ८ ॥सू० ६४॥ से भिक्खु वा (२) से जं पुण उवस्सयं जाणिज्जा अस्संजए भिक्खुपडियाए खुडियाओ दुवारियाओ महल्लियाओ कुज्जा जहा पिंडेसणाए जाव संथारगं संथारिज्जा बहिया वा निन्नक्खु तहप्पगारे उवस्सए अपुरिसंतरकडे जाव अणासेविए ठाणं वा (३) चेइज्जा, अह पुणोवं जाणिज्जा पुरिसंतरकडे आसेविए पडिलेहिता पमजित्ता, तथो संजयामेव जाव चेइज्जा १ । से भिक्खु वा (२) से जं पुण उवस्सयं जाणिज्जा, अस्संजए भिक्खुपडियाए उदग्गप्पसूयाणि कंदाणि वा भूलाणि वा पत्ताणि वा पुप्फाणि वा फलाणि वा बीयाणि वा हरियाणि वा ठाणाओ ठाणं साहरइ बहिया वा निराणाक्खु तहप्पगारे उवस्सए अपुरिसंतरकडे जाव नो ठाणं वा (३) चेइज्जा, अह पुण एवं जाणिज्जा पुरिसंतरकडे जाव चेइज्जा २ । से भिक्खु वा (२) से जं पुण जाणिज्जा अस्संजए भिक्खुपडियाए पौढं वा फलगं वा निस्सेणिं वा उदूखलं वा ठाणाओ ठाणं साहरइ बहिया वा निराणाक्खु तहप्पगारे उवस्सए अपुरिसंतरकडे जाव नो ठाणं वा सेज्जं वा निसी-हियं वा चेइज्जा ३ । अह पुण एवं जाणिज्जा पुरिसंतरकरे जाव चेइज्जा ४ ॥सू० ६५॥ से भिक्खु वा (२) से जं पुण उवस्सयं जाणिज्जा, तंजहा-खंधंसि वा मंचंसि वा मालंसि वा पासायंसि वा हम्मियतलंसि वा अन्नयरंसि वा तहप्पगारंसि अंतलिक्खजायंसि, नन्नत्थ आगादाणागादेहिं कारणेहिं ठाणं वा (३) नो चेइज्जा १ । से आहच्च चेइए सिया नो तत्थ सीओ-

दगवियडेण वा उसिणोदगवियडेण वा, हत्थाणि वा पायाणि वा अच्ची-
णि वा दंताणि वा मुहं वा उच्छोलिज्ज वा प्होइज्ज वा, नो तत्थ ऊसदं
पकरेज्जा, तंजहा-उच्चारं वा पासवणां वा खेलं वा सिंघाणां वा वंतं वा पित्तं
वा पूयं वा सोणियं वा अन्नयरं वा सरीरावयवं वा २ । केवली ब्रूया
आयाणमेयं, से तत्थ ऊसदं पगरेमाणे पयलिज्ज वा पवडेज्ज वा ३ । से तत्थ
पयलमाणे वा पवडमाणे वा हत्थं वा जाव सीसं वा अन्नयरं वा कायंसि
इदियजालं लूसिज्ज वा पाणाणि वा (४) अभिहणिज्ज वा जाव ववरोविज्ज
वा ४ । अथ भिक्खुणां पुब्बोपइट्ठा जाव जं तहप्पगारे उवस्सए अंतलिव्वजाए
नो ठाणं वा (३) चेइज्जा ५ ॥सू० ६६॥ से भिक्खू वा (२) से जं
पुण उवस्सयं जाणिज्जा सइत्थियं सखुडुं सपसुभत्तपाणां तहप्पगारे सागारिए
उवस्सए नो ठाणं वा (३) चेइज्जा १ । आयाणमेयं भिक्खुस्स गाहावइकुलेण
सद्धिं संवसमाणस्स अलसगे वा विसूइया वा ळ्ठी वा उव्वाहिज्जा अन्नयरे
वा से दुक्खे रोगायंके समुपज्जिज्जा, अस्संजए कलुणपडियाए तं भिक्खुस्स
गायं तिल्लेण वा घएण वा नवणीएण वा वसाए वा अग्गिज्ज वा
मक्खिज्ज वा सिणाणेण वा कक्केण वा लुद्देण वा वराणेण वा चुराणेण
वा पउमेण वा आघंसिज्ज वा पघंसिज्ज वा उव्वलिज्ज वा उवट्ठिज्ज वा
सीओदगवियडेण वा उसिणोदगवियडेण वा उच्छोलिज्ज वा (प्होएज्ज वा)
पक्खालिज्ज वा सिणाविज्ज वा सिंचिज्ज वा दारणा वा दारुपरिणामं कट्ठु
अगणिकायं उज्जालिज्ज वा पज्जालिज्ज वा उज्जालित्ता कायं आयाविज्जा
वा पयावेज्जा वा २ । अह भिक्खुणां पुब्बोपइट्ठा एस पतिन्ना जं तहप्पगारे
सागारिए उवस्सए नो ठाणं वा (३) चेइज्जा ३ ॥सू० ६७॥ आयाण-
मेयं भिक्खुस्स सागारिए उवस्सए संवसमाणस्स इह खलु गाहावई वा जाव
कम्मकरी वा अन्नमन्नं अक्कोसंति वा पचंति वा (बंधन्ति वा पचंति वा वहन्ति
वा) रुंभंति वा उद्विंति वा, अह भिक्खुणां उच्चावयं मणां नियंछिज्जा,

एए खलु अन्नमन्नं अकोसंतु वा मा अकोसंतु जाव मा वा उद्वित्तु; अह भिक्खूणां पुव्वोवइट्ठा एस पइन्ना जाव जं तहप्पगारे सागारिए उवस्सए नो ठाणं वा (३) चेइज्जा ॥सू० ६८॥ आयाणमेयं भिक्खुस्स गाहावइहिं सद्धि संव-
समाणस्स, इह खलु गाहावइ अण्णो सयट्ठाए अगणिकायं उज्जालिज्ज वा पज्जालिज्ज वा विज्जविज्ज वा १। अह भिक्खू उच्चावयं मणं नियं-
छिज्जा, एए खलु अगणिकायं उज्जालेंतु वा मा वा उज्जालेंतु, पज्जालितु वा मा वा पज्जालितु, अविज्जवित्तु वा मा वा विज्जवित्तु २। अह भिक्खूणां पुव्वो-
वदिट्ठा जाव जं तहप्पगारे उवस्सए नो ठाणं वा (३) चेइज्जा ३ ॥सू० ६९॥
आयाणमेयं भिक्खुस्स गाहावइहिं सद्धि संवसमाणस्स, इह खलु गाहावइस्स कुंडले वा गुणे वा मणी वा मुत्तिए वा हिरण्णोसु वा सुवण्णोसु वा कड-
गाणि वा तुडियाणि वा तिसराणि वा पालंबाणि वा हारे वा अद्धहारे वा एगावली वा कणागावली वा मुत्तावली वा रयणावली वा तरुणीयं वा कुमारिं अलंकियविभूसियं पेहाए, १ । अह भिक्खू उच्चावयं मणं नियच्छेज्जा,
एरिसिया वा सा नो वा एरिसिया-इय वा बूया इय वा णं मणं साइज्जा २। अह भिक्खूणां पुव्वोवदिट्ठा जाव जं तहप्पगारे उवस्सये नो ठाणं वा जाव
चेइज्जा ३ ॥सू० ७०॥ आयाणमेयं भिक्खुस्स गाहावइहिं सद्धि संवसमा-
णस्स, इह खलु गाहावइणीओ वा गाहावइधूयाओ वा गाहावइ सुरहाओ वा गाहावइधाइओ वा गाहावइदासीओ वा गाहावइकम्मफरीओ वा तासिं
च णं एवं वुत्तपुव्वं भवइ—जे इमे भवंति समणा भगवन्तो जाव उवरया मेहुणाओ धम्माओ, नो खलु एएसिं कप्पइ मेहुणधम्मं परियारणाए
आउट्टित्तए, जा य खलु एएहिं सद्धि मेहुणधम्मं परियारणाए आउट्टाविज्जा
पुत्तं खलु सा लभिज्जा उयस्सिं तेयस्सिं वच्चस्सिं जसस्सिं संपराइयं
आलोयणादरसणिज्जं, एयप्पगारं निग्घोसं सुच्चा निसम्म तासिं च णं
अन्नयरी सट्ठी तं तवस्सिं भिक्खुं मेहुणधम्मपडियारणाए आउट्टाविज्जा
१। अह भिक्खूणां पुव्वोवइट्ठा जाव जं तहप्पगारे सागारिए उवस्सए

ना ठाणं वा (३) चेइज्जा २। एयं खलु तस्स भिक्खुस्स भिक्खुणीए वा सामग्गियं जाव सया जएज्जासि त्ति वेमि ३ ॥सू० ७१॥

॥ इति प्रथम उद्देशकः ॥२-१-२-१॥

॥ अध्ययनं - २ :: उद्देशकः-२ ॥

गाहावइ नामेगे सुइसमायारा भवंति, से भिक्खू य असिणाणाए मोय-समायारे से तग्गंधे दुग्गंधे पडिकूजे पडिलोमे यावि भवइ, जं पुव्वं कम्मं तं पच्छा कम्मं, जं पच्छा कम्मं तं पुरे कम्मं, तं भिक्खुपडियाए वट्टमाणा करिज्जा वा नो करिज्जा वा, अह भिक्खूणां पुव्वोवइट्ठा जाव ज तहप्पगारे उवस्सए नो ठाणं वा (२) जाव चेइज्जा ॥सू० ७२॥ आयाणामेयं भिक्खुस्स गाहावइहिं सद्धिं संवसमाणास्स इह खलु गाहावइस्स अप्पणो सयट्ठाए विरुवरूवे भोयणाजाए उवक्खडिए सिया, अह पच्छा भिक्खुपडियाए असणां वा (४) उवक्खडिज्ज वा उवकरिज्ज वा, तं च भिक्खू अभिकंखिज्जा भुत्तए वा पायए वा वियट्ठित्तए वा, अह भिक्खूणां पुव्वोवइट्ठा जाव जं नो तहप्पगारे उवस्सए ठाणं वा (३) चेइज्जा ॥सू० ७३॥ आयाणामेयं भिक्खुस्स गाहावइणा सद्धिं संवसमाणास्स इह खलु गाहावइस्स अप्पणो सयट्ठाए विरुवरूवाइं दास्याइं भिन्न-पुव्वाइं भवंति, अह पच्छा भिक्खुपडियाए विरुवरूवाइं दास्याइं भिदिज्ज वा किणिज्ज वा पामिच्चेज्ज वा दास्या वा दासपरिणामं कट्ठु अगणिकायं उज्जालेज्ज वा पज्जालेज्ज वा तत्थ भिक्खू अभिकंखिज्जा आयावित्तए वा पयावित्तए वा वियट्ठित्तए वा, अह भिक्खूणां पुव्वोवइट्ठा जाव जं नो तहप्पगारे उवस्सए ठाणं वा (३) चेइज्जा ॥सू० ७४॥ से भिक्खू वा (२) उच्चारपास-वणेण उवाहिज्जमाणे रात्रो वा वियाले वा गाहावइकुलस्स दुवारबाहं अवं-गुणिज्जा, तेणे य तस्संधिचारी अणुपविसिज्जा, तस्स भिक्खुस्स नो कप्पइ एवं वइत्तए—अयं तेणो पविसइ वा नो वा पविसइ, उवल्लियइ वा नो वा

उवत्तियइ, आवयइ वा नो वा आवयइ, वयइ वा नो वा वयइ, तेण हडं
 अन्नेण हडं तस्स हडं अन्नस्स हडं अयं तेणे अयं उवचरेण अयं हंता अयं
 इत्थमकासी, तं तवस्सिं भिक्खुं अतेणं तेणंति संकइ, अह भिक्खूणां पुब्बोव-
 इट्ठा जाव नो ठाणं वा (२) चेइज्जा ॥सू० ७५॥ से भिक्खू वा (२) से जं
 पुण उवस्सयं जाणिज्जा तणपुंजेसु वा पलालपुंजेसु वा सचंढे जाव ससं-
 ताणए तहप्पगारे उवस्सए नो ठाणं वा (३) चेइज्जा १ । से भिक्खू वा (२)
 से जं पुण उवस्सयं जाणिज्जा, तणपुंजेसु वा पलालपुंजेसु वा अप्पंढे जाव
 चेइज्जा २ ॥सू० ७६॥ से आगंतारेसु वा आरामागारेसु वा गाहावइकुलेसु
 वा परियावसहेसु वा अभिक्खूणां २ साहम्मिएहिं उवयमाणेहिं नो उवइज्जा
 ॥सू० ७७॥ से आगंतारेसु वा (४) जे भयंतारो उडु(उ)वद्धियं वा वासावा-
 सियं वा कप्पं उवाइणित्ता तत्थेव भुज्जो भुज्जो संवसंति, अयमाउसो ! काला-
 इक्कंतकिरियावि भवति १ ॥सू० ७८॥ से आगंतारेसु वा (४) जे भयंतारो
 उडु(उ)वद्धियं वासावासियं वा कप्पं उवाइणावित्ता तं दुगुणा दु(ति)-
 गुणेण वा अपरिहरित्ता तत्थेव भुज्जो भुज्जो संवसंति अयमाउसो ! उव-
 ट्ठाणकिरिया यावि भवति २ ॥सू० ७९॥ इह खलु पाइणं वा पडीणं वा
 दाहिणं वा उदीणं वा संतेगइया सट्ठा भवंति, तं जहा—गाहावइ वा जाव
 कम्मकरीओ वा, तेसिं च णं आयागोयरे नो सुनिसंते भवइ, तं सहह-
 माणेहिं पत्तियमाणेहिं रोयमाणेहिं बहवे समण—माहण—अतिहि—किवणवणी-
 मए समुद्धिस्स तत्थ तत्थ अगारीहिं अगाराइं चेइयाइं भवंति, तंजहा—आए-
 सणाणि वा आयतणाणि वा देवकुलाणि वा सहाओ वा पवाणि वा पणिय-
 गिहाणि वा पणियसालाओ वा जाणगिहाणि वा जाणसालाओ वा सुहा-
 कम्मंताणि वा दम्भकम्मंताणि वा वद्धकम्मंताणि वा वक्कयकम्मंताणि वा वण-
 कम्मंताणि वा इंगालकम्मंताणि वा कट्टकम्मंताणि सुसाणकम्मंताणि वा सुरणा-
 गार-गिरिकंदर-संतिसेलोवट्ठाण-कम्मंताणि वा भवणगिहाणि वा, जे भयंतारो

तहप्पगाराइं आएसणाणि वा जाव गिहाणि वा तेहिं उवयमाणोहिं उवयंति
 अयमाउसो ! अभिक्कंतकिरिया यावि भवइ ३ ॥सू० ८०॥ इह खलु
 पाइरां वा (४) जाव रोयमाणोहिं बहवे समणमाहणअतिहिकिवणवणीमए
 समुद्दिस्स तत्थ तत्थ अगारिहिं अगाराइं चेइयाइं भवंति, तंजहा—आएस-
 णाणि वा जाव भवणगिहाणि वा जे भयंतारो तहप्पगाराइं आएसणाणि
 जाव भवणगिहाणि वा तेहिं अणोवयमाणोहिं उवयंति अयमाउसो !
 अणभिक्कंतकिरिया यावि भवइ ४॥ ॥सू० ८१॥ इह खलु पाइरां
 वा (४) जाव कम्मकरीओ वा, तेसिं च रां एवं वुत्तपुब्बं भवइ—जे इमे
 भवंति समणा भगवंतो जाव उवरया मेहुणाओ धम्माओ, नो खलु एसिं
 भयंताराणां कप्पइ आहाकम्मिए उवस्सए वत्थए, से जाणि इमाणि अम्हं
 अण्णो सयट्ठाए चेइयाइं भवंति, तं जहा—आएसणाणि वा जाव भवण-
 गिहाणि वा, सज्जाणि ताणि समणाणं निसिरामो, अवियाइं वयं पच्छा
 अण्णो सयट्ठाए चेइस्सामो, तंजहा—आएसणाणि वा जाव भवणगिहाणि वा
 एयप्पगारं निग्घोसं सुच्चा निसम्म जे भयंतारो तहप्पगाराइं आएसणाणि
 वा जाव भवणगिहाणि वा उवागच्छंति इयराइयरेहिं पाहुडेहिं वट्ठंति, अय-
 माउसो ! वज्जकिरियावि भवइ ५॥ ॥सू० ८२॥ इह खलु पाइरां वा (४) सतेग-
 इया सट्ठा भवंति, तेसिं च रां आयागोयरे जाव तं रोयमाणोहिं बहवे समण-
 माहणअतिहि-किवणवणीमगे पगणिय (२) समुद्दिस्स तत्थ (२) अगा-
 रीहिं अगाराइं चेइयाइं भवंति, तंजहा—आएसणाणि वा जाव भवणगिहाणि
 वा, जे भयंतारो तहप्पगाराइं आएसणाणि वा जाव भवणगिहाणि वा,
 उवागच्छंति इयराइयरेहिं पाहुडेहिं वट्ठंति, अयमाउसो ! महावज्जकिरियावि
 भवइ ६ ॥सू० ८३॥ इह खलु पाइरां वा (४) संतेगइया जाव तं सद्वहमा-
 णोहिं तं पत्तिममाणोहिं तं रोयमाणोहिं बहवे समणमाहणअतिहिकिवणवणीमगे
 पगणिय (२) समुद्दिस्स तत्थ (२) अगाराइं चेइयाइं भवंति तंजहा—आएस-

णाणि वा जाव भवणागिहाणि वा, जे भयंतारो तहप्पगाराणि आएस-
णाणि वा जाव भवणागिहाणि वा उवागच्छंति इयराइयरेहिं पाहुडेहिं, अय-
माउसो ! सावज्जकिरिया यावि भवइ ७ ॥सू० ८४॥ इह खलु पाइणं वा
(४) जाव तं रोयमाणेहिं एगं समणजायं समुद्दिस्स तत्थ (२) अगारीहिं
अगाराइं चेइयाइं भवन्ति, तंजहा—आएसणाणि जाव गिहाणि वा महया
पुढवीकाय-समारंभेण जाव महया तसकायसमारंभेण महया विरूवरूवेहिं
पावकम्मकिच्चेहिं, तंजहा छायाणओ लेवणओ संथारदुवारपिहणओ सीओदए
वा परट्ठवियपुव्वे भवइ, अगणिकाये वा उज्जालियपुव्वे भवइ, जे भयंतारो
तहप्पगाराइं आएसणाणि वा जाव भवणागिहाणि वा उवागच्छंति इयराइय-
रेहिं, पाहुडेहिं वट्ठंति दुपक्खं ते कम्मं सेवंति, अयमाउसो ! महासावज्जकिरिया
यावि भवइ ८ ॥सू० ८५॥ इह खलु पाइणं वा जाव तं रोयमाणेहिं अप्पणो
सयट्ठाए तत्थ (२) अगारीहिं अगाराइं चेइयाइं भवन्ति, तंजहा-आएसणाणि
वा जाव भवणागिहाणि वा महया पुढवीकायसमारंभेण जाव अगणिकाए
वा उज्जालियपुव्वे भवइ, जे भयंतारो तहप्पगाराइं आएसणाणि वा जाव
भवणागिहाणि वा उवागच्छंति इयराइयरेहिं पाहुडेहिं एगपक्खं ते कम्मं सेवंति,
अयमाउसो ! अप्पसावज्जकिरिया यावि भवइ ९ ॥ एवं खलु तस्स भिक्खुस्स
भिक्खुणीए वा सामग्गियं जाव सया जएज्जासि ति वेमि ॥सू० ८६॥

॥ इति द्वितीयोद्देशकः ॥ २-१- २-२ ॥

॥ अध्ययनं-२ :: उद्देशक-३ः ॥

से य नो सुलभे फासुए उंढे अहेसणिज्जे नो य खलु सुद्धे इमेहिं
पाहुडेहिं, तंजहा-छायाणओ लेवणओ संथारदुवारपिहणओ पिंडवाए-
सणाओ, से य भिक्खु चरियारए ठाणारए निसीहियारए सिज्जासंथार-
पिंडवाएसणाए, संति भिक्खूणो एवमक्खाइणो उज्जुया नियागपडिवन्ना

अमायं कुञ्जमाणा वियाहिया, संतेगइया पाहुडिया उक्खित्तपुव्वा भवइ, एवं निक्खित्तपुव्वा भवइ, परिभाइयपुव्वा भवइ, परिभुत्तपुव्वा भवइ परिट्टवि-
यपुव्वा भवइ, एवं वियागरेमाणे समियाए वियागरेइ ? हंता भवइ ॥सू० ८७॥
से भिक्खू वा (२) से जं पुण उवस्सयं जाणिज्जा खुडिडयाओ खुडिडुवा-
रियाओ निययाओ संनिरुद्धाओ भवन्ति, तहपगारे उवस्सए राओ वा
वियाले वा निक्खममाणे वा पविसमाणे वा पुरा हत्थेण वा पच्छा पाएण
वा तओ संजयामेव निक्खमिज्ज वा (२) १। केवली बूया आयाणमेयं, जे
तत्थ समणाणं वा माहणाणं वा छत्तए वा मत्तए वा दंडए वा लट्ठिया वा
भिसिया वा नालिया वा चेले वा चिलिमिली वा चम्मए वा चम्मकोसए वा
चम्मछेयणाए वा दुब्बद्धे दुन्निक्खित्ते अणिकंपे चलाचले भिक्खू य राओ
वा वियाले वा निक्खममाणे वा (२) पयलिज्ज वा पवडेज्ज वा २। से
तत्थ पयलमाणे वा पवडेमाणे वा हत्थं वा पायं वा जाव इंदियजायं वा
लूसिज्ज वा पाणाणि वा (४) अलिहणेज्ज वा जाव ववरोविज्ज वा ३।
अह भिक्खूणं पुव्वोवइट्ठं जाव जं तहपगारे उवस्सए पुरा हत्थेण वा पच्छा
पाएणं वा तओ संजयामेव निक्खमिज्ज वा पविसिज्ज वा ४॥सू० ८८॥ से
आगंतारेसु वा अणुवीय उवस्सयं जाइज्जा, जे तत्थ इसरे जे तत्थ समहिट्ठाए
ते उवस्सयं अणुन्नविज्जा कामं खलु आउसो ! अहालंदं अहापरिन्नायं
वसिस्सामो जाव आउसंतो ! जाव आउसंतस्स उवस्सए जाव साहमियाइं
ततो उवस्सयं गिहिहस्सामो तेण परं विहरिस्सामो ॥सू० ८९॥ से भिक्खू
वा (२) जस्सुवस्सए संवसिज्जा तस्स पुव्वामेव नामगुत्तं जाणिज्जा, तओ
पच्छा तस्स गिहे निमंतेमाणस्स वा अनिमंतेमाणस्स वा असणं वा (४)
अफासुयं जाव नो पडिगाहेज्जा ॥सू० ९०॥ से भिक्खू वा (२) से जं
पुण उवस्सयं जाणिज्जा, ससागारियं सागणियं सउदयं नो पन्नस्स निक्ख-
माणपवेसाए जावअणुचिंताए तहपगारे उवस्सए नो ठाणं वा सेज्जं वा

निसीहियं वा चेइज्जा ॥सू० ११॥ से भिक्खू वा (२) से जं पुण उवस्सयं
 जाणिज्जा गाहावइकुलस्स मज्झमज्जेणं गंतुं पंथए पडिबद्धं वा नो
 पन्नस्स जाव चिंताए तहप्पगारे उवस्सए नो ठाणं वा सेज्जं वा
 निसीहियं वा चेइज्जा ॥सू० १२॥ से भिक्खू वा (२) से जं पुण उवस्सयं
 जाणिज्जा, इह खलु गाहावई वा कम्मकरीओ वा अन्नमन्नं अक्कोसंति वा जाव
 उद्वंति वा नो पन्नस्स जाव चिंताए सेवं नच्चा तहप्पगारे उवस्सए नो ठाणं वा
 जाव चेइज्जा ॥सू० १३॥ से भिक्खू वा (२) से जं पुण उवस्सयं जाणिज्जा
 इह खलु गाहावई वा कम्मअरीओ वा अन्नमन्नस्स गायं तिल्लेण वा नव-
 नीएण वा घएण वा वसाए वा अज्झंगेति वा मक्खेति वा नो पराणस्स
 जाव चिंताए तहप्पगारे उवस्सए नो ठाणं वा जाव चेइज्जा ॥सू० १४॥ से
 भिक्खू वा (२) से जं पुण उवस्सयं जाणिज्जा-इह खलु गाहावई वा जाव
 कम्मकरीओ वा अन्नमन्नस्स गायं सिणारोण वा कक्केण वा लुद्देण वा (वराणोण
 वा चुराणोण वा पउमेण वा आघंसंति वा पघंसंति वा उव्वलंति वा उव्वट्ठिति
 वा) नो पन्नस्स निक्खमण जाव चिंताए, तहप्पगारे उवस्सए नो ठाणं वा जाव
 चेइज्जा ॥सू० १५॥ से भिक्खू वा (२) से जं पुण उवस्सयं जाणिज्जा, इह खलु
 गाहावती वा जाव कम्मकरी वा अण्णमणस्स गायं सीओदगवियडेण वा
 उसिणोदगवियडेण वा उच्छोलंति वा पयोयंति वा सिंचंति वा सिणावंति
 वा नो पन्नस्स जाव नो ठाणं वा जाव चेइज्जा ॥सू० १६॥ से भिक्खू वा
 वा से जं पुण उवस्सयं जाणिज्जा इह खलु गाहावई वा जाव कम्मकरीओ वा
 निगिणा ठिया निगिणा उल्लीणा मेहुणधम्मं विन्नविति रहस्सियं वा मंतं
 मंतंति नो पन्नस्स जाव नो ठाणं वा (३) चेइज्जा ॥सू० १७॥ से भिक्खू
 वा (२) से जं पुण उवस्सयं जाणिज्जा आइन्नसंलिक्खं नो पन्नस्स जाव
 चिंताए जाव नो ठाणं वा (३) चेइज्जा ॥सू० १८॥ से भिक्खू वा (२)
 अभिकंखिज्जा संथारगं एसित्तए, से जं पुण संथारगं जाणिज्जा सत्थंढं जाव

ससंताणयं, तहप्पगारं संथारं लाभे संते नो पडिगाहिज्जा १॥ से भिक्खु वा (२) से जं पुण्ण संथारयं जाणिज्जा अप्पंडं जाव संताणगगख्यं तहप्पगारं लाभे संते नो पडिगाहिज्जा २॥ से भिक्खु वा (२) से जं पुण्ण संथारयं जाणिज्जा अप्पंडं जाव संताणयं लहुयं अपाडिहारियं तहप्पगारं नो पडिगाहिज्जा ३॥ से भिक्खु वा (२) से जं पुण्ण संथारगं जाणिज्जा, अप्पंडं जाव अप्पसंताणगं लहुयं पाडिहारियं नो अहावद्धं तहप्पगारं लाभे संते नो पडिगाहिज्जा ४ ॥ से भिक्खु वा (२) से जं पुण्ण संथारगं जाणिज्जा अप्पंडं जाव संताणगं लहुयं पाडिहारियं अहावद्धं, तहप्पगारं संथारगं लाभे संते पडिगाहिज्जा ५ ॥सू० ११॥ इच्चेयाइं आयतणाइं उवाइक्कम-अह भिक्खु जाणिज्जा इमाइं चउहिं पडिमाहिं संथारगं एसित्तए, तत्थ खलु इमा पढमा पडिमा-से भिक्खु वा (२) उहिसिय (२) संथारगं जाइज्जा, तंजहा-इक्कडं वा कटिणं वा जंतुयं वा परगं वा मोरगं वा तण्णगं वा सोरगं वा कुसं वा कुच्चगं वा पिप्पलगं वा पलालगं वा, से पुव्वामेव आलोइज्जा-आउ-सोत्ति वा भइणीत्ति वा दाहिसि मे इत्तो अन्नयरं संथारगं ? तहप्पगारं संथारगं सयं वा णं जाइज्जा, परो वा देज्जा फासुयं एसणिज्जं जाव पडिगाहिज्जा, पढमा पडिमा ॥ १ ॥सू० १००॥ अहावरा दुच्चा पडिमा-से भिक्खु वा (२) पेहाए संथारगं जाइज्जा, तंजहा-गाहावइं वा कम्मकरिं वा से पुव्वामेव आलोइज्जा-आउसो त्ति वा भइणी त्ति वा दाहिसि मे एत्तो अन्नयरं संथारगं ? तहप्पगारं संथारगं सयं वा णं जाएज्जा परो वा से देज्जा, फासुयं एसणिज्जं जाव पडिगाहिज्जा, दुच्चा पडिमा २ ॥ अहावरा तच्चा पडिमा-से भिक्खु वा (२) जस्सुवस्सए संवसिज्जा जे तत्थ अहासमन्ना-गए, तंजहा-इक्कडे इ वा जाव पलालेइ वा तस्स लाभे संवसिज्जा तस्सालाभे उक्कुडुए वा नेसज्जिए वा विहरिज्जा, तच्चा पडिमा ३ ॥सू० १०१॥ अहावरा चउत्था पडिमा-से भिक्खु वा (२) अहासंथडमेव संथारगं जाइज्जा,

तंजहा—पुढविसिलं वा कट्टसिलं वा अहासंथडमेव, तस्स लाभे संते संव-
 सिज्जा, तस्स अलाभे उक्कुडुए वा (२) विहरिज्जा, चउत्था पडिमा ४
 ॥सू० १०२॥ इच्चेयाणं चउगहं पडिमाणं अन्नयरं पडिमं पडिवज्जमाणो तं
 चेव जाव अन्नोऽन्नसमाहीए एवं च णं विहरंति ॥सू० १०३॥ से भिक्खु
 वा (२) अभिकंखिज्जा संथारगं पच्चप्पिणित्तए, से जं पुण संधारगं जाणिज्जा
 सअण्डं जाव ससंताणयं तहप्पगारं संथारगं नो पच्चप्पिणिज्जा ॥सू० १०४॥
 से भिक्खु वा (२) अभिकंखिज्जा संथारगं पच्चप्पिणित्तए से जं पुण संथारगं
 जाणिज्जा, अण्डं तहप्पगारं जाव संताणगं संथारगं पडिलेहिय (२)
 पमज्जिय (२) आयाविय (२) विहुणिय (२) तत्रो संजयामेव पच्चप्पिणिज्जा
 ॥सू० १०५॥ से भिक्खु वा (२) समाणो वा वसमाणो वा गामाणुगामं
 दूइज्जमाणो वा पुव्वामेव पन्नस्स उच्चारपासवणभूमिं पडिलेहिज्जा, केवली
 बूया आयाणमेयं-अपडिलेहियाए उच्चारपासवणभूमीए, से भिक्खु वा (२)
 रात्रो वा वियाले वा उच्चारपासवणं परिट्टवेमाणो पयलिज्ज वा पवडेज्ज वा
 से तत्थ पयलमाणो वा (२) हत्थं वा पायं वा जाव लूसेज्ज वा पाणाणि
 वा (४) जाव ववरोविज्जा, अह भिक्खुणां पुव्वोवइट्ठा जाव जं पुव्वामेव
 पन्नस्स उच्चारपासवणभूमिं पडिलेहिज्जा ॥सू० १०६॥ से भिक्खु वा (२)
 अभिकंखिज्जा सिज्जासंधारगभूमिं पडिलेहित्तए नन्नत्थ आयरियेण वा
 उवज्झाएण वा जाव गणावच्छेएण वा बालेण वा बुड्ढेण वा सेहेण वा
 गिसाणेण वा आएसेण वा अंतेण वा मज्जेण वा समेण वा विसमेण वा
 पवाएण वा निवाएण वा, तत्रो संजयामेव पडिलेहिय (२) पमज्जिय (२)
 तत्रो संजयामेव बहुफासुयं सिज्जासंधारगं संथरिज्जा ॥सू० १०७॥ से
 भिक्खु वा (२) बहुफासुयं सेज्जा संथारगं संथरित्ता अभिकंखिज्जा बहुफा-
 सुए सिज्जासंधारए दुरुहित्तए ॥ से भिक्खु (२) बहुफासुए सेज्जासंधारए
 दुरुहमाणो से पुव्वामेव ससीसोवरियं कायं पाएय पमज्जिय (२) तत्रो संज-

यामेव बहुफासुए सेज्जासंधारणे दुरुहिता तथो संजयामेव, बहुफासुए सेज्जासंधारणं सइज्जा ॥सू० १०८॥ से भिक्खु वा (२) बहुफासुए सेज्जासंधारणं सयमाणे नो अन्नमन्नस्स हत्थेण हत्थं पाएण पायं काएण कायं आसाइज्जा से अणासायमाणे तथो संजयामेव बहुफासुए सिज्जासंधारणं सइज्जा ॥ से भिक्खु वा (२) उस्सासमाणे वा नीसासमाणे वा कासमाणे वा द्वीयमाणे वा जंभायमाणे वा उड्डोए वा वायनिसग्गं वा करेमाणे पुव्वामेव आसयं वा पोसयं वा पाणिणा परिपेहिता तथो संजयामेव ऊससिज्जा वा जाव वायनिसग्गं वा करेज्जा ॥सू० १०९॥ से भिक्खु वा (२) समा वेगया सिज्जा भविज्जा, विसमा वेगया सिज्जा भविज्जा, पवाया वेगया सिज्जा भविज्जा, निवाया वेगया सिज्जा भविज्जा, ससरक्खा वेगया सिज्जा भविज्जा, अप्पससरक्खा वेगया सिज्जा भविज्जा, सदंसमसगा वेगया सिज्जा भविज्जा, अप्पदंसमसगा वेगया सिज्जा भविज्जा, सपरिसाडा वेगया सिज्जा भविज्जा, अपरिसाडा वेगया सिज्जा भविज्जा, सउवसग्गा वेगया सिज्जा भविज्जा, निरुवसग्गा वेगया सिज्जा भविज्जा, तहप्पगाराहिं सिज्जाहिं संविज्जमाणाहिं पग्गहियतरागं विहारं विहरिज्जा नो किंचिवि गिलाइज्जा, एवं खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिए सया जए त्ति वेमि ॥सू० ११०॥

॥ इति तृतीयोद्देशकः ॥ २-१-२-३ ॥

॥ इति द्वितीयमध्ययनम् ॥ श्रु० २-च० १-अ० २ ॥

॥ ३: ईर्या-अध्ययनं ३ :: उद्देशकः १ ॥

अब्भुवगए खलु वासावासे अभिपवुट्ठे बहवे पाणा अभिसंभूया बहवे बीया अहुणाभिन्ना अंतरा से मग्गा बहुपाणा बहुबीया जाव ससंतागागा अणभिककंता पंथा, नो विन्नाया मग्गा, सेवं नच्चा नो गामाणुगामं दूइज्जिज्जा, तथो संजयामेव वासावासं उवत्तिइज्जा ॥सू० १११॥ से

भिक्षु वा (२) से ज्जं पुण जाणिज्जा गामं वा जाव रायहाणिं वा इमंसि खलु गामंसि वा जाव रायहाणिसि वा नो महई विहारभूमी नो महई वियारभूमी नो सुलभे पीढफलगसिज्जासंथारगे नो सुलभे फासुए उंछे अहेसणिज्जे जत्थ बहवे समणमाहण-अतिहि-क्खिण-वणीमगा उवागया उवागमिस्संति य अच्चाइन्ना वित्ती नो पन्नस्स निक्खमणे जाव चिंताए, सेवं नच्चा तहप्पगारं गामं वा नगरं वा जाव रायहाणिं वा नो वासावासं उवल्लिइज्जा १॥ से भिक्षु वा (२) से जं पुण जाणिज्जा गामं वा जाव रायहाणिं वा इमंसि खलु गामंसि वा जाव वा महई विहारभूमी महई वियारभूमी सुलभे जत्थ पीढफलग-सिज्जासंथारगे सुलभे फासुए उंछे अहेसणिज्जे नो जत्थ बहवे समणमाहण-अतिहिकिक्खिणवणिमागा उवागया उवागमिस्संति वा अप्पाइन्ना वित्ती जाव रायहाणिं वा तथो संजयामेव वासावासं उवल्लिइज्जा ॥सू० ११२॥ अह पुणेवं जाणिज्जा-चत्तारि मासा वासावासाणं वीईक्कंता हेमंताणं य पंचदसरायकप्पे परिवुसीए, अंतरा से मग्गे बहुपाणा जाव ससंताणगा नो जत्थ बहवे जाव उवागमिस्संति, सेवं नच्चा नो गामाणुगामं दूइज्जिज्जा ॥ अह पुणेवं जाणिज्जा-चत्तारि मासा वासावासाणं वीईक्कंता, हेमंताणं य पंचदसराय कप्पे परिवुसिए, अंतरा से मग्गे अप्पंडा जाव ससंताणगा बहवे जत्थ समणमाहण-अतिहिकिक्खिणवणिमागा उवागया उवागमिस्संति, सेवं नच्चा तथो संजयामेव गामाणुगामं दूइज्जिज्ज ॥सू० ११३॥ से भिक्षु वा (२) गामाणुगामं दूइज्जमाणे पुरथो जुगमायाए(यं) पेहमाणे दट्ठण तसे पाणे उद्धट्ठ पादं रीइज्जा, वित्तिरिच्छं वा कट्ठ पायं रीइज्जा, सइ परकमे संजयामेव परिकमिज्जा नो उज्जुयं गच्छिज्जा, तथो संजयामेव गामाणुगामं दूइज्जिज्जा १ ॥ से भिक्षु वा (२) गामाणुगामं दूइज्जमाणे अंतरा से पाणाणि वा बीयाणि वा हरियाणि वा उदए वा मट्ठिया वा अविद्धत्थे सइ परकमे जाव नो उज्जुयं गच्छिज्जा, तथो संजयामेव गामाणुगामं

दूइज्जिज्जा ॥सू० ११४॥ से भिक्खु वा (२) गामाणुगामं दुइज्जमाणे अंतरा
 से विरुवरूवाणि पच्चंतिगाणि दसुगाययाणि मिलक्खूणि अणायरियाणि
 दुसन्नप्पाणि दुप्पन्नवणिज्जाणि अकालपडिबोहीणि अकालपरिभोइणि सइ
 लाढे विहाराए संथरमाणेहिं जाणवएहि नो विहारवडियाए(वत्तियाए)
 पवज्जिज्जा गमणाए १। केवली ब्रूया-आयाणामेयं, तेणं बाला अयं तेणे
 अयं उवचरेण अयं ततो आगएत्ति कट्टु तं भिक्खुं अक्कोसिज्ज वा जाव उद-
 विज्ज वा वत्थं पडिग्गहं कंबलं पायपुच्छणं अच्छिदिज्ज वा भिदिज्ज वा
 वा अवहरिज्ज वा परिट्ठविज्ज वा २ । अह भिक्खूणं पु० जं तहप्पगाराइं
 विरुवरूवाणि पच्चंतियाणि दसुगायतणाणि जाव विहारवत्तियाए नो
 पवज्जिज्ज वा गमणाए तत्रो संजयामेव गामाणुगामं दूइज्जिज्जा ॥सू०
 ११५॥ से भिक्खु वा (२) दूइज्जमाणे अंतरा से अरायाणि वा गणारायाणि
 वा जुवरायाणि वा दोरज्जाणि वा वेरज्जाणि वा विरुद्धरज्जाणि वा सइ लाढे
 विहाराए संथरमाणेहिं जाणवएहिं नो विहारवडियाए पवज्जेज्ज गमणाए,
 केवली ब्रूया आयाणामेयं, ते णं बाला अयं तेणे तं चेव जाव गमणाए तत्रो
 संजयामेव गामाणुगामं, दूइज्जिज्जा ॥सू० ११६॥ से भिक्खु वा (२) गामाणुगामं
 दूइज्जमाणे अंतरा से विहं सिया, से जं पुण विहं जाणिज्जा एगाहेण वा दुआहेण
 वा तिआहेण वा चउआहेण वा पंचाहेण वा पाउणिज्ज वा नो पाउणिज्ज
 वा तहप्पगारं विहं अणोगायगमणिज्जं सइ लाढे जाव गमणाए, केवली ब्रूया
 आयाणामेयं, अंतरा से वासे सिया पाणेसु वा पणएसु वा बीएसु वा हरिएसु-
 वा उदएसु वा मट्टियाए वा अविद्धत्थाए, अह भिक्खूणं पुव्वोवइट्ठा जाव जं
 तहप्पगारं अणोगाहगमणिज्जं जाव नो पवज्जेज्ज गमणाए तत्रो संजयामेव
 गामाणुगामं दूइज्जिज्जा ॥सू० ११७॥ से भिक्खु वा (२) गामाणुगामं दूइ-
 ज्जमाणे अंतरा से नावासंतारिमे उदए सिया, से जं पुण नावं जाणिज्जा,
 असंजए अ भिक्खुपडियाए किणिज्ज वा पामिचेज्ज वा नावाए नावं परि-

णामं कट्टु थलात्रो वा नावं जलंसि ओगाहिज्जा जलात्रो वा नावं थलंसि
 उक्कसिज्जा पुण्णं वा नावं उस्सिचिज्जा सन्नं वा नावं उप्पीलाविज्जा तहप्प-
 गारं नावं उडढगामिणिं वा अहेगामिणिं तिरियगामिणिं परं जोयणभेराए
 अद्धजोयणभेराए अप्पतरे वा भुज्जतरे वा नो दूरुहिज्जा गमणाए १। से
 विक्खु वा (२) पुब्बामेव तिरिच्छसंपाइमं नावं जाणिज्जा, जाणित्ता से
 तमायाए एगंतमवक्कमिज्जा २, भगडगं पडिलेहिज्जा २, एगत्रो भोयणभंडगं
 करिज्जा २, ससीसोवरियं कायं पाए पमज्जिज्जा सागारं भत्तं पच्चक्खाइज्जा,
 एगं पायं जले किच्चा एगं पायं थले किच्चा तत्रो संजयामेव नावं दूरुहिज्जा २
 ॥ सू० ११८॥ से भिक्खु वा (२) नावं दूरुहमाणे नो नावाए पुरत्रो
 दूरुहिज्जा नो नावाए अगत्रो दूरुहिज्जा नो नावाए मम्मत्रो दूरुहिज्जा
 नो बाहात्रो पगिज्झिय (२) अंगुलियाए उद्दिसिय (२), ओणमिय (२),
 उन्नमिय (२), निज्झाइज्जा १। सेणं परो नावागत्रो नावागयं वड्ढा-
 त्थाउसंतो समणा ! एयं ता तुमं नावं उक्कसाहि वा बुक्कसाहि वा खिवाहि
 वा रज्जूयाए वा गहाय आकसाहि, नो से तं परिन्नं परिजाणिज्जा,
 तुसिणीत्रो उवेहिज्जा २। से णं परो नावागत्रो नावागयं वड्ढा-
 त्थाउसंतो समणा ! नो संचाएसिं तुमं नावं उक्कसित्ते वा (३) रज्जूयाए वा गहाय
 आकसित्ते वा आहर एयं नावाए रज्जूयं सयं चेव णं वयं नावं उक्कसि-
 स्सामो वा जाव रज्जूए वा गहाय आकस्सिसामो नो से तं परिन्नं परियाणो-
 ज्जा तुसिणीत्रो उवेहेज्जा ३। से णं परो नावागत्रो नावागयं वड्ढा-
 त्थाउसंतो समणा, एयं ता तुमं नावं आलित्तेण वा पीढणं वा वंसेण वा
 वलणं वा अवलुणं वा वाहेहि, नो से तं परिणं परिजाणिज्जा तुसि-
 णीत्रो उवेहेज्जा ४। से णं परो नावागत्रो नावागयं वड्ढा, एयं ता तुमं
 नावाए उदयं हत्थेण वा पाएण वा मत्तेण वा पडिग्गहेण वा नावाउस्सिंचणेण
 उस्सिंचाहि, नो से तं परिणं परिजाणिज्जा, से णं परो नावागत्रो नावा-

गयं वएज्जा आउसंतो समणा ! एयं तुमं नावाए उत्तिगं हत्थेण वा पाएण वा बाहुणा वा ऊरुणा वा उदरेण वा सीसेण वा काएण वा उस्सिचणेण वा चेलेण वा मट्ठियाए वा कुसपत्तएण वा कुविंदएण वा पिहेहि, नो से तं परिणं परिजाणिज्जा ५ । से भिक्खु वा (२) नावाए उत्तिगेण उदयं आसवमाणं पेहाए उवस्वरिं नावं कज्जलावेमाणिं पेहाए नो परं उवसंकमित्तु एवं ब्रूया—आउसंतो ! गाहावइ एयं ते नावाए उदयं उत्तिगेण आसवइ उवस्वरिं नावा वा कज्जलावेइ, एयप्पगारं मणं वा वायं वा नो पुरयो कट्ठ विहरिज्जा, अप्पुस्सुए अबहिल्लेसे एगंतगएण अप्पाणं विउसेज्जा, समाहीए, तयो संजयामेव नावासंतारिमे उदए अहारियं रीइज्जा, ६ । एयं खलु जाव सया जइज्जा सि त्तिवेमि, ७ ॥सू० ११६॥

॥ इति प्रथम उद्देशकः ॥२-१-३-१॥

॥ अध्ययनं-३ :: उद्देशकः २ ॥

से णं परो णावागयो नावागयं वइज्जा—आउसंतो समणा ! एयं ता तुमं छत्तगं वा जाव चम्मछेयणं वा गिरहाहि, एयाणि तुमं विरूवरूवाणि सत्थजायाणि धारेहि, एयं ता तुमं दारगं वा पज्जेहि, नो से तं परिणं परिजाणिज्जा तुसिणीयो उवेहेज्जा ॥सू० १२०॥ से णं परो नावागयो नावागयं वएज्जा—आउसंतो ! एस णं समणे नावाए भंडभारिए भवइ, से णं बाहाए गहाय नावायो उदगंसि पक्खिविज्जा, एयप्पगारं निग्घोसं सुच्चा निसम्म से य चीवरधारी सिया खिप्पामेव चीवराणि उव्वेढिज्ज वा निवेढिज्ज वा उप्फेसं वा करिज्जा १ । अह पुण एवं जाणिज्जा, अभिकंतकूरकम्मा खलु बाला बाहाहिं गहाय नावायो उदगंसि पक्खिविज्जा, से पुब्बामेव वइज्जा—आउसंतो गाहावइ ! मा मेत्तो बाहाए गहाय नावायो उदगंसि पक्खिवह, सयं चेव णं अहं नावायो उदगंसि ओगाहिस्सामि २ । से शेव

वयंतं परो सहसा बलसा बाहाहिं गहाय उदयगंसि पक्खिविज्जा, तं नो सुमणे सिया नो दुम्मणे सिया नो उच्चावयं मणं नियंछिज्जा, नो तेसिं बालाणं घायाए वहाए समुट्टिज्जा अप्पुस्सुए जाव समाहीए तथो संजयामेव उदगंसि पवज्जिज्जा ३ ॥सू० १२१॥ से भिक्खु वा (२) उदगंसि पवमाणे नो हत्थेण हत्थं पाएण पायं काएण कायं आसाइज्जा, से अणासायणाए अणासायमाणे तथो संजयामेव उदगंसि पविज्जा १ । से भिक्खु वा (२) उदगंसि पवमाणे नो उम्मुग्गनिमुग्गियं करिज्जा, मा मेयं उदगं कन्नेसु वा अच्छीसु वा नक्कंसि वा मुहंसि वा परियावज्जिज्जा, तथो संजयामेव उदगंसि पविज्जा २ ॥ से भिक्खु वा (२) उदगंसि पवमाणे दुब्बलियं पाउणिज्जा खिप्पामेव उवहिं विगिंछिज्ज वा विसोहिज्ज वा, नो चेव णं साइज्जिज्जा ३ । अह पुण एवं जाणिज्जा, पारए सिया उदगाथो तीरं पाउणिज्जा, तथो संजयामेव उदउल्लेण वा ससिणिद्धेण वा काएण उदगतीरे चिट्ठिज्जा ४ ॥ से भिक्खु वा (२) उदउल्लं वा ससिणिद्धं वा कायं नो आमज्जिज्जा वा पमज्जिज्जा वा वा संलिहिज्जा वा निल्लिहिज्जा वा उव्वलिज्जा वा उवट्ठिज्जा वा आयाविज्ज वा पयाविज्ज वा ५ । अह पुण एवं जाणिज्जा, विगथोदथो मे काए छिन्नसिणोहे काए तहप्पगारं कायं आमज्जिज्ज वा जाव पयाविज्ज वा, तथो संजयामेव गामाणुगामं दूइज्जिज्जा ६ ॥सू० १२२॥ से भिक्खु वा (२) गामाणुगामं दूइज्जमाणे नो परेहिं सद्धिं परिजविय (२) गामाणुगामं दूइज्जिज्जा, तथो संजयामेव गामानुगामं दूइज्जिज्जा ॥सू० १२३॥ से भिक्खु वा (२) गामाणुगामं दूइज्जमाणे अंतरा से जंघासंतारिमे उदगे सिया, से पुव्वामेव ससीसोवरियं कायं पाए य पमज्जिज्जा २, एणं पायं जले किच्चा एणं पायं थले किच्चा तथो संजयामेव जंघासंतारिमे उदगंसि अहारियं रीएज्जा १ । ॥ से भिक्खु वा (२) जंघासंतारिमे अहा-

रियं रीयमाणो नो हत्थेण हत्थं पादेण वा पादं काएण वा कायं आसा-
 एज्जा, से अणालाइए अणालायमाणो तथो संजयामेव जंघासंतारिमे उदए
 अहारियं रीएज्जा २॥ से भिक्खू वा (२) जंघासंतारिमे उदए अहारियं
 रीयमाणो नो सायावडियाए नो परिदाहपडियाए महइमहालयंसि उदयंसि कायं
 विउसिज्जा, तथो संजयामेव जंघासंतारिमे उदए अहारियं रीएज्जा ३। अह
 पुण एवं जाणिज्जा पारए सिया उदगाथो तीरं पाउणित्तए, तथो संजयामेव
 उदउल्लेण वा ससिणिद्धेण वा काएण दगतीरए चिट्ठिज्जा ४॥ से भिक्खू वा
 (२) उदउल्लं वा कायं ससिणिद्धं वा कायं नो आमज्जिज्ज वा नो पमज्जे-
 ज्ज वा ५ । अह पुण एवं जाणिज्जा दिगथोदए मे काए छिन्नसिणोहे तह-
 प्पगारं कायं आमज्जिज्ज वा जाव पयाविज्ज वा, तथो संजयामेव गामाणुगामं
 दूइज्जिज्जा ६ ॥सू० १२४॥ से भिक्खू वा (२) गामाणुगामं दूइज्जमाणो
 नो मट्ठियागएहिं पाएहिं हरियाणि छिदिय (२), विकुज्जिय (२), विफा-
 लिय (२), उम्मग्गेण हरियवहाए गच्छिज्जा, जमेयं पाएहिं मट्ठियं सिप्पा-
 मेव हरियाणि अवहरंतु, माइट्ठाणं संफासे, नो एवं करिज्जा से पुव्वामेव
 अप्पहरियं मग्गं पडिलेहिज्जा, तथो संजयामेव गामा णुगामंदूइज्जिज्जा १।
 से भिक्खू वा (२), गामाणुगामं दूइज्जमाणो अंतरा से वप्पाणि वा फलि-
 हाणि वा पागाहाणि वा तोरणाणि वा अग्गलाणि वा अग्गलपासगाणि
 वा गड्ढाथो वा दरीथो वा सइ परक्कमे संजयामेव परिकमिज्जा नो उज्जु-
 यं गच्छेज्जा २। केवली बूया-आयाणं एयं, से तत्थ परक्कममाणो पयलिज्ज
 वा पवडिज्ज वा, से तत्थ पयलमाणो वा पवडेमाणो वा रुक्खाणि वा
 गुच्छाणि वा गुम्माणि वा लयाथो वा वल्लीथो वा तणाणि वा गहणाणि
 वा हरियाणि वा अवलंबिय (२) उत्तरिज्जा, जे तत्थ पाडिपहिया उवाग-
 च्छंति ते पाणी जाइज्जा, तथो संजयामेव अवलंबिय (२) उत्तरिज्जा तथो
 संजयामेव गामाणुगामं दूइज्जिज्जा ३ ॥ से भिक्खू वा (२) गामाणुगामं

दूइज्जमाणो अंतरा से जवसाणि वा सगडाणि वा रहाणि वा सचक्काणि वा परचक्काणि वा से गां वा विरुवरुवं संनिरुद्धं पेहाए सइ परक्कमे संजयामेव नो उज्जुयं गच्छिज्जा, ४। से गां परो सेणागत्रो वइज्जा-आउसंतो ! एस गां समणो सेणाए अभिनिवारियं करेइ, से गां बाहाए गहाय आगसह, से गां परो बाहाहिं गहाय आगसिज्जा, तं नो सुमणो सिधा जाव समाहीए तत्रो संजयामेव गामाणुगामं दूइज्जिज्जा ५ ॥सू० १२५॥ से भिक्खु वा (२) गामाणुगामं दूइज्जमाणो अंतरा से पाडिवहिया उवागच्छिज्जा, ते गां पाडिवहिया एवं वइज्जा—आउसंतो समणा ! केवइए एस गामे वा जाव राय-हाणी वा केवइया इत्थ आसा हत्थी गामपिंडोलगा मणुस्सा परिवसंति, से बहुभत्ते बहुउदए बहुजणे बहुजवसे से अप्पभत्ते अप्पुदए अप्पजणे अप्पजवसे एयप्पगाराणि पसिणाणि नो पुच्छिज्जा, एयप्पगाराणि पसिणाणि पुठे वा अपुठे वा नो वागरिज्जा १। एवं खलु तस्स भिक्खुस्स भिक्खुणीए वा सामग्गियं जं सब्बट्ठेहिं समिए सहिए सया जएत्ति बेमि २ ॥सू० १२६॥

॥ इति द्वितीयोद्देशकः ॥ २-१-३-२ ॥

॥ अध्ययनं ३ :: उद्देशकः ३ ॥

से भिक्खु वा गामाणुगामं दूइज्जमाणो अंतरा से वप्पाणि वा जाव दरीत्रो वा जाव कूडागाराणि वा पासायाणि वा नूमगिहाणि वा रुक्खगिहाणि वा पव्वयगिहाणि वा रुक्खं वा चेइयकडं थुभं वा चेइयकडं आएस-णाणि वा जाव भवणागिहाणि वा नो बाहात्रो पगिज्झिय (२), अंगुलिआए उहिसिय (२), ओणमिय (२), उन्नमिय (२), निज्झाइज्जा, तत्रो संजयामेव गामाणुगामं दूइज्जिज्जा १। से भिक्खु वा (२) गामाणुगामं दूइज्जमाणो अंतरा से कच्छाणि वा दवियाणि वा नूमाणि वा वलयाणि वा गहणाणि वा गहणविदुग्गाणि वणाणि वा वणपव्वयाणि वा पव्वयविदुग्गाणि वा पव्वयगिहाणि वा, अगडाणि वा तलागाणि वा दहाणि वा नइत्रो वा

वावीओ वा पुक्खरिणीओ वा दीहियाओ वा गुंजालियाओ वा सराणि
वा सरपंतियाणि वा सरसरपंतियाणि वा नो बाहाओ पगिज्झिय (२); जाव
निज्झाइज्जा २। केवली ब्रूया आयाणमेयं, जे तत्थ मिगा वा पसू वा
पक्खी वा सरीसिवा वा सीहा वा जलचरा वा थलचरा वा खहचरा वा सत्ता
ते उत्तसिज्ज वा वित्तसिज्ज वा वाडं वा सराणं वा कंखिज्जा, चारित्ति मे अयं
समाणे ३। अह भिक्खूणं पुब्बोवइट्ठा पतिराणा जं नो बाहाओ पगिज्झिय (२)
निज्झाइज्जा, तओ संजयामेव आयरिउवज्झाएहिं सद्धिं गामाणुगामं दूइज्जिज्जा
४ ॥सू० १२७॥ से भिक्खू वा (२) आयरिउवज्झाएहिं सद्धिं गामाणुगामं
दूइज्जमाणे नो आयरियउवज्झायस्स हत्थेण वा हत्थं जाव अणासायमाणे
तओ संजयामेव आयरिउवज्झाएहिं सद्धिं जाव दूइज्जिज्जा १॥ से भिक्खू
वा आयरियउवज्झाएहिं सद्धिं दूइज्जमाणे अंतरा से पाडिवहिया उवाग-
च्छिज्जा, ते णं पाडिपाहिया से एवं वइज्जा—आउसंतो ! समणा ! के
तुब्भे ? कओ वा एह ? कहिं वा गच्छिहिह ? , जे तत्थ आयरिए वा
उवज्झाए वा से भासिज्ज वा वियागरिज्ज वा, आयरिउवज्झायस्स भासमा-
णस्स वा वियागरेमाणस्स वा नो अंतराभासं करिज्जा, तओ संजयामेव
गामाणुगामं दूइज्जिज्जा २। से भिक्खू वा (२) अहाराइणियं गामाणुगामं
दूइज्जमाणे नो राइणियस्स हत्थेण हत्थं जाव अणासायमाणे तओ संजयामेव
अहाराइणियं गामाणुगामं दूइज्जिज्जा ३। से भिक्खू वा (२) अहाराइणिअं
गामाणुगामं दूइज्जमाणे अंतरा से पाडिवहिया उवागच्छिज्जा, ते णं पाडि-
पहिया एवं वइज्जा—आउसंतो ! समणा ! के तुब्भे ? , जे तत्थ सव्वराइ-
णिए से भासिज्ज वा वागरिज्ज वा, रायणियस्स भासमाणस्स वा वियागरे-
माणस्स वा नो अंतरा भासं भासिज्जा, तओ संजयामेव अहाराइणियाए
गामाणुगामं दूइज्जिज्जा ४॥ ॥सू० १२८॥ से भिक्खू वा (२) गामाणुगामं
दूइज्जमाणे अंतरा से पाडिवहिया उवागच्छिज्जा, ते णं पाडिपहिया एवं

वइज्जा—आउसंतो समणा ! अवियाइं इत्तो पडिवहे पासह, तंजहा—मणुस्सं वा गोणं वा महिसं वा पसुं वा पक्खिं वा सरीसिवं वा जलयरं वा से आइक्खह दंसेह, तं नो आइक्खिज्जा नो दंसिज्जा, नो तस्स तं परिन्नं परिजाणिज्जा, । तुसिणीए उवेहिज्जा, जाणं वा नो जाणंति वइज्जा तत्रो संजयामेव गामाणुगामं दूइज्जिज्जा १ । से भिक्खू वा (२) गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वइज्जा—आउसंतो समणा ! अवियाइं इत्तो पडिवहे पासह उदग-पसूयाणि कंदाणि वा मूलाणि वा तथा पत्ता पुप्फा फला बीया हरिया उदगं वा संनिहियं अगणिं वा संनिखित्तं से आइक्खह जाव दूइज्जिज्जा २॥ से भिक्खू वा (२) गामाणुगामं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वइज्जा—आउसंतो समणा ! अवियाइं इत्तो पडिवहे पासह जवसाणि वा जाव से णं वा विरूवरूवं संनिविट्ठं से आइक्खह जाव दूइज्जिज्जा ३॥ से भिक्खू वा (२) गामाणुगामं दूइज्जमाणे अंतरा पाडिपहिया एवं वइज्जा—आउसंतो समणा ! केवइए इत्तो गामे वा जाव रायहाणि वा से आइक्खह जाव दूइज्जिज्जा ४॥ से भिक्खू वा (२), गामाणुगामं दूइज्जमाणे अंतरा से पाडिपहिया एवं वइज्जा—आउसंतो समणा ! केवइ ए इत्ता गामस्स नगरस्स वा जाव रायहाणीए वा मंग्गे से आइक्खह, तहेव जाव दूइज्जिज्जा ५॥ ॥सू० १२१॥ से भिक्खू (२) गामाणुगामं दूइज्जमाणे अंतरा से गोणं वियालं पडिवहे पेहाए जाव त्रित्तचिल्लडं वियालं पडिपहे पेहाए नो तेसिं भीत्रो उम्मग्गेणं गच्छिज्जा, नो मग्गात्रो उम्मग्गं संकमिज्जा, नो गहणं वा वणं वा दुग्गं वा अणुप-विसिज्जा, नो रूक्खंसि दूरुहिज्जा, नो महइमहालयंसि उदयंसि कायं विउ-सिज्जा, नो वाडं वा सरणं वा सेणं वा सत्थं वा कंखिज्जा, अप्पुसुए जाव समाहीए तत्रो संजयामेव गामाणुगामं दूइज्जिज्जा १॥ से भिक्खू वा (२)

गामाणुगामं दूइज्जमाणे अंतरा से विहं सिया, से जं पुण विहं जाणिज्जा इमंसि खलु विहंसि बहवे आमोसगा उवगरणपडियाए संपिडिया गच्छिज्जा, नो तेसिं भीओ उम्मगेण गच्छिज्जा जाव समाहीए तओ संजयामेव गामाणुगामं दूइज्जेज्जा २॥ ॥सू० १३०॥ से भिक्खु वा (२) गामाणुगामं दूइज्जमाणे अंतरा से आमोसगा संपिडिया गच्छिज्जा, ते णं आमोसगा एवं वइज्जा-आउसंतो समणा, आहर एयं वत्थं वा पायं वा कंबलं वा पायपुच्छं वा, देहि निक्खिवाहि, तं नो दिज्जा निक्खिवाहि, नो वंदिय (२) जाइज्जा, नो अंजलिं कट्ठु जाइज्जा, नो कलुणपडियाए जाइज्जा, धम्मियाए जायणाए जाइज्जा, तुसिणीयभावेण वा उवेहिज्जा, ते णं आमोसगा सयं करणिज्जं तिकट्ठु अकोसंति वा जाव उद्विंति वा वत्थं वा (४) अच्छिदिज्ज वा जाव परिट्ठविज्ज वा, तं नो गामसंसारियं कुज्जा, नो रायसंसारियं कुज्जा, नो परं उवसंकमित्तु ब्रूया—आउसंतो गाहावइ ! एए खलु आमोसगा उवगरणपडियाए सयं करणिज्जं तिकट्ठु अकोसंति वा जाव परिट्ठविंति वा, एयण्णारं मणं वा वायं वा नो पुरओ कट्ठु विहरिज्जा, अप्पुसुए जाव समाहीए तओ संजयामेव गामाणुगामं दूइज्जेज्जा । एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं समिए सहिए सया जइज्जासि ति वेमि ॥सू० १३१॥

॥ इति तृतीयोद्देशकः ॥ २-१-३-३ ॥

॥ इति तृतीयमध्ययनम् ॥ २-१-३ ॥

॥ ४ः भाषाजात-अध्ययनं ४ :: उद्देशकः १ ॥

से भिक्खु वा (२) इमाइ वयायाराइं सुच्चा निसम्म इमाइं अणारियपुच्चाइं जाणिज्जा—जे कोहा वा वायं विउजंति, जे माया वा, जे मायाए वा, जे लोभा वा वायं विउजंति, जाणओ वा फरुसं वयंति, जाणओ वा फरुसं वयंति, सव्वं चेयं सावज्जं वज्जिज्जा विवेगमासुए, भुवं जेयं

जाणिज्जा, अधुवं चेयं जाणिज्जा, असणं वा (४) लभिय नो लभिय
 भुंजिय नो भुंजिय, अदुवा आगयो अदुवा नो आगयो, अदुवा एइ अदुवा नो
 एइ, अदुवा एहिइ अदुवा नो एहिइ, इत्थवि आगए इत्थवि नो आगए, इत्थवि
 एइ इत्थवि नो एति, इत्थवि एहिति इत्थवि नो एहिति १॥ अणुवीइ
 निट्ठाभासी समियाए संजए भासं भासिज्जा, तंजहा—एगवयणं १, दुव-
 यणं २, बहुवयणं ३, इत्थिवयणं ४, पुरिसवयणं ५, नपुंसगवयणं ६,
 अज्भत्थवयणं ७, उवणीयवयणं ८, अवणीयवयणं ९, उवणीय-अव-
 णीयवयणं १०, अवणीयउवणीयवयणं ११, तीयवयणं १२, पडुप्पन्नव-
 यणं १३, अणागयवयणं १४, पञ्चस्ववयणं १५, परस्ववयणं १६,
 से एगवयणं वइस्सामीति एगवयणं वइज्जा जाव परस्ववयणं वइस्सामीति
 परस्ववयणं वइज्जा, इत्थी वेस पुरिसो वेस नपुसगं वेस एयं वा चेयं अन्नं
 वा चेयं अणुवीइ निट्ठाभासी समियाए संजए भासं भासिज्जा, इच्चेयाइं आय-
 यणाइं उवातिकम्म २॥ अह भिक्खुणं जाणिज्जा चत्तारि भासज्जायाइं
 तंजहा—सच्चमेगं पढमं भासज्जायं १, बीयं मोसं २, तइयं सच्चामोसं ३, जं
 नेव सच्चं नेव मोसं नेव सच्चामोसं असच्चामोसं नाम तं चउत्थं भासजायं
 ४॥ से बेमि ३। जे अइया जे य पडुपन्ना जे अणागया अरहंता भगवंतो
 सव्वे ते एयाणि चैव चत्तारि भासज्जायाइं भासिंसु वा भासंति वा भासि-
 स्संति वा पन्नविंसु वा पराणव्वंति वा पराणविसंति वा ४, सव्वाइं च णं
 एयाइं अचित्ताणि वराणमंताणि गंधमंताणि रसमंताणि फासमंताणि चओव-
 चइयाइं विपरिणामधम्माइं भवंतीति अक्खायाइं ५॥ ॥सू० १३२॥ से
 भिक्खु वा (२) से जं पुण जाणिज्जा पुव्वि भासा अभासा भासिज्जमाणी
 भासा भासा, भासासमयवीइक्कंता च णं भासिया भासा अभासा १॥ से
 भिक्खु वा (२) से जं पुण जाणिज्जा जा य भासा सच्चा १, जा य भासा
 मोसा २, जा य भासा सच्चामोसा ३, जा य भासा असच्चामोसा ४, तह-

प्पगारं भासं सावज्जं सकिरियं कक्कसं कडुयं निट्ठुरं फरुसं अराहयकरिं
 छेयणकरिं भेयणकरिं परियावणकरिं उद्दवणकरिं भूओवघाइयं अभिकंख
 नो भासिज्जा २॥ से भिक्खू वा भिक्खुणी वा से जं पुण जाणिज्जा, जा
 य भासा सच्चा सुहुमा जा य भासा असच्चा मोसा तहप्पगारं भासं असावज्जं
 जाव अभूओवघाइयं अभिकंख भासं भासिज्जा ३॥ ॥सू० १३३॥ से
 भिक्खू वा (२) पुमं आमंतेमाणे आमंति ए वा अपडिसुणेमाणे नो एवं वड्-
 ज्जा-होलित्ति वा गोलित्ति वा वसुलेत्ति कुपवखेत्ति वा घडदासित्ति वा
 साणेत्ति वा तेणित्ति वा चारिएत्ति वा माइत्ति वा मुसावाइत्ति वा, एयाइं तुमं
 ते जणागा वा, एयप्पगारं भासं सावज्जं सकिरियं जाव भूओवघाइयं अभि-
 कंख नो भासिज्जा १॥ से भिक्खू वा (२) पुमं आमंतेमाणे आमंति ए वा
 अपडिसुणेमाणे एवं वड्ज्जा-अमुगे इ वा आउसोत्ति वा आउसंतारोत्ति वा
 सावगेत्ति वा उवासगेत्ति वा धम्मिएत्ति धम्मपिएत्ति वा, एयप्पगारं भासं
 असावज्जं जाव अभिकंख भासिज्जा २॥ से भिक्खू वा (२) इत्थि आमंते-
 माणे आमंति ए य अपडिसुणीमाणी नो एवं वड्ज्जा-होली इ वा गोलीति
 वा इत्थीगमेणं नेयध्वं ३॥ से भिक्खू वा (२) इत्थि आमंतेमाणे आमंति ए
 य अपडिसुणेमाणी एवं वड्ज्जा-आउसोत्ति वा भइणित्ति वा भोइत्ति वा
 भगवइति वा साविगेत्ति वा उवासिएत्ति वा धम्मिएत्ति वा धम्मपिएत्ति
 वा, एयप्पगारं भासं असावज्जं जाव अभिकंख भासिज्जा ४॥
 ॥सू० १३४॥ से भिक्खू वा (२) नो एवं वड्ज्जा-नभोदेवित्ति वा गज्जदे-
 वित्ति वा विज्जुदेवित्ति वा पवुट्ठदेवित्ति वा निवुट्ठदेवित्ति वा पडउ वा
 वासं मा वा पडउ, निप्फज्जउ वा सस्सं मा वा निप्फज्जउ, विभाउ वा
 रयणी मा वा विभाउ, उदेउ वा सूरिए मा वा उदेउ, सो वा राया जयउ वा
 मा जयउ, नो एयप्पगारं भासं भासिज्जा पन्नवं १॥ से भिक्खू वा (२) अंत-
 लिक्खेत्ति वा गुज्झाणुचरिएत्ति वा संमुच्छिए वा निवइए वा पओ वड्ज्जा

बुट्टवलाहगेति वा २। एयं खलु तस्म भिक्खुस्स भिक्खुणीए वा सामग्गियं
जं सव्वट्ठेहिं समिए सहिए सया जइज्जासि त्तिवेमि ३ ॥सू. १३५॥

॥ इति प्रथम उद्देशकः ॥ २-१-४-१ ॥

॥ अध्ययन-४ :: उद्देशकः- २ ॥

से भिक्खु वा (२) जहा वेगइयाइं रुवाइं पासिज्जा तहावि ताइं नो
एवं वइज्जा, तंजहा गंडी गंडीति वा कुट्टी कुट्टीति वा जाव महुमेहुणीति
वा हत्थच्छिन्नं हत्थच्छिन्नेति वा एवं पायच्छिन्नेति वा नक्कच्चिराणेइ वा करण-
च्छिन्नेइ वा उट्टच्छिन्नेति वा जेयावन्ने तहप्पगारा एयप्पगाराहिं भासाहिं बूइया
(२) कुप्पंति माणावा ते यावि तहप्पगाराहिं भासाहिं अभिक्खं नो भासिज्जा १॥
से भिक्खु वा (२) जहा वेगइयाइं रुवाइं पासिज्जा तहावि ताइं एवं वइज्जा तंजहा-
ओयंसी ओयंसिति वा, तेयंसी तेयंसीति वा, जसंसी जसंसीइ वा, वच्चंसी वच्चं-
सीइ वा, अभिरूयंसी (२), पडिरूवंसी (२) पासाइयं (२), दरिसणिज्जं दरिस-
णीयत्ति वा, जे यावन्ने तहप्पगारा तहप्पगाराहिं भासाइं बुइया २ नो कुप्पंति
माणवा तेयावि तहप्पगारा एयप्पगाराहिं भासाहिं अभिक्खं भासिज्जा २॥ से
भिक्खु वा (२) जहा वेगइयाइं रुवाइं पासिज्जा, तंजहा-वप्पाणि वा जाव
गिहाणि वा, तहावि ताइं नो एवं वइज्जा, तंजहा-सुकडे इ वा सुट्टुकडे इ
वा साहुकडे इ वा कल्लाणे इ वा करणिज्जे इ वा, एयप्पगारं भासं सावज्जं
जाव नो भासिज्जा ३॥ से भिक्खु वा (२) जहा वेगइयाइं रुवाइं पासिज्जा,
तंजहा-वप्पाणि वा जाव गिहाणि वा तहावि ताइं एवं वइज्जा, तंजहा-आरं-
भकडे इ वा, सावज्जमेडे इ वा, पयत्तकडे इ वा, पासाइयं पासाइए वा, दरि-
सणीयं दरिसणीयंति वा, अभिरूवं अभिरूवंति वा, पडिरूवं पडिरूवंति वा
एयप्पगारं भासं असीवज्जं जाव भासिज्जा ४॥ ॥सू. १३६॥ से भिक्खु
वा (२) असणां वा (४) उवक्खदियं पेहाए, तहाविहं नो एवं वइज्जा तंजहा-

सुकडेत्ति वा सुट्ठुकडे इ वा साहुकडे इ वा कल्लाणे इ वा करणिज्जे इ वा, एयप्पगारं भासं सावज्जं जाव नो भासिज्जा १॥ से भिक्खू वा (२), असरां वा (४) उववखडियं पेहाए एवं वइज्जा, तंजहा-आरंभकडेत्ति वा सावज्जकडेत्ति वा पयत्तकडे इ वा, भइयं भइेति वा ऊसदं ऊसडे इ वा, रसियं (२), मणुन्नं (२), एयप्पगारं भासं असावज्जं जाव भासिज्जा २॥ ॥सू० १३७॥ से भिक्खू वा भिक्खुणी वा मणुस्सं वा गोणं वा महिसं वा मिगं वा पसुं वा पक्खिं वा सरीसिवं वा जलचरं वा से तं परिवूट्ठकायं पेहाए नो एवं वइज्जा—थूले इ वा पमेइले इ वा वट्ठे इ वा वज्जे इ वा पाइमे इ वा, एयप्पगारं भासं सावज्जं जाव नो भासिज्जा १॥ से भिक्खू वा भिक्खुणी वा मणुस्सं वा जाव जलयरं वा सेत्तं परिवूट्ठकायं पेहाए एवं वइज्जा—परिवूट्ठकाएत्ति वा उवन्निकाएत्ति वा थिरसंघयणेत्ति वा चियमंस-सोणिएत्ति वा बहुपडिपुन्नइंदिइए-त्ति वा, एयप्पगारं भासं असावज्जं जाव भासिज्जा २॥ से भिक्खू वा (२) विरूवरूवाओ गाओ पेहाए नो एवं वइज्जा, तंजहा—गाओ दुज्झाओत्ति वा दम्मेत्ति वा गोरहत्ति वा वाहमत्ति वा रहजोग्गत्ति वा, एयप्पगारं भासं सावज्जं जाव नो भासिज्जा ३॥ से भिक्खू वा (२) विरूवरूवाओ गाओ पेहाए एवं वइज्जा, तंजहा—जुवंग-वित्ति वा धेणुत्ति वा रसवइत्ति वा हस्से इ वा महल्ले इ वा महव्वए इ वा संवहणित्ति वा, एयप्पगारं भासं असावज्जं जाव अभिक्खं भासिज्जा ४॥ से भिक्खू वा (२) तेहव गंतुमुज्जाणाइं पव्वयाइं वणाणि वा रुक्खा महल्ले पेहाए नो एवं वइज्जा, तंजहा—पासायजोग्गात्ति वा तोरणजोग्गाइ वा गिहजोग्गाइ वा फलिहजोग्गाइ वा अगलजोग्गाइ वा नावाजोग्गाइ वा उद-गजोग्गाइ वा दोणजोग्गाइ वा पीढ-वंगवेर-नंगलकुलिय-जंतलट्ठी-नाभि(लि)गं-डीआसणजोग्गाइ वा सयणजाणउवस्सयजोगां वा, एयप्पगारं भासं साव-ज्जं जाव नो भासिज्जा ५॥ से भिक्खू वा (२) तेहव गंतुमुज्जाणाइं

पञ्चयाणि वशाणि य खख महल्ला पेहाए एवं वइज्जा, तंजहा—जाइयंता इ वा दीहवट्टा इ वा महालया इ वा पयायसाला इ वा विडिमसाला इ वा पासा-
इया इ वा जाव पडिरूवाति वा एयप्पगारं भासं असावज्जं जाव अभिक्ख
भासिज्जा ६॥ से भिक्खु वा (२) बहुसंभूया वणफला पेहाए तहावि ते नो
एवं वइज्जा, तंजहा—पक्का इ वा पायखज्जा इ वा, वेलोइया इ वा, थला
इ वा, वेहिया इ वा, एयप्पगारं भासं सावज्जं जाव नो भासिज्जा ७॥ से
भिक्खु वा (२) बहुसंभूया वणफला अंबा पेहाए एवं वइज्जा, तंजहा—अ-
संथडा इ वा बहुनिवट्टिमफला इ वा बहुसंभूया इ वा भूइरुचित्ति वा, एय-
प्पगारं भासं असावज्जं जाव भासिज्जा ८॥ से बहुसंभूया ओसही पेहाए
तहावि ताओ न एवं वइज्जा, तंजहा—पक्का इ वा, नीलीया इ वा, छवी-
इया इ वा, लाइमा इ वा, भज्जिमा इ वा बहुखज्जा इ वा, एयप्पगारं भासं
सावज्जं जाव नो भासिज्जा ९॥ से भिक्खु वा (२) बहुसंभूयाओ ओसहीओ
पेहाए तहावि एवं वइज्जा, तंजहा—रूढा इ वा, बहुसंभूया इ वा, थिरा इ
वा, ऊसदा इ वा, गब्भिया इ वा, पसूया इ वा, समारा इ वा, एयप्पगारं भासं
असावज्जं जाव भासिज्जा १०॥ ॥सू० १३८॥ से भिक्खु वा (२) तह-
प्पगाराइं सदाइं सुणिज्जा तहावि एयाइं नो एवं वइज्जा, तंजहा—सुसइत्ति
वा, दुसइत्ति वा, एयप्पगारं भासं सावज्जं नो भासिज्जा १॥ से भिक्खु वा
(२) तहावि ताइं एवं वइज्जा, तंजहा—सुसइं सुसइत्ति वा दुसइं दुस-
इत्ति वा एयप्पगारं असावज्जं जाव भासिज्जा, एवं रूवाइं किणहेत्ति वा ५,
गंधाइं सुरभि—गंधित्ति वा (२) रसाइं तित्ताणि वा (५) फासाइं कक्खडाणि
वा (८) २॥ ॥सू० १३९॥ से भिक्खु वा (२) वंता कोहं च माणं च
मायं च लोभं च अणुवीइ निट्ठाभासी निसग्गभासी अतुरियभासी विवेग-
भासी समियाए संजए भासं भासिज्जा ५॥ एवं खलु तस्स भिक्खुस्स
भिक्खुणीए वा जाव सया जइज्जासि तिवेमि ॥सू० १४०॥

॥ इति द्वितीयोद्देशकः ॥ २-१-४-२ ॥ ॥ इति चतुर्थमध्ययनं ॥ २-१-४॥

॥५॥ वस्त्रैषणा-अध्ययनं-५ :: उद्देशकः-१ ॥

से भिक्खु वा (२) अभिकंखिज्जा वत्थं एसित्तए, से जं पुण वत्थं जाणिज्जा, तं जहा जंगियं वा भंगियं वा साणियं वा पोत्तगं वा, खोमियं वा तूलकडं वा, तहप्पगारं वत्थं वा जे निग्गंथे तरुणे जुगवं बलवं अप्पायके थिरसंघ-यणे से एगं वत्थं धारिज्जा नो बीयं, जा निग्गंथि सा चत्तारिसंघाडीओ धारिज्जा, एगं दुहत्थवित्थारं दो तिहत्थवित्थाराओ एगं चउहत्थवित्थारं, तहप्पगारेहि वत्थेहि असंधिज्जमाणेहि, अह पच्छा एगमेगं संसिविज्जा ॥सू० १४१॥

से भिक्खु वा (२) परं अद्धजोयणमेराए वत्थपडियाए नो अभिसंधारिज्ज गमणाए ॥सू० १४२॥ से भिक्खु वा (२) से जं पुण वत्थं जाणिज्जा, अस्सिं-पडियाए एगं साहम्मियं समुद्दिस्स पाणाइं जहा पिंडेसणाए भाणियव्वं ॥ एवं बहवे साहम्मिया एगं साहम्मिणिं बहवे साहम्मिणीओ बहवे समणमा-हणा तहेव पुरिसंतरकडा जहा पिंडेसणाए ॥सू० १४३॥

से भिक्खु वा (२) से जं पुण वत्थं जाणिज्जा, असंजए भिक्खुपडियाए कीयं वा धोयं वा रत्तं वा घट्टं वा मट्ठं वा संपधूमियं वा तहप्पगारं वत्थं अपुरिसंतरकडं जाव नो पडिग्गाहिज्जा, अह पुण एवं जाणिज्जा, पुरिसंतरकडं जाव पडिगा-हिज्जा ॥सू० १४४॥

से भिक्खु वा (२) से जाइं पुण वत्थाइं जाणिज्जा विरूवरूवाइं महद्धणमुल्लाइं, तंजहा-आइणगाणि वा सहिणाणि वा सहिणकल्लाणाणि वा आयाणि वा कायाणि वा खोमियाणि वा दुगुल्लाणि वा पट्ठाणि वा मलयाणि वा पन्नुन्नाणि वा असुयाणि वा चीणंसुयाणि वा देसरागाणि वा अमिलाणि वा गज्जफलाणि वा फालियाणि वा कोयवाणि वा कंबलगाणि वा पावराणि वा अन्नयराणि वा तहप्पगाराइं वत्थाइं महद्धण-मुल्लाइं लाभे संते नो पडिगाहिज्जा १।

से भिक्खु वा (२) आइणपाउरणाणि वत्थाणि जाणिज्जा, तंजहा-उदाणि वा पेसाणि वा पेसलाणि वा किण्हमिगाइणगाणि वा नीलमिगाइणगाणि वा गोरमि-

गाईणगाणि कणगाणि वा कणगकंताणि वा कणगपट्टाणि वा कणगखइयाणि
वा कणगकुसियाणि वा वग्घाणि वा विवग्घाणी वा (विगाणि वा) आभर-
णाणि वा आभरणविचित्ताणि वा, अन्नयराणि तहप्पगाराणि आईणपाउर-
णाणि वत्थाणि लाभे संते नो पडिग्गाहिज्जा-२ ॥सू० १४५॥ इच्चेइयाइं
आयतणाइं उवाइकम्म अह भिक्खू जाणिज्जा चउहिं पडिमाहिं वत्थं एसित्तए,
तत्थ खलु इमा पढमा पडिमा, से भिक्खू वा (२) उहेसिय, वत्थं जाइज्जा,
तं जहा—जंगियं वा जाव तूलकडं वा, तहप्पगारं वत्थं सयं वा णं जाइज्जा,
परो वा णं देज्जा, फासुयं एसणीयं लाभे संते पडिग्गाहिज्जा, पढमा पडिमा
१। अहावरा दुच्चा पडिमा से भिक्खू वा (२) पेहाए वत्थं जाइज्जा गाहावइं
वा जाव कम्मकरी वा से पुव्वामेव आलोइज्जा—आउसोत्ति वा २
दाहिसि मे इत्तो अन्नयरं वत्थं ? तहप्पगारं वत्थं सयं वा णं जाइज्जा, परो
वा देज्जा जाव फासुयं एसणीयं लाभे संते पडिग्गाहिज्जा, दुच्चा पडिमा २ ।
अहावरा तच्चा पडिमा—से भिक्खू वा (२) से जं पुण वत्थं जाणिज्जा, तंजहा
अंतरिज्जं वा उत्तरिज्जं वा तहप्पगारं वत्थं सयं वा णं जाइज्जा जाव पडिगा-
हिज्जा, तच्चा पडिमा ३ । अहावरा चउत्था पडिमा—से भिक्खू वा (२)
उज्झियधम्मियं वत्थं जाइज्जा जं चन्ने बहवे समण-माहण अतिहि किवण
वणीमगा नावकंखंति तहप्पगारं उज्झियधम्मियं वत्थं सयं वा णं जाइज्जा, परो
वा से दिज्जा, फासुयं जाव पडिग्गाहिज्जा, चउत्था पडिमा ४ ॥ इच्चेयाणं
चउसहं पडिमाणं जहा पिंडेसणाए १॥ सिया णां एताए एसणाए एसमाणं
परो वइज्जा—आउसंतो समणा ! इज्जाहि तुमं मासेण वा दसराएण वा
पंचराएण वा सुते सुततरे वा तो ते वयं अन्नयरं वत्थं दाहामो, एयप्पगारं
निग्घोसं सुच्चा निसम्म से पुव्वामेव आलोइज्जा—आउसोत्ति वा भइणि त्ति
वा, नो खलु मे कप्पइ एयप्पगारं संगारं पडिसुणित्तए, अभिकंखसि मे दाउं इया-
णिमेव दलयाहि, से सेवं वयंतं परो वइज्जा—आउसंतो समणा ! अणुग-

च्छाहि तो ते वयं अन्नयरं वत्थं दाहामो, से पुव्वामेव आलोइज्जा—आउ-
सोत्ति वा भइणित्ति वा नो खलु मे कप्पइ संगारवयणो पडिसुणित्तए
अभिकंखसि मे दाउं इयाणिमेव दलयाहि, से सेवं वयंतं परो नेया वइज्जा
आउसोत्ति वा भइणित्ति वा ! आहरेयं वत्थं समणस्स दाहामो, अवियाइं वयं
पच्छावि अप्पणो सयट्ठाए पाणाइं (४) समारंभ समुद्दिस्स जाव चेइस्सामो,
एयप्पगारं निग्घोसं सुच्चा निसम्म तहप्पगारं वत्थं अफासुअं जाव नो
पडिगाहिज्जा २॥ सिया गां परो नेता वइज्जा—आउसोत्ति वा (२)
आहर एयं वत्थं सिणाणेण वा (४) जाव आघंसित्ता वा पघंसित्ता वा सम-
णस्स गां दाहामो, एयप्पगारं निग्घोसं सुच्चा निसम्म से पुव्वामेव आलोइज्जा
आउसोत्ति वा भयणित्ति वा मा एयं तुमं वत्थं सिणाणेण वा जाव पघंसाहि
वा, अभिकंखसि मे दातुं, एमेव दलयाहि, से सेवं वयंतस्स परो सिणाणेण
वा पघंसित्ता दलइज्जा तहप्पगारं वत्थं अफासुयं नो पडिगाहिज्जा ३।
से गां परो नेता वइज्जा—आउसोत्ति वा भइणित्ति वा ! आहर
एयं वत्थं सीओदगवियडेण वा उसिणोदगवियडेण वा, उच्छोलेत्ता वा
पहोलेत्ता वा समणस्स गां दाहामो, एयप्पगारं निग्घोसं तहेव नवरं मा एयं
तुमं वत्थं सीओदगवियडेण वा उसिणोदगवियडेण वा उच्छोलेहि वा पहो-
लेहि वा, अभिकंखसि, सेसं तहेव जाव नो पडिगाहिज्जा ४॥ से गां परो
नेत्ता वत्थं निसिरिज्जा, से पुव्वामेव आलोइज्जा—आउसोत्ति वा भइणि
त्ति वा ! आहरेयं वत्थं कंदाणि वा जाव हरियाणि वा विसोहित्ता
समणस्स गां दाहामो, एयप्पगारं वत्थं निग्घोसं तहेव, नवरं मा एयाणि तुमं
कंदाणि वा जाव विसोहेहि, नो खलु मे कप्पइ एयप्पगारे वत्थे पडिगाहि-
त्तए, से सेवं वयंतस्स परो जाव विसोहित्ता दलइज्जा, तहप्पगारं वत्थं
अफासुअं जाव नो पडिगाहिज्जा ५॥ सिया से परो नेता वत्थं निसिरिज्जा,
से पुव्वामेव आलोइज्जा—आउसोत्ति वा भइणि त्ति वा ! तुमं चेव गां

संतियं वत्थं अंतोअंतेणं पडिलेहिज्जिस्सामि, केवली बूया आयाणमेयं-
 वत्थंतेण बद्धे सिया कुंडले वा गुणे वा हिरण्णे वा सुवण्णे वा मणी वा
 जाव रयणावली वा पाणे वा बीए वा हरिण वा, अह भिक्खू णं पुब्बोवइट्ठा
 जाव जं पुब्बामेव वत्थं अंतोअंतेण पडिलेहिज्जा ६ ॥ ॥सू० १४६॥
 से भिक्खू वा (२) से जं पुण वत्थं जाणिज्जा, सअण्डं जाव ससंताणं तहप्प-
 गारं वत्थं अफासुयं जाव नो पडिगाहिज्जा १। से भिक्खू वा (२) से जं
 पुण वत्थं जाणिज्जा, अण्णं जाव संताणं अनलं अथिरं अधुवं अधारणिज्जं
 रोइज्जं तं न रुच्चइ तह अफासुयं जाव नो पडिगाहिज्जा २॥ से भिक्खू वा
 (१) से जं पुण वत्थं जाणिज्जा, अण्णं जाव संताणं अलं थिरं धुवं धारणिज्जं
 रोइज्जं रुच्चइ, तहप्पगारं वत्थं फासुयं जाव पडिगाहिज्जा ३। से भिक्खू वा
 (२) नो नवए मे वत्थेत्ति कट्ठ नो बहुदेसिएण सिणाणेण वा जाव पघं-
 सिज्जा ४॥ से भिक्खू वा (२) नो नवए मे वत्थेत्ति कट्ठ नो बहुदेसिएण
 सिणाणेण वा तहेव सीओदगविएडेण वा (२) जाव पओइज्जा ५॥ से
 भिक्खू वा (२) दुब्बिगंधे मे वत्थेत्ति कट्ठ नो बहुदेसिएण सिणाणेण
 वा तहेव, बहुसीओदगवियडेण वा उस्सिणोदगवियडेण वा जाव पओ-
 इज्जा ६॥ आलावओ ॥सू० १४७॥ से भिक्खू वा (२) अभिकंखेज्ज
 वत्थं आयावित्तए वा पयावित्तए वा, तहप्पगारं वत्थं नो अणंतरहियाए
 पुढवीए जाव संताणाए आयाविज्ज वा पयाविज्ज वा (२) से भिक्खू वा
 (२) अभिकंखेज्जा वत्थं आयावित्तए वा पयावित्तए वा, तहप्पगारं वत्थं
 थूणंसि वा गिहेलुगंसि वा उसुयालंसि वा कामजलंसि वा अन्नयरे तहप्प-
 गारे अंतलिक्खजाए दुब्बद्धे दुन्निविस्सत्ते अणिकं पे चलाचले नो आयावि-
 ज्ज वा नो पयाविज्ज वा २ से भिक्खू वा (२) अभिकंखेज्जा आयावि-
 त्तए वा (२) तहप्पगारं वत्थं कुकियंसि वा भित्तंसि वा सिलंसि वा लेलुंसि
 वा अन्नयरे वा तहप्पगारे अंतलिक्खजाए जाव नो आयाविज्ज वा

पयाविज्ज वा ३॥ से भिक्खु वा (२) वत्थं अभिकंखेज्जा आयावित्तए वा पयावित्तए वा तहप्पगारं वत्थं खंधंसि वा मंचंसि वा मालंसि वा पासायंसि वा हम्मियतलंसि वा अन्नयरे वा तहप्पगारे अंतलिद्वखज्जाए जाव नो आयाविज्ज वा पयाविज्ज वा ४॥ से तमायाए एगंतमवक्कमिज्जा (२), अहे भामथं डिल्लंसि वा जाव अन्नयरंसि वा तहप्पगारंसि थंडिल्लंसि पडिलेहिय (२) पमज्जिय (२) तत्रो संजयामेव वत्थं आयाविज्ज वा पयाविज्ज वा (५) एयं खलु तस्स जाव सया जइज्जासि त्ति बेमि ६॥ सू० १४८ ॥

॥ इति प्रथमोद्देशकः ॥ २-१-५-१ ॥

॥ अध्ययनं - ५ :: उद्देशकः - २ ॥

से भिक्खु वा (२) अहेसणिज्जाइं वत्थाइं जाइज्जा अहापरिग्गहियाइं वत्थाइं धारिज्जा नो धोइज्जा नो रएज्जा नो धोयरत्ताइं वत्थाइं धारिज्जा अपलिउंचमाणो गामंतरेसु ओमचेलिए, एयं खलु वत्थधारिस्स सामग्गिअं १ ॥ से भिक्खु वा गाहावइकुलं पविसिउकामे सव्वं चीवरमायाए गाहावइकुलं निक्खमिज्ज वा, पविसिज्ज वा, एवं बहिय विहारभूमिं वा विथारभूमिं वा गामाणुगामं वा दूइज्जिज्जा, २॥ अह पुण एवं जाणिज्जा, तिब्बदेसियं वा वासं वासमाणं पेहाए जहापिडेसणाए नवरं सव्वं चीवरमायाए ३॥ ॥सू० १४९॥ से एगइओ मुहुत्तगं (२) पाडिहारियं वत्थं जाइज्जा जाव एगाहेण वा दुयाहेण वा तियाहेण वा चउयाहेण वा पंचाहेण वा विप्पवसिय (२) उवागच्छिज्जा नो तह वत्थं अप्पणो गिरिहज्जा नो अन्नमन्नस्स दिज्जा, नो पामिच्चं कुज्जा, नो वत्थेण वत्थपरिणामं करिज्जा, नो परं उवसंकमिता एवं वइज्जा-आउसंतो समणा ! अभिकंखसि वत्थं धारित्तए वा परिहरित्तए वा ? थिरं वा संतं नो पलिच्छिदिय (२) परट्टविज्जा, तहप्पगारं वत्थं ससंधियं वत्थं तस्स चेव निसिरिज्जा नो णं साइज्जिज्जा १॥ से एगइओ एयप्पगारं निग्घोसं सुच्चा निसम्म जे भयंतारो तहप्पगाराणि

वत्थाणि ससंधियाणि मुहुत्तगं (२) जाव एगाहेण वा (५) विप्पवसिय (२) उवागच्छंति, तहप्पगाराणि वत्थाणि नो अप्पणा गिरहंति नो अन्नमन्नस्स दलयंति तं चेव जाव नो साइज्जति, बहुवयणेण भाणियव्वं, से हंता अहमवि मुहुत्तगं पाडिहारियं वत्थं जाइत्ता जाव एगाहेण वा (५) विप्पवसिय (२) उवागच्छिस्सामि, अवियाइं एयं ममेव सिया, माइट्ठाणं संफासे नो एवं करिज्जा २ ॥सू० १५०॥ से भिक्खू वा (२) नो वराणमंताइं वत्थाइं विवराणाइं करिज्जा, विवराणाइं न वराणमंताइं करिज्जा, अन्नं वा वत्थं लभिस्सामि त्तिक्खु नो अन्नमन्नस्स दिज्जा, नो पामिच्चं कुज्जा, नो वत्थेण वत्थपरिणाभं वुज्जा, नो परं उवसंकमित्तु एवं वदेज्जा—आउसंतो समणा ! समभिकंखसि मे वत्थं धारित्ते वा परिहरित्ते वा ! थिरं वा संतं नो पलिच्छिदिय (२) परिट्ठविज्जा, जहा मेयं वत्थं पावगं परो मन्नइ, परं च णं अदत्तहारी पडिपेहे पेहाए तस्स वत्थस्स नियाणाय नो तेसिं भीओ उम्मगेणं गच्छेज्जा, जाव अप्पुस्सुए, तथो संजयामेव गामाणुगामं दूइज्जिज्जा १॥ से भिक्खू वा (२) गामाणुगामं दूइज्जमाणे अंतरा से विहं सिया, से जं पुण विहं जाणिज्जा इमंसि खलु विहंसि बहवे आमोसगा वत्थपडियाए संपिंडिया गच्छेज्जा, णो तेसिं भीओ उम्मगेणं गच्छेज्जा जाव गामाणुगामं दूइज्जेज्जा २॥ से भिक्खू वा (२) दूइज्जमाणे अंतरा से आमोसगा पडियागच्छेज्जा, ते णं आमोसगा एवं वदेज्जा—आउसंतो समणा ! आहरेयं वत्थं देहि णिक्खिवाहि जहा रियाए णाणत्तं वत्थपडियाए ३। एयं खलु जाव सथा जइज्जास्सि त्ति वेमि ४ ॥सू० १५१॥

॥ इति द्वितीयोद्देशकः ॥ २-१-५-२ ॥

॥ इति पंचममध्ययनम् ॥ २-१-५ ॥



॥ ६ : पात्रैषणा-अध्ययनं ६ :: उद्देशकः १ ॥

से भिक्षु वा (२) अभिकंखिज्जा पायं एसित्तए, से जं पुण पादं जाणिज्जा, तंजहा—अलाउयपायं वा दारुपायं वा मट्टियापायं वा तहप्पगारं पायं जे निग्गंथे तरुणो जाव थिरसंघयणो से एगं पायं धारिज्जा नो विईयं॥ से भिक्षु वा (२) परं अद्धजोयणमेराए पायपडियाए नो अभिसंधारिज्जा गमणाए २॥ से भिक्षु वा (२) से जं पुण पायं धरिज्जा अस्सिंपडियाए एगं साहम्मियं समुद्दिस्स पाणाइं (४) जहा पिंडेसणाए चत्तारि आलावगा, पंचमे बहवे समणमाहणा पगणिय (२) तहेव ३॥ से भिक्षु वा (२) अस्संजए भिक्षुपडियाए बहवे समणमाहणा वत्थेसणाऽऽलावओ ४॥ से भिक्षु वा (२) से जाइं पुण पायाइं जाणिज्जा विरूवरूवाइं महद्वणमुल्लाइं, तंजहा—अयपायाणि वा तउपायाणि वा तंबपायाणि वा सीसगपायाणि वा हिरसणपायाणि वा सुवराणपायाणि वा रीरिअपायाणि वा हारपुडपायाणि वा मणिकायकंसपायाणि वा भंखसिंगपायाणि वा दंतपायाणि वा चेलपायाणि वा सेलपायाणि वा चम्मपायाणि वा अन्नयराइं वा तहप्पगाराइं विरूवरूवाइं महद्वणमुल्लाइं पायाइं अफासुयाइं जाव नो पडिगाहिज्जा ५ ॥१५॥ से भिक्षु वा (२) से जाइं पुण पायाइं विरूवरूवाइं महद्वणबंधणाइं तंजहा—अयबंधणाणि वा जाव चम्मबंधणाणि वा, अन्नयराइं तहप्पगाराइं महद्वणबंधणाइं अफासुयाइं जाव नो पडिगाहिज्जा १। इच्चेथाइं आयत्तणाइं उवाइकम्म अह भिक्षु जाणिज्जा चउहिं पडिमाहिं पायं एसित्तए, तत्थ खलु इमा पढमा पडिमा—से भिक्षु वा (२) उद्दिसिय (२) पायं जाएज्जा, तंजहा—अलाउयपायं वा ३ तहप्पगारं पायं सयं वा णं जाइज्जा जाव पडिगाहिज्जा । पढमा पडिमा १। अहावरा दोच्चा पडिमा, से भिक्षु वा पेहाए पायं जाइज्जा, तंजहा—गाहावइं वा कम्मकरीं वा से पुब्बामेव आलोइज्जा आउसोत्ति वा भइणीत्ति वा ? दाहिसि मे इत्तो अन्नयरं पादं तंजहा—लाउयपायं वा ३, तहप्पगारं पायं सयं वा जाव पडि-

गाहिज्जा, दुच्चा पडिमा २ ॥ अहावरा तच्चा पडिमा, से भिक्खू वा (२) से जं पुण पायं जाणिज्जा संगइयं वा वेजइयंतियं वा तहप्पगारं पायं सयं वा जाव पडिगाहिज्जा, तच्चा पडिमा ३ । अहावरा चउत्था पडिमा—से भिक्खू वा (२) उज्झियधम्मियं जाएज्जा जावऽन्ने बहवे समणा जाव नाव-
 कंखंति तहप्पगारं जाएज्जा जाव पडिगाहिज्जा, चउत्था पडिमा ४ । इच्चे-
 इयाणं चउगहं पडिमाणं अन्नयरं पडिमं जहा पिंडेसणाए २॥ से णं एयाए
 एसणाए एसमाणं पासित्ता परो वइज्जा, आउसंतो समणा ! एज्जासि तुमं
 मासेण वा जहा वत्थेसणाए, से णं परो नेता वदेज्जा,—आउसोत्ति वा
 भइणीत्ति वा ? आहारेयं पायं तिल्लेण वा घएण वा नवनीएण वा वसाए
 वा अन्नभंगित्ता वा तहेव सिणाणादि तहेव सीओदगाइं कंदाइं तहेव ३॥ से
 णं परो नेता वदेज्जा—आउसंतो समणा ! मुहुत्तगं (२) जाव अच्च्हाहि
 ताव अम्हे असणं वा उवकरेंसु वा उवक्खडेंसु वा, तो ते वयं आउसो ?
 सपाणं सभोयणं पडिग्गहं दाहामो, तुच्छए पडिग्गहे दिन्ने समणास्स नो
 सुट्ठु साहु भवइ, से पुव्वामेव आलोइज्जा—आउसोत्ति वा भइणीत्ति वा ?
 नो खलु मे कण्णइ आहाकम्मिए असणो वा (४) भुत्तए वा; मा उवकरेहि
 मा उवक्खडेहि, अभिकंखसि मे दाउं एमेव दलयाहि, से सेवं वयंतस्स परो
 असणं वा (४) उवकरित्ता उवक्खडित्ता सपाणं सभोयणं पडिग्गहं
 दलइज्जा, तहप्पगारं पडिग्गहं अफासुयं जाव नो पडिगाहिज्जा ४॥
 सिया से परो उवणित्ता पडिग्गहं निसिरिज्जा, से पुव्वामेव आलोइज्जा
 आउसोत्ति वा भइणीत्ति वा ? तुमं चेव णं संतियं पडिग्गहं अंतोअंतेणं
 पडिलेहिस्सामि २ । केवली बूया आयाणमेयं, अंतो पडिग्गहं पण्णाणि
 वा बीयाणि वा हरियाणि वा अह भिक्खूणं पुव्वोवइट्ठा एस पतिगणा जं
 पुव्वामेव पडिग्गहं अंतोअंतेणं पडिलेहिज्जा, सअंडाइं सव्वे आलावगा
 भाणियव्वा जहा वत्थेसणाए, नाणत्तं तिल्लेण वा घएण वा नवनीएण वा

वसाए वा सिणाणादि जाव अन्नयरंसि वा तहप्पगारंसि थंडिलंसि पडिलेहिय (२) पमज्जिय (२) तत्रो संजयामेव आमज्जिज्जा ६। एवं खलु जाव सया जएज्जा त्तिबेमि ७ ॥सू० १५२॥

॥ इति प्रथमोद्देशकः ॥२-१-६-१॥

॥ अध्ययनं-६ :: उद्देशकः-२ ॥

से भिक्खू वा (२) गाहावइकुलं पिंडवायपडियाए पविट्ठे समाणे पुव्वामेव पेहाए पडिग्गहगं अवहट्ठु पाणे पमज्जिय रयं तत्रो संजयामेव, गाहावइकुलं पिंडवायपडियाए निक्खमिज्ज वा पविसिज्ज वा केवली बूया, आयाणमेयं ? अंतो पडिग्गहगंसि पाणे वा बीए वा हरिए वा परियावज्जिज्जा, अह भिक्खूणं पुव्वोवइट्ठा एस पतिराणा, जं पुव्वामेव पेहाए पडिग्गहं अवहट्ठु पाणे पमज्जिय रयं, तत्रो संजयामेव, गाहावइकुलं पिंडवायपडियाए निक्खमिज्ज वा २ ॥सू० १५३॥ से भिक्खू वा (२) जाव समाणे सिया से परो आहट्ठु अंतो पडिग्गहगंसि सीओदगं परिभाइत्ता नीहट्ठु दलइज्जा, तहप्पगारं पडिग्गहगं परहत्थंसि वा परपायंसि वा अफासुयं जाव नो पडिगाहिज्जा, से य आहच्च पडिग्गहिए सिया खिप्पामेव उदगंसि साहरिज्जा, से पडिग्गहमायाए पाणं परिट्ठविज्जा, ससिणिद्धाए वा भूमिए नियमिज्जा १॥ से भिक्खू वा (२) उदउल्लं वा ससिणिद्धं वा पडिग्गहं नो आमज्जिज्ज वा जाव पयाविज्ज वा, अह पुण्ण एवं जाणिज्जा, विगयोदए मे पडिग्गहए द्विन्नसिणेहे तहप्पगारं पडिग्गहं तत्रो संजयामेव आमज्जिज्ज वा जाव पयाविज्ज वा २॥ से भिक्खू वा (२) गाहावाहकुलं, पविसिउकामे पडिग्गहमायाए गाहावइकुलं पिंडवायपडियाए पविसिज्ज वा निक्खमिज्ज वा, एवं बहिया वियारभूमिं विहारभूमिं वा गामाणुगामं दूइज्जिज्जा, तिब्बदेसीयाए जहा बिइयाए वत्थेसणाए नवरं इत्थ पडिग्गहे ३। एयं खलु तस्स भिक्खुस्स भिक्खु-

णीए वा सामगियं जं सब्वट्ठेहिं सहिए सया जएजासि तिबेमि ४ ॥
॥सू० १५४॥

॥ इति द्वितीयोद्देशकः ॥ २-१-६-२॥ इति षष्ठमध्ययनम् ॥ २-१-६ ॥

॥ ७: अवग्रहप्रतिमा-अध्ययनं ७ :: उद्देशकः १ ॥

समणो भविस्सामि अणुगारे अकिंचणो अपुणे अपसू परदत्तभोइ
पावं कम्मं नो करिस्सामित्ते समुट्ठाए सब्वं भंते ? अदिन्नादाणं पच्चखामि,
से अणुपविसित्ता गामं वा जाव रायहाणि वा नेव सयं अदिन्नं गिरिहज्जा
नेवऽन्नेहिं अदिन्नं गिरहाविज्जा अदिन्नं गिरहंतेवि अन्ने न समणुजाणिज्जा,
जेहिंवि सद्धिं संपव्वइए तेसिंपि जाइं छत्तगं वा जाव चम्मछेयणाणं वा
तेसिं पुव्वामेव उग्गहं अणुणुन्नविय अपडिलेहिय (२) अपमज्जिय (२)
नो उग्गिरिहज्जा वा परिगिरिहज्ज वा, तेसिं पुव्वामेव उग्गहं जाइज्जा
अणुणुन्नविय पडिलेहिय पमज्जिय तत्रो संजयामेव उग्गिरिहज्ज वा परिगि-
रिहज्ज वा ॥सू० १५५॥ से आगंतारेसु वा (४) अणुवीइउग्गहं जाइज्जा,
जे तत्थ इसरे जे तत्थ समहिट्ठए ते उग्गहं अणुणुन्नविज्जा-कामं खलु आउसो ?
अहालंदं अहापरिन्नायं वसामो जाव आउसो ? जाव आउसंतस्स उग्गहे
जाव साहम्मियाए ताव उग्गहं उग्गिरिहस्सामो, तेण परं विहरिस्सामो ॥
से किं पुण तत्थोग्गहंसि एवोग्गहियंसि जे तत्थ साहम्मिया संभोइया सम-
णुन्ना उवागच्छिज्जा जे तेण सयमेसित्ते असणो वा (४) तेण ते साहम्मिया
(३) उवनिमंतिज्जा, नो चेव गां परवडियाए ओगिज्झिय (२) उवनि-
मंतिज्जा २ ॥सू० १५६॥ से आगंतारेसु वा (४) जाव से किं पुण तत्थो-
ग्गहंसि एवोग्गहियंसि जे तत्थ साहम्मिया अन्नसंभोइया समणुन्ना उवाग-
च्छिज्जा जे तेण सयमेसित्ते पीढे वा फले वा सिज्जा वा संथारए वा तेण
ते साहम्मिए अन्नसंभोइए समणुन्ने उवनिमंतिज्जा नो चेव गां परवडियाए
ओगिज्झिय उवनिमंतिज्जा ॥ से आगंतारेसु वा (४) जाव से किं पुण

तत्थुग्गहंसि एवोग्गहियंसि जे तत्थ गाहावइण वा गाहावइपुत्ताण वा सूई
वा पिप्पलए वा करणसोहणए वा नहच्छेयणए वा तं अप्पणो एगस्स
अट्टाए पाडिहारियं जाइज्जा नो अन्नमन्नस्स दिज्ज वा अणुपइज्ज वा,
सयंकरणिज्जंतिकटट्टु २। से तमाथाए तत्थ गच्छिज्जा (२) पुव्वामेव उच्चा-
णए हत्थे कटट्टु भूमीए वा ठवित्ता इमं खलु इमं खलु त्ति आलोइज्जा, नो
चेव णं सयं पाणिणा परपाणिंसि पच्चप्पिणिज्जा ३ ॥सू० १५७॥ से भिक्खू
वा (२) से जं पुण उग्गहं जाणिज्जा अणंतरहियाए पुढवीए जाव संताणए तह-
प्पगारं उग्गहं नो उगिणिहज्ज वा पगिणिहज्ज वा १॥ से भिक्खू वा (२)
से जं पुण उग्गहं जाणिज्जा, थूणंसि वा (४) तहप्पगारे अंतलिक्खजाए
दुब्बदधे जाव नो उगिणिहज्ज वा (२) २॥ से भिक्खू वा (२) से जं पुण उग्गहं
जाणिज्जा, कुलियंसि वा (४) जाव नो उगिणिहज्ज वा (२) ३॥ से भिक्खू
वा (२) से जं पुण उग्गहं जाणिज्जा खंधंसि वा अन्नयरे वा तहप्पगारे जाव
नो उग्गहं उगिणिहज्ज वा (२) ४॥ से भिक्खू वा (२) से जं पुण उग्गहं
जाणिज्जा ससागारियं सागणियं सउदयं सइत्थिं सक्खुड्डपसुभत्तपाणं नो
पन्नस्स निक्खमणपवेसे जाव धम्माणुओगचिंताए, सेवं नच्चा तहप्पगारे
उवस्सए ससागारिए जाव सक्खुड्डपसुभत्तपाणे नो उवग्गहं उगिणिहज्ज
वा (२) ५॥ से भिक्खू वा (२) से जं पुण उग्गहं जाणिज्जा गाहावइ-
कुलस्स मज्झमज्जेणं गंतुं पंथे पडिबद्धं वा नो पन्नस्स जाव सेवं नच्चा
तहप्पगारे उवस्सए नो उग्गहं उगिणिहज्ज वा (२) ६॥ से भिक्खू वा
(२) से जं पुण उग्गहं जाणिज्जा, इहं खलु गाहावइ वा जाव कम्मकरीओ
वा अन्नमन्नं अक्कोसंति वा तेहव तिल्लादि सिणाणादि सीओदगविय-
डादि निगिणाइ वा जहा सिज्जाए आलावगा, नवरं उग्गहवत्तवया ७॥
से भिक्खू वा (२) से जं पुण उग्गहं जाणिज्जा, आइन्नसंलिक्खे नो
पन्नस्स जाव चिंताए तहप्पगारे उवस्सए नो उग्गहं उगिणिहज्ज वा (२)

૮॥ એયં સ્વલુ જાવ સયા જણ્જાસિ ત્તિ વેમિ ૬॥ ॥સૂ૦ ૧૫૮॥

॥ ઇતિ પ્રથમોદેશકઃ ॥૨-૧-૭-૧॥

॥ અધ્યયનં-૭ :: ઉદ્દેશકઃ-૨ ॥

સે આગંતારેસુ વા (૪) અણુવીડ ઉગ્ગહં જાણ્જા, જે તત્થ ઇસરે સમાહિટ્ટાણે તે ઉગ્ગહં અણુન્નવિજ્જા કામં સ્વલુ આસો ! અહાલંદં અહા-પરિન્નાયં વસામો જાવ આસો ! જાવ આસંતસ્મ ઉગ્ગહે જાવ સાહ-મ્મિઆણે તાવ ઉગ્ગહં ઉગ્ગિગિહસ્સામો તેણ પરં વિહરિસ્સામો ॥ સે કિં પુણ તત્થ ઉગ્ગહંસિ એવોગ્ગહિયંસિ ? જે તત્થ સમણાણ વા માહણાણ વા દંડે વા છત્તે વા જાવ ચમ્મછેદ્દાણે વા તં નો અંતોહિંતો બાહિં નીણિજ્જા બહિયાઓ વા નો અંતો પવિસિજ્જા, સુત્તં વા નો પઢિબોહિજ્જા, નો તેસિં કિંચિવિ અપ્પત્તિયં પઢિણીયં કરિજ્જા ॥ સૂ૦ ૧૫૯ ॥

સે ભિક્ખુ વા (૨) અભિકંસિજ્જા અંબવણં ઉવાગચ્છિત્તે જે તત્થ ઇસરે જે તત્થ સમાહિટ્ટાણે તે ઉગ્ગહં અણુજાણાવિજ્જા—કામં સ્વલુ જાવ વિહરિ-સ્સામો, સે કિં પુણ તત્થોગ્ગહંસિ એવોગ્ગહિયંસિ અહ ભિક્ખુ ઇચ્છિજ્જા અંબં ભુત્તે વા સે જં પુણ અંબં જાણિજ્જા સઅંડં સસંતાણં તહપ્પગારં અંબં અફાસુયં જાવ નો પઢિગાહિજ્જા ૧॥ સે ભિક્ખુ વા (૨) સે જં પુણ અંબં જાણિજ્જા અપ્પંડં અપ્પસંતાણં અતિરિચ્છઙ્ગિન્નં અવ્યોચ્છિન્નં અફાસુયં જાવ નો પઢિગાહિજ્જા ૨॥ સે ભિક્ખુ વા (૨) સે જં પુણ અંબં જાણિજ્જા, અપ્પંડં વા જાવ સંતાણં તિરિચ્છઙ્ગિન્નં ઇચ્છિન્નં ફાસુયં પઢિગાહિજ્જા ૩ ॥

સે ભિક્ખુ વા (૨) અભિકંસિજ્જા, અંબભિત્તં વા અંબપેસિયં વા અંબચોયગં વા અંબસાલગં વા અંબડાલગં વા ભુત્તે વા પાયે વા, સે જં પુણ જાણિજ્જા અંબભિત્તં વા (૫) સઅંડં સસંતાણં અફાસુયં જાવ નો પઢિગાહિજ્જા ૪॥ સે ભિક્ખુ વા (૨) સે જં પુણ જાણિજ્જા અંબં વા અંબભિત્તં વા અપ્પંડં જાવ

संताणगं अतिरिच्छच्छिन्नं वा अवोच्छिन्नं वा अफासुयं जाव नो पडिगाहिज्ज
 ५॥ से भिक्खू वा (२) से जं पुण जाणिज्जा अंबडालगं वा अप्पंडं वा (५)
 तिरिच्छच्छिन्नं बुच्छिन्नं फासुयं जाव पडिगाहिज्जा ६॥ से भिक्खू वा (२)
 अभिकंखिज्जा उच्छुयणं उवागच्छित्तए, जे तत्थ इसरे जाव उग्गहंसि ७॥
 अह भिक्खू इच्छिज्जा उच्छुं भुत्तए वा पायए वा, से जं उच्छुं जाणिज्जा
 सअंडं जाव नो पडिगाहिज्जा अतिरिच्छच्छिन्नं तहेव, तिरिच्छच्छिन्नेऽवि
 तहेव ८॥ से भिक्खू वा (२) से जं पुण अभिकंखिज्जा अंतरुच्छुयं वा उच्छुगंडियं
 वा उच्छुचोयगं वा उच्छुसालगं वा उच्छुडालगं वा भुत्तए वा पायए वा ९॥
 से जं पुण जाणिज्जा अंतरुच्छुयं वा जाव डालगं वा सअंडं जाव नो पडि-
 गाहिज्जा १०॥ से भिक्खू वा से जं पुण जाणिज्जा अंतरुच्छुयं वा जाव डालगं वा
 अप्पंडं वा जाव नो पडिगाहिज्जा, अतिरिच्छच्छिन्नं ॥ तहेव तिरिच्छच्छिन्नं पडि-
 गाहिज्जा ११॥ से भिक्खू वा (२) अभिकंखिज्जा, ल्हसणवणं उवागच्छित्तए तहेव
 तिन्निवि आलावगा, नवरं ल्हसुणं १२॥ से भिक्खू वा (२) अभिकंखिज्जा
 ल्हसुणं वा ल्हसुणकंदं वा ल्हसुणचोयगं वा ल्हसुणनालगं वा भुत्तए वा (२)
 से जं पुण जाणिज्जा लसुणं वा जाव लसुणवीयं वा सअंडं जाव नो पडिगाहिज्जा
 १३॥ एवं अतिरिच्छच्छिन्नेऽवि तिरिच्छच्छिन्ने जाव पडिगाहिज्जा ॥सू० १६०॥
 से भिक्खू वा (२) आगंतारेसु वा (४) जावोग्गहियंसि जे तत्थ गाहावइण
 वा गाहावइपुत्ताण वा इच्चेयाइं आयत्तणाइं उवाइक्कम्म, अह भिक्खू
 जाणिज्जा, इमाहिं सत्तहिं पडिमाहिं उग्गहं उग्गिगिहत्तए, तत्थ खलु इमा
 पढमा पडिमा—से आगंतारेसु वा (४) अणुवीइ उग्गहं जाइज्जा जाव
 विहरिस्सामो पढमा पडिमा १ । अहावरा दुच्चा पडिमा जस्स णं भिक्खुस्स
 एवं भवइ—अहं च खलु अन्नेसिं भिक्खूणं अट्ठाए उग्गहं उग्गिगिहस्सामि,
 अरणोसिं भिक्खूणं उग्गहे उग्गहिए उवल्लिसामि, दुच्चा पडिमा २ ।
 अहावरा तच्चा पडिमा-जस्स णं भिक्खुस्स एवं भवइ—अहं च खलु अन्नेसिं

भिक्षुणा अट्टाए उग्गहं उग्गिगिहस्सामि, अन्नेसिं च उग्गहे उग्गहिए नो उवल्लिस्सामि, तच्चा पडिमा ३ । अहावरा चउत्था पडिमा-जस्स गां भिक्षुस्स एवं भवइ-अहं च खलु अन्नेसिं भिक्षुणां अट्टाए नो उग्गहं उग्गिगिहस्सामि, अन्नेसिं च उग्गहे उग्गहिए उवल्लिस्सामि, चउत्था पडिमा ४ । अहावरा पंचमा पडिमा-जस्स गां भिक्षुस्स एवं भवइ-अहं च खलु अण्णो अट्टाए उग्गहं च उग्गिगिहस्सामि नो दुराहं नो तिगहं नो चउराहं, नो पंचराहं, पंचमा पडिमा ५ । अहावरा छट्ठा पडिमा-से भिक्षु वा (२) जस्स एव उग्गहे उवल्लिइज्जा, जे तत्थ अहासमन्नागए तं जहा-इक्कडे वा जाव पलाले वा तस्स लाभे संवसिज्जा, तस्स अलाभे उक्कुडुओ वा नेसज्जिओ वा विहरिज्जा, छट्ठा पडिमा ६ । अहावरा सत्तमा पडिमा-जे भिक्षु वा (२) अहासंथडमेव उग्गहं जाइज्जा, तंजहा--पुढविसिलं वा कट्टसिलं वा अहासंथडमेव तस्स लाभे संते संवसिज्जा, तस्स अलाभे उक्कुडुओ वा नेसज्जिओ वा विहरिज्जा, सत्तमा पडिमा ७ । इच्चेयासिं सत्तराहं पडिमाणं अन्नयरं जहा पिंडेसणाए ॥सू० १६१॥ सुयं मे आउसंतेणां भगवया एवमक्खायं—इह खलु थेरेहिं भगवंतेहिं पंचविहे उग्गहे पन्नत्ते, तंजहा—देविंदउग्गहे १, रायउग्गहे २, गाहावइउग्गहे ३, सागारियउग्गहे ४, साहम्मियउग्गहे ५, एवं खलु तस्स भिक्षुस्स भिक्षुणीए वा सामग्गियं जं सव्वट्ठेहिं सहिए सया जएज्जासि तिबेमि, उग्गहपडिमा सम्मत्ता ॥सू० १६२॥

॥ इति द्वितीय उद्देशकः ॥ २-१-७-२ ॥

॥ इति सप्तममध्ययनम् ॥ २-१-७ ॥ मूलतः षाडशमध्ययनम् ॥१६॥

॥ इति प्रथमा चूला ॥ श्रु० २-चू० १ ॥

॥ २ः सप्तसप्तिका-द्वितीया चूला ॥

॥ १ः स्थान—अध्ययनं १ ॥

से भिक्खु वा (२) अभिकंखेज्जा ठाणं ठइत्तए, से अणुपविसिज्जा गामं वा जाव रायहाणिं वा, से जं पुण्ण ठाणं जाणिज्जा—सअण्डं जाव समकडासंताणयं तं तहप्पगारं ठाणं अफासुयं अणोसणिज्जं लाभे संते नो पडिगाहिज्जा, एवं सिज्जागमेण नेयवं जाव उदयपसूयाइं ति १॥ इच्चेयाइं आयतणाइं उवाइकम्म (२) अह भिक्खु इच्छिज्जा चउहिं पडिमाहिं ठाणं ठइत्तए, तत्थिमा पढमा पडिमा ॥ अचित्तं खलु उवसज्जेज्जा अवलंबिज्जा काएण विपरिकम्माइ (म्मिज्जा) सवियारं ठाणं ठइस्सामि, पढमा पडिमा । अहावरा दुच्चा पडिमा—अचित्तं खलु उवसज्जेज्जा अवलंबिज्जा काएण विपरिकम्माइ नो सवियारं ठाणं ठइस्सामित्ति, दुच्चा पडिमा । अहावरा तच्चा पडिमा—अचित्तं खलु उवसज्जेज्जा अवलंबिज्जा नो काएण विपरिकम्माइ नो सवियारं ठाणं ठइस्सामित्ति, तच्चा पडिमा । अहावरा चउत्था पडिमा—अचित्तं खलु उवसज्जेज्जा अवलंबिज्जा नो काएण नो परक्कमाइ नो सवियारं ठाणं ठइस्सामित्ति वोसट्ठकाए वोसट्ठकेसमंसुलोमनहे संनिरुद्धं वा ठाणं ठइस्सामित्ति, चउत्था पडिमा । इच्चेयासिं चउराहं पडिमाणां जाव पग्गहियतरायं विहरिज्जा, नो किंचिवि वइज्जा २। एयं खलु तस्म भिक्खुस्स जाव जइज्जासि तिबेमि ३ ॥सू० १६३॥ ठाणसत्तिकयं सम्मत्तं ॥

॥ इति प्रथममध्ययनम् ॥ २ श्रु०-२ चू०-१ अ० आदितः ८ ॥

॥ :: निषीधिका-अध्ययनं २ ॥

से भिक्खु वा (२) अभिकंखिज्जा निसीहियं फासुयं गमणाए, से पुण निसीहियं जाणिज्जा—सअण्डं सपाणां जाव मक्कडसंताणयं तहप्पगारं अफासुयं लाभे संते नो चेइस्सामि १॥ से भिक्खु वा (२) अभिकंखेज्जा निसीहियं गमणाए, से पुण निसीहियं अप्पपाणां अप्पबीअं जाव सताणयं तहप्पगारं निसीहियं फासुयं चेइस्सामि, एवं सिज्जागमेणां नेयव्वं जाव उदयप्पसूयाइं २॥ जे तत्थ दुवग्गा तिवग्गा चउवग्गा पंचवग्गा वा अभिसंधारिंति निसीहियं गमणाए ते नो अन्नमन्नस्स कायं आलिंगिज्ज वा विलिंगिज्ज वा चुंबिज्ज वा दंतेहिं वा नहेहिं वा अच्चिदिज्ज वा बुच्चिदिज्ज वा ३ । एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिए समिए सया जएज्जा, सेयमिणां मन्निज्जासि त्तिवेमि ४ ॥सू० १६४॥ निसीहियामत्तिकयं॥

॥ इति द्वितीयमध्ययनम् ॥ २-२-२-९ ॥

॥ ३ :: उच्चारप्रश्रवणा-अध्ययनं ३ ॥

से भिक्खु वा (२) उच्चारपासवणाकिरियाए उब्बाहिज्जमाणे सयस्स पायपुंछणास्स असइए तत्रो पच्छा साहम्मियं जाइज्जा १॥ से भिक्खु वा (२) से जं पुण थंडिल्लं जाणिज्जा सअण्डं सपाणां जाव मक्कडसंताणयं तहप्पगारंसि थंडिलंसि नो उच्चारपासवणां वोसिरिज्जा २॥ से भिक्खु वा (२) से जं पुण थंडिल्लं जाणिज्जा, अप्पपाणां जाव संताणयं तहप्पगारंसि थंडिलंसि उच्चारपासवणां वोसिरिज्जा ३ । से भिक्खु वा (२) से जं थंडिल्लं जाणिज्जा, अस्सिपडियाए एगं साहम्मियं समुद्दिस्स वा, अस्सिपडियाए बहवे साहम्मिया समुद्दिस्स, अस्सिपडियाए एगं साहम्मिणिं समुद्दिस्स, अस्सिपडियाए बहवे साहम्मिणीओ समुद्दिस्स, अस्सिपडियाए बहवे समणमाहणावणीमगा पगणिय (२) समुद्दिस्स पाणाइं (४) जाव उद्देसियं चेएइ

तहप्पगारं थंडिल्लं पुरिसंतरकडं जाव बहियानीहडं वा अनीहडं वा
 अन्नयरंसि वा तहप्पगारंसि थंडिलंसि उच्चारपासवणं नो वोसिरिज्जा ४॥
 से भिक्खू वा (२) से जं पुण थंडिलं जाणिज्जा, बहवे समणमाहणकिवणा-
 वणीमग-अतिही-समुद्दिस्स पाणाइं भूयाइं जीवाइं सत्ताइं जाव उद्देसियं
 चेएइ, तहप्पगारं थंडिलं पुरिसंतरगडं जाव बहियाअनीहडं अन्नयरंसि वा
 तहप्पगारंसि थंडिल्लंसि नो उच्चारपासवणं वोसिरिज्जा, अह पुण एवं
 जाणिज्जा--अपुरिसंतरगडं जाव बहिया नीहडं अन्नयरंसि वा तहप्पगारंसि
 थंडिलंसि उच्चारपासवणं वोसिरिज्जा ५॥ से भिक्खू वा (२) से जं पुण थंडिलं
 जाणिज्जा, अस्सिपडियाए कयं वा कारियं वा पामिच्चियं वा छन्नं वा घट्टं
 वा मट्ठं वा लित्तं वा संमट्ठं वा संपधूवियं वा अन्नयरंसि वा तहप्पगारंसि
 थंडिलंसि नो उच्चारपासवणं वोसिरिज्जा ६॥ से भिक्खू वा (२) से जं
 पुण थंडिलं जाणेज्जा, इह खलु गाहावइ वा गाहावइपुत्ता वा कंदाणि
 वा जाव हरियाणि वा अंतराओ वा बाहिं नीहरंति बहियाओ वा अंतो
 साहरंति अन्नयरंसि वा तहप्पगारंसि थंडिलंसि नो उच्चारपासवणं वोसिरिज्जा
 ७॥ से भिक्खू वा (२) से जं पुण थंडिलं जाणेज्जा खंधंसि वा पीढंसि
 वा मंचंसि वा मालंसि वा (हम्मियतलंसि वा अट्टालंसि वा) अट्टंसि वा
 पासायंसि वा अन्नयरंसि वा थंडिलंसि नो उच्चारपासवणं वोसिरिज्जा ८॥
 से भिक्खू वा (२) से जं पुण थंडिलं जाणिज्जा, अणंतरहियाए पुढवीए
 ससीणिद्धाए पुढवीए ससरक्खाए पुढवीए मट्टियाए मक्कडाए (मट्टियाकम्म-
 कडाए) चित्तमंताए सिलाए चित्तमंताए लेलुयाए कोलावासंसि वा दास्यंसि
 वा जीवपइट्टियंसि वा जाव मक्कडासंताणयंसि वा अन्नयरंसि वा तहप्पगारंसि
 थंडिलंसि नो उच्चारपासवणं वोसिरिज्जा ९॥ ॥सू० १६५॥ से भिक्खू वा
 (२) से जं पुण थंडिलं जाणेज्जा-इह खलु गाहावइ वा गाहावइपुत्ता वा कंदाणि
 वा जाव बीयाणि वा परिसाडिंसु वा परिसाडित्ति वा परिसाडिस्संति वा

अन्नयरंसि वा तहप्पगारंसि थंडिलंसि नो उच्चारपासवणं वोसिरिज्जा ॥ से भिक्खु वा (२) से जं पुण जाणिज्जा १॥ इह खलु गाहावई वा गाहावइ-
 पुत्ता वा सालीणि वा वीहीणि वा मुग्गाणि वा मासाणि वा कुलत्थाणि
 वा जवाणि वा जवजवाणि वा पइरिंसु वा पइरिति वा पइरिस्संति वा
 अन्नयरंसि वा तहप्पगारंसे थंडिलंसि नो उच्चारपासवणं वोसिरिज्जा २॥ से
 भिक्खु वा (२) से जं पुण थंडिलं जाणिज्जा, आमोयाणि वा घासाणि वा
 भिलुयाणि वा विज्जुलयाणि वा खाणुयाणि वा कडयाणि वा पगडाणि
 वा दरीणि वा पदुग्गाणि वा समाणि वा २ अन्नयरंसि वा तहप्प-
 गारंसि थंडिलंसि नो उच्चारपासवणं वोसिरिज्जा ३॥ से भिक्खु वा
 (२) से जं पुण थंडिलं जाणिज्जा माणुसरंधणाणि वा महिसकर-
 णाणि वा वसहकरणाणि वा अस्सकरणाणि का कुक्कुडकरणाणि
 वा मक्कडकरणाणि वा हयकरणाणि वा लावयकरणानि वा वट्टय-
 करणाणि तित्तिरकरणाणि वा कवोयकरणाणि वा कविंजलकरणाणि
 वा अन्नयरंसि वा तहप्पगारंसि थंडिलंसि नो उच्चारपासवणं
 वोसिरिज्जा ४॥ से भिक्खु वा (२) से जं पुण थंडिलं जाणेज्जा
 वेहाणसट्ठाणोसु वा गिद्धपट्ठाणोसु वा तरुपट्ठाणोसु वा मेरुपट्ठाण-
 ओसु वा विसभिक्खणयट्ठाणोसु वा अगणिपट्ठाणोसु वा अन्नयरंसि वा
 तहप्पगारंसि थंडिलंसि नो उच्चारपासवणं वोसिरिज्जा ५॥ से भिक्खु वा
 (२) से जं पुण थंडिलं जाणिज्जा, आरामाणि वा उज्जाणाणि वा वणाणि
 वा वणसंडाणि वा देवकुलाणि वा सभाणि वा पवाणि वा अन्नयरंसि वा
 तहप्पगारंसि वा नो उच्चारपासवणं वोसिरिज्जा ६॥ से भिक्खु वा (२)
 से जं पुण थंडिलं जाणेज्जा, अट्ठालयाणि वा चरियाणि वा दाराणि वा
 गोपुराणि वा अन्नयरंसि वा तहप्पगारंसि थंडिलंसि नो उच्चारपासवणं
 वोसिरिज्जा ७॥ से भिक्खु वा (२) से जं पुण थंडिलं जाणेज्जा, तिगाणि

वा चउकाणि वा चचराणि वा चउम्मुहाणि वा अन्नयरंसि वा तहप्पगारंसि
नो उच्चारपासवणं वोसिरिज्जा ८॥ से भिक्खु वा (२) से जं पुण थंडिलं
जाणेज्जा इंगालदाहेसु खारदाहेसु वा मडयदाहेसु वा मडयथूभियासु वा
मडयचेइएसु वा अन्नयरंसि वा तहप्पगारंसि वा थंडिलंसि नो उच्चारपासवणं
वोसिरिज्जा ९॥ से भिक्खु वा (२) से जं पुण थंडिलं जाणेज्जा, नइयाय-
तणेसु वा पंकाययणेसु वा ओघाययणेसु वा सेयणवहंसि वा अन्नयरंसि वा
तहप्पगारंसि थंडिलंसि नो उच्चारपासवणं वोसिरिज्जा १०॥ से भिक्खु वा
से जं पुण जाणेज्जा नवियासु वा मट्टियखाणिआसु नावयासु गोप्प-
हेलियासु वा गवाणीसु वा खाणीसु वा अन्नयरंसि वा तहप्पगारंसि
थंडिलंसि नो उच्चारपासवणं वोसिरिज्जा, ११॥ से भिक्खु वा (२) से जं
पुण थंडिलं जाणिज्जा, डागवच्चंसि वा सागवच्चंसि वा मूलगवच्चंसि वा
हत्थंकरवच्चंसि वा अन्नयरंसि वा तहप्पगारंसि थंडिलंसि नो उच्चारपास-
वणं वोसिरिज्जा १२॥ से भिक्खु वा (२) से जं पुण थंडिलं जाणिज्जा,
असणवणंसि वा सणवणंसि वा धायइवणंसि वा केयइवणंसि वा अंबवणंसि वा
असोगवणंसि वा नागवणंसि वा पुन्नागवणंसि वा चुल्लगवणंसि वा अन्नयरेसु
तहप्पगारेसु पत्तोवेएसु वा पुष्फोवेएसु वा फलोवेएसु वा बीओवेएसु वा
हरिओवेएसु वा नो उच्चारपासवणं वोसिरिज्जा १३॥ ॥सू० १६६॥ से
भिक्खु वा(२)सयपायवं वा परपायवं वा गहाय से तमायाए एगंतम-
वक्कमे अणावायंसि असंलोयंसि अण्णपाणंसि जाव मक्कडासंताणयंसि
अहारामंसि वा उवस्सयंसि तओ संजयामेव उच्चारपासवणं वोसिरिज्जा, से
तमायाए एगंतमवक्कमे अणावाहंसि जाव संताणयंसि अहारामंसि वा
आमथंडिलंसि वा अन्नयरंसि वा तहप्पगारंसि थंडिलंसि अचित्तंसि तओ
संजयामेव उच्चारपासवणं वोसिरिज्जा, एयं खलु तस्स जाव सया जइज्जासि
॥सू० १६७॥ त्तिवेमि ॥ उच्चारपासवणसत्तिकओ सम्मत्तो ॥

॥ इति तृतीयमध्ययनम् ॥ २-२-३-१० ॥

॥ ४ : शब्द-अध्ययनं ४ ॥

से भिक्खु वा (२) मुङ्गसद्दाणि वा नंदीसद्दाणि वा भल्लरीसद्दाणि वा अन्नयराणि वा तहप्पगाराणि विरुवरूवाइं सद्दाइं वितताइं कन्नसोयणपडियाए नो अभिसंधारिज्जा गमणाए १॥ से भिक्खु वा (२) अहावेगइयाइं सद्दाइं सुगोइ, तं--वीणासद्दाणि वा विपंचीसद्दाणि वा पिप्पी-
(कच्ची)सगसद्दाणि वा तूणयसद्दाणि वा वण(वीणि)यसद्दाणि वा तुंबवीणि-
यसद्दाणि वा ढंकुणमद्दाइं अन्नयराइं तहप्पगाराइं विरुवरूवाइं सद्दाइं वितताइं कणसोयपडियाए नो अभिसंधारिज्जा गमणाए २॥ से भिक्खु वा (२) अहावेगइयाइं सद्दाइं सुगोइ, तंजहा-तालसद्दाणि वा कंसता-
लसद्दाणि वा लत्तिथसद्दाणि वा गोधियसद्दाणि वा किरिकिरियासद्दाणि वा अन्नयराणि वा तहप्पगाराणि विरुवरूवाइं सद्दाणि कणसोयपडियाए नो अभिसंधारेज्जा गमणाए ३॥ से भिक्खु वा (२) अहावेगइयाइं सद्दाणि सुगोइ तंजहा-संखसद्दाणि वा वेणुसद्दाणि वा वंससद्दाणि वा खरमुहिसद्दाणि वा परिपिरियासद्दाणि वा अन्नयराइं तहप्पगाराइं विरुवरूवाइं सद्दाइं भुमिराइं कन्नसोयपडियाए नो अभिसंधारेज्जा गमणाए ४ ॥सू० १६=॥ से भिक्खु वा (२) अहावेगइयाइं सद्दाइं सुगोइ तंजहा-वप्पाणि वा फलिहाणि वा जाव सराणि वा सागराणि वा सरसरपंतियाणि वा अन्नयराइं वा तहप्पगाराइं विरुवरूवाइं सद्दाइं कणसोयपडियाए नो अभिसंधारिज्जा गमणाए १॥ से भिक्खु वा (२) अहावेगइयाइं सद्दाइं सुगोइ तंजहा-कच्छाणि वा गूमाणि वा गहणाणि वा वणाणि वा वणादुग्गाणि पव्वयाणि वा पव्वयदुग्गाणि वा अन्नयराइं वा तहप्पगाराइं विरुवरूवाइं सद्दाइं सो य पडियाए नो अभिसंधारिज्जा गमणाए २॥ से भिक्खु वा (२) अहावेगइयाइं सद्दाइं सुगोइ, तंजहा-गामाणि वा नगराणि वा निगमाणि वा रायहाणाणि वा आसम-

पट्टासंनिवेसाणि वा अन्नयराइं तहप्पगाराइं सदाइं नो अभिधारेज्जा गमणाए ३॥ से भिक्खु वा (२) अहावेगइयाइं सदाइं सुणेइ, तंजहा—आरामाणि वा उज्जाणाणि वा वणाणि वा वणसंडाणि वा देवकुलाणि वा सभाणि वा पवाणि वा अन्नयराइं तहप्पगाराइं सदाइं नो अभिसंधारेज्जा गमणाए ४॥ से भिक्खु वा (२) अहावेगइयाइं सदाइं सुणेइ, तंजहा—अट्टाणि वा अट्टालयाणि वा चरियाणि वा दाराणि वा गोपुराणि वा अन्नयराइं तहप्पगाराइं सदाइं नो अभिसंधारिज्जा गमणाए ५॥ से भिक्खु वा (२) अहावेगइयाइं सदाइं सुणेइ, तंजहा—तियाणि वा चउक्काणि वा चच्चराणि वा चउम्मुहाणि वा अन्नयराइं तहप्पगाराइं सदाइं नो अभिसंधारिज्जा गमणाए ६॥ से भिक्खु वा (२) अहावेगइयाइं सदाइं सुणेइ, तंजहा—महिसकरणाट्टाणाणि वा वसभकरणाट्टाणाणि वा अस्सकरणाट्टाणाणि वा जाव कविंजलकरणाट्टाणाणि वा अन्नयराइं तहप्पगाराइं नो अभिसंधारिज्जा गमणाए ७॥ से भिक्खु वा (२) अहावेगइयाइं सदाइं सुणेइ तंजहा—महिसजुद्धाणि वा जाव कविंजलजुद्धाणि वा अन्नयराइं तहप्पगाराइं सदाइं नो अभिसंधारिज्जा गमणाए ८॥ से भिक्खु वा (२) अहावेगइयाइं सदाइं सुणेइ तंजहा—पूब्बजूहियठाणाणि वा हयजूहियठाणाणि वा गयजूहियठाणाणि वा अन्नयराइं तहप्पगाराइं नो अभिसंधारिज्जा गमणाए ९ ॥सू० १६१॥ से भिक्खु वा (२) जाव सुणेइ, तंजहा—अक्खाइयठाणाणि वा माणुम्माणियट्टाणाणि वा महताऽऽहयनट्ट-गीय-वाइय-तंती-तलताल-तुडिय-पडुप्पवाइयट्टाणाणि वा अन्नयराइं वा तहप्पगाराइं सदाइं नो अभिसंधारेज्जा गमणाए १॥ से भिक्खु वा (२) जाव सुणेइ, तंजहा—कलहाणि वा डिवाणि वा डमराणि वा दोरजाणि वा वेरजाणि वा विरुद्धरजाणि अन्नयराइं वा तहप्पगाराइं सदाइं नो अभिसंधारेज्जा गमणाए २॥ से भिक्खु वा (२) जाव सुणेइ, खुड्डियं दारियं परिभूत्तमंडियं अलंकियं निवुज्जमाणि पेहाए एगं वा पुरिसं वहाए नीणिज्ज-

माणां पेहाए अन्नयराइं वा तहप्पगाराइं नो अभिसंधारिज्जा गमणाए ३॥ से भिक्खु वा (२) अन्नयराइं विरुवरूवाइं महासवाइं एवं जाणेज्जा तंजहा—बहु-सगडाणि वा बहुरहाणि वा बहुमिलक्खुणि वा बहुपच्चंताणि वा अन्नयराइं वा तहप्पगाराइं विरुवरूवाइं महासवाइं कन्नसोयपडियाए नो अभिसंधारिज्जा गमणाए ४॥ से भिक्खु वा (२) अन्नयराइं विरुवरूवाइं महुस्सवाइं एवं जाणेज्जा, तंजहा—इत्थीणि वा पुरिसाणि वा थेराणि वा डहराणि वा मज्झिमाणि वा आभरणविभूतियाणि वा गायंताणि वा वायंताणि वा नच्चं-ताणि वा हसंताणि वा रमंताणि वा मोहंताणि वा विपुलं असणं पाणं खाइमं साइमं परिभुंजंताणि वा परिभायंताणि वा विच्छड्डियमाणानि वा विगोवयमाणानि वा अन्नयराइं वा तहप्पगाराइं विरुवरूवाइं महुस्सवाइं कन्नसोयपडियाए नो अभिसंधारेज्जा गमणाए ५॥ से भिक्खु वा (२) नो इहलोइएहिं सद्देहिं नो परलोइएहिं सद्देहिं नो सुएहिं सद्देहिं नो असुएहिं सद्देहिं नो दिट्ठेहिं सद्देहिं नो अदिट्ठेहिं सद्देहिं नो कंतेहिं सद्देहिं सज्जिज्जा नो गिज्झिज्जा नो मुज्झिज्जा नो अज्झोववज्जिज्जा ६॥ एयं खलु तस्स जाव जएज्जासि ति वेमि ७ ॥सू० १७०॥ सद्देसत्तिकथो ॥

॥ इति चतुर्थमध्ययनम् ॥ २-२-४-११ ॥

॥ ५ : रूप—अध्ययनं ५ ॥

से भिक्खु वा (२) अहावेगइयाइं रूवाइं पासइ, तंजहा—गंथिमाणि वा वेढिमाणि वा धूरिमाणि वा संवाइमाणि वा कट्टकम्माणि वा पोत्थकम्माणि वा वित्तकम्माणि वा मणिकम्माणि वा दंतकम्माणि वा (मालकम्माणि वा) पत्तन्नज्जकम्माणि वा विविहाणि वा वेढिमाइं अन्नयराइं तहप्पगाराइं विरुवरूवाइं चक्खुदंसणपडियाए नो अभिसंधारिज्ज गमणाए, एवं नायवं जहा सद्देपडिमा सव्वा वाइत्तवज्जा रूवपडिमावि ॥सू० १७१॥ पंचमं सत्तिकयं ॥

॥ इति पंचममध्ययनम् ॥ २-२-५-१२ ॥

॥ ६ : परक्रिया—अध्ययनं ६ ॥

परकिरियं अज्भत्थियं संसेसियं नो तं सायए नो तं नियमे, सिया से परो पाए आमज्जिज्ज वा पमज्जिज्ज वा नो तं सायए नो तं नियमे १। से सिया परो पायाइं संवाहिज्ज वा पलिमदिज्ज वा नो तं सायए नो तं नियमे २। से सिया परो पायाइं कुमिज्ज वा रइज्ज वा नो तं सायए नो तं नियमे ३। से सिया परो पायाइं तिल्लेण वा घएण वा वसाए वा मक्खिज्ज वा अब्भंगिज्ज वा नो तं सायए (२) ४। से सिया परो पायाइं लुद्धेण वा कक्केण वा चुन्नेण वा वराणेण वा उल्लोदिज्ज वा उव्वलिज्ज वा नो तं सायए (२) ५। से सिया परो पायाइं सीओदगवियडेण वा २ उच्छोलिज्ज वा पधोलिज्ज वा नो तं सायए (२) ६। से सिया परो पायाइं अन्नयरेण विलेवणाजाएण आलिपिज्ज वा विलिपिज्ज वा नो तं सायए (२) ७। से सिया परो पायाइं अन्नयरेण धूवणाजाएण धूविज्ज वा पधूविज्ज वा नो तं सायए (२) ८। से सिया परो पायाओ आणुयं वा कंटयं वा नीहरिज्ज वा विसोहिज्ज वा नो तं सायए (२) ९। से सिया परो पायाओ पूयं वा सोणियं वा नाहरिज्ज वा विसोहिज्ज वा नो तं सायए (२) १०। से सिया परो कायं आमज्जेज्ज वा पमज्जिज्ज वा नो तं सायए नो तं नियमे ११। से सिया परो कायं लोट्टेण वा संवाहिज्ज वा पलिमदिज्ज वा नो तं सायए (२) १२। से सिया परो कायं तिल्लेण वा घएण वा वसाए वा मक्खिज्ज वा अब्भंगिज्ज वा नो तं सायए (२) १३। से सिया परो कायं लुद्धेण वा कक्केण वा चुराणेण वा वराणेण वा उल्लोदिज्ज वा उव्वलिज्ज वा नो तं सायए (२) १४। से सिया परो कायं सीओदगवियडेण वा उसिणोदगवियडेण वा उच्छोलिज्ज वा पधोविज्ज वा नो तं सायए (२) १५। से सिया परो कायं अन्नयरेण विलेवणाजाएण आलिपिज्ज वा विलिपिज्ज वा नो तं सायए (२)

१६। से सिया परो कायं अन्नयरेण ध्रुवणजाएण ध्रुविज्ज वा पविज्ज वा नो तं सायए (२) १७। से सिया परो कायंसि वणं आमज्जिज्ज वा पमज्जिज्ज वा नो तं सायए (२) से सिया परो कायंसि वणं संवाहिज्ज वा पलिमहिज्ज वा नो तं सायए (२) १८। से सिया परो कायंसि वणं तिल्लेण वा वणण वा वसाए वा मक्खिज्ज वा अम्भंगिज्ज वा नो तं सायए (२) १९। से सिया परो कायंसि वणं लुद्धेण वा (४) उल्लोढिज्ज वा उव्वलेज्ज वा नो तं सायए (२) २०। से सिया परो कायंसि वणं सीओदगवियडेण वा उसिणोदगवियडेण वा उच्छोलिज्ज वा पधोविज्ज वा नो तं सायए २१। से सिया परो कायंसि वणं वा गंडं वा अरइं वा पुलयं वा भगंदलं वा अन्नयरेणं सत्थजाएणं अच्छिदिज्ज वा विच्छिदिज्ज वा नो तं सायए (२) २२। से सिया परो अन्नयरेणं सत्थजाएणं अच्छिदित्ता वा विच्छिदित्ता वा पूयं वा सोणियं वा नीहरिज्ज वा विसोहिज्ज वा नो तं सायए (२) २३। से सिया परो कायंसि गंडं वा अरइं वा पुलइयं वा भगंदलं वा आमज्जिज्ज वा पमज्जिज्ज वा नो तं सायए (२) २४। से सिया परो कायंसि गंडं वा (४) संवाहिज्ज वा पलिमदिज्ज वा नो तं सायए (२) २५। से सिया परो कायंसि गंडं वा (४) तिल्लेण वा (३) मक्खिज्ज वा अम्भंगिज्ज वा नो तं सायए (२) २६। से सिया परो गंडं वा (४) लुद्धेण वा (४) उल्लोढिज्ज वा उव्वलिज्ज वा नो तं सायए (२) २७। से सिया परो गंडं वा (४) सीओदगवियडेण वा उसिणोदगवियडेण वा उच्छोलिज्ज वा पधोविज्ज वा नो तं सायए (२) २८। से सिया परो कायंसि गंडं वा (४) अन्नयरेणं सत्थजाएणं अच्छिदिज्ज वा विच्छिदिज्ज वा अन्नयरेणं सत्थजाएणं अच्छिदित्ता वा विच्छिदित्ता वा पूयं वा सोणियं वा नीहरिज्ज वा विसोहिज्ज वा नो तं सायए (२) २९। से सिया परो कायंसि सेयं वा जल्लं वा नीहरिज्ज वा विसोहिज्ज वा नो तं सायए (२) ३०। से

सिया परो अच्छिमलं वा करणमलं वा दंतमलं वा नहमलं वा
नीहरिज्ज वा विसोहिज्ज वा नो तं सायए (२) ३१। से सिया परो दीहाइं
वालाइं दीहाइं वा रोमाइं दीहाइं भमुहाइं दीहाइं कवखरोमाइं दीहाइं वत्थिरोमाइं
कप्पिज्ज वा संठविज्ज वा नो तं सायए (२) ३२। से सिया परो सीसाओ
लिकखं वा जूयं वा नीहरिज्ज वा विसोहिज्ज वा नो तं सायए (२) ३३।
से सिया परो अंकंसि वा पलियंकंसि वा तुयट्टावित्ता पायाइं आमज्जिज्ज वा
पमज्जिज्ज वा, एवं हिट्ठिमो गमो पायाइणं भाणियव्वो (२) ३४। से सिया
परो अंकंसि वा पलियंकंसि वा तुयट्टावित्ता हारं वा अद्धहारं वा उरत्थं
वा गेवेयं वा मउडं वा पालंबं वा सुवन्नसुत्तं वा आविहिज्ज वा पिणहिज्ज
वा नो तं सायए (२) ३५। से सिया परो आरामंसि वा उज्जाणंसि वा
नीहरित्ता वा पविसित्ता वा पायाइं आमज्जिज्ज वा पमज्जिज्ज वा नो तं
सायए (२) ३६। एवं नेयव्वा अन्नमन्नकिरियावि ३७ ॥सू० १७२॥
से सिया परो सुद्धेणं वड्ढलेण वा तेइच्छं आउट्टे, से सिया परो असुद्धेणं
वड्ढलेणं तेइच्छं आउट्टे १॥ से सिया परो गिलाणस्स सचित्ताणि वा
कंदाणि वा मूलाणि वा तथाणि वा हरियाणि वा खणित्तु कड्ढित्तु वा
कट्ठावित्तु वा तेइच्छं आउट्टाविज्ज नो तं साइए (२) २। कड्डवेयणा पाणभूय-
जीवसत्ता वेयणां वेइंति २। एवं खलु तस्स भिक्खुस्स भिक्खुणीए वा साम-
ग्गियं जं सब्बट्ठेहिं सहिए समिए सया जए सेयमिणां मन्निज्जासि ३।
॥सू० १७३॥ त्तिबेमि ॥ छट्ठओ सत्तिकओ ॥

॥ इति षष्ठमध्ययनम् ॥ २--२--६--१३ ॥



॥ ७ : अन्योन्यक्रिया-अध्ययनं ७ ॥

से भिक्खु वा (२) अन्नमन्नकिरियं अज्झत्थियं संसेइयं नो तं सायए
(२) । से अन्नमन्नं पाए आमज्जिज्ज वा पमज्जिज्ज वा नो तं साइए (२) । सेसं
तं चेव, एयं खलु जाव जइज्जासि तिबेमि ॥सू० १७४॥

॥ इति सप्तममध्ययनम् ॥ श्रु० २-चू० २-अ० ७ मूलतः २३ ॥

॥ इति द्वितीया चूला ॥ २-२ ॥

॥ तृतीय चूलिका-भावना अध्ययनं १ ॥

तेणां कालेणां तेणां समेणां समणे भगवं महावीरे पंचहत्थुत्तरे यावि
हुत्था, तंजहा-हत्थुत्तराइं चुए, चइत्ता गब्भं वक्कंते, हत्थुत्तराहिं गब्भाओ
गब्भं साहरिए, हत्थुत्तराहिं जाए, हत्थुत्तराहिं सव्वओ सव्वत्ताए मुंडे
भवित्ता अगाराओ अण्णगारियं पव्वइए, हत्थुत्तराहिं कसिणे पडिपुन्ने
अव्वाधाए निरावरणे अण्णते अण्णत्तरे केवलवरणाण्णदंसणे समुप्पन्ने, साइणा
भगवं परिनिव्वुए ॥सू० १७४॥ समणे भगवं महावीरे इमाए ओसिप्पिणीए
सुसमसुसमाए समाए वीइक्कंताए, सुसमाए समाए वीइक्कंताए, सुसम-दुस्स-
माए समाए वीइक्कंताए, दुसमसुसमाए समाए बहु विइक्कंताए, पन्नहत्तरीए
वासेहिं मासेहिं य अद्धनवमंहिं सेसेहिं जे से गिम्हाणां चउत्थे मासे अट्टमे
पक्खे आसादसुद्धे तस्स णां आसादसुद्धस्स छट्ठीपक्खेणां हत्थुत्तराहिं नक्खत्तेणां
जोगमुवागएणां महाविजयसिद्धत्थं पुण्णत्तरवरपुंडरीयदिसासोवत्थियवद्ध-
माणाओ महाविमाणाओ वीसं सागरोवमाइं आउयं पालयित्ता, आउवख-
एणां ठिइक्कएणां भवक्खएणां चुए चइत्ता, इह खलु जंबुदीवे णां दीवे भारहे
वासे दाहिणाड्ढभरहे दाहिणमाहणाकुंडपुरसंनिवेशंमि उरुभदत्तस्स माहणास्स
कोडालसगोत्तस्स देवाणांदाए माहणीए जालंधरस्स गुत्ताए सीहुब्भदभूएणां
अप्पाणेणां कुच्छिसि गब्भं वक्कंते १ । समणे भगवं महावीरे तिन्राणोवगए

यावि हुत्था, चइस्सामित्ति जाणइ चुएमित्ति जाणइ चयमाणो न याणोइ, सुहुमे गां से काले पन्नत्ते २ । तत्रो गां समणो भगवं महावीरे हियाणुकंपणां (अणुकंपणां) देवेणां जीयमेयंतिकट्टु जे से वासाणां तच्चे मासे पंचमे पक्खे आसोयबहुले तस्स गां आसोयबहुलस्स तेरसीपक्खेणां हत्थुत्तराहिं नक्खत्तेणां जोगमुवागणां बासीहिं राइंदिएहिं वइक्कंतेहिं तेसीइमस्स राइंदियस्स परियाए वट्टमाणो दाहिणमाहणकुंडपुरसंनिवेसाओ उत्तरखत्तियकुंडपुरसंनिवेसंसि नायाणां खत्तियाणां सिद्धत्थस्स खत्तियस्स कामवगुत्तस्स तिसलाए खत्तियाणीए वासिट्ठमगुत्ताए असुभारां पुग्गलारां अब्बहारं करित्ता सुभारां पुग्गलारां पक्खेवं करित्ता कुच्छिसि गब्भं साहरइ, जे वि य से तिसलाए खत्तियाणीए कुच्छिसि गब्भे तंपि य दाहिणमाहणकुंडपुरसंनिवेसंसि उसभदत्तस्स माहणस्स कोडालसगोत्तस्स देवानंदए माहणीए जालंधरायणगुत्ताए कुच्छिसि गब्भं साहरइ ३। समणो भगवं महावीरे तिन्नाणोवगए यावि होत्था-साहरिजिस्सामित्ति जाणइ साहरिज्जमाणो न याणइ साहरिएमित्ति जाणइ समणाउसो ४। तेणां कालेणां तेणां समणां तिसलाए खत्तियाणीए अहऽन्नया कयाइ नवराहं मासाणां बहुपडिपुन्नाणां अद्धट्टमाणराइंदियाणां वीइक्कंताणां जे से गिम्हाणां पढमे मासे दुच्चे पक्खे चित्तसुद्धे तस्स गां चित्तसुद्धस्स तेरसीपक्खेणां हत्थुत्तराहिं नक्खत्तेणां जोगोवगाणां—समणां भगवं महावीरं अरोग्गा अरोग्गं पसूया ५। जराणां राइं तिसला खत्तियाणी समणां भगवं महावीरं अरोया अरोयं पसूया, तराणां राइं भवणावइवाणमंतरजोइसियविमाणवासिदेवेहिं देवीहिं य उवयंतेहिं उप्पयंतेहिं संपयंतेहि य एगे महं दिव्वे देवुजोए देवसन्निवाए देवकहक्कहए उप्पिजलगभूए यावि हुत्था ६। जराणां रयणिं तिसला खत्तियाणी समणां भगवं महावीरं अरोया अरोयं पसूया तराणां रयणिं बहवे देवा य देवीओ य एगं महं अमयवासं च १ गंधवासं च २ चुन्नवासं

च ३ पुष्पवासं च ४ हिरन्नवासं च ५ रयणवासं च ६ दाम्पि ७। जराणां
 रयणिं तिसला स्वत्तियाणी समगां भगवं महावीरं अरोया अरोयं पसूया,
 तराणां रयणिं भवणवड्—वाणमंतरजोइसियविमाणवासिणो देवा य देवीओ
 य समणस्स भगवओ महावीरस्स सूइकम्माइं तिथयराभिसेयं च करिं सु ८।
 जओ गां पभिइ भगवं महावीरे तिसलाए स्वत्तियाणीए कुच्छिंसि गब्भं
 आग(हु)ए तओ गां पभिइ तं कुलं विपुलेणां हिरणोणां सुवन्नेणां धणेणां
 धन्नेणां माणिकेणां मुत्तिणां संखमिलप्पवालेणां अइव (२) परिवड्डइ ९।
 तओ गां समणस्स भगवओ महावीरस्स अम्मापियरो एयमट्ठं जाणित्ता
 निव्वत्तदसाहंसि बुक्कंतंसि सुइभूयंसि विपुलं असणापाणाखाइमसाइमं उवक्ख-
 डाविति (२) मित्तनाइसयणासंबंधिवग्गं उवनिमंतंति उवनिमंतित्ता बहवे समणा-
 माहणा-किवणा-वणीमगाहिं भिच्छुं डगपंडरगाइणा विच्छुंति विग्गोविति
 विस्साणित्ति दायारेसु दाणां, पज्जभाइंति विच्छुंति विग्गोवित्ता विस्साणित्ता
 दायारेसु गां दायं पज्जभाइत्ता मित्तनाइसयणासंबंधिवग्गं भुंजाविति मित्तनाइसय-
 सयणासंबंधिवग्गं भुंजावित्ता मित्तनाइसयणासंबंधिवग्गेणा इममेयारूवं नामधि-
 ज्जंकारविति—जओ गां पभिइ इमे कुमारे तिसलाए स्वत्तियाणीए कुच्छिंसि
 गब्भे आहूए तणां गां पभिइ इमं कुलं विपुलेणां हिरणोणां संखमिलप्प-
 वालेणां अतीव (२) परिवड्डइ ता होउ गां कुमारे वड्डमाणे १०। तओ गां
 समणे भगवं महावीरे पंचधाइ—परिवुडे, तंजहा—खीरधाइए १ मज्जगाधाइए
 २ मंडगाधाइए ३ खेलावणाधाइए ४ अंकधाइए ५, अंकाओ अंकं साहरि-
 जमाणे रम्मे मणिकुट्टिमतले गिरिकंदरसमुत्तलीणेविव चंपयपायवे अहाणा-
 पुव्वीए संवड्डइ ११। तओ गां समणे भगवं महावीरे विन्नायपरिणयमित्ते
 विणियत्तवालभावे अप्पुसुयाइं उरालाइं माणस्सगाइं पंचलवखणाइं काम-
 भोगाइं सइफरिसरसरूवगंधाइं परियारेमाणे एवं च गां विहरइ १२॥
 ॥सू० १७६॥ समणे भगवं महावीरे कासवगुत्ते तस्स गां इमे तिन्नि

नामधिजा एवमहिज्जंति, तंजहा—अम्मापिउसंति वद्धमाणो १ सहसंमुइए समणो २, भीमं भयभेरवं उरालं अवेलयं परीसह—सहत्तिकट्ठु देवेहि से नामं कयं समणो भगवं महावीरे ३-१ समणस्स गां भगवथो महावीरस्स पिथा कासवगुत्तेगां तस्स गां तिन्नि नामधिजा एवमहिज्जंति तंजहा—सिद्धत्थे इ वा, सिज्जंसे इ वा, जसंसे इ वा, २। समणस्स गां भगवथो महावीरस्स अम्मा वासिट्ठस्स गुत्ता तीसे गां तिन्नि नामधिजा एवमहिज्जंति तंजहा—तिसलाइ वा, विंदहदिन्ना इ वा, पियकारिणी इ वा ३। समणस्स गां भगवथो महावीरस्स पिच्चियए, सुपासे कासवगुत्तेगां ४। समणस्स गां भगवथो महावीरस्स जिठ्ठे भाया नंदिवद्धणे कासवगुत्तेगां ५। समणस्स गां भगवथो महावीरस्स जेट्ठो भइणी सुदंसणा कासवगुत्तेगां ६। समणस्स गां भगवथो महावीरस्स भज्जा जसोथा कोडिन्नागुत्तेगां ७। समणस्स गां भगवथो महावीरस्स धूया कासवगोत्तेगां, तीसे गां दो नामधिजा एवमहिज्जंति—अणुज्जा इ वा, पियदंसणा इ वा ८। समणस्स गां भगवथो महावीरस्स नत्तूइ कोसिया गुत्तेगां, तीसे गां दो नामधिजा अवमहिज्जंति तंजहा—सेस्वइ इ वा, जसवइ इ वा ९ ॥सू० १७७॥ समणस्स गां भगवथो महावीरस्स अम्मापियरो पासावच्चिज्जा समणोवासगा यावि हुत्था, ते गां बहुइं वासाइं समणोवासगपरियागं पालइत्ता छराहं जीवनिकायागां सारक्खणनिमित्तं आलोइत्ता निंदित्ता गरिहित्ता पडिकमित्ता अहारिहं उत्तरगुणपायच्छिताइं पडिवज्जित्ता कुसमंथारगं दुरुहित्ता भत्तं पच्चक्खायंति (२) अपच्छिमाए मारणांतियाए संलेहणामरीए भुमियसरीरा कालमासे कालं किच्चा तं सरीरं विप्पजहित्ता अच्चुए कप्पे देवत्ताए उववन्ना, तथो गां आउक्खएगां भवक्खएगां वित्तिक्खएगां चुए चइत्ता महाविदेहे वासे चरमेगां उस्सारोणां भिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥सू० १७८॥ तेगां कालेगां (२) समणो भगवं महावीरे नाए

नायपुत्ते नायकुलनिव्वत्ते विदेहे विदेहदिन्ने विदेहजच्चे विदेहसूमाले तीसं
 वासाइं विदेहंसित्ति(हेत्ति)कट्टु अगारमज्जे वसित्ता अम्मापिउहिं कालगएहिं
 देवलोगमणुपत्तेहिं संमत्तपइन्ने चिच्चा हिरन्नं, चिच्चा सुवन्नं, चिच्चा बलं,
 चिच्चा वाहरां, चिच्चा धणकणगरयण—संतसारसावइज्जं विच्छडित्ता विग्गो-
 वित्ता विस्साणित्ता दायारेसु रां दाइत्ता परिभाइत्ता संवच्छरं दलइत्ता जे से
 हेमंताणं पढमे मासे पढमे पक्खे मग्गसिरबहुले तस्स रां मग्गसिरबहुलस्स
 दसमीपक्खेणं हत्थुत्तराहिं नक्खत्तएणं जोगोवगएणं अभिनिक्खमणाभिधाए
 यावि हुत्था १। संवच्छरेण होहिइ अभिनिक्खमरां तु जिणवरिंदस्स । तो
 अत्थसंपयारां पवत्तइ पुव्वसूराओ ॥ १ ॥ एगा हिरन्नकोडी अट्ठेव
 अण्णगा सयसहस्सा । सूरुदयमाइयं दिज्जइ जा पायरासुत्ति ॥ २ ॥ तिन्नेव
 य कोडिसया अट्ठासीइं च हुंति कोडीओ । असिइं च सयसहस्सा एयं
 संवच्छरे दिन्नं ॥ ३ ॥ वेसमणकुंडधारी देवा लोगंतिया महिद्धीया । बोहिति
 य तित्थयरं पन्नरससु कम्मभूमीसु ॥ ४ ॥ बंभंमि य कप्पमी बोधवा कराह-
 राइणो मज्जे ! लोगंतिया विमाणा अट्ठसु वत्था असंखिज्जा ॥ ५ ॥ एए
 देवनिकाया भगवं बोहिति जिणवरं वीरं । सव्वजगज्जीवहियं अरिहं । तित्थं
 पवत्तेहे ॥ ६ ॥ २ । तओ रां समणस्स भगवओ महावीरस्स अभिनिक्ख-
 मणाभिप्पायं जाणित्ता भवणवइवाणमंतरजोइसियविमाणवासिणो देवा य
 देवीओ य सएहिं (२) रूवेहि, सएहिं (२) नेवत्थेहिं, सएहिं (२) विधेहिं
 सव्विद्धीए सव्वजुइए सव्वबलसमुदएणं, सयाइं (२) जाणदिमाणाइं
 दुरूहंति सयाइं (२), जाणविमाणाइं दुरूहित्ता अहावायराइं पुग्गलाइं परि-
 साडंति (२), अहासुहुमाइं पुग्गलाइं परियाइं ति (२), उट्ठं उप्पयंति उट्ठं
 उप्पइत्ता ताए उक्किट्ठाए सिग्घाए चवलाए तुरियाए दिव्वाए देवगइए अहे-
 रां ओवयमाणा (२), तिरिएणं असंखिज्जाइं दीवसमुदाइं वीइक्कममाणा (२),
 जेणोव जंबुद्दीवे दीवे तेणोव उवागच्छंति (२), जेणोव उत्तरखत्तियकुंडपुरसं-

निवेसे तेगोव उवागच्छंति (२) जेगोव उत्तरखत्तियकुंडपुरसंनिवेसस्स उत्तरपुर-
 च्छिमे दिसिभाए तेगोव भत्ति वेगेण ओवइया ३। तओ गं सक्के देविंदे देव-
 राया सणियं (२) जाणविमाणां पट्टवेति सणियं (२) जाणविमाणां पट्टवेत्ता
 सणियं (२) जाणविमाणाओ पच्चोरुहइ (२) सणियं (२) एगंतमवक्कमइ एगंतम-
 वक्कमिता महया वेउव्विएणां समुग्घाएणां समोहणइ (२) एगं महं नाणामणिकणा-
 गरयणभत्तिचित्तं सुभं चारु कंतरूवं देवच्छंदयं विउव्वइ ४। तस्स गं देव-
 च्छंदयस्स बहुमज्झदेसभाए एगं महं सपायपीढं नाणामणिकणयरयणभत्तिचित्तं
 सुभं चारु कंतरूवं सीहासणां विउव्वइ (२) जेगोव समणो भगवं महावीरे
 तेगोव उवागच्छइ (२) समणां भगवं महावीरं तिक्खुत्तो आयाहिणां
 पयाहिणां करेइ (२) समणां भगवं महावीरं वंदइ नमंसइ (२) समणां भगवं
 महावीरं गहाय जेगोव देवच्छंदए तेगोव उवागच्छइ ५। सणियं (२)
 पुरत्थाभिमुहं सीहासणो णिसीयावेइ सणियं (२) निसीयावित्ता सयपागसह-
 स्सपागेहिं तिल्लेहिं अब्भगेइ (२) गंधकासाइएहिं उल्लोलेइ (२) सुद्धोदएणा
 मज्जावेइ (२) जस्स गां मुल्लं सयसहस्सेणां तिपडोलतित्तिएणां साहिएणां
 सीतेण गोसीसरत्त—चंदणेणां अणुलिंपइ (२) इसिं निस्सासवायवोज्झं
 वरनयरपट्टाण्णयं कुसलनरपसंसियं अस्सलालापेलवं छेयारियकणागखइयं-
 तकम्भं हंसलक्खणां पट्टजुयलं नियंसावेइ (२) हारं अद्धहारं उरत्थं नेवत्थं
 एगावलिं पालंबसुत्तं पट्टमउडरयणमालाउ आविंधावेइ आविंधावित्ता गंधिम-
 वेढिमपूरिमसंघाइमेणां मल्लेणां कप्परुक्खमिव समलंकरेइ (२) ता दुच्चंपि
 महया वेउव्वियसमुग्घाएणां समोहणइ (२) एगं महं चंदण्हं सिबियं
 सहस्सवाहणियं विउव्वति ६। तंजहा—ईहामिग-उसभ-तुरग-नर-मकर-
 विहग-वानर-कुंजर-रुरु-सरभ-चमर-सहूल-सीह-वणालय भत्तिचित्त-लय-
 विज्जाहरमिट्ठण-जुयल-जंत-जोग-जुत्तं, अच्चीसहस्समालिणीयं सुनिरुवियं
 मिसिमिसितरूवग-सहस्स-कलियं इसिं भिसमाणां भिब्भिसमाणां चक्खुल्लो-

यणालेसं मुत्ताहलमुत्ताजालंतरोवियं तवणीय-पवरलंबूस-पलंबंत-मुत्तदामं
हारद्धहारभूसण-समोणयं अहियपिच्छणिज्जं पउमलयभत्तिचित्तं असोगलय-
भत्तिचित्तं कुंदलयभत्तिचित्तं नाणालयभत्तिविरइयं सुभं चारु कंतरूवं नाणाम-
णिपंचवन्न-घंटा-पडायपडिमंडियग्गसिहरं पासाइयं दरिसणिज्जं सुरूवं, ७ ।

सीया उवणीया जिणवरस्स-जरमरण-विप्पमुक्कस्स ।

ओसत्तमल्लदामा जलथलयदिव्वकुसुमहिं ॥ १ ॥

सिबियाइ मज्झयारे दिव्वं वररयणरूवचिंचइयं ।

सीहासणां महरिहं सपायपीढं जिणवरस्स ॥ २ ॥

आलइयमालमउडो भासुरबुंदी वराभरणधारी ।

खोमियवत्थनियत्थो जस्स य मुल्लं सयसहस्सं ॥ ३ ॥

छट्ठेण उ भत्तेणं अज्झवसाणेण सुंदरेण जिणो ।

लेसाहि विसुज्झंतो आरुहई उत्तमं सीयं ॥ ४ ॥

सीहासणे निविट्ठो सक्कीसाणा य दोहि पासेहिं ।

वीयंति चामराहिं मणिरयणविचित्त-दंडाहिं ॥ ५ ॥

पुंवि उम्बित्ता माणुसेहिं साहट्ठु रोमकूवेहिं ।

पच्छा वहंति देवा सुरअसुरा गरुलनागिदा ॥ ६ ॥

पुरओ सुरा वहंती असुरा पुण दाहिणंमि पासंमि ।

अवरे वहंति गरुला नागा पुण उत्तरे पासे ॥ ७ ॥

वणसंडं व कुसुमियं पउमसरो वा जहा सरयकाले ।

सोहइ कुसुमभरेणां इय गगणायलं सुरगणेहिं ॥ ८ ॥

सिद्धत्थवरां व जहा कणयारवरां व चंपदवरां वा ।

सोहइ कुसुमभरेणां इय गगणायले सुरगणेहिं ॥ ९ ॥

वरपडहभेरिभल्लरि-संखसय-सहस्सिएहिं तूरेहिं ।

गयणायले धरणियले तूरनिनाओ परमरम्मो ॥ १० ॥

ततविततं घणभुसिरं आउज्जं चउव्विहं बहुविहीयं ।

वाइंति तत्थ देवा बहूहिं आनट्ठगसएहिं ॥ ११ ॥

तेषां कालेषां तेषां समेषां जे से हेमंताणां पढमे मासे पढमे पक्खे मग्गसिरबहुले तस्स णां मग्गसिरबहुलस्स दसमीपक्खेणां सुव्वएणां दिवसेणां विजएणां मुहुत्तेणां हत्थुत्तरानक्खत्तेणां जोगोवगएणां पाइणागामिणीए छायाए विथत्ताए बिइयाए पोरिसीए छट्ठेणां भत्तेणां अपाणाएणां एगसाडगमायाए चंदप्पभाए सिबियाए सहस्सवाहिणियाए सदेवमणुयासुराए परिसाए समणि-ज्जमाणो उत्तरखत्ति-कुंडपुरसंनिवेसस्स मज्झमज्जेणां निगच्छइ (२) जेणेव नायसंडे उज्जाणो तेणेव उवागच्छइ (२) इसिं रयणिप्पमाणां अच्छोप्पेणां भूमि-भाएणां सणियं (२) चंदप्पभं सिबियं सहस्सवाहिणिं ठ्वेइ (२), सणियं (२) चंपप्पभाओ सीयाओ सहस्सवाहिणीओ पच्चोयरइ (२), सणियं (२) पुरत्था-भिमुहे सीहासणो निसीयइ आभरणालंकारं ओमुअइ १। तओ णां वेसमणो देवे भत्तुज्वायपडिओ भगवओ महावीरस्स हंसलक्खणोणां पडेणां आभरणा-लंकारं पडिच्छइ, १०। तओ णां समणो भगवं महावीरे दाहिणोणां दाहिणां वामेणां वामं पंचमुट्ठियं लोयं करेइ ११। तओ णां सक्के देविंदे देवराया समणस्स भगवओ महावीरस्स जन्नवायपडिए वइरामएणां थालेण केसाइं पडिच्छइ (२) अणुजाणोसि भंते त्तिकट्ठु खीरोयसागरं साहरइ, १२। तओ णां समणो जाव लोयं करित्ता सिद्धाणां नमुक्कारं करेइ (२), सब्वं मे अकरणिज्जं पावकम्मं त्तिकट्ठु सामाइयं चरित्तं पडिवज्जइ २ देवपरिसं च मणुयपरिसं च आलिकखचित्तभूयमिव ठ्वेइ १३। दिव्वो मणुस्सघोसो तुरियनिनाओ यः सक्कवयणोणां । खिप्पामेव निलुक्को जाहे पडि-वज्जइ चरित्तं ॥१॥ पडिवज्जित्तु चरित्तं अहो निसं सब्वपाणाभूयहियं । साहट्ठु लोमपुलया सब्वे देवा निसामिति ॥ २-१४ । तओ णां समणस्स भगवओ महावीरस्स सामाइयं सओवसमियं चरित्तं पडिवज्जस्स मणपज्जवनाणो

नामं नागो समुप्पन्ने अड्ढाज्जेहिं दीवेहिं दोहि य समुद्देहिं सन्नीणां पंचि-
 दियाणां पज्जत्ताणां वियत्तमेणासाणां मणोगयाइं भावाइं जाणेइ १५ । तथो णां
 समणो भगवं महावीरे पव्वइए समाणो मित्तनाइं सयणासंबंधिदग्गं पांडविस-
 ज्जेइ, (२), इमं एयारूवं अभिग्गहं अभिगिरहइ—बारस वासाइं वोसट्ठकाए
 चियत्तदेहे जे केइ उवसग्गा समुप्पज्जंति, तंजहा—दिवा वा माणुस्सा वा
 तेरिच्छिया वा, ते सव्वे उवसग्गे समुप्पन्ने समाणो सम्मं सहिस्सामि खमि-
 स्सामि अहिआसइस्सामि १६ । तथो णां समणो भगवं महावीरे इमं एयारूवं
 अभिग्गहं अभिगिरिहत्ता वोसिट्ठचत्तदेहे दिवसे मुहुत्तसेसे कुम्मारगामं
 समणुपत्ते १७ । तथो णां समणो भगवं महावीरे वोसिट्ठचत्तदेहे अणुत्तरेणां
 आलएणां अणुत्तरेणां विहारेणां एवं संजमेणां पग्गहेणां संवरेणां तवेणां बंभ-
 चेरवासेणां खंतीए मुत्तीए समिइए गुत्तीए तुट्ठीए ठाणेणां कमेणां सुचरियफल-
 निव्वाणमुत्तिमग्गेणां अप्पाणां भावेमाणो विहरइ, एवं वा विहरमाणस्स जे
 केइ उवसग्गा समुप्पज्जंति—दिवा वा माणुस्सा वा त्तिरिच्छिया वा, ते
 सव्वे उवसग्गे समुप्पन्ने समाणो अणाउले अव्वहिए अदीणमाणसे तिविह-
 मणवयणाकायगुत्ते सम्मं सहइ खमइ तितिक्खइ अहियासेइ १८ । तथो णां
 समणस्स भगवओ महावीरस्स एएणां विहारेणां विहरमाणस्स बारस वासा
 वीइक्कंता तेरसमस्स य वासस्स परियाए वट्टमाणस्स जे से गिम्हाणां दुच्चे
 मासे चउत्थे पक्खे वइसाहसुद्धे तरस णां वेसाहसुद्धस्स दसमीपक्खेणां सुव्व-
 एणां दिवसेणां विजएणां मुहुत्तेणां हत्थुत्तराहिं नक्खत्तेणां जोगोवगएणां
 पाइणागामिणीए छायाए वियत्ताए पोरिस्सीए जंभियगामस्स नगरस्स
 बहिया नइए उज्जुवालियाए उत्तरकूले सामागस्स गाहावइस्स कट्टकरणांसि
 उड्ढंजाणाअहोसिरस्स भाणकोट्टोवगयस्स वेयावत्तस्स चेइयस्स उत्तरपुरच्छि-
 मे दिस्सीभागे सालरुक्खस्स अदूरसामंते उक्कुडुयस्स गोदोहियाए आयावणाए
 आयावेमाणस्स छट्ठेणां भत्तेणां अपाणएणां सुक्कज्झाणांतरियाए वट्टमाणस्स

निष्वाणो कसिणो पडिपुन्ने अवाहए निरावरणो अण्ते अणुत्तरे केवलवरणा-
णदंसणो समुप्पन्ने १६। से भगवं अरहं जिणो (जाणए) केवली सब्वन्नू
सव्वभावदरिसी सदेवमणुयासुरस्स लोगस्स पज्जाए जाणइ, तंजहा--आगइं
गइं ठिइं चयणं उववायं भुत्तं पीयं कडं पडिसेवियं आविकम्मं रहोक्कम्मं
लवियं कहियं मणोमाणसियं सव्वलोए सव्वजीवाणं सव्वभावाइं जाणमाणो
पासमाणो एवं च णं विहरइ २०। जराणं दिवसं समणस्स भगवओ महावीरस्स
निष्वाणो कसिणो (नच्चणो, निच्चणोए) जाव सुमुप्पन्ने तराणं दिवसं भवणा-
वइवाणमंतरं-जोइसियविमाणवासिदेवेहि य देवीहि उवयंतेहिं जाव उप्पिज-
लगब्भूए यावि हुत्था २१। तओ णं समणो भगवं महावीरे उप्पन्नवरणाण-
दंसणाधरे अप्पाणं च लोगं च अभिसमिक्ख पुवं देवाणं धम्ममाइक्खइ २२।
ततो पच्छा मणुस्साणं, तओ णं समणो भगवं महावीरे उप्पन्ननाणदस-
णाधरे गोयमाइणं समणाणं पंच महव्वयाइं सभावणाइं छज्जीवनिकाया
आतिक्खति भासइ परूवेइ, तं-पुढवीकाए जाव तसकाए, पढमं भंते ! मह-
व्वयं पच्चक्खामि सव्वं पाणाइवायं से सुहुमं वा बायरं वा तसं वा थावरं
वा नेव सयं पाणाइवायं करिज्जा (३) जावज्जीवाए तिविहं तिविहेणं मणसा
वयसा कायसा तस्स भंते पडिक्कामि निंदामि गरिहामि अप्पाणं वोसिरामि
२३। तस्सिमाओ पंचभावणाओ भवंति, तत्थिमा पढमा भावणा-इरियासमिए
से निग्गंथे नो अणइरियासमिएत्ति, केवली बूया-अणइरियासमिए से निग्गंथे
पाणाइं भूयाइं जीवाइं सत्ताइं अभिहणिज्ज वा वत्तिज्ज वा परियाविज्ज वा
लेसिज्ज वा उद्विज्ज वा, इरियासमिए से निग्गंथे नो इरिया-असमिइत्ति
पढमा भावणा १। अहावरा दुच्चा भावणा-मणं परियाणइ से निग्गंथे, जे य
मणो पावए सावज्जे सकिरिए अराहयकरे छेयकरे भेयकरे अहिगरणिए
पाउसिए पारियाविए पाणाइवाइए भूओववाइए, तहण्यगारं मणं नो पथा-
रिज्जा गमणाए, मणं परिजाणइ से निग्गंथे, जे य मणो अपावएत्ति दुच्चा

भावणा २। अहावरा तच्चा भावणा-वइं परिजाणइ से निग्गंथे, जा य वइ पाविया सावज्जा सकिरिया जाव भूयोवघाइया तहप्पगारं वइं नो उच्चा-रिज्जा, जे वइं परिजाणइ से निग्गंथे, जाव वइ अपावियत्ति तच्चा भावणा ३। अहावरा चउत्था भावणा-आयाणभंडमत्तनिक्खेवणासमिए, से निग्गंथे, नो अणायभंडमत्त-निक्खेवणासमिए, केवली बूया-आयाण-भंडमत्तनिक्खे-वणाअसमिए से निग्गंथे पाणाइं भूयाइं जीवाइं सत्ताइं अभिहणिज्जा वा जाव उद्विज्ज वा, तम्हा आयाणभंडमत्तनिक्खेवणासमिए से निग्गंथे, नो आयाणभंडमत्तनिक्खेवणा-असमिएत्ति चउत्था भावणा ४। अहावरा पंचमा भावणा-आलोइय-पाणभोयणभोइ से निग्गंथे नो अणालोइय-पाणभोय-णभोइ केवली बूया-अणालोइयपाणभोयणभोइ से निग्गंथे पाणाणि वा (४) अभिहणिज्ज वा जाव उद्विज्ज वा, तम्हा आलोइय पाणभोयणभोइ से निग्गंथे नो अणालोइयपाणभोयणभोइति पंचमा भावणा ५। २४। एयावता महव्वए सम्मं काएण फासिए पालिए तीरिए किट्टिए अवट्टिए आणाए आराहिए यावि भवइ, पढमे भंते ! महव्वए पाणाइवायाओ वेरमाणं २५॥ अहावरं दुच्चं महव्वयं पच्चक्खामि, सव्वं मुसावायं वइदोसं, से कोहा वा लोहा वा भया वा हासा वा नेव सयं मुसं भासिज्जा नेवन्नेणं मुसं भासा-विज्जा अन्नंपि मुसं भासंतं न समणुमन्निज्जा तिविहं तिविहेण मणासा वयसा कायसा, तस्स भंते ! पडिक्कमामि जाव वोसिरामि २६॥ तस्सिमाओ पंच भावणाओ भवन्ति-तत्थिमा पढमा भावणा-अणुवीइभासी से निग्गंथे नो अणुणुवीइभासी केवली बूया-अणुणुवीइभासी से निग्गंथे समावज्जिज्ज मोसं वयणाए, अणुवीइभासी से निग्गंथे नो अणुणुवीइभासित्ति पढमा भावणा १। अहावरा दुच्चा भावणा कोहं परियाणइ से निग्गंथे नो कोहणो सिया, केवली बूया-कोहप्पत्ते कोहत्तं समावइज्जा मोसं वयणाए, कोहं परियाणइ से निग्गंथे न य कोहणो सियत्ति दुच्चा भावणा २। अहावरा तच्चा

भावणा-लोभं परियाणइ से निग्गंथे नो अ लोभणए सिया, केवली बूया-लोभपते लोभी समावइज्जा मोसं वयणाए, लोभं परियाणइ से निग्गंथे नो य लोभणए सियत्ति तच्चा भावणा ३। अहावरा चउत्था भावणा-भयं परिजाणइ से निग्गंथे नो भयभीरुए सिया, केवली बूया-भयपत्ते भीरुसमावइज्जा मोसं वयणाए, भयं परिजाणइ से निग्गंथे नो भयभीरुए सिया चउत्था भावणा ४। अहावरा पंचमी भावणा-हासं परियाणइ से निग्गंथे नो य हासणए सिया, केवली बूया-हासपत्ते हासी समावइज्जा मोसं वयणाए, हासे परियाणइ से निग्गंथे नो हासणए सियत्ति पंचमी भावणा ५-२७ । एतावता दोच्चे महव्वए सम्मं काण्ण फासिए जाव आण्णए आराहिए यावि भवइ दुच्चे भंते महव्वए २८। अहावरं तच्चं भंते ! महव्वयं पच्च-क्खामि सव्वं अदिन्नादाणां, से गामे वा नगरे वा रन्ने वा अण्णं वा बहुं वा अण्णुं वा थूलं वा चित्तमंतं वा अचित्तमंतं वा नेव सयं अदिन्नं गिरिहज्जा नेवन्नेहिं अदिन्नं गिरहाविज्जा अदिन्नं अन्नंपि गिरहंतं न समणुजाणिज्जा जावज्जीवाए जाव वोसिरामि २९। तस्सिमाओ पंच भावणाओ भवंति, तत्थिणा पढमा भावणा-अणुवीइ मिउग्गहं जाइ से निग्गंथे नो अणुणुवीइ मिउग्गहं जाइ से निग्गंथे, केवली बूया-अणुणुवीइ मिउग्गहं जाइ निग्गंथे, अदिन्नं गिरहेज्जा, अणुवीइ मिउग्गहं जाइ से निग्गंथे नो अणुणुवीइ मिउग्गहं जाइत्ति पढमा भावणा १। अहावरा दुच्चा भावणा-अणुन्नविय पाणभोयणभोइ से निग्गंथे नो अणुणुन्नविय पाणभोयणभोइ, केवली बूया अणुणुन्नविय पाणभोयणभोइ से निग्गंथे अदिन्नं भुंजिजा, तम्हा अणुन्नविय पाणभोयणभोइ से निग्गंथे नो अणुणुन्नविय पाणभोयणभोइत्ति दुच्चा भावणा २। अहावरा तच्चा भावणा-निग्गंथेणां उग्गहंसि उग्गहियंसि एतावताव उग्गहणसीलए सिया, केवली बूया-निग्गंथेणां उग्गहंसि अणुग्गहियंसि एतावता अणुग्गहणसीले अदिन्नं ओगिरिह-

ज्जा, निग्गंथेणां उग्गहं उग्गहियंसि एतावताव उग्गहणासीलएति तच्चा भावणा
 ३। अहावरा चउत्था भावणा-निग्गंथेणां उग्गहंसि उग्गहियंसि अभि-
 वखणां (२) उग्गहणासीलए सिया, केवली बूया निग्गंथेणां उग्गहंसि उ अभि-
 वखणां (२) अणुग्गहणासीले अदिन्नं गिरिहज्जा, निग्गंथे उग्गहंसि उग्ग-
 हियंसि अभिवखणां (२) उग्गहणासीलएत्ति चउत्था भावणा ४। अहावरा
 पंचमा भावणा-अणुवीइ मिउग्गहजाइ से निग्गंथे साहम्मिएसु, नो अण-
 णुवीइ मिउग्गहजाइ, केवली बूया-अणुणुवीइ मिउग्गहजाइ से निग्गंथे
 साहम्मिएसु अदिन्नं उगिरिहज्जा अणुवीइ-मिउग्गहजाइ से निग्गंथे साह-
 म्मिएसु नो अणुणुवीइ मिउग्गहजाती इइ पंचमा भावणा ५-३० । एता-
 वया तच्चे महव्वए सम्मं काएण फासिए जाव आणाए आराहए यावि
 भवइ, तच्चं भंते ! महव्वयं ३१ । अहावरं चउत्थं महव्वयं पच्चक्खामि
 सव्वं मेहुणां से दिव्वं वा माणुस्सं वा तिरिक्खजोणियं वा नेव सयं मेहुणां
 गच्छेज्जा तं चेवं अदिन्नादाणवत्तव्वया भाणियव्वा जाव वोसिरामि ३२ ।
 तस्सिमाओ पंच भावणाओ भवंति, तत्थिमा पट्टमा भावणा-नो निग्गंथे
 अभिवखणां (२) इत्थीणां कहं कहित्तए सिया, केवली बूया-निग्गंथे णां
 अभिवखणां (२) इत्थीणां कहं कहेमाणो संतिभेया संतिविभंगा संतिकेवली-
 पन्नत्ताओ धम्माओ भंसिज्जा, नो निग्गंथेणां अभिवखणां (२) इत्थीणां कहं
 कहित्तए सियत्ति पट्टमा भावणा १। अहावरा दुच्चा भावणा-नो निग्गंथे
 इत्थीणां मणोहराइं (२) इंदियाइं आलोइत्तए निज्झाइत्तए सिया, केवली बूया-
 निग्गंथेणां इत्थीणां मणोहराइं (२) इंदियाइं आलोएमाणो निज्झाएमाणो संति-
 भेया संतिविभंगा जाव धम्माओ भंसिज्जा, नो निग्गंथे इत्थीणां मणोहराइं
 (२) इंदियाइं आलोइत्तए निज्झाइत्तए सियत्ति दुच्चा भावणा २। अहावरा
 तच्चा भावणा-नो निग्गंथे इत्थीणां पुव्वरयाइं पुव्वकीलियाइं सुमरित्तए सिया,
 केवली बूया-निग्गंथेणां इत्थीणां पुव्वरयाइं पुव्वकीलियाइं सरमाणो संतिभेया

जाव भंसिज्जा, नो निग्गंथे इत्थीणां पुव्वरयाइं पुव्वकीलियाइं सरित्तए सियत्ति तच्चा भावणा ३। अहावरा चउत्था भावणा--नाइमत्तपाणभोयणभोइ से निग्गंथे न पणीयरभोयणभोइ से निग्गंथे, केवली बूया-अइमत्तपाणभोयणभोयणभोइ से निग्गंथे पणीयरसभोयणभोइ संतिभेया जाव भंसिज्जा, नाइमत्तपाणभोयणभोइ से निग्गंथे नो पणीयरसभोयणभोइ त्ति चउत्था भावणा ४। अहावरा पंचमा भावणा--नो निग्गंथे इत्थीपसुपंडगसंसत्ताइं सयणासणाइं सेवित्तए सिया, केवली बूया-निग्गंथे गां इत्थीपसुपंडगसंसत्ताइं सयणासणाइं सेवेमाणो संतिभेया जाव भंसिज्जा, नो निग्गंथे इत्थीपसुपंडगसंसत्ताइं सयणासणाइं सेवित्तए सियत्ति पंचमा भावणा ५-३३। एतावया चउत्थे महव्वए सम्मं काएणा फासिए जाव आराहिए यावि भवइ, चउत्थं भंते ! महव्वयं ३४। अहावरं पंचमं भंते ! महव्वयं सव्वं परिग्गहं पच्चक्खामि से अप्पं वा बहुं वा अणुं वा थूलं वा चित्तमंतमचित्तं वा नेव सयं परिग्गहं गिरिहज्जा नेवन्नेहिं परिग्गहं गिरहाविज्जा अन्नंपि परिग्गहं गिरहंतं न समणुजाणिज्जा जाव वोसिरामि ३५। तस्सिमाओ पंच भावणाओ भवंति, तत्थिमा पढमा भावणा-सोयओ गां जीवे (मणुन्ना) मणुन्नाइं सदाइं सुणोइ मणुन्नामणुन्नेहिं सद्देहिं नो सज्जिज्जा नो रज्जिज्जा नो गिज्जेज्जा नो मुज्झि(च्छे)ज्जा नो अज्झोवव-ज्जिज्जा नो विणिघायमावज्जेज्जा, केवली बूया--निग्गंथे गां मणुन्नामणुन्नेहिं सद्देहिं सज्जमारो रज्जमारो जाव विणिघायमावज्जमारो संतिभेया संतिवि-भंगा संतिकेवलिपन्नत्ताओ धम्माओ भंसिज्जा; न सका न सोउं सदा, सोतविसयमागया । रागदोसा उ जे तत्थ, से भिक्खू परिवज्जए ॥ १ ॥ सोयओ जीवे मणुन्नामणुन्नाइं सदाइं सुणोइ पढमा भावणा १ । अहावरा दुच्चा भावणा--चक्खूओ जीवो मणुन्नामणुन्नाइं रूवाइं पासइ मणुन्नामणुन्नेहिं रूवेहिं सज्जमारो जाव विणिघायमावज्जमारो संतिभेया जाव भंसिज्जा, न सका रूवमद्दू, चक्खूविसयमागयं । रागदोसा उ जे

तत्थ, ते भिक्खु परिवज्जे ॥ १ ॥ चक्खुओ जीवो मणुन्नामणुन्नाइं रुवाइं पासइ, दुच्चा भावणा । अहावरा तच्चा भावणा—घाणओ जीवे मणुन्नामणुन्नाइं गंधाइं अग्घायइ मणुन्नामणुन्नेहिं गंधेहिं नो सज्जिजा नो रज्जिजा जाव नो विणिघायमावज्जिजा, केवली बूया-मणुन्नामणुन्नेहिं गंधेहिं सज्जमाणो जाव विणिघायमावज्जमाणो संतिभेया जाव भंसिजा, न सका गंधमग्घाउं, नासाविसयमागयं । रागदोसा उ जे तत्थ, ते भिक्खु परिवज्जे ॥ १ ॥ घाणओ जीवो मणुन्नामणुन्नाइं गंधाइं अग्घाइत्ति तच्चा भावणा ३ । अहावरा चउत्था भावणा—जिब्भाओ जीवो मणुन्नामणुन्नाइं रसाइं अस्साएइ, मणुन्नामणुन्नेहिं रसेहिं नो सज्जिजा जाव नो विणिघायमावज्जिजा, केवली बूया—निग्गंथेणं मणुन्नामणुन्नेहिं रसेहिं सज्जमाणो जाव विणिघायमावज्जमाणो संतिभेया जाव भंसिजा,—न सका रसमस्माउं, जोहाविसयमागयं । रागदोसा उ जे तत्थ, ते भिक्खु परिवज्जे ॥ १ ॥ जीहाओ जीवो मणुन्नामणुन्नाइं रसाइं अस्साएइत्ति चउत्था भावणा ४ । अहावरा पंचमा भावणा—फासओ जीवो मणुन्नामणुन्नाइं फासाइं पडिसेवेएइ मणुन्नामणुन्नेहिं फासेहिं नो सज्जिजा जाव नो विणिघायमावज्जिजा, केवली बूया—निग्गंथेणं मणुन्ना—मणुन्नेहिं फासेहिं सज्जमाणो जाव विणिघायमावज्जमाणो संतिभेया संतिविभंगा संति-केवलीपन्नत्ताओ धम्माओ भंसिजा, न सका फासमवेएउं, फासविसयमागयं । रागदोसा उ जे तत्थ ते भिक्खु परिवज्जे ॥ १ ॥ फासओ जीवो मणुन्नामणुन्नाइं फासाइं पडिसेवेएत्ति पंचमा भावणा ५ । ३६। एतावता पंचमे महव्वते सम्मं अवट्टिए आणाए आराहिए यावि भवइ, पंचमं भते ! महव्वयं ३७। इच्चेएहिं पंचमहव्वएहिं पणवीसाहि य भावणाहिं संप्पन्ने अणगारे अहासुयं अहाकप्पं अहामगं सम्मं काएणा फासित्ता पालित्ता तीरित्ता किट्टित्ता आणाए आराहित्ता यावि भवइ ३८ ॥सू० १७६॥

॥ इति तृतीयचूला-भावनाऽध्ययनम् ॥ श्रु० २ चू०-३ मूलतः-२४ ॥

॥ चतुर्थ चूला-विमुक्त्यध्ययनं ॥

अणिच्चमावासमुविंति जंतुणो, पलोयए सुच्चमिणं अणुत्तरं ।
 उविसिरे विन्नु अगारबंधणां, अभीरु आरंभपरिगहं चए ॥१॥

तहागयं भिक्खुमणांतसंजयं, अणोलिसं विन्नु चरंतमेसणां ।
 तुदंति वायाहि अभिद्वं नस, सरेहिं संगामगयं व कुंजरं ॥२॥

तहप्पगारेहिं जणेहिं हीलिए, ससइफासा फरुसा उइरिया ।
 तितिकखए नाणी अदुट्टवेअसा गिरिव्व वाएण न संपवेयए ॥३॥

उवेहमाणे कुसलेहिं संवंसे, अकंतदुक्खी तसथावरा दुही ।
 अलूसए सब्वसहे महामुणी, तहा हि से सुस्समणे समाहिए ॥४॥

विऊनए धम्मपयं अणुत्तरं, विणीयतरहस्स मुणिस्स भायओ ।
 समाहियस्सग्गिसिहा व तेयसा, तवो य पन्ना य जसो य वड्डइ ॥५॥

दिसोदिसंग्गांतजिणेण ताइणा, महव्वया खेमपया पवेइया ।
 महागुरू निस्सुयरा उइरिया, तमेव तेउत्तिदिसं पगासगा ॥६॥

सिएहिं भिक्खु असिए परिव्वए, असज्जमित्थीसु चइज्ज पूयणां ।
 अणिसिअओ लोगमिणं तहा परं, न मिज्जइ कामगुणेहिं पंडिए ॥७॥

तहा विमुक्कस्स परिन्नचारिणो, धिइमओ दुक्खस्वमस्स भिक्खुणो ।
 विसुज्झइ जंसि मलं पुरेकडं, समीरियं रूपमलं व जोइणा ॥८॥

से इ परिन्नासमयंमि वट्टइ, निराससे उवरय मेहुणा चरे ।
 भुयंगमे जुन्नतयं जहा चए विमुच्चइ से दुहसिज्ज माहणे ॥९॥

जमाहु ओहं सलिलं अपारयं, महासमुदं व भुयाहि दुत्तरं ।
 अहे य णं परिजाणाहि पंडिए, से इ मुणी अंतकडेत्ति बुच्चइ ॥१०॥

जहा हि बद्धं इह माणवेहिं, जहा य तेसिं तु विमुक्खयाहिए ।
 अहा तहा बंध विमुक्ख जे विऊ, से हु मुणी अंतकडेत्ति बुच्चइ ॥११॥
 इमंमि लोए परए य दोसुवि, न विज्जइ बंधण जस्स किंचि वि ।
 से हु निरालंबणमप्पइट्टिए, कलंकलो भावपहं विमुच्चइ ॥१२॥ तिबेमि

॥ इति चतुर्थ-चूला-विमुक्त्यध्ययनम् ॥श्रु०२-चू०४-मूलतः--२५

॥ इति द्वितीय-श्रुतस्कन्धः ॥ २ ॥

॥ इति श्रीमदाचारांग-सूत्रम् ॥

॥ ग्रंथाग्रं-२५५४ ॥



